

SONSHIP LIFE TRAINING CENTRE MANUAL

Phetolelo ea Sesotho

Khatiso ea 2024

**Apostle
Prophet
Mufaro Maposa**



MANIFEST SONS OF GOD MOVEMENT

THE MANIFEST SONS OF GOD MOVEMENT



TRAINING CENTRE MANUAL



BOPHELO BA MONGOLI OA BUKA ENA

Mufaro Maposa o hlahile ka la 8 January 1985, `me o hlahetse naheng ea Zimbabwe, Harare. Ntate oa hae ke Motho oa Zimbabwe, ha `me oa hae eena e le Mosotho. O holetse Lesotho ho tloha ha a le selemo se seng. O ile a amohela Morena Jesu Krete bophelong ba hae ha a le lilemo li 13 ka selemo sa 1998 ha a bala sehlopha sa bo robeli.

O ile a ea sekolong sa bibe le ha a qeta sehlopha sa leshome le metso e `meli. Ke ha a ntse a le sekolong sa bibe le ha Ntate Molimo a mo senolela ka movement ona oa New Testament le ka thuto ea bara ba Molimo ba bonahalitsoeng. O ile a tla ha habo Lesotho ha a qeta sekolong sa bibe le qetellong ea selemo sa 2005, `me a qala movement ona ka selemo sa 2006.

Mufaro Maposa o fuoe pitso ea Moapostola le Moporofeta. Ke eena mothehi le mookameli oa The Manifest Sons of God Movement (e leng movement oa Bara ba Molimo ba bonahalitsoeng) le New Testament Church. O nyetse mofumahali ea ratehang ea bitsoang `me Matumelo Maposa

2024 EDITION

THE MANIFEST SONS OF GOD MOVEMENT

TRAINING CENTER MANUAL: Buka ena e ka rutoa ke motho ea pasitseng International Training centre ka 90% ho ea holimo feela, `me a hlalose lintho ka tsela eo Moapostola Maposa a li hlalositseng ka eona bukeng ea international training centre. Tsela ea ho sebelisa buka ena, ke hore ea rutoang a ipalle eona bo`ngoeng ba hae, a bala le litemana kaofela tse ngotsoeng ho eona, e be u se a tlo e pheta le ea rutang ka liphapusing tsa baithuti. Lebaka ke hobane ka phapusing ea baithuti (Class room), ha hona nako ea ho baloa litemana tsohle, hape ea rutoang u tla e utloisisa habonolo ha ho rutoa ka hará classroom haeba a se a e balile bo`ngoeng pele. Buka ena e tlameha ho nka khoeli kapa ka tlas'e ho etsoa, haeba ho kopanoa matsatsi a mane kapa a mahlano ka beke. Ea rutang o tlameha ho etsa lipont`so tsa Moea O Halalelang tse tsamaeang le thuto ena e mona. Ho ka etsoa hofeta thuto e le `ngoe ka letsatsi ha nako e lumela. Ea rutang o tlameha ho etsa seo ke ngotseng hore se etsoe bukeng ena meleng e meng, mohlala ke hore ho ngotsoe hore ea rutang mona a etse pontsò ea semelo sa bomolimo le sa botho. Ea sa tsebeng ho li etsa ha a na tokelo ea ho ruta buka ena. O tlameha ho koetla pele le ho shebella dvd tsa Ntate Maposa khafetsa, `me o tla qetella a ipabola ka tsona. Morutuoa a be le dvd e rutang lithuto tsena le e bonts'ang le ho hlalosa ts'ebetso ea lineo tsa Moea O Halalelang, e ngotsoeng Apostolic and Prophetic ministry "class room practicals", le e ngotsoeng Apostolic and Prophetic ministry feela `me a li mamele le ho li shebella khafetsa bo`ngoeng ba hae. Hape a fumane DVD e ngotsoeng "The manifest Sons of God Movement Practical" ea Senyesemane. Morutuoa o tlameha ho bala lithuto tse rutiloeng ka claseng ha a se a le mong hae, `me a li bale le litemana tsohle tsa teng. Qetellong ea buka ea training centre ho tlameha ho ba le nako ea ho porofetisa bohle ba qetileng buka. (li Video tsena kaofela seli fumaneha YOU TUBE leqepheng le bitsoang Sonshilife ITC le ho www.voiceofgodfm.ls ebe o ea ho materials. ***Boporofeta bona bo tlameha ho senola lineo le lipitso tsa balumeli li be li tsoselletsoe, bo senole le morero oa Ntate Molimo ka bona.*** Ea rutoang o tlameha hore joale ha a qeta training centre, a kene international training centre e koetlisetsang boetapele. Training centre e u fa motheo o motle tumelong ea sekreste, International training center eona e u koetlisetsa boetapele. **Ea rutang ona le bolokolohi ba ho tlatsa ka lithuto tse hlahang bukeng ea International Training Centre le haeba ke sa li ngola bukeng ena. Buka ena e o lokisetsa ho qala International training centre. Coverer buka ea hau ka polastiki ea thata hore e seke ea taboha kapele).**

(Morutuoa a se ke be a lofa letsatsi la thuto ho hang. Le haele le le leng. Ho etsoa thuto e ncha letsatsi le letsatsi, ka hona, ha u ka lofa letsatsi feela, u tla fetoa ke thuto eno kaofela. Ha ho ka etsahala hore u lofe ka mabaka a ke keng a qojoa ho hong, u tlameha ho fumana lithuto tseno moo li hatisitoeng ho www.voiceofgodfm.co.ls, `me u lo mamela thuto eno hae.

LITHUTO

LEQEPHE

1) TSOALO EABOBELI	PAGE 4
2) LIKOLOBETSO	PAGE 5
3) TUMELO EA MOLIMO	PAGE 6
4) TSOARELO	PAGE 8
5) BARA BA MOLIMO BA BONAHALITSOENG	PAGE 9
6) MOLIMO	PAGE 22
7) HO UTLOA MOLIMO	PAGE 31
8) `MUSO OA MOLIMO	PAGE 36
9) SELEKANE SA KHALE LE SE SECHA	PAGE 44
10) BOPHELO BA MORA OA MOLIMO (BOPHELO BA BOINEHELO)	PAGE 49
11) AGAPE	PAGE 53
12) BOETAPELE LE BOIKOKOBETSO	PAGE 56
13) HO FANA	PAGE 58
14) E EANG KA LEFATS'E LOHLE	PAGE 62
15) MANYELOI	PAGE 63
16) DIABOLOSILE MATEMONA	PAGE 64
17) HO PHETHA MORERO OA NTATE MOLIMO KA BOPHELO BA HAU	PAGE 69
18) SEBE	PAGE 71
19) SEBE SE SA TS'OARELOENG	PAGE 76
20) KUTLOANO LE LENYALO	PAGE 78
21) HO AHLOLA THUTO	PAGE 80
22) HO BALA BIBELE KA TSELA E NEPAHETSENG	PAGE 83
23) BOEMO BA MOEA	PAGE 88

24) BOFELO	PAGE 90
25) SELALLO	PAGE 92
26) BOHLABOLLI	PAGE 94
27) LITHUTO TSA BAETAPELE	PAGE 95
28) LITHUTO TSA BA BITSELITSOENG LINEONG TSE HLANO TSA MORENA JESU	PAGE 100
29) TSELA EA HO HLOMPHA MOTHO EO NTATE MOLIMO A MO RUMILENG HO UENA	PAGE 103

(Cover buka ea hau ka polastiki e thata hore e seke ea senyeha ka pelenyana)

For support and partnership: First national Bank, Account

number: 62307965361 Branch: 230-234

TSOALO EA BOBELI: Ho bolela eng ho tsoaloa labobeli ? (Johanne3:3-8). Ho tsoaloa labobeli ka metsi le ka Moea keho tsoaloa ka lentsoe la Ntate Molimo le ka Moea O Halalelang. Ho tsoalo ka metsi hase ho kolobetsoa ka metsi hobane kolobetso ea metsi e tlameha ho etsahala ho motho ea seng a tsoetsoe labobeli. Empa feela Lentsoe la Ntate Molimo le bapisoa le metsi (Baefese 5:26, 1Peterose 1:23). Mosebetsi ona o etsahala ka tsela e tjena, motho o utloa lentsoe la Ntate Molimo, e leng evangeli ea Morena Jesu, ebe ha a le lumela pelong ea hae, a bolela ka molomo oa hae hore Jesu ke Morena, Moea O Halalelang o oa mo tsoala semoeeng. Moea O Halalelang o tlosa semelo sa sebe ebe o mo fa semelo se ts'oanang le sa Ntate Molimo moeeng oa hae. Pele re amohela Morena Jesu re ne re shoele moeeng, ho shoa moeeng ke ho arohana le Molimo ka lebaka la semelo sa sebe seo re neng re na le sona sa sebe ka lebaka la hobane re ne re hlaha ho Adama. Ka morao hore Adama a etse sebe, bohle ba hlahang ho eena ba hlahile ba ena le semelo sa sebe joalo ka eena ebile bale ka tlasa kahlolo ea sebe. Ka mor'a hore re amohele Morena Jesu maphelong a rona, re fuoa semelo se secha se lokileng, se ts'oanang le sa Ntate Molimo, me re fetoha bana ba Ntate Molimo. Re tlosoa tlasa kahlolo ea sebe le moputso oa sona (**Lentsoe la Ntate Molimo ke Molimo ka boeena John 1:1 le 14, Ka hona, ho tsoaloa ka lentsoe la hae, ke ho tsoaloa ke Ntate Molimo ka sebele**)

Joale, ka mora tlhaloso ena, rapela le bohle ba sokang ba amohela Morena Jesu maphelong a bona hore ba mo amohele. Ba hlalositsoe ka ho fosahala ha balimo le ho rapela ka batho ba bang le mesebetsi ea lefifi. Deutronoma 18:9 -14, 1Timotia 2:5, Johanne 14:6, Liketso 4:12. Rapela thapelo ena ha o batla ho amohela Morena Jesu Krete bophelong ba hau, 'me u e buoe ka molomo oa hau:

Ntate Molimo, kea lumela pelong eaka, hore Jesu Krete ke Morena, o ile a shoa sefapanong ka lebaka la libe tsaka, 'me a tsoha bafung ka letsatsi la boraro. Kea lumela hore ke Mora oa Molimo, 'me ke eena feela tsela le 'nete le bophelo. Ke ea mo amohela pelong eaka, e le morena le mopholosi oaka, Amen.

Tseba hore o pholositsoe ka mora hore o rapele thapelo ena. O so o tsoetsoe labobeli. O pholositsoe sebeng le moputsong oa sona e leng, karohano le Ntate Molimo, lefu le lihele, litlamorao tsa sebe joalo ka :bokuli, bofutsana, lefu, lithohako, joalo joalo. Lentsoe ho pholoso, ho tsoaloa labobeli, ho lokafatsoa, ho beoa ea lokileng li bolela ntho e le ngoe, e leng ho amohela Morena Jesu e le Morena le mopholosi oa hau.

Bakhalata 5:16-23 le 1Bakorinte 6:9-12 li bonts'a bophelo ba rona ba khale pele re amohela Morena Jesu le tsela eo batho ba sa pholosoang ba phelang ka eona. Joale rona re se re pholositsoe ebile re amohetsoe ke Ntate Molimo ka Morena Jesu, joale re tlameha ho furalla mesebetsi ena ea lefifi hobane ha e ea re lokela joalo ka ha se rele 'musong oa hae hape re le bana ba hae.

BOHLOKOA BA TSEBO: Joalo ka ha re se re tsoetsoe labobeli, re hloka ho hola tsebong ea lentsoe la Ntate Molimo. Kholo ea rona tsebong ea lentsoe la Ntate Molimo ke eona tokolloho ea rona ea 'nete (Johanne 8:32) (Hosea 4:6). Ha molumeli a tsamaea ka tsebo ea seo a leng sona ho Krete ka botlalo, ebile a tsamaea ka tumelo, o tla hlola maemong oohle, 'me ha hona letemona le ka mo thetsang. Ha a no hloka ho lula a tsamaea a ea koana le koana a re o hloka ho lokolloa (deliverance). Tsebo ke eona tokolloho ea 'nete.

BOHLOKOA BA HO THUISA LENTSOE: Ha molumeli a thuisa lentsoe la Ntate Molimo haholo (bible), o tla khona ho tsamaea ka semelo sa bomolimo (e leng se ts'oanang le sa Ntate Molimo se ka hare ho eena). Ho thuisa lentsoe hase ho le bala feela kapelenyana, empa ke ho le bala ka hloko le ka kutloisiso, 'me o le bala khafetsa ebile o le buoa ka molomo. (Joshua 1:8, 2Bakorinte 3:17 le 18). Ha re tsamaea ka semelo sena, re tsamaea joalo ka Ntate Molimo ka sebele, 'me ha hona letho le ka re emang ka pele. Tharollo ea hau bophelong le tlhoho ea hau ea 'nete, ke ho tseba seo Ntate Molimo a se buoang ka uena, 'me u se

thuisse khafetsa. Ha u utloa lentsoe la Ntate Molimo, le lula kelellong ea hau, khathe ha u le thuisa, le fetoha karolo ea moea oa hau. Joale, ha lentose le le moeeng oa hau, ke teng moo le tla lula le sebetsa le ho tliša tse molemo ho uena. Le tla u fetola seo le buoang ka sona.

LIKLOBETSO

Lentsoe “**kolobetso**” le bolela “**ho ineloa ka botlalo**”. Testamente e ncha e senola mefuta e meraro ea likolobetso. Re tla li sheba ka bonngoe.

KLOBETSO HO KRESTE (Bakhalata 3:26-29): Ho kolobetsoa ho Krete ke ho pholoso kapa ho tsoaloa labobeli. E bitsoa kolobetso hobane ha re amohela Morena Jesu maphelong a rona, re kenngoa ho eena ka botlalo meeeng ea rona, ke lebaka leo ho thoeng “**re ka ho Krete**” ‘me re ba karolo ea `mele oa hae (Baefese 5:30, 1 Bakorinte 12:12-16). Bible e re re ba moea o le mong le eena (1 Bakorinte 6:17). Hona ha ho bolele hore re ba eena, empa re ba ntho e le `ngoe le eena moeeng (Baefese 5:32).

KLOBETSO EA METSI (Matheu 28:19) Ho kolobetsoa ka metsi ke ho ineloa ka metsing ka botlalo. Kolobetso ea metsi e bolela eng?

- 1) Kolobetso ena ke sesupo se kante sa se etsahetseng ka hare ho motho ha a ne a amohela Morena Jesu. Ke sesupo sa papiso ea rona le Krete lefung le tsohong ea hae (Baroma 6:1-12). Ha re amohela Morena Jesu, motho eane oa khale oa moetsalibe o ile a shoa, `me ho tsoaloa motho e mocha ea nang le semelo le bophelo ba Krete. Tsena li etsahala moeeng oa motho ha motho a amohela Morena Jesu. Joale, ha re kolobetsoa ka metsi, re etsa sesupo se kante sa lefu la rona sebeng le tsoho ea rona bophelong bo bocha ba Krete.

Ha re kena ka metsing, re bapisoa le Krete lefung la hae, ha re le ka tlas'a metsi, re bapisoa le Krete lepatong la hae, ha re tsoa ka metsing, re bapisoa le Krete tsohong ea hae. Kelellong ea rona re nka motho eane oa khale oa moetsalibe a setse ka metsing, `me ho se ho phela motho e mocha ea ts'oanang le Krete ka ho loka le khalalelo ea `nete (Bakolose 2:11-13) (Baroma 6:11).

- 2) **Kolobetso ena hape ke sesupo sa pako (Liketso 2:38):** Ka kolobetso ena, re supa hore re bakile bophelong ba sebe, `me re amohetse bophelo ba Morena Jesu, hape re itetse ho mo phelela. Kolobetso ha se eona e pholosang motho, empa matla a eona a tabeng ea hore re ea mamela le ho phetha taelo ea Morena Jesu (Matheu 28:18-20). Balumeli bohle ba tlameha ho kolobetsoa ka metsi ha ba amohetse Morena Jesu. **Balumeli ba kolobetsoa ka lebitso la Ntate, le la Mora (Morena Jesu Krete) le la Moea O Halalelang (Matheu 28: 19), `me ebe joale ba ineloa ha `ngoe ka botlalo ka metsing.**

KLOBETSO EA MOEA O HALALELANG LE MOLLO (Matheu 3:11, Liketso 1:8): Ho kolobetsoa ka Moea O Halalelang, ke ho tlatsoa Moea O Halalelang. Moea O Halalelang o kena ka ho rona ha re amohela Morena Jesu `me ha a kena maphelong a rona, o kena ka botlalo ba hae. Ha a kene ka likarolo, empa o kena ka botho ba hae bohle. Joale ha ho thoe re kolobetsoa ka eena, kapa re tlatsoa Moea O Halalelang, hona ho bolela ho **matlafatsoa ke Moea O Halalelang**. Moea O Halalelang ha a kena maphelong a rona ha re amohela Morena Jesu, o etsa mosebetsi oa ho re tsoala moeeng, hape o re fa semelo sa Molimo meeeng ea rona, joale ebe re ba bara/ barali ba Molimo. Empa ka kolobetso ena teng, o re fa matla le bokhoni ba ho tsamaea hantle le Ntate Molimo le ho pakela Morena Jesu ka katleho. Kolobetso ena e bitsoa kolobetso ea **Moea O Halalelang le mollo** ka lebaka la mosebetsi e `meli eo ee etsang, **empa eona e le kolobetso e le `ngoe**. Mosebetsi oa pele ke oo Moea O Halalelang a o etsang oa ho thusa molumeli ho tsamaea ka katleho le Morena Jesu, e leng ho tsamaea ka tsela eo Morena Jesu a e lebelletseng.

Mosebetsi oa bobeli ke oa ho matlafatsa molumeli hore a khone ho pakela Morena Jesu ka matla. **Mollo o bolela matla**. Hona ke ho paka tsoho ea Morena Jesu ka liponts' o tsa matla, lineo, meka le mehlolo (Liketso 4:33). **Kolobetso ena e tliša neo ea ho rapela ka lipuo le bokhoni ba ho porofeta bophelong ba molumeli**. Re hlalosa taba ena ea lipuo le boporofeta ka botebo lithutong tse latelang.

Joale hape e fa molumeli bokhoni ba ho tsamaea ha bonolo le Moea O Halalelang le ho khona ho sebetsa ha bonolo ka lineo tse ling tsa hae. **Molumeli o bona mosebetsi oa kolobetso ena ha a rapela haholo ka lipuo le ho porofeta**. Balumeli bohle ba tlameha ho amohela kolobetso ena haeba ba batla ho tsamaea ka katleho le Ntate Molimo, kolobetso ena e lula e tsamaea le neo ea ho rapela ka lipuo le ea ho porofeta. Neo ena ea lipuo ke bopaki ba hore molumeli o amohetse kolobetso ena. Kolobetso ea Moea O Halalelang le neo ena ea lipuo le neo ea boporofeta e fuoa balumeli bohle ba e amohelang. (Neo ea boporofeta ha e bolele hore motho ke Moporofeta, `me re hlalosa sena thutong tse latelang).

Balumeli bohle ba ne ba rapela ka lipuo hape ba porofeta ha ba tlatsoa Moea O Halalelang bukeng ea liketso (Liketso 2:13, 10:44-47, 19:6)

TUMELO EA MOLIMO

Ho na le mefuta e `meli ea tumelo, ke tumelo ea botho le tumelo ea Molimo. Tumelo ea botho ke tumelo e sebelisoang ke batho ba sa tsoaloang labobeli. **E its'etleha holim'a likutlo tse hlano, e leng: tatso, pono, monko, kamo le kutlo (taste, sight, smell, touch and hearing).** Motho ea sebelisang tumelo e tjena ha a khone ho tsamaea le Ntate Molimo. Tumelo ena e bitsoa tumelo ea Thomase hobane Thomase o ile a lumela ka mora hore a bone Morena (Johanne 20:24-30).

Tumelo ea Molimo. Mofuta ona oa tumelo ke tumelo e sebelisoang ke Ntate Molimo ka boeena. Tumelo ena e fuoa molumeli ha a tsoaloa labobeli, `me o e fuoa e le peo e nyane moeeng oa hae. Tumelo ena e etsa hore molumeli a lumele ho Molimo ka tsela e nepahetseng, hape a lumele joalo ka Molimo ka tsela e nepahetseng. Mareka 11:22-24) Bibe e re ha rele lefats'eng mona re tsamaea ka tumelo e seng ka pono. (Bibe e re ha rele lefats'eng mona re tsamaea ka tumelo e seng ka pono. (2 Bakorinte 5:7)

Tumelo ho Molimo ke eng? Tumelo ke ho elelloa, ho lumela le ho amohela seo Ntate Molimo a se buoang lentsoeng la hae. Hona ho bolela hore sohle seo Ntate Molimo a se chong ka Eena, ka bophelo, ka Uena le ka lintho tsohle, u oa se amohela, u oa se lumela, `me u oa se phela, hona ke tumelo ea `nete.

SEMELO SA TUMELO EA MOLIMO

- 1) Tumelo e thehiloe holim'a lentsoe la Ntate Molimo le ngotsoeng (e leng bibe kapa logos, e bolelang the written word) le le buoang ho uena ke Ntate Molimo (e leng leo Moea O Halalelang a le senolelang molumeli le bitsoang Rhema (the spoken word). Tumelo ke lentsoe le ngotsoeng le sebetsa ha `moho le Moea O Halalelang **(2)** Tumelo e phomola lentsoeng la Ntate Molimo. Motho oa tumelo o oa phomola, ha a khathatsehe ka letho (Ba-Heberu 4:3-4). **(3)** Tumelo e nka likhato holim'a lentsoe la Ntate Molimo (*Jakobo 2:26*). *Mohlala ke batsoali ba rekang maleiri ha ba kopile ngoana ho Ntate Molimo ka thapelo. Karolo e `ngoe e bohlokoa ea mesebetsi ea tumelo ke ho etsetsa ba bang seo o lebelletseng hore Ntate Molimo a o etsetse sona. Ho etsa tjena ke ho jala, `me o tla kotula seo o se jalang (Luka 6:36-38).* **(4)** Tumelo e ea buoa- Tumelo e phethahatsoa ke khato le polelo ea molomo (*2 Bakorinte 4:13, Mareka 11:23*). *U lula u buoa seo Ntate Molimo a se buoang ka uena le seo u batlang ho se bona.* **(5)** Tumelo e sebetsa bokhaleng kapa bojoaleng, e seng bokamosong, ha e qala e buoa bokamoso, e se e le ts'epo, e seng tumelo. *Tumelo e lumela hore ntho e se e etsahetse, e seng hore ke hona e tla etsahala.* **(6)** Tumelo e bitsa lintho tse sieo joalo ka haeka li teng (*Baroma 4:17*). Ha e bitsa tseno tse sio joalo ka haeka li teng, li ba teng, e be tseno tse teng tse bonoang lia tloha. **(7)** Tumelo ke tholoana ea moea oa motho, e seng kelello ea hae kapa `mele. Tumelo e sebetsa boemong ba moea, `me e be litholoana tsa eona li bonahala nameng. **(8)** Tumelo e sebete **(9)** Tumelo e holisoa ke ho tseba lentsoe la Ntate Molimo, empa e matlafatsoa ke ho le etsa (*Baroma 10:17*) **(10)** Tumelo e fanoa joaloka peo e nyane ho molumeli, empa kholo ea eona ha e na tekanyo (*Mattheu 17:20*). **(11)** Tumelo e thabisoa ke lentsoe la Ntate Molimo, `me e nka likhato tsa tlhlo holim'a maemo a seng monate (*Liketso 16:22-28*) **(12)** Tumelo e tsamaea le teboho le thoriso. **(13)** Tumelo e sebetsa ka lerato (*Bakhalata 5:6*): Motho oa tumelo ha a sebelisi tumelo ea hae ho etsa ba bang hampe, joalo ka bo ho rohaka joalo joalo empa o etsa mesebetsi ea tumelo a susumetsoa ke lerato la Molimo, mohl: o folisa ba bang hobane a ba rata, e seng hobane a ipatla. **(14)** Tumelo e ea lumela le ho etsa lentsoe la Ntate Molimo maemong ohle (*Baheberu 11:32*). **(15)** Tumelo ha e latole maemo a sa thabiseng, empa ha e lumelle maemo ano ho laola bophelo ba molumeli, hape e a fetola ka likhato le lipolelo tsa tumelo tse manganga. **(16)** Tumelo e na le mamello (*Ba-Heberu 6:12*) **(17)** Tumelo e ea phehella hape e leqophe (*Luka 18:1, Baroma 4:17-25*). **(18)** Tumelo ke tsamaiso kapa molao (principle) o sa fetoheng, `me e lula e sebetsa ka linako tsohle ha e sebelisoa ka tsela e nepahetseng. **(19)** Tumelo ke thebe (*Baefese 6:16*). Tumelo e thiba mesebetsi le merero ea satane ka ho lula o buoa ebile o etsa ka lentsoe la Ntate Molimo holima maemo a sa thabiseng **(20)** Tumelo e ea bona le ho buoa joalo ka Molimo: Molumeli o tlameha ho ipona le ho ipuo ka tsela eo Ntate Molimo a mo bonang le ho mo buoa ka teng. **(21)** Tumelo sebetsa ka phomolo (confidence): Motho oa tumelo o sebetsa ka phomolo (confidence) lentsoeng la Ntate ha a nka likhato tsa tumelo. **(22)** Tumelo e ea iphapanya: tumelo e iphapanyetsa maemo a sa thabiseng nakong eo motho a ntseng a lebelletse phunyelletso kapa mohlolo ho tsoa ho Ntate Molimo joalo feela ka Aborahama a ileng a iphapanyetsa popelo ea Sara eseng e shoele le mmele oa hae o tsofetseng (*Baroma 4:19*). Motho oa tumelo o oa iphapanya ebe ena o sheba ts'episo ea Ntate Molimo feela lentsoeng la hae, ebe o buoa lentsoe feela ebile a rorisa Ntate Molimo ka lentsoe la hae le seo a se lebelletseng. **(23)** Tumelo e ea lebella: Motho ea sebetsang ka tumelo o ba le tebello e matla e tiileng ea hore seo Ntate Molimo a se buileng se tla etsahala ele kannete. Joale ka lebaka la tebello ena, o oa leboha le ho rorisa Ntate Molimo ha a ntse a eme ka tebello.

MESEBETSI EA TUMELO EA MOLIMO: (1) Tumelo e nka lintho tsa moea `me e tisa ponahatso ea tsona nameng. (2) Tumelo e ea hapa (Baheberu 11:32-35). Ka tumelo re hapa tsohle tseo Ntate Molimo a re fileng tsona, ka ho lula re buoa mantsoe a tumelo le ho nka likhato tsa tumelo tse bonts'ang hore re li amohetse le pele re li bona (3) Tumelo e ea busa (1Johanne 5:4-6): Motho oa tumelo o busa maemong oohle ha feela a tsamaea ka tumelo. O buoa mantsoe a tumelo le ho nka likhato tsa eona holima maemo a sa thabiseng (4) Tumelo e ea hlola (1Johanne 5:4): Tumelo e bona tlhlo maemong a sa thabiseng, `me e fetola maemo ano ka likhato

le mantsoe a tumelo a manganga. **(5) Tumelo e amohela likarabo tsa rona tsa thapelo ho tsoa ho Ntate Molimo (Mareka 11:24).** Ntate Molimo o re fa lintho ha re li kopa ha li tsamaea le thato ea hae, empa ke boikarabello ba rona ho li amohela ka tumelo. Re li amohela ka ho nka likhato le ho buoa mantsoe a tumelo tse bonts'ang hore re li amohetse. Re amohela lintho tse hlahang ho Ntate Molimo ka tumelo e likhoka, e leqophe e sa teleng kapa hona ho nyahama. Re lula re li buoa ebile re nka likhato holim'a tsona. **(6) Tumelo e etsa hore molumeli a sebetse joalo Molimo, 'me a fumane litholoana tseo Ntate Molimo a neng a tla li fumana ka Boeena.** **(7) Tumelo e lokolla ponahatso ea Moea O Halalelang e le matla a susumetsang (forceful power):** a phethahatsang seo re se lebelletseng ha se tsamaea le thato ea Ntate Molimo. **(8) Tumelo ke sesebelisoa se sebelisoang ho amohela lintho tse tsoang ho Ntate Molimo** joalo ka ha chelete e le sesebelisoa se sebelisoang ho fumana seo o se batlang lefats'eng.

TSOHLE LI TLA ETSOA HO EA KA TUMELO EA HAU (Matteu 9:27-31): Ntate Molimo a ka etsa lintho tsohle, empa o khethile ho sebetsa ho ea ka tumelo ea molumeli. Ho ea tumelo e matla, Ntate Molimo a ka etsa lintho tse kholo tse makatsang batho, empa ho ea tumelo e fokolang, o tla bonahatsa mesebetsi e menyane ka eena.

MATLA A LELEME (Maele 18:20-21) (Mattheu 12:36-38):

Matla a lefu le bophelo a lelemeng la motho, 'me motho o fumana seo a se buoang ka leleme la hae. Lefats'e la moea le phethahatsa seo re se buoang ka maleme a rona, Ntate Molimo o phethahatsa tseo re li buoang tse ntle, satane o phethahatsa tseo re li buoang tse mpe. Re tlameha ho lula re buoa se Ntate Molimo a se chong ka rona feela ho sa tsotellehe hore na maemo a joang. (Mareka 11:22-24). Leleme la hau ke senotlolo se tla u kenya moo u batlang ho phela teng. Seo u leng sona tsatsing lena ke seo u se buileng maobane. Ha u qala u buoa lentsoe le itseng, u oa jala, 'me u tla kotula seo u se buoang. Ha u buoa lefu, u tla fumana lefu, ha u buoa bophelo, u tla fumana bophelo. Joale, lula u buoa seo u batlang ho se bona bophelong ba hau khafetsa. Hao na ntho e matla ho feta mantsoe a tumelo bophelong. Lefats'e lena leo re leng ho lona, le entsoe ka mantsoe a tumelo. Le uena u etsa le ho lokisa lefats'e la hau ka mantsoe a tumelo a leqophe.

Maele 15:4 e re leleme le lokileng ke sefate sa bophelo, empa leleme le sothehileng le tlisa letlere semoeeng (Breach in the spirit). Ka mantsoe a mang, motho a buang hantle ka tsela e nepahetseng e ipapisang le tseo Ntate Molimo a li buileng o tla bona bophelo. Sefate se makala a mangata, ka mantsoe a mang leleme leka lokolla lekala la bophelo bo botle, bophelo bo bolele, bophelo ba katleho le mahlohonolo, bophelo ba phahamiso le liphunyelletso joalo joalo, empa haele le buang puo tse mpe lona hothoe letlo bulela le ho bitsetsa motho lintho tse mpe.

Mangolo a mang a buang ka matla a leleme ke ana a latelang.

Maele 21:23, 1Peter 3:10-12, Ephesians 4:29, Proverbs 10:19, Jakobo 3:5-6, 1 Peter 3:10-12, Eph 4:29.

LIKAROLO TSE NNE TSA TUMELO EA MOLIMO

Molumeli e mong le e mong o na le tumelo ea Molimo, empa e ka fapana ho ea ka molumeli ka bo mong, ho tla tsoa ka hore na molumeli o e koetlisa joang.

- 1) Tumelo e nyane:** ke tholoana ea tsebo e nyane, pheko ea teng ke ho bala lentsoe le ho le mamela. (Ho eketsa tsebo ea lentsoe).
- 2) Tumelo e ngata:** e tsoaloa ke tsebo e ngata ea lentsoe la Ntate Molimo, empa e ka fokola haeba re sa behe lentsoe ts'ebetsong.
- 3) Tumelo e fokolang:** ke tholoana ea ho se etse ka lentsoe la Ntate Molimo, pheko ea teng ke ho etsa ka lentsoe la Ntate Molimo. (Ho beha lentsoe ts'ebetsong).
- 4) Tumelo e matla:** Ke tholoana ea ho tseba lentsoe, ebile o le beha ts'ebetsong. Ho hloka hlahla tumelo e matla hore molumeli a phethe thato ea Ntate Molimo ka botlalo.

TS'EBETSO EA TUMELO: Tumelo e sebetsa ka kutloisiso ea Ntate Molimo le lentsoe la hae, ka kutloisiso ea litsela tsa Ntate Molimo le litsamaiso tsa hae le ka kutloisiso ea lefats'e la moea le litsamaiso tsa lona. Mohlala, ho jala le ho kotula, ho lumela le ho buoa. Ka mantsoe a mang, tumelo hase ho nka khato holim'a lefifi, empa ke ho nka khato holim'a lentsoe la Ntate Molimo. Hase ho etsa ntho ka hlooho e nts'o kapa ka maiqapelo, empa ke ho etsa ntho hobane Ntate Molimo a se a e buile lentsoeng la hae.

LETSOALO LE TUMELO: Tumelo ha e sebetse le letsoalo ho hang, letsoalo ke tumelo ho satane. Ha u lumela hore satane a ka etsa ho itseng ho uena, u mo fa matla a ho se etsa. Satane ha a khone ho etsa letho kantle ho letsoalo, le Ntate Molimo ha a etse letho kantle ho tumelo.

NTOA EA TUMELO: (1Timotia 6:11-12) Ntoa ea tumelo ke ho ema holim'a lentsoe la Ntate Molimo ho fihlella seo Ntate Molimo a se buileng ka uena se phethahetse. **Ntoa ea tumelo ha se ho loants'a matemona. Ntoa ea tumelo e nka ho qophella ka tumelo, ho hana ho nyahama le ho khathala, ho se shebe maemo ka mahlo kapa ho hona ho mamela lipolelo tsa batho tse khahlanong le lentsoe la Ntate Molimo, empa u ema holim'a lona o sa sisinyehe. Ho nka hore u iphe nako e ngata lentsoeng le thapelong hore u hlole ntoa ea tumelo.**

MEHLALA EA TUMELO: Mattheu 14:22-34 (peterose ha a tsamaea holim'a metsi, Baroma 4:16-25 (Tumelo ea Aborahama) le e meng. **Moithuti a ipalle Baheberu 11:1-chapter 12.**

HO HOLISA TUMELO EA HAU: (1) Tumelo e holisoa ka ho bala le ho mamela lentsoe la Ntate Molimo haholo, bala testamente e ncha ka makhetlo le ea khale ha u qetile e ncha hangata

(2) Rapela haholo ka lipuo le ho porofeta (re hlalosa taba ena ka botlalo thutong ea Bara ba Molimo ba bonahalitsoeng

(3) Lula u buoa lentsoe la Ntate Molimo khafetsa, e seng maemo a hau

(4) Lula u etsa ho ea ka lentsoe la Ntate Molimo. Ea rutang o tlameha ho rapella ba so kang ba khona ho rapela ka lipuo hore ba tlatsoe ka Moea O Halalelang 'me ba qale ho rapela ka lipuo.

Haeba u ntse u bala buka eena u le mong, 'me u batla ho kolobetsoa ka Moea O Halalelang le uena, 'me u rapele ka lipuo, tseba hore khato ea pele ke ea ho amohela Morena Jesu bophelong ba hau u tsoaloe labobeli. Haeba u se u tsoetsoe labobeli 'me u batla ho amohela kolobetso ea Moea O Halalelang le bopaki ba eona ba ho buoa ka lipuo, rapela thapelo ena le nna. "Morena Jesu, ke lumela lentsoe la hau, ke kopa o nkolobetse ka Moea O Halalelang hape o mphe bokhoni ba ho rapela ka lipuo. Kea leboha ka ho nkolobetsa ka Moea O Halalelang le ho mpha bokhoni ba ho rapela ka lipuo honajoale, ke rapela tsena ka lebitso la Morena Jesu Krete.

Amen. Joale, bula molomo oa hau ka tumelo 'me u qale ho rapela ka lipuo. Sekebe oa buoa ka puo ea heno e tloaelehileng. Ha u qala u khetha ho buoa ka lipuo, lipuo li tla tsoa. Ke ka tumelo, ha u hloke ho utloa letho 'meleng oa hau hape u seke oa ipotsa hore na e tla etsahala joang. **QALA HO BUOA HONA JOALE** hape u seke oa ts'oenyeha kapa oa belaela ka mantsoe kapa medumo e tsoang molomong oa hau.

TS`OARELO (Mattheu 18:21-35)

Ts'oarelo ke ntho e bohlokoa haholo ho Ntate Molimo hobane pholoho ea rona e its'etlehile holim'a ts'oarelo. Ha re pholoso, Ntate Molimo o re ts'oarela ho se na lipehelo tsa letho (Bakolose 3:12-15), ebe o tlosa semelo sa sebe se neng se re arohanya le eena. Empa kamora hore re pholoso, Ntate Molimo o lebelletse hore re ts'oarele ba bang joalo ka ha le eena a re ts'oaretse (Baefese 4:32). Ha re se re tseba Ntate Molimo re pholositsoe, ha re ntse re hola re ea pele le eena re mo fosetsa, ts'oarelo ea rona e its'etleha holima hore na re ts'oarela ba bang joang Mareka 11:25, Mattheu 6:14-15, Mattheu 18:25. **Mona ha se ts'oarelo eo re e fumaneng ha re boelangoa le Ntate Molimo ka Morena Jesu Krete ha re ne re pholoso hobane eno re e fumane ka ho lumela ka mohau (Baefese 2:8); empa ena eona e buoa ka ho hloekisoa ha re ntse re fosetsa Ntate Molimo re se re mo tseba ho ea ka 1 Johanne 1:9. Hape ena e amana le kutloano (fellowship) ea rona le Ntate Molimo e seng pholoho ea rona. Ka mantsoe a mang, ho se ts'oarele ho tla ama kutloano ea rona le Ntate Molimo ha mpe, ebile re ke ke ra khona ho ea pele le Ntate Molimo. Hape sena se ka re thatafatsa ho fihlela re itlosa pela Ntate Molimo.**

HA RE TS`OARELA, RE E TSA TSENA TSE LATELANG: (1) Re thabisa Ntate Molimo hobane re ea mo etsisa (Mattheu 18:33),

(2) re iketsetsa tsela ea hore le rona re ts'oarelloe ha re fosa (Mareka 11:25), **(3)** Re itokolla boimeng ba ho se ts'oarele, mafu le mathata a mangata a bakoa ke ho se ts'oarele **(4)** Re kaolla satane lemati maphelong a rona. Ha hona ntho e bulelang satane lemati kapele ho feta ho se ts'oarele.

RE TS`OARELA JOANG: (1) Ts'oarelo ke khetho, e seng maikutlo. Hang ha u khetha ho ts'oarela, ho Ntate Molimo o ts'oaretse ho sa tsotellehe hore na maikutlo a ntse a hloketse. **(2)** Ts'oarelo e ea leballa: Ho leballa motho hase ho leballa se sebe seo a o entseng sona, empa ke hore ha u mo bona, e be ha u sa hlokofoa kapa oa ba le maikutlo a mabe. **(3)** Re ts'oarela re its'etlehile holim'a mohau oa Ntate Molimo, e seng matleng a rona. **(4)** Ho ts'oarela ho bonolo hobane ke karolo ea semelo sa rona sa moea. **(5)** Re ts'oarela ka tumelo e seng ka maikutlo (ka mantsoe a mang, re ts'oarela hobane Ntate Molimo a re laela ho ts'oarela, eseng hore na re ikutloa joang.)

LITHOLOANA TSA HO SE TS`OARELE: (1) Motho ea sa ts'oareleng a ke ke a ts'oareloa le eena ha a fositse (Mareka 11:25)

(2) Ea sa ts'oareleng ha a khone ho ba le kopano le Ntate Molimo, 'me a ke ke a khona ho tsamaea le eena **(3)** Re bulela satane lemati le leholo ha re sa ts'oarele, 'me a ka khona ho re hlekefetsa ka mafu le mathata a mangata ka lebaka la ho se ts'oarele.

(4) Tumelo e sitoa ho sebetsa ha ho sena ts'oarelo, hobane tumelo e sebetsa ka lerato, 'me lerato le ea ts'oarela. **(5)** Sebe sa ho se ts'oarele ke sebe se ka isang lefung, ka mantsoe a mang, karohanong le Ntate Molimo. Ka mantsoe a mang, motho ea sa ts'oareleng a ka thatafala pelo ho fihlela eena a itlosa pela Ntate Molimo. **(6)** Ea sa ts'oareleng, Ntate Molimo o tla molumella

hore a hlokofofatsoe ke maemo le matemona (bahlokofofatsi) ho fihlella a ts'oarela (Matthew 18:34).

Ho se ts'oarele ho ka ama lithapelo le menehelo ea rona. Ke ka lebaka lena Morena Jesu a reng, ha re eme re etsa thapelo ho Mareka 11:25, re ts'oarele ba re sitetsoeng hape ha re tlo fana ka menehelo, re ts'oarele pele ho Matteu 5:23 le 24. Morena Jesu o re re sie menehelo ea rona aletareng ea kereke, re tsamae re ilo lokisa litaba le bao re qebaneng le bona, ebe joale ke hona re tlo fana ka eona. Sena se bonts'a tsela eo Ntate Molimo a nkelang taba ea ts'oarelo holimo ka eona.

POELANO KA MOR'A TS'OARELO: (1) Ha ho bolele hore batho ba tlameha ho tsoela pele ka setsoalle kapa likamano ha ba qeta ho ts'oarelana. **(2)** Ho molemo ho tsebisana ha le ts'oarelane ha ho khonahala. Empa ha ho bolele hore ha u oa ts'oarela e mong haeba u sa mo ts'ebisa. U ts'oaretse ho tloha nakong eo u khethang ho ts'oarela. **(3)** Ha ho bolele hore u tlameha hore u tlohele litlamorao ha u ts'oaretse motho e mong. Mohlala, ha se hore u tlameha ho tlohela sekoloto sa eo e bang o ne a u utsoelitse kapa ea o kolotang. Hape ha ho bolele hore 'me o tlameha ho khutlelana le Ntate haeba ba ne ba arohane ka lebaka la bohloka hoba a reo mo ts'oaretse. Ho se ho tsoa ho motho ea ts'oarelang hore na o khetha ho etsa joang, empa Ntate Molimo ha a mo tlame ho khutlela ho monna oa hae kapa ho tlohela sekoloto seno. Ho molemo ho mamela Moea O Halalelang boemong bona.

BARA BA MOLIMO BA BONAHALITSOENG (BAROMA 8:19)

Johanne 1:10-12, Baroma 8:19, 1Johanne3:1, Bakhalata 3:26) (ka mor'a thuto ena ho tlameha ho shebelloa dvd eane ea Moapostola Maposa e ngotsoeng "Apostolic&Prophetic ministry, e bontsang lipontso, lineo le lits'ebetso tsa Moea O Halalelang le e ngotsoeng "The Manifest Sons of God Movement ea senyesemane"). Hape baithuti ba khotalletsoa ho ba le dvd ena ka bo bona hore ba e shebelle khafetsa bo'ngoeng ba bona 'me ba ka fumana tsohle ho www.voiceofgodfm.co.ls ho materials)

Morena Jesu o tlele ho tla re fa boemo ba hae ba hoba bara ba Molimo joalo ka eena. Motho o li karolo li tharo (1Bathesalonikka 5:23). Motho ke moea o nang le pelo, o phelang ka hara 'mele oa nama. Moea ke karolo ea motho eo e leng motho hantle, pelo ke karolo ea motho e nang le maikutlo, kutloisiso le khetho, karolo ena hangata e bitsoa kelello, 'mele oa nama le mali ona ke ntlo eo motho a phelang ka hare ho eona. Joale, ha re amohela Morena Jesu maphelong a rona, meea ea rona e fetoha hang hang, 'me re fuoa semelo sa bomolimo meeng ea rona, e leng semelo se ts'oanang hantle le sa Ntate Molimo. Semelo sa sebe se neng se le meeng ea rona se ea tlosoa, e be re fuoa semelo sa bomolimo. Tsena tsohle li etsahala ha re lumela Morena Jesu lipelong tsa rona, ebile re mo bolela ka melomo ea rona ho ea ka Baroma 10:9. Kelello eona e tlameha ho fetoloa khafetsa ha re se re amohetse Morena Jesu hore e tle e qetelle e bona le ho nahana joalo ka Ntate Molimo (Baroma 12:1-3). Mosebetsi ona oa ho nchafatsa kelello ke mosebetsi oo re lulang re o etsa ha feela re ntse re le lefats'eng. Kelello e nchafatsoa ka ho ba le nako lentsoeng le linthong tsa Ntate Molimo. Nama eona e tlameha ho beoa ka tlas'a taolo ea moea oa motho o nchafatseng, 'me molumeli a ka khona ho etsa sena ka ho its'etleha matleng ao Ntate Molimo a mo fang ona ka Moea O Halalelang. Matla a na a bitsoa mohau. 'Mele ea rona ea nama e tla fetoloa ha Morena Jesu a khutla, 'me e tla ts'oana le 'mele oa hae ka mor'a tsoho ea hae bafung (Baroma 8:11, Bafilipi 3:20). 'Mele ona o tjena o bitsoa 'mele o tlotlisitsoeng. Hajoale nama e tlameha ho beoa tlas'a taolo ea moea o nchafilitsitsoeng oa motho, o nang le semelo sa bomolimo hobane nama ha e tlohetsoe feela e kaba le litloaelo tse mpe (1Bakorinte 9:27).

Moea oa motho ea tsoetsoeng labobeli o na le semelo sa bomolimo, e be 'mele oa hae oa nama o na le semelo sa botho (ka semelo sa botho, re ea ja, re ea ntloaneng joalo joalo). Ka mantsoe a mang, **motho o na le limelo tse peli**, e leng, semelo sa botho le semelo sa bomolimo ha a pholositsoe. Ha a sa pholoso, moea oa hae o na le semelo sa sebe, e be 'mele oa hae oa nama o ntso o na le semelo sa botho se ts'oanang le sa motho ea pholositsoeng feela. Ba fapana ka limelo tsa bona tsa moea feela. **Joale, motho o na le likarolo tse tharo, ebe o na le limelo tse peli.** Ka tsela e tjena, motho ke moea, o nang le pelo, o phelang ka har'a nama. Joale, moea o na le semelo sa bomolimo ha motho a pholositsoe, o na le semelo sa sebe ha motho a sa pholoso, e be le nama e na le semelo sa botho. Pelo ha se karolo e ikemetseng e nang le semelo sa eona, empa pelo ke karolo ea moea oa motho. Moea le pelo li bopa motho ea kahare. **Kakaretso:** Moea o fetoha hang hang ha motho a pholoso (hona ho bitsoa tokafatso), kelello e nchafatsoa khafetsa (hona ho bitsoa phetoho) 'mele oa nama o tla fetoloa ha Morena Jesu a khutla (Hona ho bitsoa tlotliso).

SEMELO SA MORA OA MOLIMO: Semelo sa mora oa Molimo ke semelo se ts'oanang le sa Ntate Molimo hobane Ntate Molimo ke eena ea mo tsoetsoeng (Johanne 1:12). Semelo sena se moeeng oa molumeli, 'me se na le tsohle tseo semelo sa Ntate Molimo se nang le tsona. Semelo sena se na le litholoana tsa moea ho tloha tsoalong ea bobeli ea molumeli. (Bakhalata 5:22) Se na le lerato, khotso, thabo, mamello, molemo, mosa, bots'epehi, boikokobetso le boits'oaro. Se na le tumelo,

boikokobetso, bohlale le tse ling tseo Ntate Molimo a nang le tsona. Semelo sena se fa mora oa Molimo bokhoni ba ho sebetsa joalo ka Molimo. **Lentsoe “bara ba Molimo” ha se lentsoe le buoang ka botona kapa bots’ehali, empa ke lentsoe le buoang ka bojalefa.** Ka hona, bo `me le bo ntate ba amohetseng morena Jesu ba bitsoa bara ba Molimo bibeleng. *(Ea rutang o tlameha ho etsa ponts’o ea Moea O Halalelang ea ho bonahatsa semelo sa botho le sa bomolimo karolong ena, hore ba rutoang ba hlakeloe hantle)* Linnete tsena tse hlalosang hore na o mang ho Krete li etsahetse moeeng oa hau ha u amohela Morena Jesu, empa u li bonahatsa nameng ka tumelo le polelo ea molomo(e leng hore, molumeli o tlameha ho lula a li buoa hangata). Ka mantsoe a mang, moeeng oa hau o morena, moprista, `mupuo e mocha, moemeli oa Krete joalo joalo, empa tumelo ke eona e li bonahatsang bophelong ba hau ba nama.

**MORA KE `MUPUOA E MOCHA (2Bakorinte 5:17):** Mora oa Molimo ke `mupuo e mocha. Hona ho bolela hore mora oa Molimo ke mofuta o mocha oa motho. Mofuta ona ha o ts’oane le motho oa pele eo e leng Adama. Empa Ntate Molimo o entse mofuta o mocha oa motho ha a re etsa bara ba hae. Hape ha ho buuo ka `mupuo e mocha ho boleloa hore tsohle tseo motho a neng a le tsona pele a pholoso ha li sa leo. Motho enoa e se e le motho e mocha kelellong ea Ntate Molimo.

**MORA KE MORENA (Ts`enolo 1:6, 1Peterose 2:9):** Bible e ea hlakisa hore joalo ka bara ba Molimo re entsoe marena. Joalo ka marena, re ea busa bophelong, re haha `muso oa Ntate oa rona lefats`eng, re busa holim’a `muso oa satane, re busa holim’a sebe le litholoana tsa sona, e leng bokuli, bofutsana, lithohako, lefu le tsohle tse tlleng ka lebaka la sebe. Karolo ea bobeli ea serena ke ea balumeli ba bitselitsoeng ho tla ts’ehetsa `muso oa Ntate Molimo ka lichelete le limpho tsa bona.

MORA KE MOPRISTA (Ts`enolo 1:6): Joalo ka baprista, re ema pakeng tsa Ntate Molimo le batho ho ba kopanya. Re rapella hore thato ea Ntate Molimo e phethahale. Re inehetse ho Ntate Molimo ka botlalo. Re ea mo khumamela le ho mo rorisa. Moea O Halalelang o phela ka ho rona. Karolo ea bobeli ea boprista ke ea balumeli ba bitselitsoeng lineong tse hlano tsa Morena Jesu, e leng: Baapostola, Baporofeta, Baevangeli, Balisa le baruti. Bana ke ba fuoeng boikarabello ba ho ba ka sehloohong khasong ea evangeli le ho phethahatsa balumeli ba bang. Ba fue mohau oa ho etsa joalo.

**MORA KE MOEMELI OA KRESTE LEFATS`ENG (Johanne 17:16):** Joalo ka baemeli ba Krete lefats`eng, bara ba Molimo ba emetse Morena Jesu Krete lefats`eng. Ba phela ka litsamaiso tsa leholimo lefats`eng, `me ha ba ka tlas’a letho le tlleng ka lebaka la sebe sa Adama.

MORA KE TEMPELE EA MOEA O HALALELANG (1 Bakorinte 3:16, 6:19, 2Bakorinte 6:16): Joalo ka tempele ea Moea O Halalelang, Moea O Halalelang o phela ka hare ho rona. Moea O Halalelang ke Molimo oa rona, ke motsoalle, mothusi, tichere, mots`elisi le moemeli oa rona. Hore ke moemeli ke ho bolela hore ke ea re emelang khahlanong le ba re qosang, `me o re fa matla le bohlale ba ho ba hlola.

MORA KE KAROLO EA `MELE OA KRESTE:** Molumeli e mong le e mong ke karolo ea `mele oa Krete. Morena Jesu o re rata le ho re tsotella joalo ka `mele oa hae. Le rona re tsotellana haholo hobane re karolo ea `mele o le mong. **(1Bakorinte 12:27).

MORA KE KAROLO EA KEREKE EA MORENA JESU KRESTE (Matteu 16:18-20): Lentsoe kereke le bolela “ba khethiloeng” (The chosen ones). Bana ke bao Ntate Molimo a ba khethileng hobane le bona ba khethile ho lumela ho Morena Jesu. Molumeli e mong le e mong ke karolo ea Kereke ea Morena Jesu. Kereke ea Morena Jesu e fumaneha ka likarolo tse tharo. Likarolo tsena ke **(1)** Motho ka bomong ea amohetseng Morena Jesu ke karolo ea kereke **(2)** kereke ke kopano kapa phutheho ea balumeli sebakeng se itseng **(3)** Kereke e entsoe ka batho bohle ba amohetseng Morena Jesu ba lefats`eng le ba seng ba le leholimong ho sa tsotellehe hore na ba hlaha merabeng e feng kapa ba phuthehela hokae.

MORA KE MONYALUOA OA KRESTE (2Bakorinte 11:2, Ts`enolo 19:7-10). Joalo ka banyaluoa ba Krete, Morena Jesu o oa re rata le ho re boulella haholo, le rona re ea mo rata le ho ikokobelletsa eena.

MORA KE KAROLO EA SESOLE SA KRESTE (Baefese 6:10-19): Joalo ka sesole sa Krete, re tsoellisa tlholo ea Morena Jesu pele holim’a satane, `me re lokolla batho litlamong tsa hae. Re kereke e hlotseng.

MORA KE MOJALEFA `MOHO LE JESU KRESTE LELAPENG LA NTATE MOLIMO (Baroma 8:17, Bakhalata 4:6-7). Joalo ka bara ba Molimo, re na le bojalefa bo lekanang le ba Morena Jesu lelapeng lena la Ntate Molimo. Tsohle tsa hae ke tsa rona.

**MORA KE LESELI LE LETSOAI LA LEFATS`E (Mattheu 5:13):** Joalo ka bara ba Molimo, re fa lefats`e leseli la Molimo le ho le fa tatso ea hae. Ka mantsoe a mang, re tllisa ponahatso le kutloahatso ea Ntate Molimo lefats`eng.

MORA ONA LE TESTAMENTE SELEKANENG SA NTATE MOLIMO LE MORENA JESU (Luka 22:17-21). Joalo ka bara ba Molimo, re fuoe bojalefa mahala seleaneng sa Morena Jesu le Molimo Ntate, 'me le rona re ba karolo ea selekane sena se secha ka ho lumela ho Morena Jesu. Testamente e bolela bojalefa.

HOLOKAFATSOA HA MORA OA MOLIMO (2Bakorinte 5:21, Baroma 3:21-31, Baroma 5:17-20). Mora o lokafalitsoe ka mohau oa Ntate Molimo ka ho lumela ho Morena Jesu. Ho lokafatsoa ho bolela ho beoa likamanong tse lokileng le Ntate Molimo. Holoka hona ha ho tle ka ho phetha molao oa Moshe kapa ka mesebetsi ea rona e lokileng, empa hotla ka ho lumela ho Jesu Krete. (Re etsa mesebetsi e lokileng hobane re sentse re lokafalitsoe ka tumelo ho Jesu Krete, mesebetsi e lokileng ke litholaona tsa tokafatso ea rona ka tumelo ho Jesu Krete). Joale, ka lebaka la likamano tsena tse ntle le Ntate Molimo tsa Ntate le mora, ona le litokelo lelapeng la Ntate Molimo. Litokelo tsa hae li kenyetsetsa ho buisana le ho ba le kopano le Ntate Molimo, ho busa bophelong, ho amohela likarabo tsa thapelo joalo joalo.

KHALALELO EA MORA OA MOLIMO (1 Peterose 1:15, 1Bakorinte 6:11): Lentsoe khalalelo le bolela ho arohana le bobbe. Joale, mora ona le semelo sa halalelitsoeng ka hare ho eena. Semelo sena ke karolo ea moea oa hae. **(Baefese 4:24).**

Empa le ha ho le joalo, mora o tlameha ho bonahatsa semelo sena sa hae kante, 'me a phele khalalelo. Khalalelo e bonahala ka ho phela ka litholaona tsa moea **(Bakhalata 5:22)**, e leng lerato, thabo, khotso, mamello, mosa, molemo, bots'ephehi, bonolo le boits'oaro.

PAPISO/ TS'OANTS'ISO EA MORA OA MOLIMO (1Bakorinte 15:45-49): Mora oa Molimo o bapisitsoe le Krete tsohong le bophelong ba hae. O jere sets'oants'o sa Krete moeeng oa hae. Ka mantsoe a mang, o ts'oana le Krete moeeng oa hae, mona hare bue ka ts'obotsi, empa re buoa ka boemo. Tsohle tse tllileng ka lebaka la sebe ha li mo ame, mohlala: bokuli, bofutsana, lithohako, boloi lefu pele ho nako joalo joalo. Mora o fuoe likamano tse ts'oanang hantle le tseo Morena Jesu a nang le tsona le Ntate Molimo.

MATLA A MORA (MONA RE BUA KA BORENA E LENG AUTHORITY) (Baefese 1:18-23, Baefese 2:4-7, Luka 10:19, Matteu 16:18-20): Mora o lutse le Krete letsohong le letona la Ntate. Hona ho bolela hore o busa ka boemo bona ba matla a ntse a le fats'eng. Matla ana a ka hare ho eena, 'me o sebetsa ka ona ka tumelo. Mora o ka holimo ho tsohle tse tllileng ka lebaka la sebe sa Adama, mohlala: lefu, bokuli, bofutsana, lefu, lithohako joalo joalo. O ka holimo ho satane le 'muso oa hae ohle.

BOPHELO BA MORA (Johanne 5:26, Johanne 10:10): Mora o phelisoa ke bophelo ba Molimo bo ka hare ho eena. Bophelo bona bo bitsoa **Zoe**, 'me ke bophelo boo Ntate Molimo ka boena a nang le bona. Ha ho letho la lefifi le lulang holim'a bophelo bona. Zoe e bolela mofuta oa Molimo oa bophelo. Bophelo bona bo ka hare ho moea oa mora, bo bolaea bokuli, mafu le tsohle tse mpe ha bo bonahatsoa ka tumelo. Tumelo e etsa hore bophelo bona bo bonahale nameng. Mora hape o phela ka lerato, ka tumelo, ka tsebo le ka bohlale ba Molimo linthong tsohle, joalo ka abuti oa hae oa pele, e leng Jesu Krete.

BOEMO BA MORA: (Johanne 20:17, Johanne 17:22-24): Mora o fuoe boemo bo ts'oanang le ba Morena Jesu lelapeng la Ntate Molimo. Ke bara ba lekanang le Morena Jesu lelapeng la Ntate Molimo. Ba lekana le Jesu ka bora feela, e seng ka borena le matla, hobane Jesu ha se mora feela, empa Jesu ke Molimo. Mora o khumamela le ho tlotla Morena Jesu hobane Morena Jesu ke Molimo le Morena oa hae, empa ha ho tluoa boreng ba bona, ke bara ka ho lekana le Morena Jesu. Hona ho bolela hore mora oa Molimo ke mora ea felletseng mahlong a Ntate Molimo joalo feela ka ha Jesu e le Mora ea felletseng mahlong a Ntate Molimo. Empa le ha hole joalo, Morena Jesu o moholo hobane eena hape ke Molimo le hlooho ea kereke. Ka hona, re ikokobelletsa eena.

MATLAFATSO EA MORA (MONA RE BUA KA DUNAMIS ELING MATLA A MOLLO A TLISANG PONAATSO) (Liketso 1:8): Bara ba Molimo ba matlafalitsoe ka Moea O Halalelang. Moea O Halalelang ke Motho oa boraro borarong bo teroneng, 'me mabapi le bara ba Molimo, Moea O Halalelang ke Molimo, mothusi, tichere, moelets, mots'ilisi le momatlafatsi oa mora oa Molimo. Moea O Halalelang o matlafatsa bara ba Molimo ho phetha thato ea Ntate Molimo. Matla ana a bitsoa dunamis bibeleng 'me ke moo lentsoe dynamite le tsoang teng, mme ke matla a mollo a phahlohang (explosive) ha a tliisa liphethoho tsa bomolimo. **Matla ana a fehloa ka ho rapela ka lipuo haholo 'me a lokolloa ke tumelo, lipolele le boporofeta.** Matla ana ke oona a bonahatsang liponts'o le lineo tsa Moea O Halalelang le ho tliisa liphethoho maphelong a batho. **Hape bara ba matlafalitsoe ka matla a ba thusang ho tsamaea le Morena le ho mamella mathata, 'me matla ana a bitsoa Kratos e leng strength kapa might.** Ana a shebane le ho matlafatsa uena u le motho ha dunamis e shebane le ho pakela Morena Jesu ka matla. Le oona matla ana (kratos) a fehloa ke thapelo ea lipuo haholo. Matla ana re a bona ho Baefese 3:6 le mangolong a mang.

TLOLO EA MORA (1 Johanne 2:20): Mora o tlotsitsoe ka Moea O Halalelang. Tlolo ke ponahatso ea Moea O Halalelang ka mora. Tlolo e fa mora matla a ho etsa thato ea Ntate Molimo. Tlolo e tlisa Borena, tsebo, kutloisiso, boelets, bohlale, matla le ts'abo ea Morena ho molumeli. (Isaiah 11:1-4). Tlolo ena e etsa hore mora a sebetse joalo ka Molimo.

PUSO EA MORA (Genese 1:26, Baroma 5:17): Mora o fuoe matla a ho busa lefats'eng. O tlameha ho busa holim'a maemo ohle ao a kopanang le ona. Puso ena e bonahatsoa ka tumelo e tsamaea le likhato le mantsoe. Mora ha a lula a buoa mantsoe a tumelo ebile a nka le likhato tsa eona o tla lula a busa maemong ohle. Tsela ea mora ea ho busa le ho hapa ke hore **(1)** A tsebe hore o fuoe tsohle ka selekane ke Ntate Molimo (1Bakorinte 3:21-23), temaneng ena ha hothoe lefu le bophelo ke tsa hae, ho boleloa hore o na le matla a ho khetha ho phela kapa ho shoa. **(2)** A etse ho ea ka lentsoe le ngotsoeng le le buuoang **(3)** A nke likhato tsa tumelo le ho buoa mantsoe a tumelo ho hapa seo a se batlang, (Mohlala ke ho jala, e leng ho fana ka ho hong ho bonts'a Ntate Molimo tumelo e phethahetseng, e be u buoa mantsoe a tumelo hore seno seo u se batlang ke sa hau **(4)** A lebohe Ntate Molimo ka karabo le pele a e bona.

LERUO LA MORA (2 Bakorinte 8:9, Baefese 1:3, 3Johanne 1:2): Leruo lohle la Ntate Molimo ke la mora oa Molimo hobane tsohle tsa Ntate ke tsa hae. Ntate Molimo o batla hore bana ba hae ba phele ha monate, 'me o batla hore ba tsamaise evangeli ka leruo la bona, ke mokhoa oo a batlang hore ba rue ka hohle hohle. O batla hore ba rue 'meleng, pelong le moeeng, licheleteng le linthong tse ling tsa nama. Mora o tsamaea ka leruo lena la hae ha a tsamaea ka tumelo e bonahala ka ho fana, le ho lula a buoa hore o ruile ho Krete, 'me ha a hloke letho. A se ke a sheba maemo ka nama.

MOHAU OA MORA OA MOLIMO: (Johanne 1:17, Baroma 5:17): Mohau ke botle boo Molimo a re etsetsang bona bo sa re lokele. Hona ho bolela hore Ntate Molimo etsa mosebetsi kaofela, a o qete, ebe joale o re fa seo a se qetileng mahala hobane a re rata, rona re tlameha ho o amohela ka tumelo feela. Mora o fuoe mohau oa Molimo ka botlalo. Hona ke ho bolela hore mora ona le mohau o senang tekanyo bophelong ba hae. Mohau ke Ntate Molimo ka boena a iponahatsa le ho sebetsa ka mora. Ntate o iphile mora ka botlalo hape o mo file lintho tsohle tsa hae. Mohau ona o bophelong ba mora o tlisa tsena tse latelang: botle, ho ratoa, tsoelopele linthong tsohle, phahamiso e senang tekanyo, ts'oarelo ha mora a fositse, tlholo holima sebe le lefats'e, ho sebetsa joalo ka Molimo. Mora o tlameha ho tseba mohau ona, 'me a o amohela ka tumelo e sa sisinyeheng. Ntate o sebetsa le mora ka mohau, e seng ka molao oa Moshe.

BOJALEFA BA MORA (Baroma 8:16-17): Joalo ka bara ba Molimo, re majalefa ha 'moho le Krete. Joalo ka majalefa, re fuoe tsohle tseo Morena Jesu a li fuoeng ke Ntate Molimo mahala. Bojalefa ba rona bo kenyetsetsa likamano le kopano le Ntate Molimo, o re file bophelo ba katleho ka hohle hohle, ke matla le puso holim'a 'muso oa lefifi, o re file leholimo e le lehae la bo rona le lefats'e ho busa ho lona (Mona ha re buoa ka lefats'e, re buoa ka lihloliloeng le lintho tsa lefats'ng, mohlala: matlo, makoloi, lithaba joalo joalo, e seng tsamaiso e fosahetseng ea satane e lefats'eng), o re file ts'irelletso, bohlale, katleho le ntho e 'ngoe le 'ngoe e ntle bophelong. Mora ke mojalefa oa lintho tsohle tsa Ntate oa Hae (Baheberu 1:2).

TS'EBETSO EA MORA OA MOLIMO: (Ea rutang o tlameha ho etsa liponts'o tsa Moea O Halalelang ho bonahatsa likhato tsena karolong ena). Mora oa Molimo o sebetsa joalo ka Molimo Ntate oa hae, semelo sa bomolimo se ka hare ho eena se mo fa bokhoni ba ho sebetsa joalo ka Molimo Ntate oa hae (Johanne 5:19). Ts'ebetso ea mora oa Molimo, e leng ts'ebetso ea bomolimo, e likhato li hlano. **Ke tsena tse latelang:**

(1) Ntate Molimo o oa lumela pelong ea hae, 'me e be o oa nahana ka keello ea hae, e be lintho li etsahala ho ea ka menahano ea hae ea tumelo. **Le mora o sebetsa ka tsela e joalo. O oa lumela e be o oa nahana, e be lintho li etsahala ho ea ka menahano ea hae ea tumelo (Baefese 3:20).**

(2) Ntate Molimo o oa lumela pelong ea hae, e be o nka likhato tsa tumelo, e be lintho li phethahala ho ea likhato tsa hae tsa tumelo. **Le mora o oa lumela pelong ea hae e be o nka likhato tsa tumelo, e be lintho li etsahala ho ea ka likhato tsa hae tsa tumelo (Liketso 4:30).**

(3) Ntate Molimo o oa lumela pelong ea hae, e be o buoa ka molomo oa hae, ebe lintho li etsahala ho ea ka mantsoe a hae a tumelo, **le Mora o oa lumela, e be o oa buoa, ebe lintho li etsahala ho ea ka mantsoe a hae a tumelo (Mareka 11:2224, Genese 1:3).**

(4) Ntate Molimo o oa lumela pelong ea hae, e be o buoa mantsoe a a kopantse le likhato tsa tumelo, ebe lintho li phethahala ho ea ka mantsoe le likhato tsa hae tsa tumelo, **le mora o oa lumela pelong ea hae, e be o buoa mantsoe a a kopantse le likhato, e be lintho li etsahala ho ea ka mantsoe le likhato tsa hae tsa tumelo.**

(5) Ntate Molimo o oa lumela pelong ea hae, e be o buoa qetello ea seo a lebelletseng hore se etsahale, kapa o bolela se tla etsahala pele se etsahala, ebe o labella hore lintho li etsahale ho ea ka mantsoe a hae a tumelo, le mora o buoa qetello qalong, e be lintho li etsahala ho ea ka moo a boletseng ka teng (Isaia 46:9-11). Le ha hole joalo, khato ena ha e bonahatse seo mora a se lebelletseng, empa e etsa tsela feela ea hore ponahatso e be teng. Ponahatso e tla tlisoa ke e `ngoe ea likhato tsena tse `ne tsa tumelo.

LINTHO TSEE LI ETSAHALA JOANG. Joalo feela ka ha Ntate Molimo a buoa, e be Moea O Halalelang o phalla ho tsoa ho eena ho phethahatsa menahano, likhato le mantsoe a hae a tumelo, le mora o sebetsa ka tsela e joalo. Moea O Halalelang o phalla ho tsoa ka hare ho mora ho phethahatsa menahano, likhato le mantsoe a hae a tumelo. Mora o ts'oana le Ntate hantle, phapang ke hore eena ke Ntate, `me rona re bara, empa re ts'oana hantle le eena, `me re ne le semelo se ts'oanang le sa hae. Moea O Halalelang O sebetsa le bara hantle joalo ka ha a sebetsa le Ntate. Le ha ho le joalo, Moea O Halalelang ke Molimo oa bara ba Molimo, `me o moholo ebile o ka holimo ho bona. Moea O Halalelang O sebetsa ka tsela e tjena le bara hobane ke eona tsela ea ts'ebeliso `moho le bona, empa hona ha ho bolele hore o ka tlase ho bona. Hore bara ba lokolla Moea O Halalelang ha ho bolele hore baa mo laela. Ntate o moholo ho rona hobane ke Ntate oa rona. Bara ba ikokobelletsa Ntate. **Kakaretso: (1) Khato ea pele ke menahano ea tumelo (2) Khato ea bobeli ke likhato tsa tumelo (3) Khato ea boraro ke mantsoe a tumelo (4) Khato ea bone ke mantsoe a kopane le likhato tsa tumelo (5) Khato ea bohlanong ke ho buoa qetello qalong.**

PITSO EA BARA BA MOLIMO:

Joalo ka bara ba Molimo, re bana ba hae e seng bahlanka lelapeng la hae. Ha re ea pholoso hore re tlo ba basebellets, empa re tlo ba bana ba Ntate Molimo. Re bara ka tsoalo, empa re basebellets ka khetho. Ntate Molimo o re entse, ebile o re pholositse hobane **(1) O batla ho ba le lelapa le leholo joalo ka motsoali (2) O batla hore re natefeloe ke likamano le kopano le eena (3) O batla hore re mo khumamamele le ho mo roris (4) O batla hore re amohele lerato la hae (5) O batla hore re be karolo ea `mele oa Krete le Monyaluo oa hae. O batla hore re hole re phethehe ho fihlella re ts'oana le Morena Jesu Krete.**

MESEBETSI EA MORA OA MOLIMO: (1) Mesebetsi ea rona joalo ka bara ba Molimo ke ho boelanya batho le Ntate Molimo le ho hahla `muso oa hae ka litsela tse fapaneng. (2) ke ho hahla `muso oa hae ka ho tisa lichelete le lintho tse ling tse bohlokoa ho oona (3) Ho busa lefats'e le ho hapa tse molemo tsa lefats'e sebakeng sa `muso oa Ntate Molimo, joalo ka bo mehaho, lits'a, lichelete, makoloi joalo joalo. (4) Ke ho senya mesebetsi ea satane le ho lokolla batho litlamong tsa hae (1Johanne 3:8).

Ka lebaka la mesebetsi ena, Liabolosi le matemona ba lula ba leka ho ema khahlanong le rona, ke ka hona bibe le reng re apare lihlomo tsa Moea kapa lihlomo tsa Molimo. (Baefese 6:10-19) Lihlomo tsena ke: (1) Lebanta la `nete ho tlama letheka: molumeli e be motho oa `nete ka lipuo le liketso tsa hae (2) Ho loka ho ts'irelletsa sefuba: molumeli a tsebe boemo ba hae ba ho loka le litokelo tsa hae ho Krete (3) Mafolofolo a ho bolela evangeli e le meqathatso ea hau: molumeli a chesehelle ho joetsa batho evangeli (4) Thebe ea tumelo: a lule a buoa tumelo le ho nka likhato tsa eona, ka ho etsa tjena o thiba metsu eohle ea liabolosi (5) Heleme ea poloko: mora a nkele pholoho ea hae hloohong, a seke a fumana a kopants'e Ntate Molimo le menate ea lefats'e e thetsang (6) Sabole ea lentsoe la Molimo: sabole ena re e sebelisa ha re buoa lentsoe la Ntate Molimo ka tumelo ka melomo ea rona holima maemo. Ha re etsa tjena re le lokolla e le sabole e n'qa li peli (7) Ho rapela ka Moea (lipuo) haholo. Boholo ba thapelo ea hau e be lipuo, `me u rapele ka tsona haholo.

Tse ling tsa lihlomo tsa Mora oa Molimo ke lineo tsa Moea O Halalelang (1Bakorinte 12:1-12): Lineo tsena li fuoa mora ke Moea O Halalelang, ha a li kalingoe. Ka hona hare fose ha re ka re ke lineo tsa mora oa Molimo. Lineo tsena re li sebelisa ho hapa ba lahlehileng le ho holisa balumeli. Lineo tsena li sebetsa ka likhato tse hlano tsa tumelo, `me li sebetsa ka khetho ea mora ka linako tsohle, susumetso e le teng kapa e le sio. Lineo tsena li ka tla ka litsela tse latelang. Tse ling molumeli o li fuoa hang ha a pholoso, tse ling ha a tlatsoa Moea O Halalelang, tse ling ka hoba karolo ea ts'ebelletso e sebetsang ka lineo tseno haholo, tse ling ka ho latella mosebelletsi ea itseng ea sebetsang ka lineo tseno, tse ling ka phetisetso ho tsoa ho molumeli e mong, e kaba ka peo ea matsoho, ka likhato tse ling tsa tumelo ka ho fapana, tse ling ka ho li kopa ka tumelo hobane o li rata. Mona ke litsela tse fapaneng tseo molumeli a ka fumanang lineo tsa Moea O Halalelang. Lineo tsena li fanoa ka mohau, `me li sebetsa ka tumelo. Haha bolele hore motho ea sebelletsang ka tsona o holile moeeng. Le bana moeeng ba ka sebelletsa ka tsona. Kholo ea moea e bonahala ka litholoana tsa Moea.

Lineo tsena li arotsoe ka likarolo tse tharo, ha tsona li le 9. Likarolo tsena ke lineo tsa ts'enolo, lineo tsa puo le lineo tsa matla. Lineo tsa ts'enolo ke (Neo ea tsebo, neo ea bohla le neo ea temoho ea meea). Lineo tsa puo ke (neo ea

boporofeta, neo ea maleme asele le neo ea tlhaloso ea maleme). Lineo tsa matla ke, (neo ea lipholisio, neo ea mehlolo le neo ea tumelo). Lineo tsena li sebetsa habonolo feela ha re sebetsa ka semelo sa bomolimo hobane ke karolo ea semelo sa moea. **Ea rutang a hlalose ts'ebeliso ea lineo ka tsela eo ke li hlalosang holim'a cd ea International Training Centre, joalo ka bo ho sebetsa ka neo ea tsebo joalo joalo, hape ba rutoang ba li behe ts'ebetsong.**

- 1) **Neo ea tsebo** ke ho ba le tsebo ka batho kapa ka maemo a fapaneng o e senoleloa ke Moea O Halalelang. Tsebo ena e ka tla e le ts'enolo e ka hlahang e le mehopolo le susmetso, pono kapa toro le tse ling tseo re li hlalosang thutong ea ho utloa Molimo. Ha e hlaha e le ts'enolo, hangata e hlaha e le mehopolo ea hau, hobane ha u sebetsa ka semelo sa bomolimo, mehopolo ea Ntate Molimo e ba mehopolo ea hau.
- 2) **Neo ea Bohlale** ke ho sebetsa ka bohlale ba Molimo ha o kopana le boemo bo itseng, le ho etsa se nepahetseng hore o tlo o be le litlamorao tse lokileng ha o tobana le boemo bo itseng. Neo ea bohlale hape e ka etsa hore molumeli a nke qeto e nepahetseng mabapi le bokamoso. Le bona bohlale bo ka tla joalo ka ts'enolo, pono kapa toro le tse ling tseo re li hlalosang thutong ea ho utloa Molimo.
- 3) **Neo ea temoho ea meea** e etsa hore molumeli a tsebe meea e sebetsang maamong a fapaneng. A ka lemoha ts'ebetso ea Moea O Halalelang le manyeloi, ea matemona le ho tseba merero le maikutlo a batho. Le temoho ea meea e ka hlaha e le ts'enolo, pono kapa toro le tse ling tseo re li hlalosang thutong ea ho utloa Molimo.
- 4) **Neo ea boporofeta** e etsa hore molumeli a khone ho senola pelo le kelello ea Ntate Molimo ka tsela ea semoea. Tsela ea semoea e bolela hore hase ka tsela ea maiqapelo, empa ka tsela ea ts'enolo le susumetso ea Ntate Molimo. Ke ho buoa o senoleloa ke Moea O Halalelang. Boporofeta bo ka hlaha e le ts'enolo, pono, toro le tse ling tseo re li hlalosang thutong ea ho utloa Molimo.
- 5) **Neo ea maleme asele** ke ho buoa lipuo tse teng lefats'eng tseo o sa ithutang tsona ka kelello kapa ho buoa lipuo tsa moea tseo ho senang motho ea mo utloisisang (1Bakorinte14:2), empa neo ena e lula e tsamaea le tlhaloso ea maleme haeba ho buuoa puo ea moea hore phutheho e tle e thusehe. Neo ena e fapane le neo ea lipuo e fuoang balumeli bohle ha ba tlatsoa ka Moea O Halalelang hobane eno bohoto eba puo ea moea e shebaneng le uena ka kotlolloho, ho matlafatsa kopano ea hau le Ntate Molimo le ho thusa ho tsamaea le eena.
- 6) **Neo ea tlhaloso ea maleme** e fa molumeli bokhoni ba ho hlalosa maleme a ntseng a rapeloa. A ka hlalosa ke motho ea ntseng a rapela ka oona kapa motho e mong le ha a ntse a sa rapele ka oona.
- 7) **Neo ea lipholisio** e fa molumeli bokhoni ba ho folisa maloetsi ka tsela ea semoea. E leng ho folisa mafu ka tsela ea mohlolo. 'Me hangata lipholisio li etsahala hang hang ha ho sebetsa neo ea lipholisio.
- 8) **Neo ea mehlolo** e fa molumeli bokhoni ba ho etsa mehlolo holim'a 'mele ea batho le lihloliloeng. Mohlala, ho hlaha ha lesapo mothong, ho atisa mahobe, ho hlakoha ha sekoloto ka tsela ea mohlolo.
- 9) **Neo ea tumelo** e fa molumeli bokhoni ba ho lumela hore Ntate Molimo a etse mehlolo e meng e phahameng ka pelenyana. Neo ea tumelo hangata e tsamaea le neo ea lipholisio le ea mehlolo. Ke eona e thusang neo ea mehlolo le lipholisio hore li sebetse habobebe. (Tumelo ena e fapane le tumelo eo re e fuoang bohle hare tsoaloa labobeli).

Lineo tsena li sebetsa ka likhato tse hlano tsa tumelo. Haele lintho tsa bo ho oa fats'e, ho thothomela, ho sisinyeha, ho ts'eha, ho lla, ho bilika le tse ling, ha li oele tlas'a lineo empa li oela tlas'a liponts'o tsa Moea O Halalelang. Liponts'o tsena li thusa batho hore ba lumele kapelenyana hape li bonahatsa boteng ba Ntate Molimo har'a bana ba hae.

Ea rutang o tlameha ho tsoselletsa lineo tsabalumeli ka hore ba bule matsoho, e be eena o buoa mantsoe a tumelo a hore Moea O Halalelang o tsoselletsa lineo tsa balumeli ka nako eno joalo feela ka ha ke etsa ho cd ea international training centre. Ea rutang o tlameha ho etsa lits'ebeliso (practicals) tsa lineo, 'me a li hlalose joalo ka ha ke li hlalositse bukeng ea International training centre, a be a li behe ts'ebetsong. Barutuo ba behe neo ea tsebo ts'ebetsong le bo lipholisio le tse ling. 'Me joale e mong le e mong a be le partner ea hae e be ba etsa lipontso tsa Moea O Halalelang tsa ho lokolla matla ka likhato tse hlano tsa tumelo, le ho fumana tsebo le ho buoa seo Ntate Molimo a se buoang. Empa ea rutang a li etse pele ponts'eng ea ba rutoang. A qale pele ka ho ba bonts'a mohlala. Shebella cd ea liponts'o tsa Moea O Halalelang le li practical tsa training centre tse hlahang ho cd e fuoang balumeli ba rutang training center. (Ea rutang o tlameha ho shebella le ho mamela lithuto tsena tsa ts'ebeliso ea lineo khafetsa pele a etsa karolo ena ea ho sebetsa ka lineo, thuto ena e hlaha thutong ea bara ba Molimo bukeng ea International training centre ka leqepheng la 28-37, a bale buka ea teng a mametse le cd ea teng hobane joale haeba ena a haelloa ntlheng ea ho sebetsa ka lineo le ho ruta ba bang ho sebetsa ka tsona, o salletse morao, 'me le eena o tla sallisa bao a ba rutang morao).

LITS'EBETSO TSA MOEA O HALALELANG: Ho na le lits'ebetso tse ngata tsa Moea O Halalelang joaloka bo **Yawhew Shammah:** ke ho bonahatsa boteng ba Ntate Molimo hohle moo o teng ka litsela tse fapaneng. **'Musu oa Molimo:** o bonahatsa matla le borena ba 'musu oa Molimo. **Like Father like Son:** mora o bonahatsa ho ts'oana ha hae le Ntate. **Matla**

a Mora: mora o qala liponahatso tsa Moea O Halalelang tseo a li ratang. **Ts'ebetso ea borena:** mora o sebetsa a lutes fats'e (teroneng ea hae) joalo ka Morena Molimo feela. **Lentsoe la Ntate:** mora o utloahatsa lentsoe la Ntate ka litsela tse fapaneng joalo ka bo lipono, litoro, boporofeta, lipuo le tlhaloso joalo joalo le ka lineo tsa ts'enolo le tsa puo. **Puisano le Ntate:** motho o botsa Ntate Molimo potso, e be Ntate o araba hang hang ka tsela tse fapaneng tseo re qetang ho buoa ka tsona, empa a lokolloa ke mora. **Tsebo ea Ntate:** mora o bonahatsa tsebo ea Ntate a sebelisa lineo tsa ts'enolo. **Ts'ebetso ea Boemeli:** mora o bonahatsa matla a hae a boemeli joalo ka bo ts'irelletso joalo joalo. **Ketso le ketsiso:** mora o etsa ketso e itseng, e be Moea O Halalelang o etsa ketso e ts'oanang le ea mora ka motho e mong. **Point of contact:** mora o ts'oara ho hong ho ts'oara motho ea hole le eena. A ka ts'oara `mele oa hae, senepe kapa phahlo ea motho joalo joalo. **Leru la Moea O Halalelang:** mora o lokolla ponahatso ea Moea O Halalelang holim'a batho ba bangata ka nako e le `ngoe. **Mollo oa Moea O Halalelang:** Mora O lokolla ponahatso ea Moea O Halalelang e le mollo. O ka utloahala joalo ka mollo o chesang ha monate kapa habohlolo oa kahlolo kapa bohatsu joalo joalo. **Ho ts'oara/arrest:** mora o lokolla Moea O Halalelang ho ts'oara batho ho fihlella a ba lokolla. **Liponahatso tsa Moea O Halalelang boemong ba nama** (silver and gold dust, oil, diamonds, Angels feathers, gold teeth fillings etc. (Ea rutang o tlameha ho hlalosa liponts'o tsena le ho bonahatsa tse ling tsa tsona ho ea kamoo ke li rutang le ho li bonahatsa bukeng le ho dvd ea international training centre. Tsena se li fumaneha you tube leqepheng la Sonshiplife ITC le www.voiceofgodfm.co.ls ho materials). Le ha hole joalo, Litho tsohle tsa New Testament Church li khothalletsoa ho tla training centre, `me ha li qeta li tlameha ho fumana buka le Cd ea International training centre, `me ba qete thuto ea International training centre ba bala buka le ho mamela cd ea teng. Training centre e fa balumeli motheo o nepahetseng, international training centre e ba koetlisetsa boetapele). Liponts'o tsena li bonahatsa boteng ba Ntate Molimo har'a rona, `me li bohlokoa haholo hobane li kholisa batho kapelenyane ka `nete ea hore Ntate Molimo o oa phela. (qalella ho beha lineo tsena tsèbetsong haholo hohle moo o leng teng) Ha ho tlua lits'ebetsong le lineong tsa Moea O Halalelang, mora o tlameha ho sebetsa ka tumelo, eseng ka kelello. Mohlala, haeba a rapella mokuli, a qobe ho buoa mantsoe a mangata, empa a buoe seo a lebelletseng ho se bona feela, joalo ka bo, o folile, ema o tsamae joalo joalo. A se ke a nahana hore na mohlolo o tla etsahala joang. Eena a bue le ho nka likhato tsa tumelo feela tse leqophe.

Ea sebelletsang ka lipholisano o tlameha ho tseba tsena tse latelang: (1) Hase lipholisano tsohle tse etsahalang hang hang (2) Ea rapelloang a rutoe ho tsòarela (3) Ea rapellang a rapele ka tumelo e likhoka, e leqophe (4) ea folisang a se ke a nyahama ha batho ba bang ba sa fole hang hang (5) Ea folisang a mamele Moea O Halalelang nakong eo a sebetsang ka lipholisano (6) Ea folisang a phahamise tumelo ea ba rapelloang pele a ba rapella, a ka etsa hona ka ho rapella ea nang le lefu le bonahalang ponts'eng ea bohle. Mohlomong a folisa ea hlotsang kapa ea sa boning joalo joalo. Seo ba shebileng ba ka se bonang ha a folile. (7) Ea rapellang a se ke a re batho ba tlohele lipisi hang hang ha a qeta ho ba rapella, ntle le haeba Moea O Halalelang a mo senolela joalo, empa a ba khothalletse ho hahla tumelo ea bona, le ho khutlela ngakeng ba lo paka hore mafu a neng a ba ts'oere a folile. (8) Ba rapelletsoeng ba amohela Morena Jesu ha ba so mo amohela (9) Ea folileng a tsòarelle polelo ea hae ea tumelo le ho hlatsoa likobo le liphahlo tseo a neng a li sebelisa ha a ntse a kula. (10) Ho kaba molemo ha ea folisang a kopanya lipholisano le lipontsò tsa Moea O Halalelang hobane li hahla tumelo ka pele.

Ea sebelletsang ka boporofeta o tlameha ho tseba tsena tse latelang: Tsela ea ho utloa Ntate Molimo ka nepo le ho porofeta ka phethahalo ke eena eo ke tlo e hlalosa. Lintho tseo ke li ngotseng mona li tla u thusa ho nepa Ts'enolo, tlhaloso le peo ea litaba ha u porofeta.

Ts'enolo (Revelation): ke seo Ntate Molimo a u senolelang sona, mohlomong u bona sets'oants'o se itseng ha u sheba motho kapa u tleloa ke lentsoe le itseng. **Tlhaloso (Interpretation)** ke hore na sets'oants'o kapa lentsoe leno le bolela eng ha le amahangoa le motho eno eo u mo porofetang kapa seno se porofetoang. **Peo ea litaba (Application):** ke hore na taba eno u tlameha ho e hlaloesetsa motho eno joang kapa neng. Mohlomong u hloka ho mo joetsa taba eno moo a leng mong kapa na u hloka ho mo joetsa taba eno neng joalo joalo.

1. U tlameha ho utloa u phomotse ka botlalo moeeng oa hau. Ho etsa tjena ke ho bonts'a tumelo e phethahetseng ho Ntate Molimo, ea hore ke eena ea tlo buoa, `me hase uena ea iketsetsang lintho kapa ho iqapela.
2. Nts'a lintho ka kelellong ea hau. U se ke oa tla ho motho u se u inahanetse lintho ntle le haeba Ntate Molimo a se a u joetsitse taba ka motho pele u kopana le eena, kapa oa iketsetsa molaetsa ho ea ka ts'obotsi kapa moaparo oa hae. Mohlomong ha u bona a apere joalo ka sono, o bo o so o re oa bona hore o sokolana le lichelete.
3. Hopola hore boporofeta bo oa ts'elisa, boo a khothatsa le ho matlafatsa (1Bakorinte 14:3), joale boporofeta ba hau bo tlise mats'eliso, khothatso le matlafatso ho batho, e seng tsuo, pherekano le liqabang. Haeba e le khalemo kapo e le bo elellisang motho kotsi e ka etsahalang, e buuoe ka lerato le ka boikokobetso, haholo lekunutung.
4. Ea porofetang a qobe hore **"Molimo o re"** haholo haele motho ea ntseng a ithuta ho utloa Ntate Molimo, empa a mpe a re eena o oa bona kapa o oa utloa ho hong ka motho. Mohlala ke hore, ke bona hore o teteбетse, ho fapana le hore, Ntate Molimo o re o teteбетse.

5. Ea porofetang a se ke a hatella (manipulate) batho kapa hona ho ba laola (control) ka boporofeta. **Hape a se ke a ipitsa moporofeta feela** hobane a bona neo ea boporofeta e sebetse bophelong ba hae. A ka ipitsa moporofeta feela ha Ntate Molimo a mo file Ofisi ea Moporofeta, haeba a sa tsebe ka ofisi eno kapa a so hlakeloe ke ofisi ea hae, a seke a ipitsa hono.
6. Haeba u tlo buoa ntho e seng eona kapa e ba u tlo e buuo ka tsela e fosahetseng kapa ka tsela e sa phethahalang, Moea O Halalelang o tla leka ho o thiba pele u buoa. U tla utloa ts'oenyehonyana (Disturbance ka hare ho uena mpeng ea hau). U imamele ka hare ho moea oa hau. Tsela e bobebe ea ho etsa hona ke ho ikutloa hore na u ikutloa joang sebakeng sena moo mpa e leng teng nameng hobane sebaka sena se supa botebo ba hau ba moea (Johanne 7:37).

Ha u utloa ts'oenyeho e nyane, ke sesupo sa hore u fositse hanyane, mohlomong tlhaloso e fosahetse ha ts'enolo e nepahetse kapa peo ea litaba e fosahetse joalo joalo, empa u fositse ha nyane. Ha u utloa ts'oenyeho e kholo e tsamaea le ntho e kang letsoalo, ke sesupo sa hore o tlo ipuela tsa hau, 'me Moea O Halalelang o se a ntse a u thiba pele u buoa, u se ke oa hatella maikutlo ano. Ithute ho ikutloa ka hare pele u buoa.

7. U seke oa tatela ho buoa taba e so u hlakele. Ithute ho mamela le ho hlakeloa pele o buoa. Haeba u so hlakeloe, emela hore Ntate Molimo a tiise taba eno pele u e buoa. Se ke oa buoa ka pele eaba u tlo phopholetsa u batlana le hore na Ntate Molimo o ne a bolela eng. Haeba o sa hlakeloe, thola ka taba eno ho fihlella o hlaketsoe. Ntle le haeba Ntate Molimo a buoa lentsoe le leng feela, 'me ebe joale u tlameha ho botsa motho hore na o amana joang le taba eno.
8. Haeba o tlo tsoa mohaung o holima hau, o tla utloa ts'oenyeho e kholo le letsoalo moeeng oa hau. Porofeta ho ea ka mohau o holim'a hau, o se ke oa leka ho etsisa motho e mong. Buoa seo o se senoletsoeng feela, o se ke oa leka ho porofeta lintho tseo o nahanang hore li tla makatsa batho tseo o lekanyang hore li kholo. Boporofeta bohle bo bohlokoa hobane lintho tsohle tse buuoang ke Ntate Molimo li bohlokoa. Porofeta ho ea ka tumelo ea hau.
9. Linako tse ling Ntate Molimo a ka senola lintho tse makatsang (spectacular), linako tse ling e tla ba lintho tseo u nahanang hore li tloaelehe. Uena buoa seo o se senoleloang feela, o seke oa batla hore batho ba o utloe hore o khona ho porofeta lintho tse makatsang. O ithute ho latella Ntate Molimo ha u porofeta, u seke oa mo etella pele kapa oa salla morao. Linako tse ling ts'enolo e tla tla kapele, ka tsela e phahameng, 'me le uena u ka e buoa ka tsela e joalo, linako tse ling e tla tla butle, le uena u e bue ka tsela e joalo, le teng u buoe seo u se senoleloang feela.
10. Porofeta ho ea ka tumelo ea hau, hape o fumane hore na Ntate Molimo o buoa le uena joang haholo. Ba bang e tla ba ka lipono, ba bang ka ts'enolo le susumetso, e tla ka mehopolo le maikutlo, ba bang ka litoro, ba bang ka litsela tse ling. Fumana hore na uena Ntate Molimo o sekametse ho sebelisa tsela e feng ea ho buoa ha a buoa le uena, 'me o ipabole ka eona.
11. Qoba ho phopholetsa ha u porofeta, hape o seke oa buoa seo u se nahanang feela, empa u buoe taba eo o tiileng ka eona. Ha u so hlakeloe, u thole.
12. Ba le nako e ngata le Ntate Molimo u tlo u khone ho tseba lentsoe la hae ha ntle. Rapela haholo ka lipuo le nako lentsoeng la hae. Etsa polelo ea tumelo ea hore u porofeta ka nepo ka linako tsohle, u khona ho utloa Ntate Molimo hantle, hopola hore u buoa pele u bona.

Haeba u fuoe boporofeta, u tlameha ho tseba hore ha bo phethehe feela uena u sa etse letho. Le uena u na le karolo. U tlameha ho bo utloisisa, u mamele le ho etsa lentsoe la Ntate Molimo. U lule pela Ntate Molimo le ho etsa lintho ka nako ea hae. Nako ea hae u e tseba ha u tsamaea pela hae. Hape u tsamaee ka tumelo holima tseo Ntate Molimo a li buileng. Mohlala, haeba u fumane boporofeta ka hore u tla ba mohoebi e moholo, qala khoebo ea hau ka tumelo, ka tsamaiso ea ho jala le ho kotula. E leng ka ho fana pele ho Ntate Molimo sebakeng sa khoebo ea hau, hape u buoe tumelo hore na u bona khoebo ea hau e le hokae.

Ea sebetsanang le matemona o tlameha ho tseba tseo ke li ngotseng thutong ea liabolosi le matemona, moo ke buoang ka ho sebetsana le matemona.

KHOLO EA BARA BA MOLIMO:

Bibele e re joetsa hore re hole moeeng, re e pele re tlohele lithuto tseo ho qaloang ka tsona. (Baheberu 6:1-3). Morena Jesu o fane ka lineo tsena tse hlano hore li phethahatse balumeli boreng le boralang ba bona (Baefese 4:11-17). Re tlameha ho tloha boseeng hofihlela re holela boreng le boralang ba rona ho Krete. Joale ho na le maemo a fapaneng bophelong ba moea joalo ka bophelong ba nama feela. **Re tlo shebana le maemo a fapaneng a moea.**

MASEA MOEENG: Masea a moea ha a tsebe ho tsamaea ka tumelo, a tsamaea ka pono le ka kutlo, a ka tsamaea ka nama (1 Bakorinte 3:1-5), a ka rata ho ipapisa, ho itseka, a hlokofatsoa ke lintho tse nyane. A hloka ho jesoa lithuto tse nepahetseng, a hloka ho hlokomeloa ka hohle hohle. A rata papali. A rata ho bapala ka ineo tsa Moea. Morena Jesu o iponahatsa ka bonolo

ho masea moeeng. A ja ntho e `ngoe le e `ngoe. A koenya lithuto tsohle le tse sa nepahalang.

BANA MOEENG: Ba ithuta ho tsamaea ka tumelo, hangata o tla utloa puo ea bona e kopa kopane, ba kopantse tumelo le kelello. Le bona ba rata papali, ba ka amohela lithuto tse thatanyana. Linako tse ling ba ka ratana le lineo ho feta Ntate Molimo. Ba ja ntho e `ngoe le e `ngoe. A koenya lithuto tsohle le tse sa nepahalang. Morena Jesu o iponahatsa ka bonolo ho bana ba tjena, `me o ba ts`epa ka mesebetsi e menyane feela.

BAHLANKANA LE BAROETSANA MOEENG: Ba se ba khona ho tsamaea ka tumelo. Ba rata ho bonahatsa seo ba nang le sona le ha ho sa hlokahale. Hangata ba nahana hore ba tseba tsohle tse ba lokelang ebile linako tse ling ba nahana hore Ntate Molimo o taolong ea bona. Ba ka itseka kapa ho ikhohomosa. Hangata ba na le cheseho e ngata ho feta bohlale. Hangata Morena Jesu o iponahatsa ka bohale ho ba tjena ha ho hlokahalo, `me a ka ba ts`epa ka mesebetsi e meholonyana.

BARA LE BARALI MOEENG: Morena Jesu ke mohlala o phethahetseng oa mora ea holileng moeeng. Bara ke ba holileng kutloisisong ea bona ka Ntate Molimo. Ba tsamaea ka litholoana tsa moea (Bagalata 5:22). **Litholoana tsa moea ke agape eleng lerato la bomolimo, khotso, thabo, mamello, mosa, molemo, bots`ephehi le boitsoaro. Ba tsamaea ka tumelo ea Molimo, lerato la Molimo, bohlale le ts`enolo ea Moea O Halalelang. Ha ba etse lintho feela ka hlooho e nts`o kapa hobane ba ipatla. Ba tsitsitse thatong ea Ntate Molimo, `me tsohle tseo ba li etsang li khannoa ke lerato la Ntate Molimo (1Bakorinte 13:1-13). Lihloliloeng li emetse ponahatso ea balumeli ba tjena. Bana Morena Jesu o khona ho ba ts`epa ka mesebetsi e meholo, `me ho bona, Morena Jesu o iponahatsa ka bonolo le bohale ho bona.**

**BAKRESTE BA BOFATS`E:** Bana ke bakreste ba tlamehang hore e be ba holile moeeng, empa ha ba hola ho ea ka ts`oanelo. Ba ithatafatsa lipelo, ba phehella ka bophelo ba sebe. Ba khoka Ntate Molimo, `me ha ba sa itlhokomele, Morena Jesu o tla ba ts`oela. Ho ba ts`oela ke ho khaola kutloano (fellowship) le eena hore hle ba phele litshila ba bate hore mohlomomg tle ba ipone hore se ba le thoko le eena tle ba khone ho khutlela ho eena (Ts`enolo 3:15-22, Bafilipi 3:18-20).

U ETSA JOANG HORE U PHELE SEE SEO NTATE MOLIMO A U ENTSENG SONA HO KRESTE, E LENG HO PHELA KA PONAHTSO EA MORA/MORALI OA MOLIMO.

Hore u phele boemong ba mora kapa morali oa Ntate Molimo ea bonahalitsoeng, hape u phele bophelo boo Morena Jesu a u reketseng bona ka mali a hae, e leng bophelo ba kutloano le Ntate Molimo, ba khanya, ba katleho linthong tsohle, ba matla le borena, bophelo ba bomolimo ka kakaretso, u tlameha ho etsa tsena tse latelang: **Linnete tsena tsohle li etsahetse moeeng oa molumeli, empa u li bonahatsa nameng ka tumelo e phethahatsoa ke polelo ea molomo.**

- 1) Bala hape u thuisse lentsoe la Ntate Molimo. Qeta testamente e ncha, 'me u e bale ka boitelo le ka kutloisiso.** E balle ho itseba hore na u mang ho Krete le hore na Ntate Molimo ke mang ho uena, le hore na o ofile eng. Hopola hore bibeke ke seipone sa hau sa moea. Sehella ka mekala e fapaneng litamana tse buoang ka hore na: u mang ho krete, kapa na u na le eng ho eena, kapa na u ka etsang ho eena. Sehella hape tse buoang ka hore na Ntate Molimo ke mang ho uena, hape na o sebetse joang le uena. Mohlala, litemana tse kang (2 Bakorinte 5:17), "Ha motho a le ho Krete, ke `mopuo e mocha..., kapa ena ea (Bakhalata 3:26) "Hobane bohle le bara ba Molimo ka ho lumela ho Jesu Krete"...Litemana tsena li u joetsa hore na u mang ho Krete. Johanne 5:24 eona e re, "ba lumelang ho 'na ba na le bophelo bo sa feleng", ena eona e u joetsa hore na u na le bophelo bo sa feleng ho Krete. U etse litemana tsena tsa hao (personalize them). (Mareka 16:15) e u joetsa hore na u ka etsa eng ho Krete, "ba lumelang ba tla folisa bakuli, ba leleke matemona ka lebitso laka...Litemana tse ling ha li u joetse li u tobile hore na u mang kapa ona le eng, empa u tlameha ho li etsa tsa hao. Ha u qetile testament e ncha ka makhetlo khetlo, u e utloisisa ka phethahalo, qala ho bala ea khale. Eona e tla u ruta semelo le mesebetsi ea Molimo Ntate haholo. E balle ho utloisisa le ho tseba Ntate Molimo le hore na o ikutloa joang ka uena. E tla u ruta le ho tsamaea ka tumelo ho Ntate Molimo ha u bala ka lipale tsa bahale ba tumelo (1 Bakorinte 10:11) e ea re joetsa hore lintho tsena li ngolletsoe ho ba mehlala ea rona balumeli.
- 2) Rapela ka lipuo/ ka moea haholo:** Ho rapela ka moea ke ho rapela ka lipuo. Neo ena ea lipuo e fuoa balumeli bohle ba amohetseng Morena Jesu maphelong a bona. Ha u rapela ka lipuo, ho rapela moea oa hao o tsoetsoeng labobeli, e seng kelello ea hao. Testamenteng e ncha bibeleng, re bona ho rapeloa ka lipuo haholo, 'me hona ke mohlala oa rona. U tlameha ho rapela ka lipuo haholo ho feta ka kelello, e leng ka puo e utloahalang kelellong kapa puo ea heno. Ha u rapela haholo ka lipuo, tsena tse latelang li tla bonahala bophelong ba hao: **1)** U tla tseba Ntate Molimo ka botebo, `me le be le kopano e matla le eena, **2)** u tla utloisisa bibeke habobebe, 'me u tla e utloisisa ka botebo, **3)** u tla khona ho utloa lentsoe la Ntate Molimo ha bonolo ha a bua le uena, **4)** U tla khona ho tsamaea ha bonolo ka semelo sa hau sa moea, **5)** u tla khona ho tsamaea ha bonolo le Moea O Halalelang le ka lineo le li ts`ebetso tsa hae. **6)** U tla khona ho tsamaea ka sebetse sa bomolimo linthong tsohle, 'me letsoalo lohle le tla tloha bophelong ba hao, **7)** tumelo ea hao e tla holela boemong bo phahameng ho feta boo e leng ho bona, **8)** u tla khona ho sebetse ka bohlale ba Ntate Molimo hape u tla lula u tletse Moea O Halalelang. Ho tla Moea O Halalelang ho

bolela ho re Moea O Halalelang O khona ho iponahatsa le ho sebetsa ka uena. **9)** O tla lula o tletse matla a Moea O Halalelang hape tumelo ea hau etla lula e matlafala. **10)** Moea oa hau otlala lula o le matla hobane ha o rapela ka lipuo, oa ikaha moeeng le ho imatlafatsa. Le tse ling tse ngata tse molemo li tla etsahala bophelong ba hau. Rapela haholo ka lipuo ho feta ka kelello. Mohlala, haeba u rapela hora, rapela metsotso e 55 ka lipuo. Ho tloha mono, u iphe nako le Ntate Molimo ka khumamelo, lithoriso, ho shebella le ho mamela, le ho bala lentsoe la hae le tse amanang le lona (**1Bakorinte14:2,4,14,15,18, Baefese6:18, Jude1:20**).

Lipuo li lula li tsamaea le boporofeta 'me lineo tsena li ka sebetsa ka litsela tsena tse latelang:

Lipuo le boporofeta tsena li ka tla ka mekhahlelo e meraro eleng ena e latelang **(1)** Motho a ka bua lipuo tse teng lefatsheng tseo a sa ithutang tsona ka kelello joalo ka bukeng ea liketso 2:4 moo ba neng ba bua lipuo tse teng lefatsheng hape ba porofeta ba bolela mesebetsi ea Ntate Molimo e metle 'me sena ene ele molemong oa batho ba neng ba ba mametse le bopaki ho bona ba hore hona le mosebetsi o mocha oo Ntate Molimo a o etsang.

2) E kaba lipuo tsa Moea tseo eseng puo e teng lefatsheng kapa ea eba puo e lefatsheng empa le eona e tsamaea le boporofeta hore phetheho e e tle e fumane molemo, 'me boporofeta bona bo ka hlaha e le tlhaloso ea maleme a sele kapa ka tsela tse ling tsa boporofeta tseo re tla li hlalosa ha ntse re ea pele Joalo ka ho bakorinte 12:4-7 ha ho buuo a lipuo tseo molumeli a li fuoang molemong oa ho thusa ba bang. **3)** Ke lipuo tseo molumeli a li fuoang molemong oa hae hore a be ke kopano e matla le Ntate Molimo joalo ka ha ho buuo a ho **1 Bakorinte 14:2 le 4**, 'moo ho senang motho a mo utloisisang me le tsona li tsamaea le boporofeta ba ho buua seo Ntate Molimo a o senolelang sona o se phatlallatsa joalo ka ha eka se se se etshahetse mme re hlalosa sena haholo thutong ea Bara ba Molimo le ea thapelo. Mona ke moo o rapelang ka lipuo bonngoeng kapa molemong oa hau ese hakaalo hore o hara batho kapa phuthehong. **Boporofeta boo retlo teba ka bona thutong ena ea Bara ba Molimo le ea thapelo ke bona boo o bo etsang thapelong ea hau ea lipuo bonngoeng (personal prayer).** Boporofeta bona bo ka hlaha ele tlhaloso ea lipuo kapa ts'eno kapa batla ka litsela tse ling mme sena ke molemong oa hau joalo ka molumeli, 'me bona bo sebetsa ka tsela ena e latelang;

2.1) Lipuo le Boporofeta: Ha ontso o rapela ka lipuo, o itloaetse ho porofeta. Boporofeta bona bo sebetsa ka tsela e latelang..Ha o rapela ka lipuo o bua puo ea moea 'me o bolela liphiri tsa Ntate Molimo ka moea 'me ebe li senoha kelellong ea hau, empa joale lipuo li sebetsa semoeeng boholo, joale seno seo o se senolelang moeeng oa hau ha ontso o rapela ka lipuo, otlameha hore o qale ho se porofeta. Ka mantsoe a mang o qale ho se bua ka sesotho kapa puo ea heno e utloahalang mme o se bitse se se etsahetse. Mohlala, mohlomong ha ontso rapela ka lipuo o qala ho bona pono kelellong ea hau ea katleho ea hau kapa mohlomong ea seo Ntate Molimo a batlang hore o se etse, ha o porofeta otlo qala ho phatlallatsa seno seo o se bontshoang se se etsahetse ka tumelo. Mohlomong o bona lelapa leno le se le pholositsoe. Ha o porofeta, otlo re Ntate kea leboha hobane lelapa lesa le pholositsoe hona joale.

Lipuo li fehla matla a mollo (Dunamis) a ka hare ho meea ea rona, ha boporofeta bona bo lokolla matla ano ebile bo supisa (direct) matla ano mosebetsing kapa maemong a itseng. Boporofeta bona bo kenyetse ho bitsa seo o se bontsoang kapa seo o se utloang ha o rapela ka lipuo 'me o se bitsa joalo ka ha eka se se se etsahetse lefatsheng la nama hobane tumelo e bitsa lintho tse sio joalo ka ha eka li teng. O tlameha ho bitsa tse sio joalo ka ha eka li teng ha o porofeta!!!!

Lintlha tse bohlokoa nakong ea boporofeta: A) Nakong eo u rapelang ka lipuo u fehlehile joalo, ebe mohlomong u fumana ts'eno ea seo Ntate Molimo a batlang ho se etsa kapa seo u ntseng u se rapella ka lipuo, u hlo porofete ka matla ka eona nako eno moea oa hau o ntse o fehlehile hobane mantsoe a boporofeta a buuang ka nako eno a tla tsoa ka matla a fetang ao u a buang ha moea oa hau o sa fehleha joalo. **B)** Ha u porofeta ha se hore u tlameha ho lula u bua mantsoe a mangata, empa se bohlokoa ke ho bua mantsoe a tumelo ka nako eo u fehleleng mollo oa Moea O Halalelang ka nako ea lipuo. Mohlomong u ka pheta pheta lentsoe le leng kapa a mabeli makhetlo ho fihlella o utloa hore seno se etsahetse semoeeng 'me se tla bonahala nameng. U tseba sena ka ho utloa khotso le phomolo moeeng oa hau. Se bohlokoa ke hore feela o latelle seo u utloang moea o u etella pele ho se etsa, ka nako ena kelello e se ke ea kena tseleng ea hau. **C)** ha u utloa hore u nke likhato tsa tumelo mohlomong u foka letsoho e le ho lia marako kapa bothata bo itseng kapa u hula letsoho e le ho hula se seng lefatsheng la semoea ho li tliša nameng, etsa joalo ka tumelo 'me o phete khato eno ha ho hloka hloka ho fihlella u utloa hore ho phethahetse moeeng oa hau ka ho utloa phomolo le khotso. Ha feela u so utloe phomolo moeeng, u nno u phehelle ka boporofeta le likhato le lipuo hobane ke hona ho ntso ho etsahala semoeeng, 'me phehello ea hau e tliša phethahalo 'me ha u fihletse phethahalo, u tliša ba le phomolo moeeng oa hau. **D)** Boporofeta bona bo ka kenyetse liphatlallatsa, likhato tsa tumelo, tlhaloso ea maleme joalo joalo, se bohlokoa ke hore u lumelle moea oa hau hore u phuthullohe joalo ka ha u rapela ka lipuo feela. **E)** Boporofeta nako tse ling bo bitsa lintho tseo o batlang ho li bona ka kotlolloho le ka ho li toba (be specific) joalo ka Ezekile ha a hloka hore moea o kene litopong o ile a bitsa moea ho tsoa n'geng tse nne tsa lefatse. Le uena nako tse ling ha o porofeta ho molemo ho bitsa lintho tseo ka kotlolloho tseo o batlang ho li bona. **Bala Ezekiel 37:1-14 u tlo utloisise matla a boporofeta hantle. Ha re porofeta masapo a omelletse aa kopana semoeeng, ha re tsoelapele mesifa le nama lia hlaha li koele masapo a omelletse, ha ntse re tsoelapele moea o oa kena, 'me ebe bophelo bo ba teng, mona ke pono e bonts'ang matla a boporofeta a ho fetola maemo a rona.**

3) Bua lentsoe la Ntate Molimo: U tlameha ho lula u bua lentsoe la Ntate Molimo ha u batla ho bona le bonahala bophelong ba hau. Ho le lumela feela ha o oa lekana. Ha u le lumela pelong ea hao, 'nete eno eo o e lumelang e ea phethahala moeeng molemong oa hau, empa ha u le bua ka molomo, 'nete e no e iponahatsa nameng mothong oa k antle. U tlameha hore u lule u bua seo Ntate Molimo a se chong ka uena ka linako tsohle, u se ke oa bua bophelo le lefu ho tsoa molomong oa hau. Bua feela seo u batlang ho se bona, le seo Ntate Molimo a sechong ka uena. **Leleme la hau ke senotlolo se tliša u kenya moo u batlang ho**

phela teng (maele 18: 20 le 21) (Mareka 11:22-24). (liphatlallatso tsena li bohlokoa haholo empa li fapane le boporofeta ka hore tsona u ka li ngola fats'e 'me oa li bua mehlaena ha boporofeta bona bo tla e le ts'enolo le ts'usumetso ka nako ea lipuo empa le tsona ntse li le matla haholo ebile le tsona e ntse le karolo e ngoe ea ho porofeta)

4) Etsa ka lentsoe la Ntate Molimo: Ho tloha mona u tlameha ho etsa ka lentsoe la Ntate Molimo. Lula u nka likhato holima lona, 'me u le beha ts'ebetso ka linako tsohle. Ha bibe le re etsa tjena, u etse joalo. Ha le re u se ke oa touta ka letho, u itjoetse hore u ke ke oa touta ka letho, ha le re u behe bakuli matsoho, u etse joalo. Ha le re u lebohe ka linako tsohle, u etse joalo, u se ke oa iphumana u tletleba le ka mohla o le mong. Ke hona ho etsa ka lentsoe ho etsa joalo, 'me ha u lula u etsa ka lona, u tla khona ho tsamaea ka ponahatso ea mora /moralis oa Molimo ha bonolo linthong tsohle, ka linako tsohle. U nke likhato holima lentsoe ka tumelo, e seng ho latela maemo kapa maikutlo. **U tsebe hore u seo bibe le reng u sona, u na le seo bibe le reng u na le sona, u khona ho etsa seo bibe le reng u se etse. Ka hona, ipone ka moo bibe le e u bonang ka teng feela, 'me u ipuo e joalo feela. Ha u etsa tjena, u tla bona ponahatso ea lentsoe la Ntate Molimo bophelong ba hau.**

LIPOLELO TSA TUMELO TSEO U KA LI ETSANG KE TSENA TSE LATELANG, U LI ETSE KAMEHLA KA MORA NAKO EA HAU EA THAPELO HAPE U INGOLLE TSA HAU TSE AMANANG LE BOPHELO BA HAU LE MORERO OA NTATE MOLIMO KA UENA. U HOPOLE HORE KA TUMELO, U IPONA U SE U LE MONO MOO NTATE MOLIMO A O BATLANG TENG, KAPA MOO EENA A U BONANG U LE TENG. HO SA TSOTELEHE HORE NA U RAKHOEBO, SEHOAI, MORUTI, MOREKISI, JOALO-JOALO, TS'EBETSO EA TUMELO E SEBELIETSA BATHO BOHLE. 'ME HA U KANNA OA LI BUA, U LI LUMELA, U TLA BONA SE LI BONAHLA BOPHELONG BA HAU BA NAMA.

- 1) Ke tsamaea ka botlalo ba tsebo le ts'enolo ea Molimo (Ntate, Mora le Moea O Halalelang) honajoale.
- 2) Ke tsamaea ka botlalo ba ponahatso e felletseng ea mora / moralis oa Molimo hona joale. Ke Morena, 'me ke rena holim'a tsohle, ke mopresta, 'me ke sebeletsa Ntate Molimo ka khalalelo le boinehelo, ke 'mopuo e mocha, tsa khale ha lina matla holim'a ka, ke moemeli oa Morena Jesu lefats'eng, ke phela ka tsamaiso ea leholimong.
- 3) Ke tsamaea ka botlalo ba matla, ts'enolo, puso, bokhoni, lineo, khanya, mohau, kutloisiso, litokelo, khalalelo, ho loka, semelo, katleho le ponahatso e felletseng ea mora / moralis oa Ntate Molimo hona joale.
- 4) Ke phethahatsa thato ea Ntate Molimo ka bophelo baka ka botlalo honajoale.
- 5) Ke tsamaea ka tlholo holim'a satane le mesebetsi ea hae, le 'muso oa hae ohle hona joale. Kena le matla holima bokuli, lefu, bofutsana, lithohako, bohloki, ho se atlehe, sebe le tsohle tse tlleng ka lebaka la ho oa ha Adama, 'me ke bonahatsa tlholo eaka holim'a tsona hona joale.
- 6) Ke tsamaea ka botlalo ba ponahatso ea Moea O Halalelang le liponahatso tsa hae tse supileng honajoale, e leng Moea oa Borena, oa Bohlale, oa kutloisiso, oa Boeletsi le oa Matla, oa Tsebo le oa Ts'abo ea Morena.
- 7) Ke utloisisa thato ea Ntate oaka, 'me ke e phetha ka botlalo honajoale.

Etsa lipolelo tsena tsa tumelo khafetsa, 'me u iketsetse le tsa hao tsa moo u batlang ho ba teng bophelong ba hau le Ntate Molimo.

MONA KE TATAISO EA HO QETA TESTAMENTE E NCHA KA KHOELI, LE LITEMANA TSOHLE TSE BUOANG KA HORE NA U MANG HO KRESTE, HAPE NA U NA LE ENG HO EENA LE HORE NA U KA ETSANG KA KRESTE EA U FANG MATLA.

HOPOLA, TSELA EA HO HOLA KAPELE MOEENG KE HO IKHANNA HAHOLO. BALA LITEMANA TSENA, 'ME U LI SEHELLE KA BIBILENG EA HAU. MEBALA E FAPANENG E TLA U THUSA HAHOLO. ETSA HORE U QETE TESTAMENTE E NCHA KA MAKHETLO-KHETLO, U E UTLOISISE HANTLE, HA U QETA U BALE EA KHALE, EMPA KA KUTLOISISO EA HORE EA KHALE KE SERITI SA E NCHA.

LITS'EPISO TSOHLE TSE SELEKANENG SA KHALE, HA ESALE LITS'EPISO HO RONA BA TLAS'A TESTAMENTE E NCHA, EMPA E SE E LE LI'NETE TSEO RE PHELANG HO TSONA, TSE PHETHAHALITSOENG HO RONA HO KRESTE.

Litemana tsena li buoa ka hore na u mang ho Kreste, hape li ea u hlaloesetsa hore na u na le eng ho eena le hore na u ka etsa eng ka Kreste ea u fang matla. Li hlalosa hape hore na Kreste ke eng ho uena le hore na Kreste o o etselitse eng. Tse ling ha li otle sepekere hloohong (ha li direct), empa ntse li senola seo u leng sona kapa u nang le sona ho Kreste. Hape qetellong ho na le tataiso ea ho qeta testamente e ncha ka khoeli. Etsa bo'nete ba hore u e qeta khoeli le khoeli kapa ha beli ka khoeli. U e bale ka liphetoletso tse fapaneng, 'me u e sehelle ka mebala e fapaneng. U tla teba haholo ho Kreste ha u ka etsa joalo. Ha u se u utloisisa e ncha, bala ea khale u bo u e qete. Le eona e bale khafetsa 'me u e utloisise. Mohlomong u e qete ha'ngoe likhoeling tse ts'eletseng kapa ka moo u ka iphehang ka teng. Hape u ka bala ea khale le e ncha ka nako e le 'ngoe. U etse boikatlaetso ba ho qeta bibe le khafetsa selemo le selemo ho fihlella Kreste a khutla, kapa uena u tloha lefats'eng. U tla lula u teba feela Moreneng, 'me kholo ea hau e sena tekanyo.

Romans 3:24	Ephesians 2:13	Ephesians 1:6	
2Peter		Ephesians 5:8	
1:8 Ephesians 1:14		Ephesians 6:10	
Romans 8:1	Ephesians 3:6	Ephesians 1:7	Ephesians 2:21
2John		Colossians 1:14	
1:9			
Romans 8:2	Philippians 1:6	1Peter 1:8	
Romans 12:5	Philippians 3:13,14	Ephesians 1:11	Ephesians 2:22
1Corinthians 1:2,30	Colossians 1:28	Colossians 2:3	
1Corinthians 15:22	1Thessalonians 4:16	Ephesians 1:13	Ephesians 3:12
2Corinthians 1:21	1Thessalonians 5:18	Colossians 2:11	
2Corinthians 2:14	1Timothy 1:14	Romans 3:22	Romans 7:4
2Corinthians 3:24	2Timothy 1:19	Galatians 2:16	
2Corinthians 5:17	2Timothy 1:13	Romans 5:15	1Corinthians 1:4
2Corinthians 5:19	2Timothy 2:1	Ephesians 1:5	
		Romans 5:17-19	2Corinthians
Galatians 2:24	2Timothy 2:10	5:18	
Galatians 3:26	2Timothy 3:1	Philippians 1: 11	
Acts 17:28	Colossians 2:6	Philippians 4:19	1Peter 2:5
1John		1Peter 1:3	1Peter 5:10
3:5			
John 1:4	Colossians 2:7	2Corinthians 1:20	1John 2:5
1John		1John	
3:6		4:13	
John 3:15,16	Colossians 2:10	2Corinthians 5:21	1John 2:6
1John		1John	
3:24,14	1John 2:8	5:1	
5:20 Ephesians 1:10	1John 2:27,28		
Philippians 3:9	1John 3:3		
1Corinthians 1:5	Colossians 1:17	Hebrews 7:25	
1Corinthians 8:6	Colossians 1:20	Hebrews 13:15	
Colossians 1:6	Colossians 3:17	1Peter 1:21	
Romans 6:4	Romans 8:32	Col. 2: 13-15	
Romans 6:6	2Colossians 13:4	Colossians 3:4	
Romans 6:8	Colossians 2:12		
2Tim. 2:11-12 John 6:57	John 14:6		
John 6:56	John 15:4,5	John 16:33	
John 14:20	John 15:7,8		
John 15:9			
Matthew 18:20	John 14:13,24	1Cor. 6:11	
Mark 16:17,18	John 16:23,24		
Hebrews 1:3	Hebrews 9:26		
Hebrews 9:11,12	Hebrews 10:19,20		
Hebrews 9:14,15	1John 1:7		
Romans 5:2	Romans 5:11	Galatians 6:14	
Ephesians 4:16	Colossians 2:19		
2Corinthians 2:15	Colossians 2:17		
Philippians 3:12	Colossians 3:24		
1John 1:5	1John 2:27		
Romans 5:1	1Corinthians 15: 57	Philip 4: 6-7	
Romans 5:11	Galatians 3:13-14	Hebrews 10:10	
Romans 6:23	Ephesians 2:7	Hebrews 13:20-21	
John 3:17	Romans 8:37		
Romans 5:9	1John 4:9		
Romans 6:8	Ephesians 2:5	Colossians 3:1	
Galatians 2:20	Colossians 2:20	Colossians 3:3	
Matthew 8:17	Philippians 2:5	Hebrews 13:5b,6	
Matthew 11:28-30	Philippians 2:13	Hebrews 13:8	

Matthew 18:11**Colossians 1:13****James 4:7****Matthew 18:18-20****Matthew 28:18-20****Colossians 1:26-27****1Peter 2:9****Mark 1:8****Titus 2:14****1Peter 2:21****HOW TO FINISH THE NEW TESTAMENT IN A MONTH/ HO QETA TESTAMENTE E NCHA KA KHOELI**

Day	Read
1.	Mat 1-8
2.	Mat 9-15
3.	Mat 16-22
4.	Mat 23-28
5.	Mark 1-6
6.	Mark 7-12
7.	Mark 13-Luke 2
8.	Luke 3-7
9.	Luke 8-12
10.	Luke 13-19
11.	Luke 20-24
12.	John 1-7
13.	John 8-13
14.	John 14-21
15.	Acts 1-7
16.	Acts 8-13
17.	Acts 14-20
18.	Acts 21-28
19.	Romans 1-8
20.	Romans 9-16
21.	1Corinthians 1-11
22.	1Corinthians 12-2Corinthians 7
23.	2Corinthians 8-Galatians 6
24.	Ephesians-Philippians
25.	Colossians-2Thessalonians
26.	1Timothy-Philmon
27.	Hebrews
28.	James-1Peter
29.	2Peter-Jude
30.	Revelations 1-11
31.	Revelations 12-22

MOLIMO

MOLIMO (NTATE MORA LE MOEA O HALALELANG): Molimo o senotsoe bibeleng e le Molimo o le mong o iponahatsang ka botho bo boraro. Molimo o senoloa e le Ntate, Mora le Moea O Halalelang. Mona hase melimo e meraro, empa ke Molimo o le mong o iponahatsang ka botho bo boraro. Molimo o matla ohle, o hohle, ebile o tseba tsohle. Molimo ha ana qalo le qetelo (eternal), Molimo ha a fetohe. **Molimo Ntate O ne a senotsoe e le Molimo O Matla oohle, Morena Jesu e le Lentsoe la Molimo, Moea O Halalelang e le Moea Oa Molimo, pele a its'enola ho motho e le Molimo (Ntate, Mora le Moea O Halalelang).** O its'entse ka tsela ena ea Ntate, Mora le Moea O Halalelang ka lebaka la likamano tsa hae le motho. Ntate ke Ntate oa rona, Mora ke ngoana oa bo rona joalo ka bara ba Molimo, Moea O Halalelang ke eena ea re fang matla le bokhoni ba ho phela bophelo ba bomolimo bo kenyelletsang khalalelo le boinehelo ho Ntate Molimo le ho phela le ho etsa lintho joalo ka eena.

Selekane sa khale se senola Molimo Ntate haholo, li gospel li senola Morena Jesu haholo, buka ea Liketso eona e senola Moea O Halalelang haholo. Mangolo a mang a testamente e ncha a senola rona bakreste le seo re se fuoeng ho Krete.

JOALE RE TLO SHEBA MOLIMO NTATE

Esale a le teng pele ho nako le tlholeho, `me lintho tsohle **li entsoe ke eena**. Ntate ke motho oa pele borarong bo teroneng, o na le sebopeho se ts'oanang le sa rona hobane re entsoe ka sets'oants'o le sebopeho sa hae. Phapang pakeng tsa rona le eena ke hore eena ha a phele ka har'a `mele oa nama le mali joalo ka rona. Empa re meea e nang le kelello joalo ka eena (Johanne 4:24).

LEBITSO LA HAE: Lebitso la hae ke Jehova. Lebitso Jehovah le bolela Ea leng teng. Ke lebitso le hlahang lentsoeng la Seheberu YAWEH, le bolelang Ea leng teng. Lebitso lena le senola Boteng ba Ntate Molimo har'a batho ba hae, le hore e sale a le teng, `me tsohle li tsoa ho eena le hore ke eena tsohle tseo bana ba hae li hlokang. (Exoda 3: 13-14)

SEMELO SA HAE (Exoda 34:5-8): **Molimo o lerato:** o re etsetsa le ho re fa tsohle ka lebaka la lerato la hae ho rona, **Molimo o mohau (gracious):** o re fa tsohle le ho re beha sebakeng se nepahetseng ho eena le ho re phahamisa ka lebaka la mohau oa hae, **Molimo o oa ts'ephala:** O re ts'epahalla ka linako tsohle, **Molimo o mosa (merciful):** ha a re fe kahlolo e re lokelang, empa o re susumelletsa ho baka pele a re ahlola, **Molimo o na le mamello:** O re mamella mefokolong ea rona, `me o re holisa le ho re phethahatsa ka mamello, **Molimo o lokile (good):** Ke motsoali ea lokileng ea batlang hore bana ba hae ba phele ha monate ba iketlile. **Molimo o lereko:** O oa re hauhela le ho re thusa mathateng a rona. **Molimo o na le kutloelo bohloko:** O re utloela bohloko mahlokong a rona, `me o sebelisa batho ba bang ho re thusa. **Molimo o bonolo:** ha a rofo empa o bonolo ha a sebetsa le ba mo ratang. **Molimo o oa halalela:** o arohane le bobbe, **Molimo o sebetsa ka toka.** Ntate Molimo o matla ohle, Ntate Molimo o tseba lintho tsohle, Ntate Molimo o hlohle ka Moea O Halalelang.

Ke eena ea neng a sebetsa le batho selekaneng sa khale. Mosebetsi oo a o entseng o moholo selekaneng sa khale ke selekane le Aborahama hobane selekane sena se file Jehovah mokhoa oa hore a tlise Morena Jesu lefats'eng hore a tlo pholosa lefats'e hobane Aborahama le eena o fane ka mora oa hae, Isaka ho Jehovah Ka tumelo (Baheberu 11:17-20). **Mosebetsi oa Ntate oa ha joale ke oa hore Ntate o behile tsohle tlas'a Morena Jesu le kereke ea hae, hape o busa ka Eena.** Ntate o phela ka ho Krete ka botlalo, `me ha ho ea ka eang ho Ntate ha ese ka Morena Jesu Krete (Johanne 14:6).

MABITSO A HAE A MANG: Mabitso a hae a senola semelo, boleng le mesebetsi ea hae. Lentsoe El le bolela **Molimo**, Lebitso **Yahweh** le bolela **Ea leng teng**. Lebitso Jehovah le bolela ntho e le `ngoe le Yahew, e leng, Ea leng teng. Lebitso Jehovah le hlaha ho lebitso Yahweh. **El/Elohim:** Molimo o matla ohle. **El Elyon:** Molimo ea holimo limo. **El Shaddai:** Molimo ea khonang tsohle. **El Gibhor:** Molimo ea ntlholelang. **El Roi:** Molimo ea bonang tsohle, **El Olam:** Molimo ea senang qalo le qetelo. **El Nasa:** Molimo ea ts'oarelang. **Adonai:** Morena oa ka/Morena ea mpusang. **Yahweh/Jehovah:** Ea leng teng. **Yahweh Yasha Gaal:** Jehovah mopholosi le molopolli oa rona. **Yahweh Tsidkenu:** Jehovah ho loka ha rona. **Yahweh M'qaddesh:** Jehovah khalalelo ea rona. **Yahweh Qanna:** Jehovah ea mpouellang. **Yahweh Shalom:** Jehovah khotso ea rona. **Yahweh Rapha:** Jehovah mofolisi oa rona. **Yahweh Jireh:** Jehovah ea Ntlhokomelang. **Yahweh Rohi:** Jehovah molisa oa ka. **Yahweh Nissi:** Jehovah tlholo ea rona. **Yahweh Sabaoth:** Jehovah oa makhotla, e leng ea re laelang ntoeng. **Yahweh Shammah:** Jehovah o teng, `me o ipnahatsa har'a rona. **Abir:** Ea matla. **Qadosh:** Ea halalelang. **Jehovah Raah:** Jehovah Molisa oa rona. **Jehovah Hoseenu:** Jehovah ea re bopileng. **Jehovah Eloheenu:** Jehovah Morena oa rona.

Mabitso ohle a Molimo Ntate a akarelitsoe ka lebitso "Jesu", le bolelang Jehovah o oa pholosa kapa Jehovah ke pholoho, e leng (The Lord is salvation ka senyesemane). Le botlalo bohle ba Molimo Ntate bo lutse ho Jesu Krete, `me bo bonahatsoa ka eena (Bakolose 1:19-20). Ntate le mesebetsi ea hae. Empa o utloisise hore phethahalo le ponahatso e felletseng e phethahetseng ea Molimo ntate e bonoa ka Morena Jesu.

Ho tloha qalelong le selekaneng sa khale ene ele Molimo Ntate bohola a sebetsang le batho le manyeloi a hae, ho fihlella Morena Jesu a tla.

JOALE RE TLO SHEBA MESEBETSI EA MOLIMO NTATE HO TLOHA QALONG, HO FIHLELLA MORENA JESU A E TLA LEFATS'ENG.

RE TLO SENOLA LE HO NOLOFATSA MORERO LE MOSEBETSI OA HAE OA TOPOLLO HONA JOALE.

Pale ea topollo e tsamaea ka tsela e tjena.

E qala ho Adama ho ea ho Nooe. Ho tloha ho Nooe ho ea ho Aborohama. Ho tloha ho Aborahama ho ea ho Moshe. Ho tloha ho Moshe ho ea ho Morena Jesu.

Morena Jesu ke eena phetheho le topollo e felletse. Khutsufatso ke ena e latelang:

QALO;

Ntate Molimo o ile a etsa Maholimo le manyeloi ka mefuta le mekhahlelo ea oona pele a ka etsa lefats'e. Jobo 38 e bonts'a manyeloi a thabile ka nako eo Ntate Molimo a bopang lefats'e. Manyeloi ana a ne a fuoe tsamaiso e hlakileng, tlhatlhamano, boetapele le boikokobetso 'me a entsoe ka li million ka palo.

Ho ne hona le Manyeloi a fuoeng bookameli leholimong, a mang a hlakisoang bibeleng e ne e le **Mikaele**, 'me eena ke lenyeloi le okametseng sesole sa leholimo (**Lebitso Mikaele le bolela "ke mang ea ts'oanang le Molimo?"**). Gabariele eena ke ea okametseng ts'ebetso ea ho fetisa melaetsa le mesebetsi e meng e meholo ea Ntate Molimo. (**Gabariele e bolela Molimo ke matla aka**)

Lucifer e bolelang Mphatlalatsane kapa naleli ea mesong, eena o ne a okametse ts'ebetso e pelong ea Ntate Molimo haholo e leng ea khumamelo. Hape e ne e le kerubime e sirelletsang.

Ho na le Manyeloi a mang ao mabitso a bona a sa hlakang bibeleng joalo ka bo Raphaele e leng lenyeloi le sebetsang ka lipholisso le a mang. Manyeloi ana a bile teng leholimong le Ntate Molimo nako e sa hlakisoang pele lefats'e le etsoa.

HO BOPTJOA HA LEFATS'E LE MOTHO (Genese 1:1-26)

Kamora nako e itseng Ntate Molimo o ile a bopa lefats'e, 'me a etsa motho ka sets'oants'o le sebopeho sa hae, a ba a mo fa matla le borena holima lefats'e. Ntate Molimo o ile a etsa monna pele 'me a mo fa lebitso Adama e bolelang mora oa Mobu o mokhubelu hobane o ne a tsoa mobung. Ntate Molimo o ile a mo fa mosali 'me Adama a 'mitsa Eva, e bolelang "ho phela, ho fana ka bophelo kapa ho hema". Adama o ile a mo fa lebitso lena hobane e ne e tloba eena 'me oa bohle ba phelang. Adama le Eva ba ile ba phela hamonate ba busa lefats'e le liphoofofo, ba rata Ntate Molimo le ho mo mamela. Ntate Molimo o ne a ba file taelo ea hoja lifateng tsohle le limela tsohle ntle le sefate se le seng feela sa tsebo ea botle le bobé 'me a ba joetsitse hore batla shoa ha ba ka ba ja tholoana ea sefate seno. (**Sena o ne a se etsa hobane o ne a batla batho ba mo mamele ka khetho ea bona. Ba ka khona ho khetha botle hobane hona ho ne ho tla paka lerato la bona ho eena le ho mo mamela e leng se mo khotsofatsang**).

HO OA HA MPHTALALATSANE (LUCIFER)

Bibele ha e hlakisi hantle na Lucifer o ile a oa neng empa rea tseba ke kamora hore lefats'e le etsoe hape le pele a ka eka Adama le Eva. Ntate Molimo ha a etsa lefats'e o ile a re tsohle tse teng lefats'eng lintle. Joale taba ena e ka re bonts'a hore o ne a so ka a lokisetsoa satane lihele hobane mohlomong ka nako eno o ne a so oe. Hobane ho thoe Molimo o entse tsohle 'me a bona hore tsohle li ntle lefats'eng hobane lihele tsona tse ileng tsa lokisetsoa satane le manyeloi a hae ha li ntle. Kutloisiso ena e ka re fa hore satane o oele kamora hore lefatsh'e le motho li boptjoe.

Lucifer o ile a tla boikhohomoso 'me a eka manyeloi a mang, karolo ea pele borarong (one third) ho mo latela, eaba manyeloi ana a hana puso ea Ntate Molimo a fetoha marabele. Ho ile hoa e ba le nto e kholo leholimong hoo Mikaele le manyeloi a hae a ileng a loana le Lucifer le manyeloi a hae ho fihlella lucifer a hloloa a lahleloa lefats'eng, a lahleloa ke sebaka sa oona leholimong. (Ts'enolo 12:7le 8)

Manyeloi ana a ile a lahleloa ke khanya ea oona, 'me a fetoha mademona, lucifer a fetoha diabolosi 'me lebitso le a akaretsang ke lentsoe satane le bolelang moqosi. Ha lentsoe ledemona le bolela moea o litshila (evil spirit), diabolosi eona e bolela moea o ka holimo ka bobé (a supreme spirit of evil). Manyeloi ana a ile a lahleloa ke 'mele ea oona e metle e khanyang ea bonyeloi, a fuoa likotlo tse fapaneng ha a lahleloa lefats'eng, 'me a lokisetsoa lihele e le sebaka sa oona sa kahlolo (Matteu25:41).

LIABOLOSİ EDENE

Liabolosi o ile a tla ts'imong ea edene 'me a kena ho noha 'me a eka Eva ho ja tholoana eo ba hanetsoeng ho e ja eaba Eva o lumela liabolosi o ja tholoana ena eo a sa lokelang ho e ja. Ha a qeta a fa monna oa hae Adama. Adama eena o ne a sa ekoa ke satane, hlakoreng la hae e ne e le ho roba taelo ea Ntate Molimo ka kotlolloho. A khetha ho mamela mosali ho fapana le Ntate Molimo a ja tholoana le eena. Kamora hore Adama a je tholoana, sebe se ile sa kena lefats'eng 'me lefu le lona la kena ka sebe seno (Baroma 5:12). Adama le Eva ba ile ba shoa hang hang moeeng eaba ba se ba ts'aba Ntate Molimo ebile ba its'oabela ha ba sa apara ba bona bofeela ba bona. Ha Ntate Molimo a ba etela joalo ka ha e ne e le tloaelo, ba ile ba ipata ka lebaka la ts'abo (Genese 3:7).

Ntate Molimo o ile a laela lenyeloi le leng hore le kate sefate sa bophelo ka sabole e tukang hore Adama asekebe a ja tholoana ea sefate seno ase a shoele moeeng (Genese 3:24) **(Sena Ntate Molimo o se entse hobane hoja Adama o ile a ja tholoana eno e ne e tla ba motho ha a sa khona ho hang ho lopolleha ka ha o ne a tla phela ka ho sa feleng boemong bo oeleng joale a sa khone ho shoa. Hona ho no tla thibela topollo ea rona hobane topollo ea rona e ile ea khonahala feela ka lebaka la lefu la Morena Jesu. Joale hoja Adama o jele tholoana Morena Jesu joalo ka motho o na tla sitoa hore shoela a re lopolle. E ne tla ba re ba satane ka ho safeleng joale ebile ho se na tsela ea topollo).**

Kamorao ho mona, Ntate Molimo o ile a leleka Adama le Eva Edene ka mora ho bafa likotlo. Adama o ile a fuoa kotlo ea ho ja ka mofufutso oa phatla eleng ho sebetse ka thata a sebelletsa linyane. Eva e ile eaba kotlo ea mahloko a pelehi le ho batla ho laola monna (Genese 3:14-19), ha nooa eona e ile ea fuoa kotlo ea ho phesha ka limpa fatshe ea amouoa maoto le hore etlaja Mobu hobane e itumelletse ho sebelisoa ke satane. Haele satane eena o ile a hla fuoa tsuo khale ea hore o tla isoa lets'eng le tukang ka mollo le sebafole.

Adama le Eva ba ile ba ba le bana ba babeli e leng kaine le Abele. Kaine o ile a bolaea ngoanabo Abele. Adama le Eva ba ile ba ba le bana ba bang hape 'me Caine o ile a nyala e mong oa bana babo ha nako e ntse e ea.

Bophelo bo ile ba tsoelapele joalo, sebe se kene lefats'eng, batho ba iphelela ka ho se tsebe Ntate Molimo ba iphelela feela ho fihlela Seta a ba teng. Ka nako ena, Seta o ile a qala ho khumamela Jehova le ba moloko oa hae (Genese 4:26), empa meloko e meng ea nna ea iphelela feela ka moo ba ratang ka teng ho fihlela khenese 6.

MOROALLO OA METSI LE MANYELOI A OELENG

Ebile lilemo tse 1656 ho tloha ho Adama ho fihla ho Nooe (Lebitso Nooe le bolela phomolo).

Ka nako ena batho ba ne ba se ba le bangata lefats'eng 'me history e hakanyetsa limillione tse fetang 200. Bible e bonts'a ha Manyeloi a neng a fuoe mosebetsi oa ho sebetseana le batho ka ho fetisa melaetsa ea Ntate Molimo le ho thusa batho a nka 'mele ea oona ea botho a etsa thobalano le bomme hobane a bone bale batle. Ntate Molimo o ne a file manyeloi a na matla a ho hlaha joalo ka batho hore a tle a sebetse ha bobebe le batho joale ka ha re bona ho bo Genese 18:1-3 le mangolong a mang.

Manyeloi ana a ile a etsetsa bomme bana bana. 'Me bana bana ba hlaha e le liqhobane (giants)(Genese 6:1-6). Bana bana ba manyeloi ba ba khopo haholo 'me ba tlatsa lefats'e bokhopo. Joale bane ba le matla haholo hobane karolo e 'ngoe e ne e le motho, e 'ngoe e le lenyeloi, eaba joale moloko oa botho (human race) o se o fumana o kopa-kopane ka batho ba felletseng le batho/lenyeloi. Joale ke moo Ntate Molimo a buang le motho ea lokileng e leng Nooe hore a nke bana ba hae le liphoofolo, e tona le e ts'ehali tsa mefuta eohle a ahe areka 'me ba kene ka ho eona hobane o tlo tisa moroalo oa metsi lefats'eng 'me metsi ana a tlo timetsa bohle lefats'eng (Genese 6:13)

SENA NTATE MOLIMO O NE A SE ETSA HO BOLOKA MOLOKO O HLOEKILENG OA BOTHO LEFATS'ENG (God was preserving the human race)

Manyeloi ana a entseng ketso ena, Ntate Molimo o ile a a tlamella liheleleng 'me o a bolokile mono hofihlella a a isa lets'eng la Mollo (Jude1:6).

Ka sebe sa Adama, tsena tse latelang li ile tsa kena lefats'eng. Sebe, lefu, lithohako, mafu ka ho fapana, ho ja ka mofufutso oa phatla e leng ho ja ka thata, mahloko a pelehi le tsohle tse mpe, joalo ka bo likhohola, ho sisinyeha ha lefats'e le tse joalo.

Tsena Tse latelang li ile tsa lahleha ka sebe sa Adama.

- 1) matla le puso le borena ba motho ba fuoa liabolosi ka semolao ke Adama.
- 2) likamano le kutloana le Ntate Molimo eaba re ba bana ba satane ka semolao.
- 3) bophelo, eaba ho kena lefu le litholoana tsa lona.

Kamora moroallo, batho ba ile ba nna ba ata, 'me Ntate Molimo o ile a ts'episa batho hore ha a sa tla timetsa lefats'e ka moroallo kamora hore Nooe a mo etsetse sehlabelo se monko o monate sa liphoofolo (Genese 8:20-22). Ntate Molimo o ile a mo fa mookoli (Rainbow) e le sesupo sa selekane le eena sa hore ha a satla timetsa lefats'e lohle ka metsi.

Kamora nako batho se ba atile, kamora moroallo, batho ne ba bua puo e le 'ngoe lefats'eng. E mong oa batho a ba le pono ea ho haha tora e tla fihla leholimong e le ho kopanya batho hore ba seke ba arohana ho hang le ha ba ntse ba ata ho ea pele, ba tle ba be le ntho e ka ba kopanyang (Genese 11:1-10). Ntate Molimo o ile a qhala morero ona hobane joale sena ba ne ba se etsa e le molemong oa botlitlehi ba bona e seng khanyeng ea Ntate Molimo. Ke moo ba ileng ba tsoha ba bua lipuo tse fapaneng, ba se ba sa utloane eaba baa arohana ba tlala lefats'e lohle. Lipuo le linaha le mehlobo e fapaneng li qalile ka tsela e tjena.

ABORAHAMA

Ebile lilemo tse ka bang makhola a mane ho tloha ho Nooe hofihla ho Aborahama.

Kamora lilemo tse isang makholong a mane kamora moroallo, Ntate Molimo o ile a iponahatsa ho motho ea bitsoang **Aborame (Aborame e bolela ntate a phahamisitsoeng)**, 'me Aborame a mo latela a sia lehae la habo a tsamaea le Jehova (Genese 12). Jehova o ile a mo hlohonolofatsa ka hohle empa Aborame o ne a sena ngoana. Ntate Molimo o ile a mo fetola lebitso a re esele **Aborahama (Aborahama e bolela Ntate oa Lichaba)** kaha o mo entse ntate oa lichaba tse ngata, le hore mofumahali oa hae ha

e sa le Sarai (Sarai e bolela master, palace, princess le releaser ka sebeheru) empa e se e le Sara (Sara e bolela 'me oa lichaba) ka ha Ntate Molimo o mo entse 'M'e Malichaba.

Ka matla a tumelo e bonahatsoa ka lipono, lipolelo le lithoriso, Aborahama o ile a fumana ngoana 'me a mo reha Isaka ha a le lilemo li 100, 'me mofumahali oa hae eena a le lilemo li 90.

Ha Isaka e se e le mohlankana, Ntate Molimo o ile a laela Aborahama hore a fane ka Isaka e le sehlabelo sa secheso, ka mantsoe a mang a mo selakhe ka thipa ebe joale o oa mo chesa kamora mono (Genese22:1-20)

Lebaka la ketso ena e ne e le hobane Ntate Molimo le eena o ne a tla fana ka mora oa hae ho tsoa molokong oa Aborahama, 'me o ne a tlameha ho hlaha ka tumelo ka matla a Moea O Halalelang e seng ka motho oa monna le mosali, ke ka hoo Ntate Molimo a ileng a etsa bonnete ba hore le ngoana oa Aborahama o hlaha ka tumelo e seng ka tsela e tloaelehileng ea monna le mosali.

Joale mora enoa oa Ntate Molimo o ne a tlameha ho tla bolaoa ka ho thakhisoa sefapanong ebe o ilo chesoa lihelong e le sehlabelo sa secheso se nkang libe tsa batho. Ke ka lona lebaka lena Ntate Molimo a ileng a re Aborahama a etse joalo ka mora oa hae pele hobane ha Aborahama a ka etsetsa Ntate Molimo seno ke ho mo lumela le ho mo mamela, sena se tla fa Ntate Molimo hore le eena a etsetse Aborahama se ts'oanang ka mora oa hae.

Aborahama o ile a mamela 'me ha a phahamisa letsoho a re o hlaba Isaka, Ntate Molimo o ile a mo thiba hobane ho ea ka eena, Aborahama o ne a se a entse ketso eno hobane o ne a se a qetile le pelo ea hae a sa cheche.

Aborahama o ne a lumela hore ha a qeta ho bolaea ngoana oa hae, a mo chesa, Ntate Molimo o tla mo kopanya 'me a mo tsose bafung (Baheberu 11:19), 'me tumelo ena ke eona e fileng Ntate Molimo tokelo ea ho kena lefats'eng la batho, mora oa hae le eena a hlahe ka mohlolo, a shoe sefapanong, a hlokoatsoe lihelong a ba tlo tsoha bafung hobane Ntate Molimo joalo ka Moea, o ne a hloka motho oa nama ea tsoetsoeng ke mosali lefatsheng hore a tlo mo lokolla joalo ka Moea hore a tlo etsa mosebetsi ona hobane Moea o lokolloa ke Motho ho sebetse lefatsheng, e le oa Ntate Molimo kapa oa satane hobane qalong Ntate Molimo o ile a fa motho lefats'e le puso lefatsheng joale a ke ke a tsoa lentsoe la hae fats'e a be a se a etsa borata feela lefatsheng. Empa o khethile hore a sebetse le motho.

Kamora tsena, Isaka o ile a hola, 'me a nyala Rebeka. Aborahama le mofumahali oa hae ba ile ba hloka hla ba se ba le baholo. Isaka a ba le bana ba babeli e leng Esau le Jakobo e le mafahla. Ntate Molimo o ile a khetha hore morero oa hae o tsoelepele ka Jakobo, ke ka hona mangolo a reng e moholo o tla sebelletsa a monyane le hore Jakobo ke mo ratile empa Esau ha kea mo rata. **Sena ha se bolele hore Ntate Molimo o ne a sa rate Esau empa feela se bolela hore Ntate Molimo o khethile hore morero oa hae oa ho tisa Morena Jesu o tsoelepele ka Jakobo. Lebitso Jakobo le bolela Mothetsi empa Ntate Molimo o ile a le fetola ho ba Iseraele e bolelang khosi ea Molimo.** Jakobo o ile a ba le bana ba 12 'me ba ile ba ea Egepete ba lula teng ka lebaka la komello e ileng ea aparela lefats'e. E mong oa bana ba Israele e leng Josefa, e ile ea eba tona kholo egepete tlasa Faro. Iseraele e leng Jakobo o ile ekhepheta e le lelapa la batho ba 70.

Bana ba Jakobo ba ileng Egepete ke bana ba latelang (Reuben, Simeon, Levi, Judah, Dan, Naphtali, Gad, Asher, Issachar, Zebulun, Joseph le Benjamin 'me meloko ea Israele e 12 e rehelletsoe ka bona. Moloko oa Josefa ha oa rehelloa ka lebitso la hae empa la bana ba hae ba babeli e leng Manasseh le Ephraim, 'me moloko ona ono o bitsoa (half tribe of Manasseh and Ephraim). Moloko ona o no o bitsoa tjena hobane halofo tsa meloko ena e 'meli li ne li etsa moloko oa Josefa.

MOSHE

Ebile lilemo tse 430 ho tloha ho Aborahama ho fihla ho Moshe.

Ba ile ba lula Egepete mono ho fihlela moloko ono o hloka hla kaofela. Joale ha eba le morena Faro, e mong a neng a sa natse litaba tsa bo Josefa le ba Israele egepete mono.

Eena o ile a fetola ba Israele makhoba 'me ba ba bokhobeng Egepete lilemo tse 430 ho fihlela Ntate Molimo a roma Moshe (**Moshe e bolela ea nts'uoeng metsing**) eo e neng e le Mo Israele empa a hotse e le khosana ea Egepete hobane o ile a tholoe ke morali oa Faro ha Faro a ne a laetse hore bana bohle ba bolaoe ka nako ea tsoalo ea Moshe. Moshe o ile a phonyoha 'me a holela sereneng ha Faro ho fihlela a baleha, kamora ho bolaea MoEgepete ea neng a sotla MoIsraele. O ne a le lilemo li 40 ha a baleha Egepete. Kamora lilemo tse ling tse 40 Ntate Molimo o ile a iponahatsa ho Moshe 'me a mo roma Egepete ho lokolla sechaba sa hae. Moshe o ile a atleha ho lokolla sechaba sena kamora likotlo tse boima tse leshome holima BaEgepete le ka liponts'o tsa matla, 'me a lokolla sechaba sa Israele kamora lilemo tse 430 tsa bokhoba. Moshe a petsola leoatle 'me sechaba sa ts'elela lehoatateng.

Moshe o ile a nka matsatsi a 40 a le thabeng le Jehova 'me ke moo a ileng a fuoa molao oa Molimo le ho bonts'oa qalo. Ke moo a ileng a fuoa litaba tsa Genese ha lefats'e le thehoa le sebe sa Adama le hore ba fihlile joang mono. Selekane sa khale se theuo ka nako ena eleng selekane sa Molao mme re hlalosa taba tsena thutong ea selekane sa khale le se secha.

Ka lebaka la ho se lumele, moloko ona o tsoileng Egepete oa nka lilemo tse 40 lehoatateng Ha ba ne ba tlameha ho nka khoeli feela. Moloko ona o ile oa shoella lehoatateng mono ba sitoa ho kena lefats'eng la ts'episo ka lebaka la ho se lumele Jehova. Le Moshe o ile a shoella lehoatateng mono a le lilemo tse 120, le eena haa ka ba kena kanana ka lebaka la khalefo ea hae e sa laoleheng.

Satane o ile a tseka setopo sa Moshe le Mikaele ka mora hore Moshe a hloka hla, 'me haho hlake hore na o ne a se isa kae, empa Mikaele o ile a mo hlola ka ho tla ka Lebitso la Jehova (Jude 1:9).

Moloko o hlahlamang ka tlasa keta pele ea Joshua ke oona o ileng oa kena kanana, 'me oa hapa lefatshe la oona eaba sebaka sena

eba naha ea Israele.

Kamora lefu la Joshua, ho ile hoa ba le baahloli ba fapaneng ba neng ba busa Israele 'me moahloli oa ho qetela e ile ea ba Samuele eo e neng e le moporofeta hape e le moahloli. Ke nako ena Israele e ileng ea kopa ho bua le Morena ho Samuele, 'me Samuele a bua le Jehova eaba Jehova o khetha Saule hore ebe Morena oa BaIsraele. Kamora lilemo pusong Morena Molimo o ile a tlosa Saule ka lebaka la borabele 'me a khetha Davida ho ba Morena. Davida o ile a khetha mora oa hae Solomone hore a nke puso ha a hlokahala. Ka nako ea Solomone Israele e ile ea aroha likoto 'me merabe e leshome ea ikarabella Samaria e le ntlo kholo ka lebaka la ho oa ha Solomone litseleng tsa Jehova. Merabe ea Judah le Benjamin e ile ea sala e ikarabella Jerusalema e le ntlo kholo. Kamora mona ha e ba le Marena a mangata a Israele 'me boholo ba oona bane ba sa mamele litaelo tsa Jehovah ha ba bang ba ne ba mamela. Ka lebaka la ho se mamele ha sechaba, Ntate Molimo a romela naha e ileng ea nka BaIsraele ba bangata, ea ba tlosa naheng eabo bona baea naheng ea Assaria 'me eaba bats'oaruoa teng. Boholo ho nkuoe merabe ena e leshome e neng e ikarabella Samaria. Kamora nako, mo rabe o setseng e leng oa Judah, o ile oa nkuoa oa ea Babilona tlasa Morena Nebukadnessa 'me ba bile Babilona lilemo tse 70. Israele e ile ea khutlela hae ha Cyrus Morena oa Persia a hlola Babilona 'me a nka puso. Ke teng moo a ileng a lokolla BaIsraele ho khutlela hae, 'me ba qala ho haha tempele hobane tempele e ileng ea hauoa ke Morena Solomone e ile ea senngoa ha Israele e ts'oaroa.

Ha e le merabe e 10 e ileng ea ea Assaria eona ha ekaba ea lokolloa joalo ka Juda le Benjamin ho khutlela hae ka nako e le ngoe, empa e ile eaba ba bang ba ile ba hasana linaheng tse ling, ba nyala eaba litho tsa linaha tseno 'me ba bang ba ile ba khutla ha nako entse e ea. Baporofeta bo Isaiah, bo Jeremiah, bo Elia le ba bang boholo bane ba porofeta ba le Israele 'me ba khalema Israele, hape ba ba bonts'a kotsi e tlang ha ba ka ba tsoelapele ka ho se mamele Jehovah le ho ikokobetsa.

Buka ea Malakia le tse ling tse qetellang Selekane sa khale ke tse buang ka Israele ha e qeta ho khutlela Jerusalema, 'me joale ba tsosa tempele ea Morena. Boholo e ne e le morabe oa Judah le Benjamin 'me ntlokhlo e le Jerusalema. Kamora Malakia ho ile hoa feta lilemo tse makholo a mane ho sena baporefeta kapa lipono joalo joalo, empa ho ile hoa thehoa lihlopha tsa Bafarasi le Basadusi ho toloka molao oa Moshe.

Kamora nako ena e telele ea lilemo tse 400 ho ile hoa hlaha Johanne Mokolobetsi eaba ho hlaha Morena Jesu e leng eena lejoe la mantlha.

Ho hlahile litumelo tse tharo ho tsoa ho Ntate Aborahama, e leng

- 1) **Sekreste (Bana ke bana ba Ntate Aborahama ba tumelo ka Jesu Krete, ke bana ba hae ba moea, 'me sena rese hlalosa haholo thutong ea selekane sa khale le se secha)**
- 2) **Bo Juda (Jewish faith): Bana ke bana ba Ntate Aborahama ba nama 'me ntse ba lumela molaong oa Moshe. Naha ea bona ke Iseraele ea nama. Boholo ba bona ha ba amohela Morena Jesu e le Morena**
- 3) **Islam: Bana ke bana ba Ntate Aborahama ho tsoa ho Ishmaele ngoana oa Ntate Aborahama le Haggar.**

Le ha hole litumelo li tharo tjena ho tsoa ho Aborahama, ke ba lumetseng ho Morena Jesu feela le ho mo amohela bao e leng ba Molimo oa 'nete oa Aborahama e leng bakreste. Ba Juda ba ne ba tlameha ho utloisisa hore Morena Jesu o tlele ho tla phethahatsa bojuda le ho tla theha sekreste, empa ha se bohle ba amohelang taba ena. Re tla hlalosa sena thutong ea selekane sa khale le se secha.

JOHANNE MOKOLOBETSI

Ebile lelimo tse 1591 hotloha ho Moshe ho fihla ho Johanne Mokolobetsi

Johanne (Johanne e bolela 'Molimo o mohau) e ne e le mora oa Elizabeta le Zakaria eo e neng e le Moporista. Bane ba sena ngoana joale ba se ba le baholo. Ke moo lenyeloi Gabariele le ileng la hlaha ho Zakaria la mojoetsa hore o tla ba le ngoana ea tla lokisetsa Morena tsela. Zakaria ka ho belaela taba tsa lenyeloi, o ile a fetoha semumu ho fihlela Johanne a hlaha. Johanne o ile a ea hlatheng ha a le koetlisong ea Ntate Molimo. Ntate Molimo o ne a mo joetsitse hore mosebetsi oa hae ke ho lokisetsa Morena Jesu tsela, 'me eena o tla mo bona ka ho buleha ha leholimo le hore Moea O Halalelang a theohela holima hae joalo ka leeba. Sena se etsahetse nako eo Morena Jesu a tlang ho kolobetsoa ke Johanne. Leholimo le ile la buleha, Moea O Halalelang a theohela holima Morena Jesu joalo ka leeba, eaba lentsoe le bua ho tsoa leholimong ka Morena Jesu, le re "enoa ke mora oaka eo ke mo ratang, ea nkhang le mo mamele".

Johanne o ne a le matla haholo, a ruta pako le hore batho ba kolobetsoe hoba 'muso oa Ntate Molimo o atametse, joale ebile a bua ka ea tlang kamora hae, e leng Morena Jesu. Batho ba ne ba mo mamela haholo ebile setumo sa hae se tletse Israele eohle.

Mosebetsi oa hae e ne e le ho tla lokisetsa Morena Jesu tsela le ho mo hlahisa sechabeng sa Israele.

Johanne o entse mosebetsi oa hae ka bokhabane bohle, a supisa batho ho Morena Jesu ebile a re eena o tlameha ho theoha ha Morena Jesu a phahama.

Ha a se a qetile mosebetsi oa hae, o ile a ts'oaroa ke Heroda 'me a qetella a 'molaile ka ho mo khaola hlooho. Batho bohle ba ileng ba lumela ho Johanne ba ile ba latela Morena Jesu. Morena Jesu o re Johanne o moholo ho feta baporofeta bohle ba Molimo sekaneng sa khale ka lebaka la mosebetsi oa hae oa ho lokisetsa Morena Jesu tsela. Empa a re, ea monyane 'musong oa Molimo ke eena ea moholo, ho feta Johanne mokolobetsi hobane joale rona 'musong re Bara ba Molimo, ha bona e ne e le bahlanka.

Ebile lilemo tse 1591 ho tloha ho Moshe ho fihla ho Morena Jesu.

Ka mora Johanne ho ile ha tla Morena Jesu Krete e leng eena lejoe la mantlha. Ka mantsoe a mang, ke eena ea neng a emetsoe hore a tlo pholosa lefats'e ho tsoa sechabeng sa Israele. Ke eena eo baporofeta ba neng ba bua ka eena. Ke lentsoe la Molimo le ileng la fetoha nama, 'me la aha hara rona. O hlahile Israele 'me a tsoa lelokong la Judah.

Boporofeta ba selekane sa khale bone bo supa eena ka sebele. Ebile selekane sa khale ene ele sets'oants'o feela le seriti, Morena Jesu ke ena nnete le phetheho.

Ntate Molimo o ne a tlohetse lichaba tse ling ka nako ena, a sebetsa le Israele feela ho fihlela Morena Jesu a khutla, a tlo boelanya lichaba tsohle le Molimo ka lefu la sefapano. Joale re tlo bua ka Morena Jesu

MOLIMO: LENTSOE

MORA OA MOLIMO: JESU KRESTE.

Bophelo ba hae: Morena Jesu ha a etsoa. Esale a le teng pele ho nako le tlholeho (creation) le lintho tsohle tsohle tse teng tsatsing lena (Bakolose 1:17). Ke motho oa bobeli borarong bo teroneng, 'me mesebetsi eohle ea **Molimo e entsoe ka eena** (Johanne 1:1-4, Baheberu 1:2-4, 1Bakorinte 8:6).

BOLENG: Morena Jesu ke Molimo (Johanne1:1,18, 1Timotia3:16, Isaia 9:6-8). Morena Jesu ke lentsoe la Molimo (Johanne1:1, Ts'enolo 19:11-14). Morena Jesu ke Mora oa Molimo, hona ho bolela hore o tsoetsoe ke Molimo (Johanne1:14, 3:16). Morena Jesu ke mora oa motho. Hona ho bolela hore ke motho ea felletseng joalo ka nna le uena ea tsoetsoeng ke mosali.

LEBITSO LA HAE: Lebitso **Jesu** le bolela Jehovah o oa pholosa, Lebitso lena le bolela **"pholoho"** ha le fetoleloa, empa le fana ka moelelo oa hore Jehovah o pholosa batho ba hae ka Jesu, ke mokhoa oo re reng le bolela **"Jehovah o oa pholosa"**. **Kreste** e bolela **"Ea tlotsitsoeng"**. Lentsoe **"mesia"** le lona le bolela **"Ea tlotsitsoeng"**. **(The anointed one).**

SEMELO SA HAE: Morena Jesu o ts'oana le Molimo Ntate hantle ka semelo (Johanne 14:9-11). O lerato, o mohau, o na le mamello, o lokile, o lereko, o na le kutloelo bohloko, o bonolo, o oa halalela, o oa ts'epahala, o na le 'nete le toka le tsohle tseo Ntate a nang le tsona.

Ligospele li senola bophelo ba Morena Jesu, Buka ea Mattheu e senola Morena Jesu e le Morena oa Majuda, o pakela Majuda hore Jesu ke eena mesia eo ba mo emetseng, eo ho porofitiloeng ka eena, ea Mareka e senola Morena Jesu e le mosebetsi oa mehlolo, buka ea Luka e senola Morena Jesu e le mor'a motho. Ka mantsoe a mang, e le motho ea felletseng joalo ka nna le uena. Buka ea Johanne e senola Morena Jesu e le mor'a oa Molimo.

BOPHELO BA HAE LEFATS'ENG LE MOSEBETSI OO A O PHETHILENG: Morena Jesu o ne a ntse a le leholimong pele a tla lefats'eng e le lentsoe la Molimo (Baheberu 10:5). Ha a tla lefats'eng, o ile a tsoaloe ke moroetsana Maria ka matla a Moea O Halalelang (Mattheu 1:18, Luka 1:34). O hlahile ka tsela e tjena hobane hoja a hlahile ka motho oa monna le mosali joalo ka rona, a kaba a hlahile a na le semelo sa sebe, 'me hoja ho ne hole joalo, o ne a ke ke a khona ho re emela pela Molimo le ho nka sebe sa lefats'e ka ha le eena e ne e tla o na le sebe ho eena. Morena Jesu o hlahetse Betlehema e Judea. O hlahile ho tsoa lelokong la Aborahama la nama, 'me e ne e le Mo Israele ka nama, 'me o hotse joalo ka ngoana e mong le e mong oa Mo-Israele ea ka tlas'a molao oa Moshe. Morena Jesu o ne a **sa** sebetse ka Bomolimo ba hae ha a le lefats'eng, o ne a sa tsebe tsohle, o ne a se hohle, ebile a khona ho etsa feela tseo Ntate a mo senoletseng tsona. O ne a sebetsa joalo ka motho ea ka tlas'a matla a Moea O Halalelang joalo ka rona feela. Bafilipi 2:6-9 e bonts'a hore Morena Jesu o ne a behile bomolimo ba hae fats'e ha a tla lefats'eng. E ne e ntse e le Molimo, empa o ne a sa sebetse ka bomolimo ba hae. Morena Jesu o hotse joalo ka ngoana e mong le e mong, 'me o fetile maemo ohle a bo ngoana.

MORERO LE TS'EBETSO EA HAE: Morero oa hae: (1) Morena Jesu o ne a tletse ho tla boelanya batho le Molimo, ho tla nka boemo ba bona ba sebe ho re a tle a ba fe boemo ba hae ba hoba bara ba Molimo (2Bakorinte5:21), **(2)** O ne a tlile hape ho tla phetha tsamaiso ea molao hore a tle a tlise ea mohau (Mattheu5:17, Johanne 1:17) **(3)** O ne a tlile ho tla lefa moputso oa sebe le litholoana tsohle tsa sona le ho tla senya mesebetsi eohle ea satane (1Johanne3:8).

Ts'ebetso ea hae: 1) Morena Jesu o ile a kolobetsoa ka metsi ha a le lilemo li 30 ke Johanne mokolobetsi. Ka kolobetso o ne a bonts'a hore le eena joalo ka motho, o amohela tsela e nepahetseng eo Ntate Molimo a e behileng ea hore batho ba tsamaee le eena. Hang ha a qeta ho kolobetsoa ka metsi o ile a kolobetsoa ka Moea O Halalelang hobane joalo ka motho o ne a hloka kopano le matla a Moea O Halalelang ho phetha thato ea Molimo. **(2) O ile a itima lijo matsatsi le masiu a 40 thabeng eaba kamora hore a itime** o lekoe ke satane hobane o ne a tlameha ho pasa teko ena hobane ke eona eo Adama a ileng a se ke a e pasa. Joale eena o ne a tlile ho tla lokisa tseo Adama oa pele a li sentseng. Teko e ne e ntse e ts'oana empa e ne e tla ka tsela e fapaneng

(Matheu 4:1-11) **(3)** Morena Jesu o qalile ts'ebetso ea hae ha a le lilemo li 30 hobane e ne e le ts'oanelo ho ea ka selekane sa khale hore baprista ba qale ho sebelletsa ts'ebetsong ea bona ea seprista ha ba le lilemo li 30 ho ea holimo. Lithuto tsa hae li ne li senola ebile li bonahatsa Molimo, 'muso oa Molimo le 'nete ea hoba mora oa Molimo. **(4)** O ile a khetha batho ba 12 bao a ileng a ba koetlisa hore ba tlo etella ts'ebelletso ea hae pele lefats'eng ha eena a tsamaea. Emong oa ba 12, e leng Judas Iscariot e neng e le lesholu o ile a eka Morena Jesu 'me a mo nehela ho ba Juda empa a ikoahlaea ka morao a ba a ipolaea ke masoabi le ho itsoa **(5)** Morena Jesu o ne a tletse lichaba tsohle, empa ha a le lefats'eng o ne a shebane le Israele ea nama feela nakoana eno, empa morero oa hae e ne e le ho tla boelanya lichaba tsohle le Molimo, 'me a thehe sechaba se le seng ka lichaba tsohle, ho sa tsotellehe hore na ke Bajuda kapa Balichaba (Baefese 2:13-21). **(6)** Morena Jesu o ile a lekoa ka mekhoha eohle ha a le lefats'eng, empa ha a ka ba a etsa sebe (Baheberu 4:14-16). Ha se bohle ba ileng ba amohela Morena Jesu hobane ba bang ba ne ba lebelletse rapolotiki ea matla eo e leng mohale oa nto, joale eena o ne a shebane le tsa moea le ho lokolla batho bokhobeng ba moea.

LEFU LA HAE LA NAMA LE LA MOEA: (1) Morena Jesu o ile a thakhisoa sefapanong ke Baroma le Bajuda ha a le lilemo li 33. Baroma ba ne ba mo ts'ohile hore o tlo ba nkela 'muso hobane batho bohle ba ne ba mo mamela, Bajuda ba ne ba mo qosa ka bonyefoli ha a ipitsa mora oa Molimo. Empa semoeeng e ne e le satane ea susumetsang lefu la hae hobane Morena Jesu o ne a senya 'muso oa hae (1Bakorinte 2:8) **(2)** Morena Jesu o fane ka bophelo ba hae, ha a nkuoa ka likhoka (Johanne 10:17-19). **(3)** Morena Jesu o ile a fumanoa a sena molato ke moahloli Pilato ha a qosoa ke lira tsa hae, taba ena e bonts'a hore o fane ka bophelo ba hae, empa eena o ne a sena molato. **(4)** Sefapanong o ile a nka sebe le molato oa lefats'e lohle, 'me a shoa moeeng (e leng ho arohana le Molimo), eaba ke hona a khonang ho shoa nameng. Nakong eo a neng a re (Eli Eli lema sabachthani) e leng hore "Molimo oaka, Molimo oaka o mphuralla hobaneng, e ne e le ha a shoa moeeng, ha Ntate Molimo a arohana le eena. Pele sebe se kena moeeng oa hae, o ne a ke ke a khona ho shoa nameng hobane motho o ile a tlameha ho shoa moeeng pele a shoa nameng. **(5)** Lesira la ka tempeleng le ile la taboha e le sesupo sa hore tsela e entsoe ea hore batho bohle ba lumelang ho Morena Jesu ba ka phela boteng ba Ntate Molimo (Matheu 27:50-51) **(6)** Ha Morena Jesu a qeta ho shoa nameng, o ile a ea lihelong ka moea oa hae o neng o jere sebe sa lefats'e (baefese 4:9-11, Isaia 53:9-11, Matheu 12:40-41). Ho na le phoso ea phetolelo ka ho Luka 23: 43, khefutso e tlameha ho ba kamora kajeno, e seng ho uena. Morena Jesu o ne a sa bolele hore o ea paradeising tsatsing leno empa o ne a bolela hore tsatsing le leng o tla kopana le sesinyi seno paradeising. Morena Jesu o ne a sare o ea leholimong ha a re o nehela bophelo ba hae matsohong a Ntate, o ne a mpa a bolela hore o amohela Morero oa Ntate Molimo ka eena (Luka 23:46). Morena Jesu o ile lihelong e le mots'oaruoa, a le las'a puso ea satane hobane o ne a nkile sebe ho eena. **(7)** O ile a hlokatsoa lihelong ho fihlela a lefile kahlolo ea sebe sa lefats'e lohle ka botlalo hape batho ba ka beoa likamanong tse lokileng le Ntate Molimo. Liketso 2:23-30 e bonts'a hore Molimo o lokollotse Jesu mahlokong a lefu. Ka mantsoe a mang, o ile a utloa mahloko a lefu. Ebile e re moea oa hae ha o oa tloheloa nq'along ea bafu (lihelong/ hades). Temana ena e buoa ka boporofeta ba Jesu.

TSOHO EA HAE EA MOEA: (1) Morena Jesu o ile a lokfatsoa a le lihelong ha sebe sa lefats'e se qeta ho lefelloa. Ka mantsoe a mang, o ile a tsoaloa labobeli a le lihelong (Bakolose 1:18). Hona ke ho bolela hore Ntate Molimo o ile a mo phelisa moeeng, 'me a boelana le eena ha a qeta ho lefella sebe sa lefats'e a ntse a le lihelong. **(2)** Ha a qeta ho phelisoa moeeng o ile a hlola liabolosi le matemona, 'me a amoha liabolosi matla ohle a hae (Bakolose 2:14-16, Ts'enolo 1:17-19). **(3)** *Ho na le lintho tse ling tseo Morena Jesu a ileng a li etsa ha a le lihelong ha a qeta ho phelisoa moeeng. 1Peterose 3:18 e bonts'a hore o ile a buoa le meea e neng e le chankaneng, e foselitseng Ntate Molimo ka nako ea bo Nooe. Temana ena ha e hlake hantle, e bile ke temana e fileng litsibi tsa bibe bothata ka nako e telele. Ntho e e thatafatsang le ho feta ke hobane e hlaha ha 'ngoe feela bibeleng, 'me e hlaha hanyane le teng e sa hlalose hantle ka botebo hore na ho etsahetse eng. Le Peterose o re Morena Jesu o ile a etsa phatlallatso feela ho meea eno. Ha e hlakisi hore na ha a qeta ho etsa phatlallatso ho ile ha etsahala eng ka meea eno. (Litoloki tsa bibe li re **mohlomong** o ile a bolela evangeli ho ba neng ba so e utloe ha ba ntse ba le lihelong, 'me le bona ba ile ba fuoa monyetla oa ho lumela ha ba khetha, ba bang ba re o ne a mpa a etsa tsebiso feela ea tlhola ea hae holima satane le 'muso oa hae meeng eno e neng e le chankaneng. Hape hae hlakisi hore na meea ena ke ea batho kapa manyeloi. Hape ha hona temana e 'ngoe eo re ka e sebelisang ho tlatsa temana ena. 'Nete ke hore, ke Ntate Molimo feela ea ka tiisang hore na ho etsahetse eng boemong bono. **Ka hona, ha re na tokelo ea ho etsa thuto e felletseng ka temana ena, kapa ra leka ho hlalosa hore na ho etsahetse eng ka botebo mona. Empa rea bona hore o ile a etsa lintho tse ling ka mora hore a phelisoa moeeng. Ka hona, moo bibe e buileng, le rona re tla buoa, moo e thotseng, le rona re tla thola, moo e sa hlakang, re tla hlakisa hore ha re tsebe, empa moo e hlakileng, re tla buoa ka sebete ka taba eno.***

BATHO BA NENG BA MO EMETSE: Ha a qeta ho hlola satane, o ile a ea ho batho ba neng ba hlokahtse ba lumela ho Jehovah ho ea ka selekane sa khale, meea ea batho bana e ne e le sebakeng se bitsoang "sefubeng sa Aborahama", moo e neng e emetse mohla Morena Jesu a tlang ho e lata. Sebaka sena e ne ele karolo ea nq'alo ea bafu, 'me se ne sa atamelane le lihele (Luka 16:22-27). Ho ne ho sena motho ea kileng a ea leholimong pele Morena Jesu a etla lefats'eng (Johanne 3:13).

TSOHO EA HAE EA 'MELE: (1) Morena Jesu o ile a khutlela 'meleng oa hae oa nama ka mor'a matsatsi a mararo. O tsohile e se e le 'mele o tlotlisitsoeng oa semoea. 'Mele ona ke 'mele o phelisoang ke bophelo ba Molimo, o se nang sebe ho oona. Ha ona lefu kapa litholoana tsa lona ho ona. Mohlala, ha o tsofale, ha o kule, ha o shoe, hape o khona ho phela leholimong le lefats'eng. **(2)** Morena Jesu o ile a nyoloha le batho ba neng ba le sefubeng sa Aborahama. Batho bana ba nyolohile ka 'mele ea moea feela, ha

ba so tsosoe `meleng ea bona ea nama (Mattheu 27:51-54). ke boporofeta ba se tla etsahala ha Morena Jesu a khutla. Bafu ha ba so tsosoe ka `mele ea nama. **(3)** Ka mor'a hore Morena Jesu a khutlele `meleng oa hae oa nama, o ile a ea leholimong tsatsing leno leo a tshileng ka lona ho ea phethahatsa selekane se secha. O ne a re Maria a se ke a its'oarella ka eena hobane ho ea ka selekane sa khale, moprista e moholo o ne a sa tlameha ho ts'oaroa ha a ilo isa sehlabelo sa libe ka sehalalelo se halalelang. Joale le Morena Jesu o ne a isa mali a selekane se secha a lefelletseng libe tsa rona sehalalelong se halalelang sa leholimong ke ka hona a ne a re Maria a se ke a mo ts'oara pele a ea leholimong (Johanne 20:16-18, Baheberu 9:11-13). **(4)** O ile a khutlela lefats`eng, eaba joale o iponahatsa ho barutuo ba hae kaofela, `me a qoqa le bona ka `muso oa Molimo hape a ja le bona. **(5)** O ile a fa barutuo ba hae taelo ea ho ea ka lefats`e lohle, `me ba etse batho bohle barutuo ba hae (Mattheu 28:18, Mareka 16:15-20).

NYOLOHELO EA HAE: Morena Jesu o ile a nyolohela leholimong ka `mele oa hae o tlotlisoeng ka mora matsatsi a 40 a tshile bafung. O nketsoe leholimong barutuo ba hae ba ntse ba mo shebile, `me a lula letsohong le letona la Ntate (Mareka 16:19, Luka 24:50-53, Liketso 1:9-12).

MAEMO A HAE HONA JOALE: Morena Jesu ke Molimo, mora oa Molimo, lentsoe la Molimo, Mopholosi le molopolli (Liketso 4:12), Morena oa marena le Khosi ea likhosi (Ts`enolo 19:16), Hlooho ea kereke le mothehi oa pholoho ea rona (Baefese 5:23-24, Baheberu 2:10-12), Ke moahloli oa batho ba pholositsoeng le ba sa pholosoang (2Bakorinte 5:10), Ke eena tsela e isang batho ho Molimo (Johanne 14:6), Ke Moprista oa rona e moholo oa bosafeleng (Baheberu 7:24-28), Lebitso la hae le ka holimo ho mabitso ohle, o fuoe matla ohle leholimong le lefats`eng, O lutse letsohong le letona la Ntate maholimong (Mareka 16:19).

MOSEBETSI OA HAE HONAJOALE: **(1)** Morena Jesu o ntse a sebetsa le kereke ea hae ka Moea O Halalelang ho pholosa lefats`e (Mareka 16:20) **(2)** Morena Jesu o ntse a phethahatsa kereke ea hae ka Moea O Halalelang le ka basebelletsi ba hae ba tlotlisoeng (Baefese 4:11-17) **(3)** Morena Jesu o ntse a rapella ba lumetseng ho eena hore ba phethahatse thato ea Ntate Molimo (Baheberu 7:25). Ho re rapella ha se ho nka lithapelo tsa rona a li fetisetse ho Ntate hobane o re file tokelo ea ho buoa le Ntate ka lebitso la hae.

MOSEBETSI OA HAE OA KAMOSO: Morena Jesu o tla khutla khetlo la bobeli ho tla lata kereke ea hae. **(Re tla hlalosa litaba tsena ka botlalo thutong ea bofelo).**

PAPISO EA RONA LE MORENA LE JESU. Morena Jesu o tlile ho tla nka boemo ba rona ba hoba lira tsa Ntate Molimo, `me o re file boemo ba hae ba hoba bara ba Molimo (2Bakorinte 5:21). Joale tsohle tseo a li entseng, o ne a re etsetsa tsona, ka hona ho ts'oana le ha re li entse. Kelellong ea Ntate Molimo re ne re na le eena ha li etsa hobane o ne a etsetsa rona. Joale **(1)** ha a shoa, re shoele le eena nqeng ea sebe (Baroma 6:3,6-8 Bakhalata 2:20) **(2)** ha a patoa, re patiloe le eena (Baroma 6:4) **(3)** Ha a tsosoa bafung, re tsositsoe le eena (Baefese 2:4-7) **(4)** ha a phahamisoa, re phahamisitsoe le eena (Baefese 2:6) **(5)** Ha a lula letsohong le letona la Ntate Molimo re lutse le eena, `me re phela le eena hape re busa le eena (Baroma 6:10-12, Baefese 2:6).

LEBITSO LA MORENA JESU: Re fuoe matla ka lebitso la Morena Jesu a ho busa bophelong, a ho laela maemo hore a fetohle, a ho kopa tsohle ho Ntate ka lebitso la hae. Lebitso la hae le ka holimo ho mabitso ohle. (Johanne 14:12, 16: 23-25, Mareka 16:15-19). Lebitsong la hae ho fumaneha pholoho, bophelo le tsohle tseo Molimo Ntate a re fileng tsona eleng tse rekuoeng ka mali a hae. Botlalo ba Molimo bo lutse lebitsong la hae. Lebitso la hae le lokolla Ntate Molimo le Manyeloi ho sebetsa. Lebitso la hae le emetse botho ba hae le matla a hae ka botlalo (his authority).

MALI A MORENA JESU: Mali a morena Jesu a bohlokoa haholo, re hloka ho lula re a ela hloko, ebile re a hopola (Luka 22:19-21). **Mali a Morena Jesu a re etselitse eng:** **(1)** Re rekuoe ka mali a hae, pholoho ea rona le bojalefa ba rona bo rekuoe ka mali a hae: mohlala: likamano le kutloano le Ntate Molimo, pholiso, katleho, ts`irelletso, katiso, tlhohonolofatso joalo joalo. (1Peterose 1:18, Ts`enolo 5:9-11) **(2)** Re hlotse ka mali a hae le polelo ea rona ea tumelo ho Krete (Ts`enolo 12:110) **(3)** Re hlatsuo ka mali a hae libeng tsa rona (Liketso 3:19-21) **(4)** Selekane se secha se thehiloe ka mali a hae (Luka 22:20). Re tlameha ho lula re hopola le ho ellelloa bohlokoa ba mali a Morena Jesu. Re bine ka ona, re buoe ka ona le ho lula re a elelletsoe. Mali a Morena Jesu a na le matla a sa feleng.

MORENA JESU KE ENG HO RONA BA LUMELANG HO EENA: **(1)** Morena Jesu ke Morena le Molimo oa rona (Ts`enolo 21:6-8, 19:16) **(2)** Ke hlooho ea rona re le kereke e hae (Bakolose 1:18) **(3)** Ke abuti oa rona oa pele lelapeng la Ntate Molimo (Baroma 8:29, Bak 1:18, Baheberu 2:11-13) **(4)** Ke molekane oa rona (Ts`enolo 19:7-9, 2Bakorinte 11:2) **(5)** Ke Ntate oa rona (Baheberu 2:13) **(6)** Ke bophelo ba rona (Johanne 15:5), Ke ho loka, khalalelo, bohlale le topollo ea rona (1Bakorinte 1:30) **(7)** Ke konyana ea rona ea paseka (1Bakorinte 5:7) **(8)** Ke khanya ea Molimo ka ho rona (Bakolose 1:27) **(9)** Ke thabo, khotso le tsohle tsa rona (Baefese 2:14) **(10)** Ke matla a rona (Bafilipi 4:13) **(11)** Ke moahloli oa rona (2Bakorinte 5:10).

MABITSO A HAE A MANG: Mabitso a hae a senola semelo, boleng le mesebetsi ea hae: Jesu, Lentsoe la Molimo, Mora oa Molimo, Adama oa bobeli, Molimo o matla ohle, Qalo le qetelo, Amen, Ea tlotsitsoeng, Mphatlalatsane, Emmanuel, Konyana ea Molimo, Bophelo bo sa feleng, Paki ea `nete, Molopolli, Mopholosi, Mofolisi, Morena oa khotso, Lentsoe la bophelo, Bohobe ba bophelo, Tau ea leloko la Juda, Matla le bohlale ba Molimo, Khanya ea Molimo, Mora oa Davida, Molimo. **Ho na le a mang a mangata a hlahang testamenteng e ncha le ea khale.**

MOLIMO: MOEA O HALALELANG.

BOPHELO BA HAE: Esale a le teng pele ho nako le tlholeho. Ha a etsoa, empa tsohle li tsoa ho eena. Ke motho oa boraro borarong bo teroneng, `me mesebetsi eohle ea Molimo **e bonahatsoa ke eena.**

BOLENG BA HAE: Moea O Halalelang ke Motho joalo ka Morena Jesu le Molimo Ntate. Moea O Halalelang ha a na `mele oa nama le masapo joalo ka Morena Jesu Krete, empa o na le `mele oa moea. `Mele oa hae oa moea o na le sebopeho le ts'obotsi ea motho hobane re entsoe ka sets'oants'o le sebopeho sa hae. **Moea O Halalelang ke motho, `me re tlameha hore ha re buoa ka Eena re re Moea O Halalelang "O", e seng Moea O Halalelang kapa Holy Spirit "e" hobane ke motho, ha se ntho.** **Moea O Halalelang O hohle, O Matla oohle, ebile O tseba tsohle.**

SEMELO SA HAE: Moea O Halalelang o ts'oana le Molimo Ntate le Morena Jesu ka semelo. (Bakhalata 5:22) e senola semelo sa hae. **Moea O Halalelang ke eena ponahatso ea Ntate Molimo lefats'eng. Lebitso Moea O Halalelang le senola mosebetsi oa hae oa motheo oa ho etsa hore molumeli a phele bophelo ba bomolimo bo kenyelletsang bophelo ba khalalelo le boinehelo ho Ntate Molimo le ho etsa lintho joaloka Ntate Molimo ka mokhoa oa mohlolo.**

Hobaneng a tlike ho tla sebetsa le Kereke ea Morena Jesu: (Johanne 16:7) Morena Jesu o itse ho betere ha Moea O Halalelang e le eena ea setseng le kereke ea hae lefats'eng hobane Moea O Halalelang o khona ho ba hohle ka nako e le `ngoe, hape Moea O Halalelang o khona ho phela ka hare ho molumeli. `Mele oa Morena Jesu oa nama o ne o sa mo lumelle ho ba hohle ka nako e le `ngoe hape o ne a ke ke a khona ho phela ka hare ho rona ka `mele o joalo. Joale empa ka Moea O Halalelang, Morena Jesu o khona hoba hohle ka nako e le `ngoe hape o khona ho phela ka har'a balumeli bohle hobane hohle moo Moea O Halalelang a leng teng, botlalo ba Ntate le Mora bo teng (Baefese 4:10, Johanne 14:17, 21 le 23).

MESEBETSI EA HAE MABAPI LE MOLUMELI (Johanne 14:25-28, 15:26-27, 16:12-18): Ke Moeletsi, Tichere, Mohopotsi, Mots'elisi, Moemeli: O re emela khahlanong le ba re qosang, ke Motataisi, O senolela molumeli bokamoso, O senolela molumeli se buuoang ke Morena Jesu. Ke Momatlafatsi (Liketso 1:8), ke lets'oao la hore re ba Krete (Baefese 1:13&14), Ke Morapelli: O rapela ka rona, ebile o re ruta ho rapela le ho rapella hore thato ea Ntate Molimo e etsahale. **O ba le kopano le setsoalle le Molumeli (2Bakorinte 13:13) O sebetsa `moho le molumeli. Re tlameha ho ba le setsoalle se seholo le Moea O Halalelang `me re mo elellae e le ea nang le rona ka linako tsohle. Re bue le eena hape re mo botse lipotso le ho mo elellae ka linako tsohle hore o lula a ena le rona hape re se ke ra mo utloisa bohloko ka ho iphapanyetsa eena kapa ho tsamaea ka nama (2Bakorinte 6:1).** Moea O Halalelang o etsa tsohle tseo Morena Jesu a batlang ho li etsa bophelong ba Molumeli, hape o re thusa ka hohle ho maphelong a rona le Ntate Molimo. **Moea O Halalelang o oa phahamisa le ho tlotlisa Jesu.**

MESEBETSI EA HAE MABAPI LE BA SA LUMELANG (Johanne 16:8-11): (1) O kholisa lefats'e ka tsa sebe sa ho se lumele ho Morena Jesu. **(2)** O kholisa batho ba sa lumelang hore le bona ba ka ba likamanong tse lokileng le Ntate Molimo ha ba ka ba lumela. **(3)** O kholisa batho ka likahlolo tsa Ntate Molimo.

LIPONAHATSO TSE SUPILENG TSA MOEA O HALALELANG (ISAIAH 11:1-4): Moea O Halalelang ke motho a le mong, empa o na le liponahatso tse 7. 7 e emetse phethahalo. Ka mantsoe a mang, liponahatso tsena li senola botlalo ba Moea O Halalelang ka ho phethahala. Moea O Halalelang o phela ka har'a balumeli ka botlalo, empa molumeli o tlameha ho tseba le ho tsamaea ka tumelo ho bonahatso liponahatso tsena.

- 1) **Moea oa Morena e leng Moea oa Borena:** O fa molumeli borena le puso holim'a lefats'e le `muso oa lefifi le maemo ohle ao a kopanang le ona.
- 2) **Moea oa bohlale:** O fa molumeli bokhoni ba ho tsamaea ka bohlale ba Ntate Molimo bo kenyelletsang ho etsa lintho joalo ka Ntate Molimo le ho etsa lintho ka nako ea Ntate Molimo.
- 3) **Moea oa Kutloisiso:** O fa molumeli bokhoni ba ho utloisisa lintho tsa Ntate Molimo ha bobebe.
- 4) **Moea oa Boeletsi:** O eletsa kapa ho hlabolla molumeli bophelong ba hae kahohle le ho fa molumeli bokhoni ba ho eletsa ba bang ka likeletso tsa bomolimo.
- 5) **Moea oa matla:** O fa molumeli matla a ho phetha thato ea Ntate Molimo. Matla a na ke bokhoni ba ho etsa seo molumeli a se bitselitsoeng ho sa tsotellehe hore na ke eng.

- 6) **Moea oa tsebo:** O fa molumeli bokhoni ba ho tseba lintho tseo Ntate Molimo a mo fileng tsona mahala, le ho tseba litsela le litsamaiso tsa Ntate Molimo.
- 7) **Moea oa ts'abo ea Morena:** O fa molumeli ts'abo le tlhompho ea Ntate Molimo hape o tisa bohloemphehi ho molumeli.

LISUPO LE MATS'OA O A HAE: Moea O Halalelang ke motho, empa bibe e mo senola ka lisupo le mats'oao a fapaneng hore batho ba tle ba utloisise mosebetsi oo a o etsang ka nako eno ha bobebhe. Lisupo tsa hae ke tsena tse latelang: **Mollo:** mollo o oa hloekisa, mollo o oa chesa, mollo ke matla, mollo o oa senya, mollo o oa futhumatsa hape o fana ka leseli. Mollo ona o ka utloahala e le mocheso, mofuthu kapa bohatsu joalo joalo.

Moea O Halalelang: O oa re hloekisa 'me o re fa matla a ho phela ka bohloeki, O chesa tse mpe maphelong a rona, O re fa matla a ho pakela Morena Jesu, O ahlola tse sa lokang, O oa re ts'elisa, O oa re tataisa.

- 1) **Metsi:** metsi a phelang, kapa a phallang, kapa a hloekileng, kapa noka e phallang. Metsi a pholisa, a hloekisa, a nyorolla. **Moea O Halalelang:** O khatholla molumeli joaloka metsi a pholileng, O fa molumeli matla a ho phela ka tlhoeko, O tlatse ba mo nyoretsoeng (Johanne 7:37).
- 2) **Leru:** leru le fana ka moriti 'me le ts'ireletsa letsatsing. **Moea O Halalelang:** Oa re sireletsa litlokotsing tse etsahalang lefats'eng.
- 3) **Oli:** Oli e ea tlotsa, e ea folisa. Re le balumeli, re tlotsitsoe ka **Moea O Halalelang (1Johanne 2:20). Moea O Halalelang hape o oa folisa.**
- 4) **Moea O Halalelang** O bonahatsoa e le leseli, e le setsokotsane, e le veini e ncha. Leseli le ea re khants'etsa, setsokotsane se bonts'a moea o tsamaeang, hona ho supa ho tsamaea ha Moea O Halalelang a etsa mosebetsi o itseng. Veini e fana ka thabo le sebete, Moea O Halalelang o re fa thabo le sebete sa ho tobana le tsohle (Baefese 5:18).
- 5) **Leeba:** Moea O Halalelang o bonolo joaloka leeba (Bakhalata 5:22).

LENTSOE LA HAE: Moea O Halalelang o buoa ka litsela tse fapaneng, empa se bohlokoa ke hore ebe molumeli o fumane molaetsa, e seng hakaalo hore na o buile ka tsela e feng. O buoa ka bibe (logos), o buoa ka lentsoe le buuoang (rhema) le ka tlang e le ts'enolo, litoro, lipono, boporofeta joalo joalo. O buoa ka boporofeta, lipono, litoro, ka thero e boporofeta, liketso tse boporofeta, pina le puo e boporofeta le ka lineo le liponts'o tse ling tsa hae. O buoa ka litholoana tsa moea le tse ling tseo re tlo li hlalosa thutong e latelang. Tsohle tseo a li buoang li tla tsamaea le lentose le ngotsoeng (e leng bibe), 'me ho tlameha hore ho be le mangolo a mabeli kapa a mararo ho tsoa testamenteng e ncha a pakang taba eno eo a e buoang.

LINEO TSA HAE: Lineo tsa hae li hlaha ho **1 Bakorinte 12:1-11 le Baroma 12:6-9. Empa ha ho bolele hore mona ke lineo tsohle tsa hae. Tse ling ke bo ho hlalosa litoro joalo joalo.** Lineo tsena o li fa balumeli ha a ba kalime, 'me ke li hlalositse haholo thutong ea Bara ba Molimo.

MOSEBETSI OA HAE OA HAJOALE: 1) Moea O Halalelang o sebetsa le kereke ho pholosa lefats'e. 2) Moea O Halalelang o ntse a phethahatsa balumeli, a ba lokisetsa ho tla ha Morena. 3) Moea O Halalelang o oa bitsa le ho tlotsa balumeli ho etsa mosebetsi e fapaneng 'musong oa Ntate Molimo (Liketso 13:2-5). Mosebetsi ea hae e meng ke eo re seng re buile ka eona.

MOSEBETSI OA HAE OA KAMOSO: 1) Moea O Halalelang o tla tsosa 'mele ea balumeli ba shoetseng moreneng ha Morena Jesu a khutla. 2) Moea O Halalelang o tla nkela kereke marung ho ea khahlanyetsa Morena Jesu mohlang a khutlang. 3) Moea O Halalelang o tla lula a le ka hare ho balumeli ho fihlela.

MABITSO A HAE A MANG: Mabitso a hae a senola semelo, boleng le mosebetsi ea hae: Moea O Halalelang, Moea oa Molimo, Moea oa 'nete, Moea oa Jehova, Mots'elisi, Moemeli, Moea oa Jesu Krete, Tlolo, Moea oa khalalelo, Linoka tsa metsi a kollang, Mollo oa Molimo, Meea e supileng ea Molimo, Khanya ea Molimo, Moea oa Morena, le liponahatso tsa hae tse supileng ke mabitso a hae. **Ho na le mabitso a mang a mangata a Moea O Halalelang testamenteng e ncha le ea khale.**

HO UTLOA LENTSOE LA NTATE MOLIMO

TS'EBETSO EA BOAPOSTOLA LE BOPOROFETA: Ha re buoa ka ts'ebetso ea boporofeta, ha re buoe ka ofisi ea moporofeta, empa re buoa ka ts'ebetso ea ho buoa ha Ntate Molimo (Liketso 2:17-20). Ha re buoa ts'ebetso ea boapostola, ha re buoe ka ofisi ea moapostola, empa re buoa ka ts'ebetso ea ho iponahatsa ha Ntate Molimo, e leng ts'ebetso ea meka, mehlolo le limakatso (Mareka 16:15-19).

THUTONG ENA RE TLO SHEBANA LE TS'EBETSO EA BOPOROFETA, E LENG LITSELA TSE FAPANENG TSEO MOEA O HALALELANG A BUOANG KA TSONA. (PROPHETIC MINISTRY). Bibe e ea hlakisa hore bana bohle ba Ntate Molimo ba khona ho mo utloa (Johanne 10:14, 27-29). Lentsoe la Ntate Molimo le likarolo li peli. Ke lentsoe le ngotsoeng (e le bibe), le lentsoe

le buuoang bophelong ba molumeli (e leng rhema kapa the spoken word). Lentsoe le na le buuoang ke lentsoe la Morena Jesu le senoloa ke Moea O Halalelang bohphelong ba molumeli (Johanne 16:12-16).

MOEA O HALALELANG O BUOA JOANG.

(1) MOEA O HALALELANG O BUOA KA LENTSOE LE NGOTSOENG (E LENG BIBELE). Ha molumeli a bala bibebe, Ntate Molimo o ntse a buoa le eena. `Me ka linako tse ling a ka nka litemana tse itseng, `me a li phelisa moeeng oa molumeli. Moea O Halalelang a ke ke a buoa se ka thoko ho bibebe. A ke ke a ema khahlanong le lentsoe la hae (2Timotia3:16)

(2) MOEA O HALALELANG O BUOA KA LITORO (Liketso 2:17). Ke tsela eo a e khethileng ea ho buoa, linako tse ling ke tsela e bonolo ea ho fetisetsa molaetsa ho molumeli, ha a robetse kelello e sa eme ka tseleng, Linako tse ling ha molaetsa o tla ka toro e le lits`oants`o o ka hlaha o le matla ebile o hlakile haholo. Le ha ho le joalo, litoro li ka hlaha libakeng tse tharo, ho Ntate Molimo, ho motho kapa ho satane.

LITORO TSE HLAHANG HO MOEA O HALALELANG LI JOANG: **(1)** Li ka senolo seo e leng thato ea Ntate Molimo kapa morero oa hae. **(2)** Li fana ka bokamoso bo chabileng, hangata li senola moo Ntate Molimo a batlang ho isa molumeli kapa seo a mo ts`oaretseng sona. **(3)** Li tliša molaetsa o fe kapa o fe oo Ntate Molimo a batlang ho o fa ngoana oa hae. **(4)** Ha toro e ipheta hangata ka tsela e ts`oanang kapa e fapaneng, e ka bolela hore Ntate Molimo o tiisa taba ea hore seno se loroang se tla etsahala. **(5)** Litoro tsa Ntate Molimo hangata ke linnete tse etsahalang moeeng, mohlala, o lora o rapelloa o bo o tsoha o folile kapa o amohetse seo o neng o se fuoa torong. **(6)** Li ka supa bokhale, bojoale kapa bokamoso, sepheo e ntse e le ho tliša bokamoso bo betere. **(7)** Li ka bonts`a molumeli hore na boemo ba hae ba moea bo joang. Li jala peo ea morero oa Ntate Molimo ho molumeli. **(8)** Le haeba Ntate Molimo a khalema ngoana oa hae torong, e tla mo siela tsela ea ho baka.

LITORO TSE HLAHANG HO SATANE: Li tliša tsuo (tsuo ke kahlolo e se nang ho fetoha), li tliša tlhekefetso le pherekano, lia qosa, li jala peo e fosahetseng mothong, ea boikhohomoso le sebe joalo joalo, li khahlanong le lentsoe le tsamaiso ea Ntate Molimo.

LITORO TSE HLAHANG MOTHONG: Hangata ke lintho tseo motho a li nahanneng haholo nakong eno, kapa ntho e mo ts`oentseng kapa e mo thabisitseng. Empa le ha hole joalo, Ntate Molimo o oa hla a bue ka toro le ngoane oa hae haeba ho na le ntho e mo ts`oenyang. Ha ho bolele hore ha motho a lora ntho hobane e mo ts`oenya, ee be e le toro e tsoang ho eena ka linako tsohle. Ntate Molimo o oa hla a bue ka taba eno hobane ke Ntate ea lerato.

4) MOEA O HALALELANG O BUOA KA LIPONO (Liketso 2:17): Lipono ntse li ts`oana le litoro empa feela li tla ka tsela e fapaneng, empa li ka ba le moelelo le matla a ts`oanang. **Lipono li mefuta e meraro. Mefuta ena ke ena e latelang:** **1) ke pono eo molumeli a e bonang moeeng oa hae (inner vision):** Molumeli ha a e bone ka mahlo empa o e elelloa (perceive) moeeng oa hae. **(2) Ke pono eo molumeli a e bonang e le eona feela (trance):** mona molumeli ha a bone letho ntle le eona **(3) Pono eo molumeli a e bonang a butse mahlo (open eye vision):** Ena molumeli o e bona a ntse a bona lintho tse ling tsa nama. Lipono li sebetša joalo ka litoro feela, empa feela li tla ka litsela tse fapaneng. Lintlha tsane tsa litorong li sebetša le litorong. **(4) Ho tsoa `meleng oa nama (out of body experience):** Mona ke ha molumeli a tsoa `meleng oa hae oa nama. A ka nkuoa ka moea a isoa leholimong kapa lihleleng kapa lefats`eng la moea kapa hoohle moo Ntate Molimo a batlang ho mo isa kapa a bonts`oa soohle seo Ntate Molimo a batlang ho mo bonts`a sona. Ena pono e matla ho feta lipono tsohle hape e ba le matla a fetang holima batho hofeta lipono tsohle.

5) MOEA O HALALELANG O BUOA KA LENTSOE LE UTLOAHALANG: Ka linako tse ling Moea O Halalelang o buoa ka lentsoe le utloahalang joalo ka la motho ha a buoa le e mong. Lentsoe lena le ka buoa le hlaha ka hare kapa kantle molumeli.

6) MOEA O HALALELANG O BUOA KA BOPOROFETA (Liketso 2:17-18): Ha molumeli a porofeta e mong, ke Moea O Halalelang ea ntseng a buoa ka molumeli eno ea porofetang, a buoa le eno ea porofetoang. Empa mona re buoa ka boporofeta ba bokreste feela, e seng ba bohata. **Moea O Halalelang o buoa ka thero e boporofeta:** ha moreri a rera ka ts`enolo le susumetso ea Moea O Halalelang. **Moea O Halalelang o buoa ka pina e boporofeta:** ke ha ea binang kapa ba binang ba bina ka ts`enolo le susumetso ea Moea O Halalelang. E kaba pina eo ba ntseng ba e senoleloa ke Moea O Halalelang ka nako eo ba ntseng ba e bina, kapa eaba pina e tsebahalang, empa e binoa ka tlas`a susumetso ea Moea O Halalelang. **Moea O Halalelang o buoa ka liketso tse boporofeta:** ke ha motho a etsa ketso e itseng ka tlas`a susumetso le ts`enolo ea Moea O Halalelang. Mohlomong a fa motho e mong ho hong kapa a etsa ketso e itseng hoba a senoletsoe ke Moea O Halalelang. **Moea O Halalelang o buoa ka sehlopha sa batho ba boporofeta kapa baporofeta:** mona ke ha sehlopha sa batho ba khonang ho utloa Ntate Molimo, kapa baporofeta ba porofeta motho kapa batho ba itseng. Sepheo ke ho tiisa taba ha bonolo ha Ntate Molimo a e buile kapa ho thiba se sa buuoang ke Ntate Molimo. **Moea O Halalelang o buoa ka puo e boporofeta:** mona ke ha molumeli e mong a buoa le e mong kapa batho ba bang empa a senola pelo le kelello ea Ntate Molimo ka puo ea hae. **Moea O Halalelang o buoa ka bohlabolli bo boporofeta:** Mona

ke ha molumeli ea hlabollang e mong a hlabolla ka lineo tsa moea, haholo tsa ts`enolo le tsa puo. **Moea O Halalelang o buoa ka ofisi ea Moporofeta:** Ha moporofeta oa Ntate Molimo a porofeta, ke Moea O Halalelang ea ntseng a buoa ka moporofeta eno.

Boporofeta ba satane bona bo tlisa pherekano, tsuo le letsoalo. Bo qosa ba senang molato joalo ka hore mang mang o oa loea. Bo oa hatella, boo a patalisa, bo oa utsoa le ho senyetsa le ho timetsa. Bo khahlanong le testamente e ncha.

- 7) **MOEA O HALALELANG O BUOA KA TS`ENOLO:** Moea O Halalelang o buoa ka ts`enolo. Ts`enolo ena e ka tla e le mohopolo, susumetso kapa tsebo feela ho molumeli.
- 8) **MOEA O HALALELANG O BUOA KA LITHOLOANA TSA MOEA:** Litholoana tsa Moea li hlaha ho **Bagalata 5:22**. Ha Moea O Halalelang a senotse ho hong, litholoana tsa Moea li tla paka. Mohlala: ho tla ba le khotso, thabo, sebete le phomolo moeeng oa molumeli. Ha li le sio, ke sesupo sa hore hase Moea O Halalelang ea buileng. Litholoana tsa Moea li ka holimo ho lipono, litoro, boporofeta le ts`enolo, hobane le satane a ka buoa ka lipono, litoro, boporofeta le ts`enolo, empa a keke a khona ho fana ka khotso kapa thabo ea `nete.
- 9) **MOEA O HALALELANG O BUOA KA LINEO LE LIPONTS`O TSA HAE:** Moea O Halalelang o buoa ka lineo tsa hae tse robong le liponts`o tsa hae. Mohlala, neo ea tsebo, boporofeta, temoho ea meea, maleme le tlhaloso ea ona, bohlae, ke Moea O Halalelang ea ntseng a buoa le molumeli ka lineo tsena. Lipholiso, tumelo le mehlolo le liponts`o tsona li bonahatsa boteng ba hae. Le teng o ntse a buoa hore o teng, `me o oa re araba ha re sebetsa le ho buoa le eena ka tumelo.
- 10) **MOEA O HALALELANG O BUOA KA BALUMELI LE BATHO BA BANG BAO E SENG BALUMELI:** Moea O Halalelang a ka susumetso molumeli e mong ho buoa ho hong le e mong le ha ena a sa tsebe hore o buoa seno ka tlas`a tataiso ea Moea O Halalelang. A ka sebelisa le batho ba sa pholosoang ho buoa le ha bona ba sa tsebe hore ke ka tataiso ea Moea O Halalelang ba buileng kapa ba entseng lintho tse itseng.
- 11) **MOEA O HALALELANG O BUOA KA MAEMO:** Linako tse ling Moea O Halalelang a ka bula kapa a koala mamati a mang maphelong a rona. Kapa a sebelisa maemo ho araba lithapelo tsa rona kapa ho buoa le rona.
- 12) **MOEA O HALALELANG O BUOA KA BOETAPELE:** Moea O Halalelang o sebelisa boetapele ho buoa. E kaba boetapele ka kerekeng, ka lapeng la balumeli, kapa mesebetsing e fapaneng.
- 13) **MOEA O HALALELANG O BUOA KA LIKETSO:** Moea O Halalelang o susumetso batho hore ba etse liketso tse molemo ho ba bang. Mohlala, ha motho a o fa ho hong, kapa a o patella sekoloto kapa a etsa se seng se molemo ho uena joalo joalo.
- 14) **MOEA O HALALELANG O BUOA KA LETSOALO (Baroma 9:1):** Mona ha se letsoalo la ho ts`aba matemona empa ke letsoalo la ho ts`aba Ntate Molimo le ho etsa se nepahetseng mahlong a hae. Ke lentsoe conscience ka senyesemane, e seng fear.
- 15) **MOEA O HALALELANG O BUOA KA HO KHOLISA (CONVICTION) (Johanne 16:5-12):** Moea O Halalelang o kholisa molumeli ka seo e leng thato ea Ntate Molimo, le ba sa lumelang ka ho lumela ho Morena Jesu.
- 16) **MOEA O HALALELANG O BUOA KA BOELETSI BO BOHLALE (Isaia 28:29):** Moea O Halalelang o sebelisa batho ho eletsa ba bang. Ho molemo hore molumeli a fumane boeletsisi ho balumeli ba bang ba tsamaeang le Moea O Halalelang ka katamelo pele a nka liqeto tse kholo a le mong.

TSELA EA HO UTLOISISA LITORO LE LIPONO: Hona le mefuta e `meli ea lipono le litoro: **1) Ke tse buoang ka molaetsa o hlakileng o tobileng taba eo motho a e lorang.** 2) **Ke tse buoang ka molaetsa o patehileng, tse ka hlahang e le lilothe.** Moea O Halalelang o fana ka mofuta ona hobane o batla hore molumeli a batlane le eena ka tlhaloso ea toro eno. Hona le mefuta e `meli ea lipuo tsa litoro le lipono: **ke puo ea bibe le puo ea botho. (1) Puo ea bibe:** o lora ka lits`oants`o tse teng bibeleng joalo ka bo likhomo, lintja, oli, noha, lampi joalo joalo. **(2) Puo ea botho:** o lora lintho ka lintho tse amanang le uena o le motho, `me li ka utloisisoa ha bonolo ke uena. **Le ha hole joalo, lipuo tsena lia kopa kopana torong e le `ngoe.**

LITORO LE LIPONO LI HLAISOA JOANG: **(1)** Its`etlehe holim`a bohlae le ts`enolo ea Moea O Halalelang **(2)** Arola toro kapa pono ka likoto **(3)** Tse ling tsona li ka utloisiseha feela ha li phethahala kapa ka mora nako e itseng. **(4)** Tse ling li tla nka hore o bale bibe le ka batho ba itseng hore u fumane meelelo ea tsona hantle. **(5)** Tse buoang ka molaetsa o hlakileng li batla hore molumeli a li nke li le joale empa a tsebe hore Ntate Molimo o na le nako ea ho li phetha. **(6)** Toro e ka iphetha ka makhetlo, hona ho tiisa hore Ntate Molimo o tla etsa taba eno. Empa le satane a ka tlisa litoro tse iphethang, tsona molumeli o tlameha ho iphanyetsa tsona feela.

Ha Ntate Molimo a buile ka tsela e fe kapa e fe, a ka kopa hore Ntate Molimo a tiise taba eno. Ntate Molimo o tla e tiisa ka litsela tse ngata. Ha a se a e tiisitse, molumeli a bone hore o oa e phetha, empa a tsebe nako le tsela ea Ntate Molimo ea ho etsa seno.

HO UTLOISISA LITS'OANTS'O TSE HLAHANG LITORONG LE LIPONONG, E EA HO WEB SITE EA WWW.

TEHILLAH. ORG LE LI WEB SITE TSE LING TSA BAKRESTE. O hopole hore lits'oants'o li ka bolela lintho tse fapaneng ho ea ka pono le toro le tse ling tseo ke sa li ngolang. Ha ho bolele hore sesupo se le seng se lula se buoa ka ntho e le 'ngoe. **Tse ling tsa lisupo li bolela tsena tse latelang.** **Lifate/sefate:** batho, bophelo ba motho, 'muso oa Ntate Molimo, **Lekala:** Kreste, bakreste, litholoana tsa bophelo motho kapa tsa ho hong, **Sabole:** lentsoe la Ntate Molimo, matla **Ka moo ho jelloang:** sebaka sa kopano le bonngoe, **Lefika:** Kreste, sets'abelo sa motho, **Harepa:** khotso, **Terompeta:** Ho ba malala a laotsoe. **Maoto:** leeto la semoea. Mosebetsi oo Ntate Molimo a o fileng motho.

Linaleli: Manyeloi, bana ba Ntate Molimo kapa boemo ba bona. **Mookoli:** ts'episo ea Molimo. **Leoatle:** lichaba. **Israele:** Kereke. **Lekerapa:** pholoho. **Lemati:** Kreste, monyetla o bulehileng, o butsoe ke Ntate Molimo kapa satane. **Lifensere:** mahlo, ho senoloa se ka hare. **Lebanta:** 'nete. **Lieta:** pitso, mosebetsi oo motho a o fuaang ke Ntate Molimo. **Lebitla le bulehileng:** Tsosetso. **Joang bo botala:** lekhulo, sebaka sa phomolo le lithohonolofatso. **Buka:** bophelo ba motho, thuto. **Sekolo:** Kereke/ sebaka sa ho ithuta. **Sepetlele:** kereke. **Teronko:** kahlolo. **Mofarasi:** molao. **Bohlola:** ho se ts'epahale. **Ho hlobola:** liketso tse soabisang kapa ho bulela sera. **Oli:** tlolo. **Ts'its'inyeho ea lefats'e:** boteng ba Ntate Molimo kapa kahlolo. **Moea:** ho sebetsa ha Moea O Halalelang. **Kamore ea boroko:** sebaka sa kopano kapa bo'ngoe. **Ntloana:** lekunutu. **Lere:** Matla a bomolimo. **Mosi:** boteng ba Ntate Molimo. **Phoka:** boteng ba Ntate Molimo. **Leru:** boteng ba Ntate Molimo **Pitsa e belang:** kotsi e kannang ea etsahala, **Pitsa:** katleho.

Mona ke hlalosa hore na linomoro ka puo ea bibe le litoro kapa lipono li ka bolela eng. **Nomoro e le 'ngoe e ka bolela lintho tse ngata ho ea ka hore na toro kapa pono e joang.** Ka mora nomoro e 'ngoe le e'ngoe ke hlalositse hore na e ka bolela eng. **Empa ha kea ngola litemana tse bonts'ang linomoro tsena, empa o ka li fumana kaofela ho www.tehillah.org.** **1:** Qaleho, ntho e ncha, kopano, boemo, bomolimo le bokhoni. **2:** Ho paka, karohano, phethahalo lenyalong, lira, likarohano, **3:** Phethahalo, botlalo, bopaki, Botlalo ba bomolimo, Molimo, matla a tsoho ea bafu **4:** lefats'e, lihloliloeng, linako, likarolo tse nne tsa lefats'e, ho busa holima lefats'e. **5:** mohau, tefello ea libe, lineo tse hlano tsa Morena Jesu, ts'ebeletso, litlamo, ho phela hantle ka botlalo. **6:** Motho, sebata, satane, nama, bofats'e, ho sebetsa ka thata ka nama kapa ka boemo ba nama, ho hlokofoa, ho phethahala nameng. **7:** ho qeta, mosebetsi o felileng, phethahalo, phomolo, phethahalo moeeng. **8:** Ho khaohana le sebe, ho lokoloha, pholoho, qaleho e ncha, matla a tsoho bafung, ho shoa booeneng. **9:** Litholoana tsa moea, lineo tsa Moea, kotulo, qetello, botlalo ba kholo. **10:** 'muso, molao, tsamaiso, boshomo, teko kapa qholotso. **11:** qetello, ho qeta, pherekano, ho hloka tsamaiso, ho se felle. **12:** Puso le khetho ea bomolimo, botlalo ba boapostola, borutuo, kereke, batho ba Molimo, kopano, bookameli. **13:** Borabele, ho hana, ho koeneha le ho khutlela sebeng **14:** paseka, ho tsoala, mosebeletsi **15:** tokoloho, mohau, phomolo le bolokolohi. **16:** mahala, pholoho. **17:** Tsamaiso ea semoea, ho se phethahale, bongoana. **18:** Litlamo, kahlolo, ts'enyeho, bots'oaruoa. **19:** tumelo, ho soaba, ho hloka litholoana nameng kapa moeeng. **20:** khalalelo, topollo. **24:** Phethahalo pusong, bopresta, boinehelo, kholo. **30:** Qaleho ea ts'ebeletso, kholo ea hore o ka qala ts'ebeletso. **40:** liteko, liqholotso. **50:** pentakonta, Moea O Halalelang, tokoloho. **70:** Ho fetisetsa ha Moea oa Molimo, katiso, sechaba, pusetso. **75:** Ho hloekisa, ho arola. **100:** botlalo, batho ba ts'episo. **120:** Qaleho ea bophelo ba Moea, qetello ea bophelo ba nama. **150:** Bofelo ba lefats'e ka metsi. **666:** sera sa Kreste, satane, nomoro ea motho, lets'oao la sebata. **10 000:** sesole sa Molimo se koetlisoa le ho etelloa pele ke Molimo. **12 000:** Sesole se matla sa Molimo.

Mona re hlalosa hore na mebala e fapaneng e ka bolela eng ka puo ea litoro le lipono ea bibe le: **Bosehla:** kopano le Ntate Molimo, sebe **boputsoa:** Moea O Halalelang, boholumo. **Botala:** bophelo kapa katleho. **Pherese:** serena, borui, matla, **Bosoeu:** bohloeki le ho loka, botlotlehi ba Molimo, khanya ea Molimo. **Khauta:** bomolimo. **Silifere:** topollo, **Bronze:** Semelo sa sebe. **Bo pinki:** phethahalo ea ts'episo ea Molimo. **Bokhubelu:** ts'oarelo. **Orange:** Boikokobetso. **Bosootho:** Bofats'e. **Bots'o:** lefifi, sebe, bosatane, mesebetsi e lits'ila

Mona re hlalosa hore na liphoohofolo tse fapaneng li ka bolela eng: **Ntja:** Motho ea sa lumelang, mohlekefetsi, motsoalle. **Leeba:** Moea O Halalelang. **Katse:** ho hohela, ho qhekella. **Nooa:** pholiso, bohlale, satane, ho thetsa kapa ho qhekella. **Tau:** Kreste, satane, Moapostola, boapostola, sebete, holoka. **Nonyana:** Ho hlokomeloa, sera. **Poho:** mohlekefetsi, sehlabelo. **Khomo:** sehlabelo, mohlekefetsi. **Pere:** kahlolo, matla, ho matha kapa ho tata. **Linots'i:** ho phathahana. **Marutle:** barumuo ba kahlolo. **Lits'inti:** matla a bosatane. **Ntsu:** Moporofeta, neo ea boporofeta. **Phokojoe:** moporofeta oa bohata, moporofeta ea bang leshano kapa ea lahleng batho. **Likokonyana:** boitelo mosebetsing. **Tlhapi:** morutuo. **Nku:** mokreste. **Konyana:** kreste.

Mona re tla hlalosa hore naa liketso tse fapaneng li ka bolela eng: **Bohlola:** Bohlola ba moea (ho se ts'epahalle Ntate Molimo), sebe sa thobalano. **Ho tlotso/tlotsoa:** Ho khetheloa mosebetsi o bomolimo, ho rapella bakuli, khalalelo. **Ho tsoha:** ho elelloa ho hong, ho hlapoheloa, ho susumetsoa ho nka khato. **Ho pheha:** Ho sebelletsa, Tlhokomelo ea Molimo, Ho khumamela. **Kolobetso:** Ha khaohana le motho oa khale, ho kena nthong e 'ngoe ka botlalo, pako. **Ho nyopa:** Ho se behe litholoana ts'ebetsong ea hao ho Ntate Molimo, Kahlolo, lefu la moea, lefu la ts'ebelletso. **Ho hlapa:** ho hloekisoa, ho baka, bohleki. **Ho felloa ke moea kapa ho hema ka thata:** ho tata ho feta tekano, ho nka boikarabello bo bohlo ho feta tekano, ho etsa lintho ka nama, ntho e o emeng ka pele. **Ho phesha:** ho se hloeke, boikokobetso, ho rohakeha, ho tlontlolloa, nooa, ho khumamela melimo

ea bohata. **Ho lla:** ho hlokofoala, pako, kahlolo, thapelo, ho utloa bohloko kapa ho thaba. **Ho jaefa (ho Danca):** khumamelo kapa thoriso, thabo, ho thaba, tlhlo, tlhlo ea satane. **Ho lora o lora:** ho fuoa molaetsa ka hara molaetsa o mong, ts`enolo ea thato ea Ntate Molimo le ea bokamoso. **Ho noa:** kopanelo ha le noa `moho, tlasa matla a Moea O Halalelang, ho noa hampe ke ho tsamaea ka litakatso tsa nama. **Ho khaqa:** ho hloloa, ho inyatsa, ho tetebea, ho hlokofoala, ho ba sekolong, ho ba tsietsing, teko ea ho oa tumelong. **Ho ja:** ho ikutloela ho hong (experience), selekane (ha le ja `moho), tumellano, ho nka karolo, setsoalle, kopanelo (fellowship), ho senya, ho thuisa, ho amohela lentsoe la Ntate Molimo. **Ho oa:** ho oa sebeng, tlhokomeliso ea ho oa sebeng kapa nthong e mpe, ho se ts`ehetsoe, ho lahlehela ke ts`ehetso, karohano le Molimo, ho khutlela morao, matla a Molimo a ho fetola, pelo e mpe, litlamo tsa satane kapa sebe, ho fufala moeeng. **Ho fepa kapa ho fetjoa:** Ho hlokomeloa ka tsela ea semoea kapa ea mohlolo, mesebetsi e lokileng, ho rutoa kapa ho ruta le ho sebelletsa. **Ho fofa:** moea, mosebelleksi, moporofeta, Moea O Halalelang, ts`irelletso. **Ho sebetisa jareteng:** kholo, mesebetsi, ts`ebelletso (ministry), kereke, ho beha litholoana, ho atleha. **Ho meta:** selekane, tumellano, ho hohela, ho koeneha, ho thetsa, setsoalle. **Ho khumama:** khumamelo, thapelo, boinehelo. **Ho ts`eha:** ho thaba, thabo ea ho tsamaea le Morena. **Ho phahamisa matsoho:** ho khumamela, ho inehela, ho hlompha Molimo. **Ho hlotsa kapa ho se tsebe ho tsamaea:** mefokolo, ho hloka botsitso, ho sebe maemong a matle a ho sebelletsa. **Ho falla (moving):** Phethoho ts`ebelletsong, phethoho linthong tsa nama, ho se khotsofale ke moo o leng teng. **Pente:** thuto, e nepahetseng kapa e khelohileng. **Ho penta kapa ho teroea:** ho apesa, ho lokisa, ho tsoselletsa. **Ho bapala:** ho ipha nako lintho tse senang thuso, ho ipatla, ho ba le nako e monate le Ntate Molimo. **Ho bapala seletsa:** ho porofeta, khumamelo le thoriso, ho loana moeeng, ho etsa ho hong ho tsoa pelong, thabo, ts`ebetso ea lineo tsa Moea. **Ho na ha pula:** lithonolofatso tsa Ntate Molimo. Ho ts`olloa ha lentsoe le Moea oa Ntate Molimo, tsoselletso, bophelo, Moea O Halalelang, qholotso. **Komello:** Ho ts`oaroa ha lithonolofatso ka lebaka la sebe, bo sio ba Molimo. **Ho kotula:** ho putsoa ha liketso (tse ntle kapa tse mpe), ho atleha ha mesebetsi. **Ho bina:** ho thaba, ho leboha, thapelo, thoriso, khumamelo ea Molimo kapa ea lits`oants`o (kapa melimo ea bohata). **Ho lula (ho lula setulong kapa teroneng):** Matla, terone e bonts`ang matla le puso, ho busa, phomolo, boemo (position), ho shebana le ho hong (concentration), ho amohela, sebaka sa matla, Terone ea Molimo, matla a satane, setulo sa qenehelo sa Molimo, Serena sa Molimo. **Ho roabala:** ho se ele hloko, lefu, phomolo, ho se elelloe, ho se tsebe, kotsi, botsoa, ho hlapholaa (refresh), ho ts`irihana moeeng. **Ho roabala hofeta tekano (overslept):** kotsi ea ho fetoa ke nako ea Molimo. **Ho bonya (smile):** setsoalle, lereko, ho thabela, ho se khohehe, ho hohela. **Ho jala:** ho jala peo semoeeng, peo e ntle kapa e mpe. **Ho ema:** mesebetsi o so kang o fela, ho itella ho hong (commitment).

Straight, o tsamaea, o lutse kapa o eme straight (ka nepo): ho ea ka tsela e nepahetseng, ho se kobehe moeeng (crooked spiritually). **Ho thekesela:** qholotso ka tseleng, ho hanela `nete, sebe, phoso, ho thetseha, ho hloloa, ho se tsebe. **Ho ea holimo:** lintho tsa moea tse phahameng, ho phahamisoa moeeng, boikhohomoso, boiphahamiso, matla. **Ho tsamaea:** ho ea pele (progressing), ho phela ka moea kapa ka nama, boits`oaro ba ea lorang, liketso le bophelo ba hae. **Ho tsamaea ka thata:** ho tobana le liqholotso. **Ho loana:** Ho sebetisa `musong oa Ntate Molimo, ho hapa ba bang le ho senya `muso oa satane, ho hana thato ea Ntate Molimo (torong o shebe na o loants`a eng). **Moea o bolulang:** Matla a Molimo kapa a satane, ho sebetisa ha Moea O Halalelang, thuto kapa moea o sebetisang sebakeng seno, kapa mothong ea itseng. **Ho sesa:** Ho sebetisa le Moea O Halalelang (flowing with the Spirit).

Mono ke tlo hlalosa hore na batho ba ka bolela eng:

Ngoana: qaleho e ncha, ngoana moeeng, tholoana ea ho hong (fruit), ho beha litholoana, tsoalo ea bobeli. **Monyaluoa, lenyalo kapa monyali:** likamano tsa selekane, kereke, ho ts`epahala kapa ho se ts`epahale Ka lintho tsa moea kapa tsa nama. **Ausi kapa abuti kapa motsoalle:** Moea O Halalelang, moena kerekeng, **Ngaka:** mofolisi, mosebelleksi. **Mokhanni:** Ea taolong ea ts`ebelletso, lenyalo kapa bophelo. **Letaoa:** ea tlasa susumetso ea moea o sele kapa o lokileng, ea tlasa susumetso e itseng.

Mona ke hlalosa libaka tse fapaneng:

Banka: letlotlo le bokelletsoeng leholimong, moo o bokellang, **Sekolong:** sebaka sa ho ithuta, kereke, koetliso ea Ntate Molimo. **Jarete:** mesebetsi, sebaka sa ho jala, ts`ebelletso. **Sepetlele:** ts`ebelletso ea lipholiso, sebaka sa ho hlokomeloa le lerato, kereke, pholiso moeeng kapa nameng. **Ntlo:** kereke, bophelo ba motho kapa lelapa la hae. **Ka moo ho hlapeleang (bathroom):** Pako, tlhoekiso. **Kamore:** phomolo, lekunutu, khotso, selekane, katamelo, ho otsela, botsoa. **Ntlong ea bonyaneng:** ntho e `ngoe e etsahetseng ha motho a ntse a le monyane e ntseng e mo susumetsa botleng kapa bobeng. **Ka moo ho jelloang:** kopano (fellowship), kerekeng moo re feptjoang lentsoe, ho itukisetsa ho ruta kapa ho sebelletsa. **Ntlo kapa kereke e lits`ila kapa e tlohetsoeng feela:** bophelo kapa kereke e hlokanang ho thusoa.

Mona ke likarolo tsa `mele oa motho:** **sephaka:** matla, thuso, puso ea Molimo. **Mahlo:** ho khala, ho ba hlokolosi, ho batla Molimo, ho bona ka moea, ho ba boporofeta. **Matsoho:** mesebetsi ea motho, **sefahleho:** semelo kapa boits`oaro, se ka pelong, maikutlo. **Maoto: metsamao ea motho. **Mokuli:** ea khokehileng kapa ho utloa bohloko, **menoana:** liqoso, tsela, matla a Molimo. **Feisi:** khalefo/ntoa. **Hlooho:** puso, matla.

`MUSO OA MOLIMO:

**SEMELO SA `MUSO OA MOLIMO:** (1) `Muso oa Ntate Molimo ke ponahatso ea Ntate Molimo le tsamaiso le puso ea hae. (2) `Muso oa Ntate Molimo o ka hare ho molumeli, `me o bonahatsoa ka eena (Luka17:20-21) (3) Leholimo ke ponahatso e phethahetseng ea `muso oa Ntate Molimo. (4) `Muso oa Ntate Molimo o semoea ha joale (spiritual), empa o bonahatsoa ka tumelo (5) `Muso oa Ntate Molimo o bonahatsoa ke balumeli, e le molumeli a e mong kapa ba le bangata hobane Ntate Molimo o phela ka hare ho molumeli. Neng kapa neng ha a sebetsa ka tumelo o tla tlisa ponahatso ea `muso oa Ntate Molimo. (6) `Muso ona ke `muso oa matla le khanya (1 Bakorinte 4:20). (7) `Muso oa Ntate Molimo ke `muso oa leruo le se nang tekanyo (8) Ke `muso oa Marena le baprista (Ts`enolo 1:6)

**TSAMAIISO EA `MUSO OA MOLIMO:** (1) Muso ona o busoa ke lerato le ts`abo ea Molimo (Liketso 9:31, Mareka 12:29- 31) (2) Ho busa litholoana tsa Moea `musong ona (Bagalata 5:22, Baroma 14:17)

TS`EBETSO EA `MUSO OA MOLIMO: Muso ona o sebetsa ka ho jala le ho kotula ka tumelo limthong tsohle. Ntate Molimo o tla u etsesa tseo u li etsetsang ba bang. Ke hona ho jala le ho kotula.

**PONAHATSO EA `MUSO KA KEREKE:** `Muso oa Ntate Molimo o bonahatsoa ka kereke ea Morena Jesu lefats`eng. Kereke ke eona e bonahatsang hape e senolang Ntate Molimo le tsamaiso ea hae. Lentsoe kereke le bolela “ba khethiloeng” (The chosen ones). Bana ke ba khethiloeng ke Molimo ka lebaka la tumelo ea bona ho Morena Jesu Krete.

KEREKE KE ENG: (1) Motho ka bo mong ea amohetseng Morena Jesu ke karolo ea kereke ea Morena Jesu. (2) Kereke ke kopano ea balumeli ba phuthehetse sebakeng se itseng (Mattheu 18:20) (3) Kereke e entsoe ka batho bohle lefats`eng le ba seng ba le leholimong ba amohetseng Morena Jesu ka `nete aphelong a bona. **Kereke ke lelapa la Ntate Molimo, hape ke `mele oa Krete.**

**Kereke e thehiloe holim`a motheo oa baapostola le baporofeta (Baefese 2:19):** Hona ho bolela hore kereke e thehiloe holim`a ts`enolo e behiloeng ke baapostola ba 12 ba pele ba Morena Jesu le baporofeta ba Molimo ba seleaneng sa khale, `me Morena Jesu e le eena lejoe la mantlha. Ka mantsoe a mang, baporofeta ba ngotse ts`enolo ea hore na kereke ea Morena Jesu e tla ba joang, `me baapostola ba hae ba theha tsamaiso ea kereke holim`a ts`enolo e neng e ngotsoe ka baporofeta ba Molimo seleaneng sa khale. Ke sona se boleloang ha ho thoe kereke e thehiloe holim`a motheo oa baapostola le baporofeta.

Morena Jesu ke eena hlooho le moetapele oa kereke, `me ha a tsamaea o ile a fa batho lineo tsa hae tsa boetapele hore ba mo emeleka boetapele lefats`eng. (Baefese 4:9-15). Lineo tsena ke: Boapostola, boporofeta, boevangeli, bolisa le boruti. Morena Jesu o ne a ts`oere lineo tsena kaofela ha a le lefats`eng, `me lineo tsena li tlameha ho etsa mosebetsi oo Morena Jesu a neng a tla o etsa ha a le lefats`eng. Bana ke bona baprista ba Testamente e ncha ho ea ka mokhahlelo oa rona oa bobeli.

Mesebetsi e akaretsang ea lineo tsena ke ena e latelang. (1) Ho koetlisetsa balumeli hore e be basebelletsi ba amohelang ho Ntate Molimo (2) Ho phethahatsa balumeli ho fihlela ba holile boreng le boraling ba bona (3) Ho hapela ba sa lumelang ho Krete. (4) Ho senya mesebetsi ea satane.

Lineo tsena ha se lineo tsa `mele oa Krete joalo ka lineo le lits`ebetso tseo Moea O Halalelang a li fang balumeli, joalo ka bo lipholis, boporofeta, tsebo, bosebelle, ho khothatsa ho fana joalo joalo le lineo tse ling tse hlahang ka ho 1Bakorinte 12:111 le Baroma 12:6-9) empa tsena ke lineo tsa boetapele tseo Morena Jesu a li abelang bao a ba khethetseng tsona. Batho ba bitsetsoa lineong tsena, ha ba ikhethela tsona ka thato ea bona. Hape, ha li fetisetsanoe ka peo ea matsoho le likhato tsa tumelo joalo ka lineo tsa Moea O Halalelang. **Le ha ho le joalo, mesebetsi ea lineo tsena e ea kopa kopana, hape e ka ts`oana, empa feela e le hore e `ngoe e sekametse mosebetsing o itseng ho feta e `ngoe. Lineo tsena lia lekana ka bohlokoa ho Morena Jesu le kereke ea hae hape li hloka hloka ka mokhoa o ts`oanang, empa li ka fapana ka mesebetsi le boikarabello.**

Joale re tlo sheba lineo tsena le mesebetsi ea tsona ka ho fapana:

MOAPOSTOLA: Lentsoe Moapostola le bolela “**Morumuo**”. Hona ho bolela ea romiloeng, `me ea emetseng ea mo romileng ebile a sebetsa ka matla a ea mo romileng. Empa baapostola baa fapana ka lipitso le mohau o maphelong a bona.

SEMELO SA OFISI (NEO) EA BOAPOSTOLA: (1) Ke ofisi ea pele kerekeng (2) Ke ofisi ea motheo, hangata baapostola ba beha metheo ea mesebetsi ea Ntate Molimo. Empa le ha hole joalo, baapostola baa fapana ka mesebetsi ea bona (3) Ke ofisi ea botsoali: baapostola ke batsoali moeeng ka semelo, baa tsoala le ho holisa balumeli (4) Ke ofisi ea boemeli: Ba emela Krete `me ba etsa mosebetsi oo a neng a tla o etsa ha a le teng ka boena (2Bakorinte5:20). Empa hona ha ho bolele hore ho tlameha hore ho rapeloe ka bona kapa molimo oa bona (5) Ke ofisi ea ts`enolo: hangata Ntate Molimo o bafa ts`enolo ea seo a batlang ho se etsa kerekeng ea hae (6) Ke ofisi ea kahlolo: hangata Morena Jesu o ba sebelisa ho ahlola bobele bo lefats`eng le bo ka kerekeng

ka ho e hloekisa **(7)** Ofisi ena e lateloa ke meka le mehlolo le liponts' o tsa matla (2Bakorint 12:12). **(8)** Hangata Moapostola a ka khona ho sebetsa ka tlolo ea liofisi tsena tse ling (tlolo ke mohau kapa bokhoni boo motho a o fuoang ke Moea O Halalelang).

MESEBETSI EA OFISI EA BOAPOSTOLA: **(1)** Ho emela Krete le ho etsa mosebetsi oo a neng a tla o etsa ka boeena ha a ne a le lefats'eng. **(2)** Ho hapa ba lahlehileng le ho holisa balumeli lipitsong tsa bona le ho ba ba phethahatsa boreng le boraleng ba bona. **(3)** Ho fetisetsa lineo le mehau e fapaneng ho balumeli **(4)** Ho tsoselletsatsa lineo, litalente le mehau e fapaneng ho balumeli **(5)** Ho hahla le ho bonahatsa 'muso oa Ntate Molimo ka tsela e hlakileng **(6)** Ba bang ba bitselitsoe ho okamela mosebetsi e itseng ea 'muso oa Ntate Molimo. Ho tseba haholo ka ofisi ea baapostola, bala ligospel le buka ea Liketso le mangolo a mang a testamenta e ncha. Baapostola ba holileng tumelong ba batla tsoelo pele ea balumeli ba bang ho sa tsotellehe hore na ke bana ba bona moeeng kapa hase bona. Ha hona tekanyo ea hore na office ena e ka sebetsa ka lineo le liponts' o tsa Moea O Halalelang ho le hokae. Ho joalo le ka li office tsena tse ling kaofela, ha li ea beheloa tekanyo ea hore na li ka sebetsa ka lineo le liponts' o tsa Moea O Halalelang ho le hokae le tsona. **Motsoali moeeng hase motho feela ea ileng a o bolella evangeli eaba o arohana le uena, empa ke motho ea nkang boikarabello ba botsoali bophelong ba hau ba moea le haeba e ne e se eena ea o joetsitseng evangeli qalong. Hape ekaba motho eo Ntate Molimo a ka o senolelang eena hore o ufile eena ele motsoali oa hau moeeng le haeba u sa pholoso ka eena.**

MOPOROFETA: Lentsoe "Moporofeta le bolela ea buoang sebakeng sa Molimo (muelli oa Molimo).

SEMELO SA MOPOROFETA: **(1)** Ke ofisi ea bobeli kerekeng **(2)** Ke ofisi ea ts' enolo joalo ka ea boapostola **(3)** ke ofisi ea motheo joalo ka ea boapostola **(4)** Ke ofisi ea kahlolo joalo ka ea boapostola **(5)** E kaba ofisi ea botsoali **(6)** ofisi ena e lateloa ke lineo tsa ts' enolo le tsa puo haholo **(7)** Moporofeta ke motho ea pakeng tsa lefats' e la moea le la nama, 'me o senola tseo Ntate Molimo a li buoang le tse lefats'eng la moea.

MESEBETSI EA OFISI EA BOPOROFETA: **(1)** Ke ho buoa sebakeng sa Krete **(2)** Ho supa tsela ea Kereke ea Morena Jesu hore e tle e phethe morero oa hae **(3)** Ho hapa ba lahlehileng le ho holisa balumeli boreng le boraleng ba bona ho Krete **(4)** Ho fetisetsa lineo le mehau e fapaneng ho balumeli **(5)** Ho tsoselletsatsa lineo, litalente le mohau oo Ntate Molimo a o fileng balumeli **(6)** Ho bonahatsa 'muso oa Ntate Molimo ka tsela e hlakileng. **Ho na le baporofeta ba porofetang ka ho bona lipono, e kaba pono ea ka hare, kapa tse ling, bana ba bitsoa "liboni". (seer) Ho na le ba porofetang ka ho senoleloa litaba ha ba ntse ba buoa. Bana ba bitsoa li Nabi ka senyesemane, e bolelang "to bubble forth kapa ho thatholoha. Le balumeli bao e seng baporofeta ba porofeta ka litsela tsena tse peli. Ho na le baporofeta ba bang ba sa sebelletseng ka kerekeng, empa Ntate Molimo o ba sebelisa ho hapa leruo la lefats' e molemong oa katiso ea evangeli.**

Baapostola le Baporofeta ba honajoale ha ba behe ts' enolo e ncha, empa ba tiisa ts' enolo e se ntse e ngotsoe bibeleng.

TICHERE: Lentsoe tichere kapa moruti le bolela ea rutang le ho manolla lentsoe la Ntate Molimo.

SEMELO: **(1)** Ke ofisi ea boraro kerekeng (1Bakorinte12:28) **(2)** Ofisi ena e na le mohau oa ho ruta le ho manolla lentsoe la Ntate Molimo **(3)** E kaba ofisi ea botsoali. (Matichere a mang a lula a ts' oara likopano tsa lithuto feela, e be ba ea sebakeng se seng, ha se boohle ba etsang mosebetsi oa botsoali oa ho shebana le balumeli ka kotloloho).

MESEBETSI EA OFISI EA BO TICHERE: **(1)** Ke ho ruta le ho manolla linnete tsa Ntate Molimo **(2)** Ke ho tsitsisa balumeli lentsoeng la Ntate Molimo le tumelong ea bona **(3)** Ke ho hapa ba lahlehileng **(4)** Ke ho phethahatsa balumeli boreng le boraleng ba bona **(5)** Ke ho bonahatsa 'muso oa Ntate Molimo ka tsela e hlakileng. Matichere a mang a lisa liphutheho, a mang a lula a tsamaea a ts' oara likopano tsa lithuto, a mang a ruta likolong tsa bibe, a mang a ruta likerekeng tlas'a balisa ba bang. **Ofisi ena e tsamaea ka liponts' o, lineo, meka le mehlolo le ts' enolo ea lentsoe la Ntate Molimo le buuoang (rhema) le lineo tse ling tsa Moea O Halalelang. Neo ena ha e ea beheloa tekanyo ea hore na e ka fella hokae ka ho etsa mosebetsi o itseng joalo ka ho porofeta, ho tsoselletsatsa lineo tsa ba bang kapa ho sebetsa ka lineo tsa Moea O Halalelang.**

MOLISA: Lentsoe "Molisa" le bolela, "ea lisang le ho hlokomela mohlape oa Morena Jesu

SEMELO: **(1)** Ke ofisi ea bone kerekeng **(2)** Ofisi ena e na le mohau o khethihileng oa ho hlokomela kereke le ho fana ka boeletsi, tataiso, le ho hlokomela balumeli ka tsela e khethihileng. **(3)** E kaba ofisi ea botsoali. Molisa o etsa mosebetsi oa botsoali haholo, oa ho hlokomela balumeli, ho ba fepa, ho ba khalema le ho ba holisa.

MESEBETSI EA OFISI EA BOLISA: **(1)** Ke ho hlokomela le ho lisa mohlape oa Morena Jesu **(2)** Ke ho ruta le ho manolla lentsoe la Ntate Molimo **(3)** Ke ho hapa ba lahlehileng **(4)** Ke ho phethahatsa balumeli boreng le boraleng ba bona **(5)** Ke ho bonahatsa 'muso oa Ntate Molimo ka tsela e hlakileng. **Ofisi ena e tsamaea ka liponts' o, meka le mehlolo le ts' enolo ea lentsoe la Ntate Molimo le buuoang (Rhema) le lineo tse ling tsa Moea O Halalelang. Neo ena ha e ea beheloa tekanyo hore na e**

ka fella ho kae ka ho sebetša ka lineo le liponts`o tsa Moea O Halalelang kapa ho etsa mosebetsi o itseng. Mohlala: ho porofeta, ho senola le ho tsoselletsa lineo tsa balumeli joalo joalo.


MOEVANGELI: Lentsoe Moevangeli le bolela “Ea ts`oereng molaetsa o molemo (bearer of good news)

SEMELO: (1) Ke ofisi ea bohloko kerekeng (2) Ke ofisi e nang le mohau o khethehileng oa ho fehlella le ho hapa ba lahlehileng. (3) E kaba ofisi ea botsoali. Ba bang ba etsa mosebetsi oa botsoali ka kotloloho ho balumeli, ba bang ba etsa mosebetsi oa ho matlafatsa balumeli le ho hapa ba lahlehileng.

MESEBETSI EA OFISI EA BOEVANGELI: (1) Ke ho hapa ba lahlehileng ka tsela e phahameng haholo (2) Ke ho phethahatsa balumeli boreng le boraling ba bona (3) Ke ho fa balumeli cheseho ea ho hapela batho ho Krete (4) Ke ho bonahatsa `muso oa Ntate Molimo ka tsela e hlakileng. (5) Hangata moevangeli o lula a ea libakeng tse fapaneng a rera evangeli, a ts`oara litsoselletso tse kholo tsa evangeli joalo ka bo litenteng, li holong, li stadium joalo joalo. Neo ena e tsamaea ka liponts`o tsa Moea O Halalelang, lineo le ts`enolo ea lentsoe la hae le buuoang (Rhema). Le eona ha e ea beheloa tekanyo ea hore na e ka fella hokae lineong le lits`ebetso tsa Moea O Halalelang kapa ho etsa mosebetsi oa bo ho porofeta le bo ho tsoselletsa lineo joalo joalo.

Liofisi tsena kaofela li tlameha ho tsamaea ka liponts`o, meka le mehlolo hape li tsamaee ka ts`enolo ea lentsoe la Ntate Molimo le buuoang, e seng le ngotsoeng feela. Kaofela li tlameha ho koetlisetsa balumeli ts`ebelletso ea Molimo le ho ba phethahatsa boreng le boraling ba bona.`

Lineo tsena lia kopa kopana: Ho na le baapostola ba boapostola, baapostola ba boporofeta, baapostola ba boevangeli, baapostola ba bolisa le baapostola ba boruti. Ho na le baporofeta ba boapostola, ba boevangeli, ba bolisa le ba boruti. Ho na le baevangeli ba boapostola, ba boporofeta, ba bolisa le ba boruti. Ho na le balisa ba boapostola, ba boporofeta, ba boevangeli le ba boruti. Ho na le baruti ba boapostola, ba boporofeta, ba boevangeli le ba bolisa. Hona ho bolela hore motho ea fuoeng ofisi e itseng a ka sebetša ka tlolo ea ofisi e `ngoe, empa e sa bolele hore o se a na le ofisi eno. Ba bang bona ba ka ba le liofisi tse peli kapa ba sebetša ka tlolo ea li ofisi ka linako tse ling.



Mohlala oa lineo tsena ke ona ka letsoho le menoana e mehlano

- (1) Monoana o motona o sebelisoa e le moapostola hobane neo ea boapostola hangata e khona ho sebetša ka tlolo ea lineo tse ling hape Ntate Molimo o sebelisa baapostola ba bang ho hlokomela liofisi tse ling. (2) Monoana o supang o emetse moporofeta hobane moporofeta o sebelisoa ho supa tsela le merero ea Ntate Molimo le ho toba tse ka thibelang motho ho tsamaea le Ntate Molimo ka katleho. (3) Monoana o mahareng o emetse moevangeli hobane ke oona monoana o mo telele ho feta e meng. Moevangeli o ea hole moo ho sa fihlehang ha bonolo a isa evangeli. (4) Monoana o kenyang reng o emetse molisa hobane molisa o ba le pelo ea ho tsotella phutheho joalo ka ha motho a tsotella molekane oa hae (5) Monoana o monyane o emetse moruti. Monoana ona o khona ho kena ka litsebang o tlose likonokono hape o tlisa botsitso letsohong, le moruti o tlosa lithuto tse sa nepahalang ho balumeli hape ba tlisa botsitso balumeling.

Tsela e`ngoe ea ho hlalosa mesebetsi ea li ofisi tsena ke ena: Baapostola baa busa (Apostles govern), Baporofeta baa tataisa (Prophets guide), Baefangeli baa bokella (Evangelists gather), Balisa baa hlokomela (pastors guard), matichere a tsitsisa (teachers ground).

Lineo tsena tse hlano li fuoe mohau o moholo oa ho fuoa limpho ke batho. Ntate Molimo o batla hore ba shebane bohlo le mosebetsi oa bona o moholo. Joale o entse tsela ea hore lithoko tsa bona a li koale ka batho ba bafang tsa moea (1 Bakorinte 9:11, 14, Bakhalata 6:6). Mohau ona o teng holima ba bitselitsoeng lineong tsena. Ba bitsuoeng ba tlameha ho o tseba, ba o lumele ba o buoe le ho o phatlallatsa le ho leboha Ntate Molimo ka oona, `me mohau ona o tla bonahala maphelong a bona `me ba tla fuoa lintho tse kholo tsa bohlokoa ba sa hatelle kapa hona ho sotha batho matsoho (manipulation) le ho ba thetsa (deception). Batho hangata ba tla fana ho ea ka molemo oo ba o kotutseng ts`ebetsoeng ea

bona. Empa Ntate Molimo a ka susumetsa le batho ba bang ho fana le ha ba sa kotula t`shebetsong ea bona hobane ke tsela ea Ntate Molimo ea motheo ea ho sebetsa le lineo (li office) tsena. Litsela tse ling tsa ho t`sehetsa lineo tsena ke ka mashome le menehelo ea ba rutoang lentsoe.

Ke nnete ba ka ba le mesebetsi e meng le likhoebo, empa ba tsebe nnete ea mohau ona o holima bona hape ba o ananele le ho lebella le ho o buoa ka tumelo thapelong ho o bona o sebetsa maphelong a bona le ha ba ntse ba ena le likhoebo ka thoko kapa mesebetsi e meng.

Molumeli o fumana pitso ea hae ka ho ba le nako le Ntate Molimo le ho batlana le morero oa Ntate Molimo ka eena.

‘Me o tlameha ho amohela koetliso ea Ntate Molimo le ho tsamaea ka nako ea Ntate Molimo.

LENTSOE BOAPOSTOLA LE BOPOROFETA LE BOLELA ENG: Lentsoe boapostola ha le bue ka ofisi ea baapostola, empa le buoa ka ts`ebetso ea mehlolo, meka le liponts`o tsa Moea O Halalelang (Mareka 16:15-19). Lentsoe Boporofeta ha le bue ka ofisi ea baporofeta, empa le buoa ka ts`ebetso ea ho buoa ha Ntate Molimo (Liketso 2:17-22). Balumeli bohle ba tlameha ho ba boapostola le boporofeta ho sa tsotellehe hore na ba bitselitsoe lineong tse hlano tsa Morena Jesu kapa ba sa li bitsetsoa. Ka mantsoe a mang, ba khone ho tsamaea ka lineo le liponts`o tsa Moea O Halalelang hape ba khone ho ikutloela Ntate Molimo.

KHUTSUFATSO EA BUKA EA LIKETSO TSA BAAPOSTOLA LE HISTORY EA KEREKE EA MORENA JESU

Buka ea Liketso tsa Baapostola e ngotsoe ke Luka eo e neng e le ngaka ka ts`ebetso, ‘me o nkile nako a tsamaea le Paulosi mosebetsing oa hae oa ho hasa evangeli (Bakolose 4:10, Filimone 1:24 le 2 Timotia 4:11).

Morena Jesu o ile a ba le barutuo ba hae kamora tsoho ea hae bafung, ‘me a iponahatsa ho bona matsatsi a 40 pele a nkeloa leholimong. O ile a re ba eme Jerusalema ho fihlela ba amohela matla a tsoang leholimong e leng Moea O Halalelang, ‘me eena ha a tlike o tlaaba thusa ho paka tsoho ea hae ka matla lefats`eng lohle. Kamora mantsoe ana Morena Jesu o ile a nkeloa leholimong.

Hobane Judas Iskariota o ile a ipolaea, o ile a nkeloa sebaka sa hae sa boapostola ke Mattiase.

Ka letsatsi la Pentakonta (matsatsi a leshome kamora hore Morena Jesu a nkeloe leholimong), Moea O Halalelang o ile a theohela holima barutuo ba Morena Jesu ‘me a tla phela ka hare ho bona. E ne e le batho ba 120 ka palo ka nako eno. Bajuda ba ile ba qala ho bua ka lipuo tse ncha tse teng lefats`eng mona ba rorisa Molimo. Sena se ile sa hohela mats`oelehali, ‘me Peterose a rera ka Morena Jesu eaba ho pholoso batho ba 3000 letsatsing leno. Sena e ne e le qaleho ea kereke. Kamora mona ba ile ba kopana khafetsa bakeng sa thuto, kopanelo, thapelo le ho ja selallo.

Joalo ka Morena Jesu feela, Baapostola ba ile ba etsa mehlolo ba folisa bakuli le ho nts`a bademona bathong, ‘me ba bangata ba inehela ho Morena Jesu le kerekeng ena e ncha. Ka nako ena e ne e ntse e le Bajuda feela ‘me kereke ena e ne e le Jerusalema. Empa le ha hole joalo, Baapostola ba ile ba loants`oa le ho hlekefetsoa ke baetapele ba selumeli sa Bajuda.

Balumeli ba ne ba arolelana tsohle, ‘me ho ne ho se ea hlokanang hara bona hobane bane ba rekisa matlo le lits`a, ‘me ba tlisa chelete maotong a Baapostola ebe joale batho bohle baa hlokomeloa ba hlokanang lithuso tsa mefuta ka hofapana. Ke nakong ena moo Annaniase le Safire ba ileng ba fuoa kahlolo ea lefu ke Peterose ka lebaka la ho thetsa Moea O Halalelang le Peterose, ba rekisa ts`imo empa ba boloka karolo e ngoe ea thekiso ka lekunutu le ka thetso.

Baapostola ba ile ba khetha banna ba supileng hore ba shebane le mosebetsi ona oa lijo le litafole ha bona ba shebana le mosebetsi oa thapelo le oa thuto ea lentsoe.

Ke nakong ena eo Stefane a ileng a bolaoa ka lebaka la tumelo ea hae ho Krete. Monna ea bitsoang Saule e ne e le karolo ea polao ea Stefane, a shebelletse ebile a lumellana le se etsoang, babolai ba siile liaparo tsa bona le eena.

Ke nakong ena moo kereke e ileng ea qala ho loants`oa, eaba joale baa arohana ba ea ka lefats`e lohle.

Bakreste ba ile ba kena hohle Jerusalema le kante ba baleha tlikefetso empa joale ba baleha ba ntse ba paka taba tsa Morena Jesu.

Ke nakong ena Saule eo lebitso la hae la Seroma e neng e le Paulosi, a ileng a bona Morena Jesu le ho fumana pitso ea hae a le tseleng ea ho fumana tumello ea ho hlekefetsa bakreste le ho khutlisa ba balehileng hore ba tle ba ilo qosoa hape ba bang ba bolaoe. O ile a bona leseli le leholo a ba a utloa lentsoe le reng: Saule Saule hobaneng u ntlhekefetsa? Eaba oa araba a re "u mang Morena? Eaba lentsoe lena le re ‘ke ‘na Jesu eo u ntseng u mo hlekefetsa’, hape la re ‘tsamaea u kene teropong ‘me u tla bolelloa hore na u etseng’. Paulosi o ile a fofala ke leseli lena. Ba neng ba na le eena ba bone leseli empa ha ba utloa lentsoe. Kamora mona, Morena Jesu o ile a hlaha ho Annanias ka pono a re a ilo bona Paulosi a be a mo rapelle hore a bone hobane o khethetsoe ho phatlalatsa molaetsa o molemo ho balichaba. Annanias o ile a kopana le Paulosi, ‘me a mo rapella hore a bone hape a tlatsoe Moea O Halalelang le ho mo hlaloesetsa ka tsela ea Morena Jesu. Paulosi ha a qeta ho ja a fumana matla hobane o ne a sa ja ka matsatsi a mararo. A qala ho paka hore Jesu ke Morena.

BALICHABA BA AMOHELA PHOLOHO LE MOEA O HALALELANG.

Petrose o ile a ruta Judea le Samaria, ‘me ke mona moo a ileng a bonts`oa ka pono hore le Balichaba ba amohetsoe ke Molimo, ebile o ronngoe ntlong ea Cornelius eo e neng e le molichaba. Ba ntlo ea Cornelius ba ile ba amohela Morena Jesu le Moea o

Halalelang ba rapela ka lipuo hape ba porofeta le bona.

Kamora mona Jakobo o ile a bolaoa eaba le Peterose o oa ts'oaroa, empa a lokolloa ka mohlolo ke lenyeloi ka lebaka la lithapelo tsa balumeli.

Paulosi o ile a fumana thomo ea hae ea Boapostola ka nako ena 'me a rongoa le Barnabase. E ne e le lilemo tse 13 Paulosi a se a amohetse Morena, ha Moea O Halalelang a mo fa thomo ena ea Boapostola. Paulosi o ile a qala hoea mosebetsing oa hae oa bo missionary a theha likereke, ebile a li tsitsisa le ho beha baruti. O ile Turkey le Greece a ntse a kena literopong le metseng ea linaha tsena a bolela evangeli, a theha likereke a folisa le bakuli le ho nts'a bademona bathong. Kamora mona o ile a ts'oaroa 'me a isoa Roma moo a ileng a pakela Morena Jesu teng, ho Morena oa Roma. Paulosi o ile a ts'oaroa empa a fuoa kahlole ea hore a se tsoele kantle ho ntlo ea hae. O ile a lula ka tsela ena a ntse a bolela evangeli lilemo tse peli ho fihlela a bolaoa ka ho khaoloa hlooho. Petrose eena o ile a shebana boholo le ho isa evangeli ho majuda, ha paulosi a ile a ea ho Balichaba (Bakhalata 2:8)

MESEBETSI EA BAAPOSTOLA BA MORENA JESU BA 12 LE MAFU A BONA

Baapostola ba bang ba ile ba ea libakeng tse fapaneng tsa lefats'e. Thomase o ile a ea Parthia aba a fihla bo India, Andrew a ea Scythia, **1) Peterose** o ile a ruta Pontus, Galatia, Bithynia, Cappadocia, le Asia empa boholo a shebane le majuda, eaba qetellong o isoa Roma moo a ileng a thakhisoa a shebile tlase.

3) Filipi o ile a ea Phrygia e Asia moo a ileng a sokolla ba bangata. O ile a fihla le North Africa le Asia Minor moo a ileng a sokolla mosali oa e mong oa baetapele ba Roma 'me ka lebaka leno Filipi a ts'oaroa a ba a bolaoa ka sehloho.

4) Matteu ea neng a bitsoa Levi hape, o ile a ea Ethiopia, Persia le Parthia. Ha ho hlake hantle na o shoele joang. Ba bang bare o ile a bolaoa ka ho hlajoa Ethiopia mono, ba bang bare haa ka a bolaoa.

5) Bartholomew ea neng a tsejoa e le Nathaniele eena o ile a ea India, Armenia, Ethiopia le Mesopotamia. Tsa lefu la hae ha lia hlaka empa e ka o ile a khaoloa hlooho kapa a bolaoa butle ka ho tlosoa letlalo a ntse a phela.

6) Jakobo ea neng a bitsoa a monyane mora oa Alphaese e seng Jakobo ea neng a lisa kereke ea Jerusalema, le eena e ka ka o ile a bolaoa 'me ha ho hlake hantle na o ile libakeng li fe empa e ne e le molateli a moholo oa Morena Jesu.

7) Simon the Zealot e ka eena o ile a ruta Egepet, North Africa le Persia moo a ileng a bolaoa teng.

8) Matthias a ileng a nka sebaka sa Judase. Ho buuo hanyane ka eena empa ekare o ile a ruta Cappadocia, Caspian Sea Area le Ethiopia. Eena o ile a bolaoa ka ho chesoa le Andrew.

9) Johanne ea neng a tsejoa ka ho atamela Morena Jesu. Johanne o phetse Efese 'me a ruta teng ho fihlela lefu la hae. Ke eena feela hara barutuo ba Morena Jesu ea sa kang a bolaoa, a shoeleng lefu le tloaelehileng. O ne a etelletse kereke ea Efese pele 'me o ile a hlokomela 'M'e Maria ho fihlela lefu la hae. Ka nako ea litlhekefetso o ile a nkeloa Patmos e le mots'oaruoa moo a ileng a ngola buka ea Ts'enolo. Hona le taba ea hore o ile a ts'eloa ka hara mafura a belang ha a le Roma, empa o ile a tsoa a sa cha. Ho tloha Patmose o ile a khutlela hae Efese moo a ileng a ngola buka ea Johanne a ba a hlokahalla teng.

10) Jakobo e moholo. Enoa ho thoe o moholo ka lebaka la mosebetsi oa hae kerekeng. E ne e le abuti oa Johanne eo re qetang ho bua ka eena. Jakobo enoa o ile a ea Spain, 'me ke eena oa pele oa ho bolaoa bukeng ea Liketso ke Heroda 'me history e supa eka o ile a pateloa hona Spain mono. Ha **10) Jude.** Enoa ene ele ngoana bo Morena Jesu oa nama. Jude o ile ruta evangeli Judea, Samaria, Idumaea, Syria, Mesopotamia le Lybia. O ile a ea Beirut le Edessa. O ile a bolaeloa Beirute ka selepe 'me 'mele oa hae oa latoa Beirute oa isoa Roma.

11) Andrew ngoanabo Simon Peterose o ile Scythia, Greece le Asia 'me a bolaeloa Patras Greece moo a ileng a thakhisoa sefapanong sa shape ea X.

12) Thomas o ile libakeng tse ngata a ba a fihla India, 'me o hlompheua haholo India le kajeno joalo ka Moapostola a ileng a isa evangeli India. Le eena o ile a bolaeloa tumelo.

Kamora hore Baapostola ba bolaoe kaofela, bakreste ba ile ba loants'oa ba bolaoa le bona ke Bajuda le Muso oa Roma boholo. Ba ne ba chesoa, ba bang ba thakhisoa ba shebisitsoe fats'e ho fihlela re kena nakong ena ea li dark ages, 'me nako ena e nkile lilemo tsa 1500.

Baapostola bana bane ba hloma likereke hape ba etsa mehlolo hohle moo baneng ba fihla teng.

LI MOVEMENT TSA PUSELLETSO: Morena Jesu o siile kereke ea hae lefats'eng e tsamaea ka matla le khanya ea hae, empa ka mora nako e telele a se a tsamaile, e ile ea pateha hobane bakreste ba ile ba bolaoa. Linako tsena li bitsoa linako tsa lefifi (dark ages). **Ho ne ho busa 'muso oa Roma, Joale tsatsi le leng ha Morena oa Roma a ea ntoeng, a bonts'oa pono ea sefapano, eaba o utloa lentsoe le re ha aka lumela sefapanong o tla fumana tlhoho. O ile a khetha ho lumela, 'me a fela a fumana tlhoho. Ke moo a ileng a etsa hore sekreste se amoheloe ka nkane 'musong oa hae ha pele ene ele 'muso oa hae onong o bolae bakreste ka kopanelo le Majuda. 'Muso o ile oa kopana le kereke ea eba ntho ele ngoe eaba ho theoa Roman Catholic Church. Nako ena e nkile lilemo tse 1500. Ba ne ba ruta thuto e khelohileng ba ruta pholoho ka mosebetsi.**

Joale Morena Jesu o ne a khutlisetsa kereke ea hae moo e neng e le teng bukeng ea liketso ka li movement tsena. **Ka 1500** hoa hlaha movement oa khanyetso moo ho thuto ea pholoho ka tumelo e ileng ea busetsoa kerekeng, **ka 1600** ha hlaha movement oa evangeli moo kolobetso ea metsi e ile ea busetsoa kerekeng, **ka 1700** hoa hlaha movement oa khalalelo, moo thuto ea khalalelo e ileng ea busetsoa kerekeng, **ka 1800**, ho ile ha hlaha movement oa pholiso, moo lipholiso ka tumelo li ileng tsa busetsoa kerekeng. **Ka 1900** ho ile ha hlaha movement oa pentakonta moo kolobetso ea Moea O Halalelang le thapelo ea lipuo li ileng tsa busetsoa kerekeng. **Ka 1950** ho ile ha hlaha movement oa pula tsa morao, moo boporofeta le ho bina lithoriso le khumamelo tse boporofeta ka bolokolohi li ile tsa busetsoa kerekeng. **Ka 1950** ho ile ha hlaha movement oa boevangeli, moo ofisi ea moevangeli e ileng ea busetsoa malulong a eona a nepahetseng kerekeng, **ka 1960** ho ile ha hlaha movement oa

litoselletso tsa linnete le lineo tsa Molimo (charismatic movement), mona ofisi ea bolisa e ile ea busetsoe malulong a eona nepahetseng kerekeng. **Ka 1970** ho ile ha hlaha movement oa tumelo moo ofisi ea botichere e ileng ea busetsoa malulong a eona a nepahetseng kerekeng. **Ka 1980** hoa hlaha movement oa boporofeta, moo ofisi ea moporofeta e ileng ea busetsoa malulong a eona a nepahetseng kerekeng. **Ka 1990** hoa hlaha movement oa boapostola, moo ofisi ea moapostola e ileng ea busetsoa malulong a eona a nepahetseng kerekeng. Hona joale re movementeng oa Boapostola le Boporofeta. Lebitso lena ha le bue ka liofisi tsa baapostola le baporofeta feela, empa ke lebitso le akaretsang movement oa Morena Jesu oa ligospeleng le bukeng ea Liketso. Le kenyelletsa limovement tsohle tse fetileng le lineo tsa Moea O Halalelang le lits'ebetso tsa hae. Morena Jesu o rehelletse movement oa hae ka liofisi tsa hae tsa motheo (Baefese 2:10). Movement ona ke ona o tlang ponahatso ea bara ba Molimo. Movement oa boapostola le boporofeta ke movement oa bara ba Molimo ba bonahalitsoeng.

LIPITSO TSE LING TSE BOHLOKOA `MUSONG OA NTATE MOLIMO

Ntate Molimo o bitsetsa batho ts'ebelletso ena ea borapelli. **Hore evangeli e tsamaee hantle, e hloka ba e bolelang, ba e rapellang, ba fanang le ba rorisang le ho khumamela (Those who preach, those who pray, those who pay and those who praise).** Tsena ke lipitso tse khohle tse ka sehloohong khasong ea evangeli. Kaofela re tlameha ho ruta evangeli, ho e rapella le ho fana molemong oa eona empa feela motho a fuoeng pitso enngoe ho tsena otlala sekamela haholo mosebetsing ono 'me otlala o etsa ka tsela e holimo haholo. 'Me taba ena ke nnete ka lipitso tsohle tsa Ntate Molimo.

BARAPELLI (Intercessors)

Re se re buile ka ba lineong tse hlano tsa Morena Jesu eleng ba ka sehloohong khasong le thutong ea evangeli. Joale re tlo sheba ba e rapellang. Mehlala ea bibeleng ke mme Anna ea neng a phela tempeleng bosiu le mots'eare a rapela a itimme lijo a rapella hotla ha Morena Jesu (Luka 2:36-37). Sena e ne ele pitso le mosebetsi oa hae ka linako tsohle.

'Me ha Morena Jesu a qeta ho hlaha, mme Anna o ile a tseba hore mosebetsi oa hae o phethahetse ebile a utloa hore le ho hloka hla a ka hloka hla ka khotso. E mong ke Simeone, le eena o ne a rapella hotla ha Morena. Le mangolong a mangata sekaneng sa khale rea bona hore Ntate Molimo o ne a lula a sebetsa ka barapelli. Mehlala e meng ke ena e latelang. Moshe o ne a lula a rapella ba Iseraele haba tsoa tseleng 'me ebe ba fumana mohau ka lebaka la lithapelo tsa hae. Ho Esekiele 22:30 Ntate Molimo o ile a batla motho a ka emang sekheong hore bobe bo seke ba oela holima sechaba empa ha a Kaba a mofumana.

Morena Jesu hothoe o lula a re rapella le hona joale ka ho Baheberu 7:25.

Paulosi hangata o khotalletsa thapelo ena ea borapelli hore e etsetsoe kereke, ba pusong le batho bohle.

Le eena o ne a lula a kopa ho rapelloa hangata ke baena. **Joale re tlo sheba lintlha tsa bohlokoa thapelong ea borapelli.**

(1) Morapelli a rapele a its'etlehile holima lentsoe la Ntate Molimo le tataiso ea Moea O Halalelang hore a tle a khone ho rapella thato ea Ntate Molimo e phethahetseng ka nepo. **(2)** Morapelli a rapele ka phehello le ka leqophe ho fihlella a utloa khotso le ho imolloha moeeng oa hae. Ha feela a so utloe khotso ena, a petetse ka thapelo e tsamaea le thoriso a rapela ka lipuo hape a porofeta (bala ka lipuo le boporofeta thutong ea Bophelo ba boinehelo)

(3) Thapelo ena e ka tsamaea le boitimo ba lijo le mefuta e meng ea boitimo ka linako tse ling. **(4)** Thapelo ena e tsamaee le likhato tsa tumelo le likhato tsa boporofeta. Likhato tsa tumelo e kaba ho qala ho nka likhato tsa litebello tsa likarabo tsa seo o ntseng o se rapella joalo ka Elijah ha a rapella pula eaba o qala ho roma mohlanka oa hae ho ea sheba leru ele khato ea tumelo le tebello. Likhato tsa boporofeta ekaba ho phahamisa matsoho ebe u oa theola e le ho hula seno seo u se lebelletseng ho tsoa lefats'eng la moea. Kapa ho jaefa ka thabo hoba u tseba hore u amohetse seo u se rapellang, kapa ketso e fe kapa e fe feela e tla u tlela ka nako eno ea thapelo.

Melemo ea thapelo ea borapelli (1) Thapelo ena e thusa hore thato ea Ntate Molimo e etsahale lefatsheng joalo ka ha e etsoa leholimong. **(2)** Thapelo ena e thibela merero ea satane le ho etsa hore eseke ea atleha. **(3)** E lokolla Ntate Molimo le manyeloi ho sebetsa ha bobebe. Mohlala ke oa Liketso 12 ha Peterose a lokolloa teronkong ka mohlolo ka lebaka la Thapelo ena. **(4)** E lokolla mahlohonolo a ntate Molimo le mohau oa hae (favor) ho sebetsa molemong oa rona. **(5)** Ho ea ka Jakobo 5 thapelo ena e etsa hore matla a mangata a be teng molemong oa rona, ebe joale ha re sebetsa ka tumelo re lokolla matla ana a tlišitsoeng ke thapelo.

(6) Thapelo e bolaea bo rona, e leng ho ipatla le boikhothomoso le mekhoa e mebe eo e bang ne re na le eona. Ha ntse re rapela re shebane le Morena rea fetoha ho ts'oana le eena le haebe resa elelloe ka nako eno empa re tla qetella re bona hore se re fetohile ha nako entse e ea. Khathe nako tse ling re tla hle re bone hang hang mekhoeng e meng hore re fetohile. sena se ka etsahala le haeba resa rapelle mekhoa eno ea rona hobane hoba botenng ba Ntate Molimo feela hoa re fetola

MARENA A `MUSO OA NTATE MOLIMO (BAFANI):

Bana ke batho ba ts'ehetsang `muso oa Ntate Molimo ka lichelete le limpho tsa bona. Hona ke pitso joalo ka tse ling. Balumeli bana ba tlameha ho ts'epahala mosebetsing ona, 'me ba tsebe hore Ntate Molimo o ba fa matla a ho ruoa hobane o batla hore ba ts'ehetse `muso oa hae ka lichelete. Ba shoe leratong la chelete, 'me ba ts'epahale (Deutronoma 8:18).

Lintlha tse bohlokoa ts'ebetsong ea Serena (1) Marena a shoe bo boneng ba seke ba rata kapa ho leka ho laola baruti ka lebaka ka chelete. **(2)** Ba seke baba lekhonatha empa ba utloe ele tlotla ho khona ho ts'ehetsa mosebetsi oa Morena Molimo ka chelete le maruo a bona **(3)** Ba tsebe hore mosebetsi oa bona ke ho ts'ehetsa pono e fuoeng moetapele oa kereke eo ba

sebelletsang ho eona `me ba etse mosebetsi ono ka bokhabane. **(4)** Ba nke boikarabello ba bona ka matla ba se ke ba ipapisa le batho ba bang. **(5)** Ba sebetse ka tumelo le ka sebete. Hape ba lumelle Ntate Molimo hore a ba koetlise ba tsebe hore liqholotso li tla teng ts`ebetsong ea bona empa ka tumelo ba tla hlola.

BA RORISANG LE HO KHUMAMELA

Batho ba bang bao Ntate Molimo a ba bitsang le ho ba tlotsa ke ba mororisang le ho mo khumamela. Bana bana le pitso ena e joalo le ho thusa ba Bangka ho ba etella pele ts`ebetsong ea thoriso le khumamelo.

Lintlha tse bohlokoa pitsong ena **(1)** Ka lebaka la semelo sa mosebetsi ona le sefutho sa oona le bokhoni ba oona ba ho sisinya batho ka tsela e matla. Barorisi ba tlameha ho ikokobetsa haholo, ba hlokomele ba se ke ba oa sebeng se ts`oanang le sa liabolosi. **(2)** Ka lebaka la bohlokoa ba t`sebetso ena ho Ntate Molimo, barorisi ba tsamaee pela Ntate Molimo haholo, **(3)** Le bona ba qobe lerato la chelete. **(4)** Pelo ea bona e be ho kenya batho botenng ba Ntate Molimo eseng ho tlotleha pela batho. **(5)** E be batho ba boinehelo bo tibileng hobane bona ba fuoe boikarabello ba ho tliša boteng ba Ntate Molimo bo bonahalitsoeng bathong (Gods manifest presence).

Ba bang ba fuoe mesebetsi ea bo ho hlokomela likhutsana, ho thusa bahloki, ho hlokomela maqheku, ho hlabolla, ho khothatsa, Ho khumamela le ho etella batho pele thorisong le khumamelong, ho thusa ba boetapeleng, le ho etsa mesebetsi e fapaneng `musong oa Ntate Molimo (helps and administrations). Se seng le se seng se bohlokoa se tlišang molemo ho ba bang le ho aha `muso oa Ntate Molimo ke seo Ntate Molimo a o bitselitseng sona. Ba bang ba fuoe mesebetsi e fetang bo`ngoe. Kaofela e bohlokoa. Uena phetha karolo ea hau.

Lebaka leo Ntate Molimo a hlalisitseng, Bo Moshe, Aborahama, Estere, Daniele, Josefa, Elia le babang ka mesebetsi ea bona e fapaneng `musong oa hae, ke hobane mesebetsi le lipitso tsa rona ka ho fapana li bohlokoa `musong oa Ntate Molimo. Uena fumana le ho phetha pitso ea hau.

LINOTLOLO TSA `MUSO OA MOLIMO

Linotlolo tsa `muso oa Ntate Molimo ke litsamaiso tsa hae (kingdom principles). Li bitsoa linotlolo hobane ha motho a li tseba, li tla mo sebelletsa le ho mo bulela mamati a molemo. Linotlolo tsena e ne ele liphiri empa li senoletsoe kereke ke Moea O Halalelang ka batlotsuo ba hae. Linotlolo ha li tsòane le lineo hobane lineo li fuoe batho ba itseng feela, khathe linotlolo tsona li sebelletsa balumeli boohle ba li tsebang ebile ba li beha ts`ebetsong.

RE FUMANA LINOTLOLO TSEE JOANG: **(1) Tsebo:** Re tlameha ho tseba na lentsoe la Ntate Molimo le reng ka karolo eno eo re hlohang maphelong a rona. **(2) Thuisa nnete eno (meditation):** tsebo ena eseke ea fella kelellong ea hau feela, empa o e thuisse ka ho bala khafetsa, o e utloisise ka botebo hape o e buoe ka molomo hore e tle e qetelle ele karolo ea moea oa hau. **(3) O buoe nnete eno bophelong ba hau o buoe hore o phela nneteng eno, kapa `nete eno e bonahala bophelong ba hau** **(4) Nka likhato holima nnete eno `me hape o lebelle** ho e bona bophelong ba hau hape o lebohe Ntate Molimo ka eona khafetsa. **(5) Phetha karolo ea hau le uena:** Ho nka likhatho hape ho kenyetsetsa ho etsa karolo ea hao hore nnete ena e bonahale bophelong ba hau,

JOALE RE TLO SHEBA LINOTLOLO TSE LING TSE FAPANENG `MUSONG OA NTATE MOLIMO

HOPOLA HORE KAROLO EA RONA EO RE TLAMEHANG HO E PHETHA E NA LE LEHLAKORE LA MOEA LE LEHLAKORE LA NAMA

TSE LING TSA LINOTLOLO TSA `MUSO OA NTATE MOLIMO KE TSE LATELANG:

1) Senotlolo sa ho tseba Ntate Molimo: Re tlameha ho batlana le eena ka lipelo tsoohle tsa rona ka ho mofa nako thapelong, ka ho ithuta lentsoe le hae le litsamaiso tsa hae. Sena ke sona senotlolo sa ho mo fumana. Mangolo a buang ka ho batla Ntate Molimo le ho mo fumana ke ana (Matteu 6:33, Baheberu 11:6, Jeremaia 29:11-13, Isaia 55:6-7, Matteu 7:7-9, 2 Likronike 7:14, Jakobo 4:8, 2 Likronike 15:10-15, 26:5 le a mang.

2) Senotlolo sa bophelo ba bolele lefatsheng mona. 1) fuamana na mangolo a reng ka bophelo bo bo lelele. **(Mehlala ke ena Exoda 20:12, Pesalema 91:16, Maele 3:1-2, Dipolelo 5:33, Maele 10:27, Isaia 65:20 le a mang a mangata)** **2)** Thuisa nnete ena hofihlella e ba karolo ea moea oa hau, **3)** Buoa hore otl'a phela nako e telele lefatsheng mona o phetha thato ea Ntate Molimo, `me o keke oa tsamaea lefatseng osa qeta thato ea Ntate Molimo. **4)** phela osa tshohe lefu, o lebella bophelo bo botle

bo bolelele ebile o leboha Ntate Molimo ka bona. **5)** Phetha karolo ea hau bophelong ba moea le ba nama. Mehlala ea karolo ea hau bophelong ba moea ke ho tseba lentsoe tabeng ena, ho le thuisa, ho le bua le ho leboha Ntate Molimo ka bophelo bo bolelele le ho tseba ho loantsà moea oa lefu ka thapelo ea ntoa le hlomphe batsoali. **Karolo ea hau bophelong ba nama** ke ho ja hantle, ho noa metsi a hloekileng, ho koetlisa `mele (exercise), ho phomola hantle le ho se itumelle ho touta le ho baleha sebe joalo joalo hobane bophelo ba sebe bo khutsufatsa mapholo a rona lefatseng.

- 3) Senotlolo sa ho tsamaea ka matla a Ntate Molimo: 1)** Re tlameha ho tseba litemana tse re joetsang hore re fuoe matla ho Krete le ho li lumela. **2)** Hape re be le bophelo ba thapelo le boitimo khafetsa. Sena ke sona senotlolo sa matla: **tsebo, thapelo le boitimo, haholo thapelo ea lipuo le boporofeta. (Mangolo a buang ka matla a rona ho Krete ke ana Luka 10:19, Matteu 28:18-20, Liketso 1:8, Mareka 6:7 le a mang)**
- 4) Senotlolo sa ho phela ka holimo ho mafu (divine health): 1)** Re tlameha ho tseba mangolo a buoang ka hore re fuoe bophelo bo botle le bophelo holima mafu, re lumele mangolo ana le ho a bua khafetsa. **(2)** Hape re lebohe Ntate Molimo ka bophelo bo botle bo senang mafu. Hape re laele `mele ea rona hore e phele hantle, e be matla ka linako tsohle, re be re phatlallatse hore `mele ea rona e phela hantle ka linako tsohle, ebile e matla. Ha o utloa karolo e seng hantle, o buoe le eona ka kotlolloho, o e laele hore e sebetse hantle ebe o leboha Ntate Molimo hore karolo eno e sebetse hantle ka lebitso la Morena Jesu. Re meea, `me re fuoe matla holima `mele ea rona ea nama. **Ebe boemong ba nama:** re ja hantle, re qoba lijo tse senang bophelo bo botle, re noa metsi a mangata a hloekileng, re koetlisa `mele, re qoba ho touta le ho imeloa bophelong le ho baleha sebe joalo joalo le fumana likeletso tsa lingaka (doctor le litsibi tsa `mele) molemong oa bophelo bo botle. Sebelisa moriana (medicine) ha ho hlokahala, ho etsa sena hase phoso. Mangolo a bophelo bo botle ka ana **(Exoda 15:26, Isaiah 53:5, Liprovia 17:22, Exoda 23:25 le 3 Johanne 1:2 le a mang)**
- 5) Senotlolo sa ho atleha licheleteng le linthong tsa nama (financial and material blessings) : (1)** Fumana mangolo a buang ka katleho licheleteng tsa hau le mesebetsing ea hau ea matsoho. **(2)** Thuisa nnete ena hape o e phatlallatse ka molomo oa hau. O lule o bua katleho ea hau, o lebohe Ntate Molimo ka eona hape o lebele ho e bona bophelong ba hau ba nama **(3)** Fana ka boshome le menhele e hlomphe Ntate Molimo. **(4)** Batla katleho le tsoelopele ea `muso oa Ntate Molimo hape o rate ho thusa ba hlohang. **Boemong ba nama: (1)** sebetse ka matla ka boitelo o seke oa ba botsoa. **(2)** Eketsa tsebo ea hau le boleng (value) ba hau ka ho koetlisa keletso ea hau le ho ipabola mesebetsing kapa karolong ea hau ea bophelo. O sebetse ho ipabola. **(3)** Baa sebetse hape o seke oa ts'aba ho faila. **(4)** Boloka likamano tsa bohlokoa (destiny relationships) hobane likamano tsena le batho li tla o tlisetsa melemo. **(5)** Leboha Ntate Molimo ka bohlole le ka katleho licheleteng le ho e lebella. Mangolo a buang ka katleho ea lichelete le mahlohonolo mesebetsing ea rona ke ana **(Liprovia 13:22, Liprovia 21:20, Luka 6:38, Liprovia 3:9-10, Malakia 3:10-14, Bafilipi 4:19, Liprovia 10:22, 2 Bakorinte 9:8, Jeremia 17:7-8 le a mang)**
- 6) Senotlolo sa ho tsamaea ka Mohau (favour): (1)** Fumana mangolo a buang ka mohau ona o etsang hore o fuoe lintho hape o tsamaea ka mahlohonolo le hore batho ba utloe ba thabela ho o thusa le hore o fumane lintho ka tsela ea mohlolo hape mamati a o bulehele ka tsela e mohlolo. Tsena li etsahala ka lebaka la mohau ona o bitsoang "favour". Lumela Mangolo ana hape o a phatlallatse ka molomo oa hau, o bua hore o tsamaea ka mohau (favour) ona ka linako tsohle. **(2) Tsamaea le Ntate Molimo ka katamelo.** Hona le mohau o tloang ke ho tsamaea le Ntate Molimo. **(3) Thapelo le tumelo:** Hona le mohau o lokolloang ke thapelo le tumelo **(4) Ho fana;** Ho fana le hona ho ka lokolla mohau ona. **(5) Ho ipabola (Maele 22:29):** Ho ipabola mesebetsing le lineong tsa hau le tsona li ka lokolla mohau ona **(6) Likamano tsa bo Molimo (destiny relationships):** Likamano tsa batho ba kopantsoeng ke Ntate Molimo le tsona li tisa mohau ona, empa ke boikarabello ba rona ho li boloka hantle le ho li holisa likamano tsena. **(7) Hokahana le bahlanka ba Molimo ba tsamaeang le Ntate Molimo ka Matla hape o hokahane le mesebetsi oa Ntate Molimo oo ba o etsang.** O ba bua hantle, o ba rapelle hape o jale maphelong a bona hape o re ba o rapelle hape o lumele lentsoe la bona. Sena se lokolla mohau ka tsela e phahameng bophelong ba motho.
- 7) Senotlolo sa ho fumana Lereko (mercy): (1)** Fumana mangolo a buang ka lereko (mercy). Tseba hape o lumele lerekong la Ntate Molimo hape o lebohe ka lereko la hau bophelong ba hau. **(2)** Robeha pela Ntate Molimo hape o bake moo o hlohang ho baka. **(3)** Bontsha ba bang lereko le uena.
- 8) Ha o batla ho ratuoa, bontsha ba bang lerato pele, ha o batla ho hauheloa, hauhela ba bang le uena, ha o batla ho phahamisoa ka tsela ea bomolimo, le uena phahamisa ba bang ka bokhoni ba hau. O hopole ho phatlallatsa ka molomo oa hau hore seno seo o se batlang se etsahala bophelong ba hau ka tumelo ha ontso nka likhato tsena.**

Linotlolo tsena li ngata. Uena fumana seo o se hlohang ka ho fumana na lentsoe la Ntate Molimo le reng ka korolo eno. O ka kena google oa fumana ha bonolo na lentsoe le reng ka taba eno eo o hlohang. Mohlomong haeba o hloka tsebo ka bophelo bo bolele. O ka kena google eaba o ngola "verses about long life". O tla fumana litemana tsena habonolo. Ebe joale oa li tseba, oa li thuisa, oa li lumela, o oa li bua hape o phetha karolo ea hau hore o bone senotlolo seno se sebetse bophelong ba hau.

SELEKANE SA KHALE LE SE SECHA (MOLAO LE MOHAU) (Johanne 1:17)

Bibele e re joetsa hore re phela tlas'a selekane se secha se thehiloeng pakeng tsa Molimo Ntate le Morena Jesu Krete (Luka 22:17-21). Re ba karolo ea selekane sena ka ho amohela Morena Jesu maphelong a rona, 'me ebe re fuoa tsohle tsa selekane sena e le bojalefa ba rona. Bojalefa bona ke bona bo bitsoang testamente.

Selekane sa mali ka kutloisiso ea bibele: Selekane sa mali ke tumellano e etsoang ke batho ba babeli kapa ba fetang bobeli kapa lihlopa tse peli ho ea holimo, 'me ebe se tiisoa ka mali. Ho sebelisoa mali hobane mali a bolela bophelo. Ka mantsoe a mang, motho e mong o ikana ka bohelo ba hae molemong oa e mong. Hang ha se tiisitsoe ka mali, ha se sa robeha kapa hona ho feela, se se tla arohanngoa ke lefu feela. Nako tse ling ho ne ho kopanngoa mali a batho ba babeli.

SELEKANE SA KHALE: (1) Se thehiloe pakeng tsa Ntate Molimo le Iseraele, Moshe e le moemeli, 'me se tiisitsoe ka mali a liphoohofolo (Baheberu 8:19-23) (2) Se ne se shebane le Israel ea nama feela ka nako eno, e seng lichaba tse ling, morero oa Ntate Molimo e ne e le ho tla hlalisa mopholosi oa lefats'e lohle (Jesu Krete) ho hlaha Naheng ea Israele. (3) Se ne se busoa ke molao oa Molimo o fanoeng ho Moshe (4) Molao ona o no o tliša tsamaiso ea Ntate Molimo Israele, o no o senola tsela ea ho khumamela Ntate Molimo, le tsela ea ho phelisana le ea boits'oaro bathong ba Ntate Molimo (5) Mohau le lereko la Ntate Molimo li ne li bonahatsoa ka tekanyo seleaneng sa khale (6) Lithohonolofatso le lits'episo tsa Ntate Molimo li ne li its'etleha holim'a ho phetha molao (7) Batho e ne e le basebelletsi le bahlanka feela seleaneng sena, e ne e se bara ba Molimo joalo ka rona seleaneng se secha (8) Ntate Molimo o ne a phela hara batho feela, e seng ka hare ho bona, ba ne ba sa kolobetsoa ka Moea O Halalelang, 'me o ne a ba holima baporofeta, baprista le marena feela (9) Sesupo sa selekane sena e ne e le lebollo la nama. E ne ele ho khaola letlalo le kapele botoneng ba batho ba batona, e seng lebolloa le bo mephato joalo ka ha re le tseba tsatsing lena. (10) Hase libe tsohle tse neng li ts'oarelola seleaneng sena. Ho no ho tsoa ka bohola ba tsona. 'Me li ne li sa hlatsuoe, empa li ne li koaheloa feela ka mali a liphoofolo. (11) Ntate Molimo o ne a theha selekane sena nakoana e khuts'oane feela ho fihlela Morena Jesu a tla lefats'eng. Selekane sena e ne e le seriti feela sa selekane se secha.

MESEBETSI EA MOLAO OA SELEKANE SA KHALE

- 1) E ne e le ho tataisa batho hore ba tle ba lumele ho Morena Jesu Krete (Bakhalata 3:23).
- 2) E ne e le ho bonts'a batho hore ba na le semelo sa sebe, 'me ke baetsalibe, 'me ba ke ke ba khona ho beoa likamanong tse lokileng le Ntate Molimo ka ho phetha molao oa Moshe, empa morero e ne e le hore ka molao o Halalelang oa Molimo, ba ikelelloe hore ba na le semelo sa sebe se khahlanong le Ntate Molimo, ka hona ba tle ba elelloe hore Ke Ntate Molimo feela ea ka ba pholosang (Baroma 3:19-20).
- 3) E ne e le hore batho ba tle ba elelloe hore sebe se ka hare ho bona, me ba hloka semelo se secha ho tsoa ho Ntate Molimo hore ba tle ba be likamanong tse ntle le eena. 'Me Semelo le likamano tsena li fumaneha ka ho lumela ho Jesu Krete feela (Baroma 3:21-30).
- 4) E ne e le ho tliša tsamaiso ea sechaba sa Iseraele nakong eno. 5) E ne e le ho senola semelo le thato ea Ntate Molimo.

SELEKANE SE SECHA: (1) Se thehiloe pakeng tsa Ntate Molimo le Morena Jesu, 'me se tiisitsoe ka mali a Morena Jesu (Luka 22:20) (2) Se shebane le batho bohle ba amohetseng Morena Jesu ho sa tsotellehe hore ba hlaha hokae (Johanne 17:20) (3) Boraro bo teroneng seleaneng se secha: Selekane sena se thehiloe pakeng tsa Ntate le Morena Jesu, 'me Ntate o file Morena Jesu Moea O Halalelang ka mora hore a phethe karolo ea hae ea selekane, joale Morena Jesu eena o file kereke Moea O Halalelang hobane o re file tsohle tseo Ntate a mo fileng tsona (Liketso 2:32-34) (4) Ke rona Israele ea 'nete seleaneng se secha, rona ba amohetseng Morena Jesu. Ke rona khosi ea Molimo ea 'nete. Morena Jesu ke khosi ea li khosi. Likhosi tse ling ke rona. (5) Selekane se secha ke selekane sa mohau (6) Se busoa ke molao oa lerato le Moea O Halalelang (Johanne 13:34-36)

(7) Balumeli ba selekane se secha ba tlatsitsoe, ba tlotsitsoe ebile ba busoa ke Moea O Halalelang hape ba khumamela Ntate ka tataiso ea Moea O Halalelang (Johanne 4:24). Moea O Halalelang o phela ka hare ho rona, ke rona litemepele tsa hae (1Bakorinte 3:16, 6:19) (8) Mohau (grace) le lereko (mercy) la Ntate Molimo li bonahatsoa le ho fanoa ka botlalo seleaneng se secha. Lereko la Ntate Molimo le etsa hore a seke a refa kahlolo e re lokelang, hape le re ts'irelletsa harele mathateng le ha ele rona ba ikentseng kapa re kentsoe ke batho.

(9) Lithohonolofatso tsa Ntate Molimo li fanoa ka botlalo seleaneng se secha ho bohle ba amohetseng Morena Jesu Krete (baefese 1:3, 2Bakorinte 1:20). (10) Re bara le barali ba Ntate Molimo seleaneng se secha (Bakhalata 4:6-7) (11) Re fue semelo se ts'oanang le sa Ntate Molimo, 'me re khona ho etsa thato ea hae habonolo hobane re tsoetsoe ke eena. Ho ka ho rona ho mo mamela (Baheberu 8:10-14) (12) Selekane se secha ha se fele, 'me se tlisitse khanya, boteng le bophelo ba Ntate Molimo ka botlalo baneng ba hae (2Bakorinte 3:7-12) (13) Ntate Molimo ka boeena o nkile boikarabello ba ho re etsa hore re mo

mamele, `me re phethe thato ea hae (Bafilipi 2:12-13, Johanne 10: 28-31, Baheberu 8:10-13) **(14)** Lebollo la selekane se secha ke la moea, ke ho khaoloa ha semelo sa sebe meeng ea rona ha re amohela Krete, `me re fuoa semelo se secha se ts'oanang le sa Ntate Molimo (Baroma 2:29, Bakolose 2:11-12) **(15)** Selekane sena re bara ka tsoalo, empa re basebellets ka khetho. Re basebellets ba lentsoe le ba Moea O Halalelang. Ka mantsoe a mang, re sebellets ka ho ruta lentsoe le ka liponahatso le lineo tsa Moea O Halalelang. Balumeli bohle ke basebellets selekaneng se secha (Baefese 4:11-13). **(16)** Libe tsohle lia ts'oareloa selekaneng se secha. Lia hlatsua, `me li tlohe ka botlalo ka mali a Morena Jesu, ha li koaheloe feela.

SELEKANE SA MOHAU: Joalo ka ha ke hlakisitse hore selekane se secha ke selekane sa mohau, ke tlo hlalosa mohau ka kotlolloho. Mohau ke seo Ntate Molimo a re etsang kapa a re fang sona mahala hobane a re rata. Ke lerato la Ntate Molimo ts'ebetsong kapa ponahatsong. Hape, Mohau ke matlafatso ea Moea O Halalelang bophelong ba molumeli, bo mo etsang hore a sebetse joaloka Molimo. Mohlala, Ntate Molimo ha a etse sebe, le mohau o re fa matla holima sebe (Baroma 6:14). Le lineo tsa Moea O Halalelang ke lineo tsa mohau, `me li re etsa hore re sebetse joalo ka Molimo.

MOHAU O ENTSE ENG MAPHELONG A RONA: **(1)** Mohau o re pholositse oa ba oa re etsa bara ba Molimo, ebile o re behile letsohong le letona la Ntate le Krete (Baefese 2:6-8) **(2)** Mohau o re fa matla a ho phela bophelo ba bomolimo **(3)** Tsohle tseo Ntate a re fang tsona, ke ka lebaka la mohau oa hae o moholo **(4)** Ntate Molimo o lula a re phahamisa ebile a re isa pele ka lebaka la mohau oa hae ho rona hape o lula a re ts'oarela ha re mo fosetsa ka lebaka la mohau oa hae. **(5)** Ntate Molimo o oa re lopolla ha re kene bothateng, le ha e le rona ba ikentseng, ka lebaka la mohau oa hae **(6)** Mohau o re tsamaisa joalo ka marena lefats'eng holim'a maemo oohle **(7)** Ntate Molimo o re etsa tsohle, ebile o tla lula a re etsa tsohle ka lebaka la mohau oa hae. **Rona re hloka feela ho amohela mohau oa hae ka tumelo feela.**

SELEKANE SA LEREKO\MOSA (MERCY): Ntate Molimo o mohau hape o lereko. Lereko ke qenehelo ea hae ka lebaka la lerato la hae. **Lereko la Ntate Molimo le etsa hore a re qenehele `me a re thuse le ho re qobisa kahlolo kapa litlamorao tsa mesebetsi ea rona e soabisang. Hape le re qobisa litlamorao tsa maemo a mabe le ha ese rona ba ikentseng ho oona.** **(1)** Lereko la hae le isitse kahlolo ea rona holima Morena Jesu sefapanong. **(2)** Lereko la hae le re bulela mamati a mohau le botle maphelong a rona (Pesalema 102:13) (Baheberu 4:16), **(3)** Lereko la hae le re ts'irellets litlokotsing tsa lefats'e (Lamentations 3:22-23). **(4)** Lereko la hae le re ts'irellets khalefong ea Ntate Molimo (Micah 7:18-19) **(5)** Lereko la hae lea re ts'irellets (Baefese 2:4-5) **(6)** Lereko la hae le repholosa sebeng le moputsong oa sona (Pesalema 51:1-2) **(7)** Lereko la hae lea re busellets hare lahlehetsoe le ho re folisa ha re kula (Zakaria 10:6)

Pehelo ea ho amohela Lereko ho tsoa ho Ntate Molimo ke eena: Motho o tlameha hore a robehe le ho ikokobetsa pela Ntate Molimo hore a khone ho amohela Lereko la hae. A amohela melato ea hae pela Ntate Molimo le ho baka ho eona. A se ke a lula a itatola leha a tseba hore o molato (Pesalema 51:17 (Maele 28:13). Hape ba bontshang ba bang lereko le bona batla le amohela ka tsela e phahameng hotsoa ho Ntate Molimo (Mattheu 5:7, Jakobo 2:13-18).

SELEKANE SA NTATE MOLIMO LE ABORAHAMA: Ntate Molimo o entse selekane le Aborahama sa hore mohlal moloko oa Ntate Molimo oa `nete o theoang, Aborahama e tla eena Ntate oa tumelo oa moloko oa Ntate Molimo oa `nete o neng o tla theo a ke Morena Jesu. Ke ka lona lebaka leo a bitsoang Ntate oa rona bohle ba lumetseng ho Morena Jesu, ebile bibe e re re tsamaea maotong a hae a tumelo (Bakhalata 3:7,9, 3:26-29 Baroma 4: 11-13) **Selekane sena ha se sona sa khale. Sa khale ke sa Ntate Molimo le Israele ka Moshe.**

BOHLOKOA BA KETSO EA ABORAHAMA EA HO FANA KA ISAKA HO JEHOVAH: (Genese 22:1-24) Kesto ena e file Jehova mokhoa oa hore le eena a fane ka mora oa hae ea innotsi sebakeng sa Aborahama hobane le eena o fane ka ngoana oa hae ho Jehova ka tumelo. `Me bohle ba lumelang ho mora oa hae, Jesu Krete, ba bitsoa bana ba Aborahama ba tumelo. Ho ea ka selekane sa mali, ha o nketsetsa ho hong, le nna ke na le tokelo ea ho o etsa se ts'oanang kapa ho phetha karolo eaka ea selekane. Joale Jehova o ile a khona ho fana ka ngoana oa hae hobane Aborahama a se a fane ka oa hae hobane ba ne ba na le selekane le Jehova.

LITLOHOLO TSA ABORAHAMA: Litloholo tsa Aborahama ke rona ba pholositsoeng. Eena ke Ntate oa rona oa tumelo. Ha bibe e buoa ka litloholo tsa hae, ha e buoe ka litloholo tsa hae tsa nama, e leng Israele ea nama, empa e buoa ka litloholo tsa hae tsa moea, e leng rona ba lumetseng ho Morena Jesu (Bakhalata 3:7). **Joalo ka litloholo tsa hae, litlhohonolofatso tsa Aborahama ke tsa rona. Litlhohonolofatso tsa Aborahama ke litlhohonolofato tsa moloko oa Ntate Molimo: `me ke tsena tse latelang :** **(1)** Ho amohela Moea O Halalelang (Bakhalata 3:14) **(2)** Ke kholo le katiso linthong tsohle, ke setumo le tlhohonolofatso le ts'irilletso khahlanong le bobe (Genese 12:2-4). **(3)** Ke bojalefa ba lefats'e (Genese 13:14, Baroma 4:13) **(4)** Ke katiso le ngatafaloo haholo linthong tsohle (Genese 13:2) le hore re ba tlhohonolofatso bathong ba bang (Genese 12:3). **Lits'episo tsohle tsa Ntate Molimo tse hlahang selekaneng sa khale le se secha ke litlhohonolofatso tsa Aborahama, `me ke tsa rona ho Krete.**

MOSEBETSI OA MOSHE: Mosebetsi oa Moshe e ne e le ho tlisa tsamaiso ea Ntate Molimo sechabeng sa hae ka nako eno. Sechaba sena sa Ntate Molimo e ne e le litloholo tsa Aborahama tsa nama (Israele ea nama). Ntate Molimo o ne a sebelisa litloholo tsa

Aborahama tsa nama hore Morena Jesu a tlo hlaha ho tsoa molokong ono oa hae oa nama. Israele e ne e se moloko oa Molimo oa `nete, empa e ne e le sechaba seo a khethileng ho tsamaea le sona. E ne e le bahlanka ba hae feela. O ne a etsa sets'oants'o ka ho ba hlohonolofatsa sa hore na o batla ho etsetsa moloko oa hae oa `nete eng mohlang o seng o le teng. Moloko oa hae oa `nete ke oa bara le barali o thehiloeng ke Morena Jesu.

MOSEBETSI OA MORENA JESU: Mosebetsi oa Morena Jesu e ne e le ho tla theha moloko oa Molimo oa `nete le ho tlisa tsamaiso ea Ntate Molimo e sa feleng ea mohau molokong oa hae oa `nete. O tile ho tla theha selekane se secha. O ne a phethahatsa selekane sa khale hore a thehe se secha.

KHOKAHANO PAKENG TSA SELEKANE SA NTATE MOLIMO LE ABORAHAMA LE SELEKANE SA NTATE MOLIMO LE

MORENA JESU: Selekane seo Ntate Molimo a se entseng le Aborahama ke sa hore Aborahama e be ntate tumelong ho moloko oa Molimo oa `nete, ka mantsoe a mang, a re bonts'e mohlala oa ho tsamaea ka tumelo le Ntate Molimo. Bible e re re tsamaea maotong a hae a tumelo. Selekane sa Ntate Molimo le Morena Jesu e ne e le sa hore Morena Jesu a tlo theha moloko oa Ntate Molimo oa `nete, ono oo Aborahama e leng ntate oa oona oa tumelo. Morena Jesu ke Molimo oa rona, ebile ke Ntate oa rona oa moea le oa tumelo. Aborahama eena ke Ntate oa rona tumelong feela joalo ka baruti ba rona le bao e bang ba re holisitse moeeng bao re ba bitsang bo ntate le bo `me ba rona tumelong kapa moeeng. Aborahama ke Ntate oa rona ka tsela e joalo feela. Mohlala: re fana ka mashome hobane rele litlhoholo tsa Aborahama, `me re tsamaea maotong a hae a tumelo.

LI ALETARA

Lentsoe lena Aletara le hlaha ho isa makhetlong a 400 ka bibeleng. Re qalile ho bona Aletara ka Nooe ha a etsetsa Ntate Molimo Aletara ka ho Genese 8:20 ka mora morao oa metsi, me ka morao ho mono re e bona ka Ntate Aborahama ka mekhetlo ha a etsetsa Jehovah Aletara le ba bang ba bangata bibeleng. Ka lebaka la tsamaiso eo Ntate Molimo a e entseng ea hore lefatsheng ke la motho ho Genese 1:26-28. Sena se entse hore Motho e be ena a nang le tokelo ea ho lokolla Moea ho sebetse lefatsheng la hae e le oa Ntate Molimo kapa oa satane. Ka hona, **aletara ke tsela ea semolao (legal way)** ea ho lokolla moea ho sebetse lefatsheng la motho, e ka ba bophelong ba hae, kapa lelapeng la hae kapa lelokong la hae ka kakaretso

Li Aletara bibeleng li ne li etsoa ha o etsoa mahlabelo, ha ho khumamelo le ha ho etsoa lilekane le Ntate Molimo. Bible e hlalosa li aletara li ne li etsoa ka majoe a sa seoang kapa ka tse ling li etsoa ka tsèpe le lintho tse ling haholo tse neng li sebetse ka tempeleng. Ho tloha mona batho ba ne ba iketsetsa li aletara tsa bona tse ikhethileng (personal alters), moo ebang ba ile ba kopana le Ntate Molimo ka tsela e ikhethileng.

Selekaneng sa khale, li aletara li ne li etsoa moo Ntate Molimo a entseng mosebetsi o mong o ikhethileng kapa moo a iponahalitseng mothong ea itseng.

Aletara ene e bolela, boinehelo, teboho, kopanelo le Ntate Molimo (fellowship) kapa kopo ea thapelo kapa boitlamo bo itseng ho Jehovah kapa sesupo sa ho lokolla hore Ntate Molimo a sebetse le ho tsoela pele ho sebetse bophelong ba motho kapa lelapeng kapa lelokong le itseng.

Joale re tlo Sheba mosebetsi ea li aletara selekaneng sa khale le se secha.

Li Aletara selekaneng sa khale;

- 1)** li aletara selekaneng sa khale li ne etsoa ka majoe a sa seoang, 'me li ne li hahoa ka nama (physical structures) empa li ena le moelelo le sesupo sa moea. Aletareng ene ele moo lefatsheng la nama le kopanang le la moea ele oa Ntate Molimo kapa oa satane.
- 2)** Mosebetsi oa li aletara ene ele ho ananela mosebetsi o entsoeng ke moea o mong, ele oa Ntate Molimo, manyeloi, kapa oa liabolosi le matemona, kapa ele ho leboha kapa ho kopa kapa hona ho lokolla moea ono hore o qale mosebetsi mothong, lelokong kapa lelapeng le itseng haeba oso o qale, empa ha oso o o qalile, ene ele ho lumella moea ono hore o tsoele Pele ka mosebetsi oa ona.
- 3)** Aletara hore o phethahale hone ho tlameha hoba le sehlabelo le tsholoho ea mali, hangata a phoofolo, le mantsoe a buuang ha mali a tsholoha hore na ka aletara eno motho o kopa eng ho moea ono o itseng kapa na sepheo sa aletara eno ke sefe, ekaba teboho, khumamelo kapa tokollo ea moea ho sebetse ho etsa botle kapa bobele. Polelo e ne e tlameha ho tsoa ele ho hlakisa sepheo sa aletara eno. Polelo ena e tlameha ho ba polelo ea tumelo hobane ho buua le moea osa bonnoeng ele oa Ntate Molimo kapa oa satane.

4) Matla a aletara a itsètleha holima tsena tse latelang:

(a) Matla a moea o etsetsoang sehlabelo seno. Meea ena e fapane ka matla le borena ba oona, `me re hlalosa tsena thutong ea liabolosi le matemona. Meea ena e ikhakanya eka ke bafu, kapa melimo e meng e mengata ka mabitso a fapaneng. Ka mora molingoa o mong le o mong ke motemona **1Bakorinte 10:20 (b)** Matla a tumelo e ka mora aletara eno **(c)** Ho mameleng ha motho le ho ikokobelletsa moea ono o sebelletsoang (obedience) le matla kapa boholo ba sehlabelo se entsoeng aletareng eno. **(d)** Boholo ba sehlabelo bo ne bo etsa aletara e Matla. Mohlala sehlabelo sa khomo sene se etsa aletara e matla ho feta sehlabelo sa khoho. Empa sehlabelo se matla ka ho fetisisa ene ele sa tsholoho ea mali a motho, empa le ha hole joalo, Ntate Molimo ha a lumelle mofuta ona oa sehlabelo. Empa sene sentse se etsoa `musong oa lefifi ke batho ba rapelang medimo ea bohata ebile sentse se etsoa le matsatsing ana ke baloi le ba rapelang satane le ba nkang karolo boling. **(e)** Botebo ba bokhopo le bohloko kapa khalefo e ka mora aletara eno ea lefifi e etsetsoang satane, kapa botebo ba tumelo, lerato le ho mamela ho ka mora aletara e neng e etsetsoa Jehovah. **(f)** Matla a moemeli ea

kopanyang motho le meea eno e sebelletsoang (hangata batho bana ke lisangoma kappa mathuela li aletareng tsa lefifi,) kapa bahlanka ba Molimo `musong oa leseli.

5) Hangata aletara ene e etsetsoa lelapa kapa leloko le itseng hobane Ntate Molimo o batla hore leloko loohle le ikokobelletse ena ebile o batla ho hlohonolofatsa leloko loohle ho ea melokong e sekete, empa le satane o batla hore leloko loohle le mosebelleitse hape le ikokobelletse ena. Ke ka lebaka lena aletara e sa ameng motho ale mong feela boholo ba nako.

6) Aletara li nako tse ling, ha eba mosebetsi oa eona ene ele ho lokolla moea o itseng o litsila ho etsa mosebetsi o itseng, e tlameha ho lula e matlafatsoa ka lihlabelo, nako tse ling selemo le selemo, tse ling ekaba khoeli le khoedi, tse ling e kaba lilemo ka hofapana. Ke moo nako tse ling o fumanang mafu a lula a hlaha ka mora nako e itseng malapeng kapa malokong a mang. O ka fumana hore linako tse ling, ho matlafatsoa aletara e bang e ne e entsoe ka mali a batho joalo joalo kapa ho lefshoa mokoloto oo ebang lelapa le kolota moea ono o lits'ila. Empa linako tse ling ho ka shoa liphoofole kapa motho a senyeheloa kapa a lahleheloa ke se seng sa bohlokoa haeba a sa phetha karolo ea hae aletareng eno. **Aletara ea matemona ha e se e phahamisitsoe, e lokolla matemona ho sebelisa batho, liphoofole le lihloliloeng ho etsa mesebetsi ea ona ea ho senya, ho utsoa, ho bolaea le ho timetsa. Re hlalositse thutong ea liabolosi le matemona hore na re helets a li aletara tsa matemona joang.**

Matla a aletara ea Aborahama ha a fana ka isaka (...Abraham put him on the altarGenese 22:9).

Aletara ena ene ele eona e matla ka ho fetisisa testamenteng ea khale hobane tumelo ea eona le ho mamela ha eona ene ele ea matla a sehlabelo sa motho hobane Aborahama one a tlo fana ka isaka ka lebaka la ho rata le ho mamela Jehovah. Ke nnete hore Ntate Molimo o ile a qetella a mothibile ha a re o hlaba Isaka, empa kelellong ea Ntate Molimo a ne a entse ketso eno hobane one a qetile le maikutlo a hae. Ntate Molimo o ile a mothiba hobane ha a lumele sehlabelong sa motho, empa one a hloka tumelo eno e joalo le ho mamela hono ho phahameng ha kaalo hore aletara ena etle e mo lokolle ho phahamisa aletara e kholo ho feta tsohle ea kholekhotla eo ho eona mora oa Ntate Molimo a ileng a etsoa sehlabelo sa libe tsa rona. **Aletara ena ea kholekhotla ke eona e kholo ebile e Matla ho feta li aletara tsohle lefatsheng Lena le le tlang.** Ka mora hore Aborahama a pase teko ena, Ntate Molimo o ile a mofa rama hore a etse sehlabelo ka eona holima aletara eno. Empa semoeeng Aletara eno ke eona e lokollotseng Ntate Molimo hore a tle a fane ka Morena Jesu sefapanong.

Aletara ena e matla ka ho fetisisa hobane sehlabelo sena se ne se etsetsoa Jehovah e leng eena Moea o Matla oohle ka tsela e senang tekanyo. Hape e ne ele sehlabelo sa motho, se etsoang ka tumelo e phethahetseng, e susumetsoang ke ho rata le ho mo mamela Jehovah. Ke ka lona lebaka lena aletara ena eleng eona aletara e matla ka ho fetisisa pele ho ea kholekhotla.

MOTHEO OA LI ALETARA TSOHLE TSE LITSILA HO SA TSOTELLEHE MEFUTA LE BOEMO BA TSONA, LI ALTERA TSENA LI MATLAFATSOA KE ALETARA ELE NGOE E KHOLO, E LENG ALETARA EA SEBE. ALETARA ENA E ILE EA PHAHAMISOA KE ADAMA HA A ROBA TAELO EA JEHOVAH, `ME KE EONA E MATLAFATSANG LI ALETARA TSOOHLE TSA BOBE HOBANE KA HO ROBA TAELO EA JEHOVAH, SATANE O ILE A FUMANA TOKELO EA HO SEBETSA LE HO SENYA LEFATS`ENG. HOPOLA HORE ALETARA E LOKOLLA MOEA HO SEBETSA KA TOKELO LEFATS`ENG LA NAMA.

LI ALETARA SELEKANENG SE SECHA

ALETARA EA SEFAPANO SA MORENA JESU KHOLEKHOTHA

Aletara e kholo ho feta tsohle lefatsheng, ke aletara ea sefapano sa Morena Jesu kholekhotla.

1) Aletara ena ene ele sehlabelo se seholo ka ho fetisisa hobane sehlabelo sena sene se etsetsoa Jehovah, e leng eena Moea o matla ka ho fetisisa lefatsheng le lehodimong le tlasa lefats'e. Joale Mali a tsholohileng mona ke madi a mora oa Molimo ka sebele a neng a sena sebe ho ona. **Mali ana a boemong ba bomolimo. Ka mantsoe a mang, ke mali a Molimo ka sebele.**

2) Puo e entsoeng ha mali a tsholoha ke hore Ntate ba tsoarele hoba Haba tsebe seo ba se etsang. Hape ene ele mantsoe a reng " ho felile". Ho bolelang hore aletara ena ke ea mohau le tsoarelo le tefello ea libe tsohle tsa batho le litlamorao tsa sebe ka botlalo. Ha Morena Jesu a re "**ho felile**", o ne a bolela hore molato oa motho kaofela ha oona o lefuoe, e leng sebe le litlamorao tsohle tsa sona. **Aletara ena kea tefelo ka phethahalo.**

Ha Morena Jesu a shoa, lesira la ka tempeleng le ile la taboha, hona ho ne ho bontsha hore Ka aletara ena, Ntate Molimo o lokollotsoe ka botlalo ho sebetsoa lefatsheng loohle le ho phela ka hara batho boohle batla amohela Morena Jesu maphelong a bona.

3) Aletara ena ea Kholekhotla e felisitse li aletara tsa selekane sa khale tsa majoe le tse ling hobane ka aletara ka bo n'goe, motho one a ananela ts'eno ea Ntate Molimo e sa phethahalang eo motho eno a e fumaneng e le karoloana feela. **Empa ka aletara ena ea Morena Jesu, botlalo ba Molimo bo senotsoe ebile bo tlisitsoe ho batho boohle ka Jesu Krete ka ho safeleng**

Ka Aletara ena ea sefapano sa Morena Jesu, pholoso, pholiso le mahlohonolo oohle a Molimo a rekuoe molemong oa rona ka ho safeleng ho batho boohle ba tla lumela ho Morena Jesu Krete maphelong a bona.

- 4) Aletara ena e matla haholo hobane mmoelanyi pakeng tsa Ntate Molimo le batho ke Morena Jesu ka sebele eleng konyana ea Molimo e senag sekoli. Ka hona e matla haholo hobane ea kopanyang Molimo le batho ke mora oa Molimo ka boeena (1 Timotia 2:5).
- 5) Bohale boohle ba Molimo Ntate bo ile ba kokobetsoa aletareng ena ea kholekhotla ha libe tsoohle tsa batho li lefelloa.
- 6) Ka Aletara ena, Ntate Molimo o ne a reka ka semolao, batho le libupuo tsa hae tsoohle a li boelanya le eena (1 Peter 1:19). Hape Ntate Molimo o re hlatsoitse libe ka mali a Morena Jesu aletareng ena.

ALETARA ENA E LEFATSÈNG E THEHILOE HOLIMA MALI A MORENA JESU KRESTE.

ALETARA ENA EA SEFAPANO E THEUOENG KA MALI A MORENA JESU, KE EONA E KHOLO KA HO FETISISA EBILE KE EONA MOTHEO OA LI ALETARA TSOOHLE TSE LOKILENG EBILE LI ALETARA TSOOHLE TSE LOKILENG LI MATLAFATSOA KE EONA HOBANE KETSO ENA EA LEFU LA MORENA JESU KRESTE KE EONA E LOKOLLOTSENG NTATE MOLIMO HO SEBETSA KA BOTLALO LEFATSÈNG.

ALETARA E LEHOLIMONG

Bibele e re Morena Jesu o kene sehalalelong se halalelang sa lehodimong, ho ea isa mali a hae aletareng ea leholimo e sa etsoang ke motho, ho ea phethahatsa pholoho ea rona ea bosafeleng (Baheberu 9:24). *Rea tseba hore sehalalelong se halalelang sa lefatsèng, moprista e moholo o ne a kena hanngoe ka selemo a tsòere mali a liphoofo, 'me mosebetsi ona ono o etsetsoa aletareng e ka mono, 'me Moshe o ne a fuoe ho haha ntlo ena ea bosebelletsi joalo ka ha e le leholimong. Sena se re joetsa hore Morena Jesu le eena ha a hlaha ka sehalalelong se halalelang sa leholimo, o ne a isa mali a hae aletareng ea leholimo pela Molimo Ntate.*

Aletara ea sefapano e tlisitse tsoarelo ea libe tsa rona le ho nka mafu a rona le litlamorao tsa sebele tsoohle, empa aletara ena ea leholimong eona e tlisitse bophelo ba Molimo bo sa feleng eleng Zoe ho batho, le mahlohonolo oohle a Molimo ebile ke eona e fanang ka tokelo ea hore re be bara ba Molimo le hore re amohela Moea O Halalelang ea khonneng hotla feela ka mora hore Morena Jesu a ee leholimong. Aletara ena e tlisitse bophelo ba leholimo lefatsèng.

ALETARA ENA E LEHOLIMONG E THEHILOE HOLIMA LEBITSO LA MORENA JESU KRESTE.

Bafilipi 2:5-11 e ea hlakisa hore ka mora hore Morena Jesu a shoe lefu la sefapano, Molimo o ile a mo phamamisa, eaba ke hona a phahamisang lebitso la hae hore le be ka holimo ho mabitso oohle, hore lebitsong la hae, mangoele oohle a khumame le maleme oohle a bolele hore Jesu ke Morena. Sena Molimo Ntate o mofile sona ka mora ho phethahatsa mosebetsi oa hae sehalalelong se halalelang sa leholimo.

LEBITSONG LA HAE, NTATE MOLIMO O KHONA HO PHOLOSA LE HO FOLISA LE HO PHELISA BATHO (LIKETSO 4:12). LEBITSONG LA HAE NTATE MOLIMO O KHONA HO IPONAHATSA LEFATSÈNG A ETSE SEO A SE RATANG (MATTHEW 18:20). MOEA O HALALELANG O RONNGOE KA LEBITSO LA LAE (JOHANNE 14:26). JOALE, LEBITSO LA HAE KE ALETARA E FANG NTATE MOLIMO TOKELO LE MATLA HO SEBETSA LEFATS'ENG LE LEHOLIMONG.

SENA SE RE JOETSA HORE LI ALETARA TSA MOTHEO LI PELI SELEKANENG SE SECHA E LENG MALI A MORENA JESU LE LEBITSO LA MORENA JESU. Mali a Morena Jesu a re reketse Ntate Molimo le ho re fa tokelo ea tsòohle tseo o leng tsa hae eleng bojalefa ba rona ho Kreste, ha lebitso la Morena Jesu lona le bonahantsa tsohle tseo e leng tsa rona ho Kreste. **Mali a Morena Jesu a re file tokelo (legal right) ha lebitso la Morena Jesu lona le tliša ponahatso ts'ebetsong (Operational right).** Mohlala ke ona: tsohle tseo Mali a hae a re fileng tsona ka tokelo, re li kopa ho ntate ka lebitso la hae ebile re tsamaea ho tsona ka lebitso la hae (Johanne 16:25)

SELEKANENG SE SECHA, LI ALETARA LI KA SHEJOA KA TSELA TSE TJENA HAPE 'ME LI SEMOEKA KAOFELA HA TSONA. SELEKANENG SE SECHA HA RE HAHE LI ALETARA KA MAJOE LE HO ETSA LIHLABELO TSA LIPHOOFOLO KHAFETSA JOALO KA SELEKANENG SA KHALE, SEHLABELO SA MORENA JESU SE PHETHAHALITSE TS'EBETSO EA LIHLABELO TSA LIPHOOFOLO. LI ALETARA TSA SELEKANE SE SECHA KE TSA MOEA 'ME LI KA SHEJOA KA LITSELA TSENA TSE LATELANG.

LI ALETARA E LE BALUMELI KA BO BONA.

Molumeli ka boeena e se e le aletara ka bo mong hobane ke ena ea fang Ntate Molimo tokelo ea ho sebetsa bophelong ba hae le lefatsheng. Hape ke ena ea kopanyang Ntate Molimo le lefatshe. Ka mantsoe a mang, molumeli ka boeena e se ele aletara a phelang. Le peterose oa cho ka ho 1 Peterose 2:5 hore re se rele majoe a phelang ho Kreste.

Baroma 12:1-3 e re re inehele ho Molimo re le lihlabelo tse phelang tse halalelang. Ka mantsoe a mang, maphelo a rona ke ona lihlabelo tse neheloang aletareng molemong oa ho khahlisa Ntate Molimo.

Lithoriso le lipolelo tsa rona tsa Ntate Molimo ka Jesu Kreste le tsona ke lihlabelo tse phelang tse matlafatsang aletara tsena tsa rona tsa moea Baheberu 13:15-17. Ha resa isa lihlabelo tsa liphoofole ho Ntate Molimo selekaneng se secha.

Matla a aletara a etsoa ke hore na Moea o Hlabeloang na ke ofe le hore na o matla hakae, le hore na ho fanoa ka sehlabelo sa mofuta

ofeng. Ka hona, balumeli ba inehetseng e le lihlabelo tse phelang ho Ntate Molimo ka Krete ba fetoha li aletara tse matla tseo Ntate Molimo a khonang ho sebetsa le ho iponahatsa ka tsona hobane balumeli ke lihlabelo tsa batho tse phelang, ba inehetseng ho jehova Molimo oo Matla oohle ho phetha thato eohle ea hae ka Jesu krete. Molumeli a inehetseng o etsa aletara e matla haholo e lokollang Ntate Molimo ho sebetsa ka matla le botlotlehi.

LI ALETARA E LE LIBAKA SELAKANENG SE SECHA.

Lialetara hape e kaba liabaka tseo Ntate Molimo a iponahantsang ka tsona joalo ka likerekeng tsa bo rona kapa li radiong kapa maqepheng a social media a lokollang Ntate Molimo ho sebetsa. Le tsena li ka bitsoa li aletara selekaneng se secha.

Aletara hape ekaba sebaka seo molumeli a rapellang ho sona le hoba le nako le Ntate Molimo ho sona. E kaba kamore ea hae, e kaba thaba eo a rapellang ho eona, ekaba sebaka se fe kapa se fe seo a bang le nako le Ntate Molimo ho Sona. Le sebaka sena seka bitsoa aletara. Sebaka Sena sa hau sa thapelo moo o bang lekunutung le Morena kapa kereke eo o e kenang kapa sealemoea kapa television eo e shebellang kapa leqhephe la social media e kaba aletara ea hau mme ekaba sona se tla lokolla matla le katleho le tsoelopele bophelong ba hau hobane li aletara tsa rona ke tsona tse re phahamisang bophelong ba nama.

HA RE HLOKE HO HABA LI ALETARA TSA MAJOE KAPA TSA LITSÈPE JOALO KA SELEKANENG SA KHALE

LI ALETARA TSE THEOANG HOLIMA LILEKANE TSE IKHETHILENG TSEO RE LI ETSANG LE JEHOVAH KA JESU KRESTE

Linako tse ling molumeli a ka etsa selekane sa hore o tlo sebelletsa Ntate Molimo ka boitelo boohle, kapa o tlo fana ka boitelo boohle kapa o tla etsetsa Ntate Molimo se seng se molemo. Tsena re li bitsa lilekane tsa rona tse ikhethileng (personal covenants). Lilekane tsena li phahamisa li aletara molemong oa rona semoeeng. Ka mantsoe a mang, ka lebaka la boinehelo le boitelo boo, o ka fumana hore hona le molemo kapa lehlohonolo le sa tloheng bophelong ba molumeli eno le bana ba hae le ba habo linako tse ling. Hona ho bolela hore aletara eno e phahamisitsoeng ke boitelo ba hae, e lokollotse Ntate Molimo ho etsa se seng se molemo se sa tloaelehang molumeling eno le ho ba habo ebile sena seka kenyetsetsa le ba pela hae le ha asa amane le bona.

BOPHELO BA MORA OA MOLIMO (BOPHELO BA BOINEHELO):

Joalo ka bara le barali ba Ntate Molimo, re phela bophelo ba boinehelo ho Ntate Molimo. Bophelo bona ke bophelo ba thapelo, lentsoe le boitimo. Morena Jesu ke mohlala oa rona o phethahetseng oa motho ea neng a phela bophelo ba boinehelo ha a le lefats'eng.

BOPHELO BA THAPELO:

Mangolo a latelang a senola bophelo ba Morena Jesu ba thapelo (Luka3:21, 4:42, 5:16, 6:12, 9:28-30, 11:1, 18:1, 21:37 le a mangolong a mang. Hona le mefuta e fapaneng ea thapelo, `me re tlo e sheba ka bo`ngoe:

Thapelo ea boinehelo (Luka 22:39-45): mona molumeli o nehela thato ea hae ho Ntate Molimo khafetsa ho phetha thato ea Ntate Molimo. **(2) Thapelo ea polelo (Liketso 4:24):** mona molumeli o bolela seo Ntate Molimo a leng sona **(3) Thapelo ea pako le boipolelo (1Johanne1:9):** mona molumeli o bolella Ntate Molimo moo a mo sitetsoeng teng ebile a kopa ts'oarelo le ho furalla liketso tseno tse sa lokang. **(4) Thapelo ea thoriso (1Timotia 2:1, Liketso 16:25-27):** mona molumeli o rorisana Ntate Molimo le ho mo leboha ka tseo a mo etselitseng tsona **(5) Thapelo ea teboho (Bakolose 4:2-3):** mona molumeli leboha Ntate Molimo ka tseo a mo etselitseng tsona le seo a leng sona bophelong ba hae. Thapelo ena e tsamaea le thoriso haholo. Thapelo ena ea teboho le thoriso li bula mamati a maholo, li kokobetsa lira tsa Ntate Molimo ka pele le ho re thusa lintoeng tsa rona ho hlola ka pele le ho re lokolla litlamong ka pelenyana haeba motho a li rapela ka kutloisiso le tsenolo. Li **kenyetsetsa le ho ananela seo Ntate Molimo a se entseng eleng ho sheba morao ho leboha ka tseo a li entseng khale.** Ho etsa tjena ho tla fana ka leseli la ho ea pele bophelong le ho bula mamati a bohlokoa. **(6) Thapelo ea khumamelo (Johanne4:24):** mona molumeli o hlomphele le ho khumamela Ntate Molimo ka baka la seo a leng sona **(7) Thapelo ea borapelli (1Timotia 2:1):** mona molumeli o ema sekheong ka thapelo pakeng tsa Ntate Molimo le batho, lichaba kapa maemo, `me o rapella hore thato ea Ntate Molimo e etsahale. **(8) Thapelo ea likopo (Baefese 6:18, Johanne 16:23):** Thapelong ena molumeli o etsa likopo tsa hae ho Ntate Molimo **(9) Thapelo ea kopano le tumellano (Mattheu 18:19-21):** mona balumeli ba babeli kapa ba bangata baa kopana, `me ba rapele ba lumellana ka thapelo **(10) Lipolelo tsa tumelo:** mona molumeli o etsa lipolelo tsa tumelo tse its'etlehleng holim'a bibe. Lebaka ke hobane seo Ntate Molimo a se buileng ka rona se bonahala bophelong ba rona ba nama ha re se buoa ka molomo ebile re nka likhato holim'a sona. **(11) Litaello tsa serena (Johanne 14:12):** mona molumeli o etsa litaello holim'a maemo a sa thabiseng kapa a sa tsamaeng le thato ea Ntate Molimo, `me e be o oa a fetola ka litaello tsa tumelo tse manganga. **(12) Thapelo ea ho thuisa/ thapelo ea khutso:** mona molumeli o oa thola bote`ng ba Ntate Molimo, `me e be o tlatsa keello ea hae ka Ntate Molimo le botle ba hae. Molumeli a ka bapala `mino oa khumamelo ka nako ena ha a batla. O tla mo thusa haholo ho shebana le Ntate Molimo **(13) Thapelo e boporofeta (prophetic prayer):** mona molumeli o rapela a senoleloa hore na a rapelle eng ke Moea O Halalelang, kapa a rapele se pelong ea Ntate Molimo ka susumetso ea Moea O Halalelang. **(14) Kopano le Moea O Halalelang (2Bakorinte 13:13):** mona molumeli o ba le kopano (fellowship) le Moea O Halalelang. O elelloa boteng ba hae le eena, `me o mo ts'oaro joalo ka

motsoalle oa hae oa hlooho ea khomo. **(15) Thapelo ea Ntoa (spiritual warfare):** mona ha se ho loants`a matemona, empa ke ho buoa lentsoe la Ntate Molimo holim'a maemo a sa thabiseng, kapa re rapela re ipapisitse le lentsoe la Ntate Molimo holim'a maemo a sa thabiseng, `me re le buoa ho fihlella re bona phethoho. Ha re buoa lentsoe ka melomo ea rona, le sebetsa joalo ka sabole e `nqa li peli. **(16) Ho rapela ha Moea O Halalelang (Baroma 8:26):** Mona Moea O Halalelang o oa rapela, a sebelisa molumeli. A ka rapella ena molumeli eno kapa a rapella batho ba bang kapa maemo a mang ka molumeli eno. Linako tse ling thapelo ena e ka utloahala e le mefehelo feela (groanings) kapa ea hlaha e le lipuo tse ling. **(17) Thapelo ea lipotso (prayer of enquiry):** Mona molumeli o botsa Ntate Molimo lipotso kapa seo a hlokang ho se tseba. Mohlala ke ha Davida a botsa Ntate Molimo hore na ee ntoeng le mehlala e meng e mengata bibeleng. Thapelo ena e bohlokoa haholo hobane linako tse ling Ntate Molimo o re emela hore re mobotse lipotso pele a ka re fa tsenolo, bohlae kapa tsela. Ithutse ho botsa moo o hlokang tlhakiso `me o tla fumana likarabo `me ha mamorao re tlo hlalosa hore na o fumana karabo kapa thato ea Ntate Molimo joang. **(18) Thapelo ea ho sebelletsa Morena (ministering to the lord) (Liketso 13:1-3):** Mona Molumeli ha a shebane le mathata, litsietsi kapa likopo kapa hona ho rapella, empa o ba le nako a shebane le botle le boholo ba Ntate Molimo haholo ka khumamelo le thoriso le ho mo tlotla le ho mo lebohela seo a leng sona.

HO RAPELA KA LIPUO KAPA MALEME A SELE: Ho rapela ka lipuo hase mofuta o mong oa thapelo joalo ka bo teboho le thoriso, empa ke boemo bo bong ba thapelo. Ke ho rapela ka meea ea rona e tsoetsoe labobeli (1Bakorinte 14:15). Ena ke eona tsela ea testamente e ncha bibeleng ea ho rapela. Mefuta ena e meng eohle ea thapelo e ka rapeloa ka lipuo, `me ke eona tsela e betere ea ho rapela. Molumeli o tlameha ho rapela ka lipuo haholo ho feta ka kelello. Ha o rapela ka lipuo, o ba le kopano le Ntate Molimo (1Bakorinte 14:2), o buoa liphiri tsa Ntate Molimo ka moea, e be li senoloa kelellong ea hau (1Bakorinte 14:2). U oa ikaha moeeng le ho hah tumelo ea hau (1Bakorinte 14:4, Jude 1:20). O rapela thato ea Ntate Molimo e phethahetseng.

Ha u rapela ka lipuo, ho ba le kopano le puisano le Ntate Molimo le ha ho ntso ho buoa lentsoe la hau feela. Hona ha ho bolele hore ke uena feela ea ntseng a buoa. O ntse o buoa le Ntate Molimo le eena o ntse a buoa le uena empa ho sebelisoa lentsoe le molomo oa hau. Hobale kopano (fellowship) e matla haholo pakeng tsa rona le Ntate Molimo ha re rapela ka lipuo. Ha o rapela ka lipuo haholo, o tla lula o tletse Moea O Halalelang, o tla khona ho sebetsa habonolo ka lineo tsa Moea O Halalelang, o tla khona ho utloa Ntate Molimo habobebe le tse ling tse ngata tse molemo li tla etsahala ka uena. Rapela haholo ka lipuo ho feta ka kelello. Hape o labelle hore Ntate Molimo a o fe neo ea ho hlalosa lipuo, `me ha o rapela ka tsona, linako tse ling o ka senoleloa hore na o ntse o rapella eng. Ha o rapela ka lipuo, o ngole fats'e seo o se senoleloang nakong eo o ntseng o rapela ka tsona. Hape o seke oa ts'oenyeha ka mantsoe a tsoang molomong oa hau, hore na o buoa ntho e ts'oanang kapa e fapaneng hobane puisano ea hau le Ntate Molimo e ka hare moeeng, mantsoe a hau e se e le qetello feela.

2.1) Lipuo le Boporofeta: Ha ontso o rapela ka lipuo, o itloaetse ho porofeta. Boporofeta bona bo sebetsa ka tsela e latelang: Ha o rapela ka lipuo o bua puo ea moea `me o bolela liphiri tsa Ntate Molimo ka moea `me ebe li senoha kelellong ea hau, empa joale lipuo li sebetsa semoeeng boholo, joale seno seo o se senoleloang moeeng oa hau ha ontso o rapela ka lipuo, otlameha hore o qale ho se porofeta. Ka mantsoe a mang o qale ho se bua ka sesotho kapa puo ea heno e utloahalang mme o se bitse se se etsahetse. Mohlala, mohlomong ha ontso rapela ka lipuo o qala ho bona pono kelellong ea hau ea katleho ea hau kapa mohlomong ea seo Ntate Molimo a batlang hore o se etse, ha o porofeta otlo qala ho phatlallatsa seno seo o se bontshoang se se se etsahetse ka tumelo. Mohlomong o bona lelapa leno le se le pholositse. Ha o porofeta, otlo re Ntate kea leboha hobane lelapa leso le pholositse hona Joale.. **Mona retlo sheba lipuo le boporofeta tse shebaneng le rona ka kotlolloho hobane mefuta e meng rese re e hlalositse thutong ea bara ba Molimo.**

Lipuo li fehla matla a mollo (Dunamis) a ka hare ho meea ea rona, ha boporofeta bona bo lokolla matla ano ebile bo supisa (direct) matla ano mosebetsing kapa maamong a itseng.

Lintlha tse bohlokoa nakong ea boporofeta: A) Nakong eo u rapelang ka lipuo o fehlehile joalo, ebe mohlomong o fumana ts'enolo ea seo Ntate molimo a batlang ho se etsa kapa seo u ntseng u se rapella ka lipuo, u hlo porofete ka matla ka eona nako eno moea oa hau o ntso o fehlehile hobane mantsoe a boporofeta a buuang ka nako eno a tla tsoa ka matla a fetang ao u a buang ha moea oa hau o sa fehleha joalo. **B)** Ha u porofeta ha se hore u tlameha ho lula u bua mantsoe a mangata, empa se bohlokoa ke ho bua mantsoe a tumelo ka nakong eo u fehlieng mollo oa Moea O Halalelang ka nako ea lipuo. Mohlomong u ka pheta pheta lentsoe le leng kapa a mabeli makhetlo ho fihlella u utloa hore seno se etsahetse semoeeng `me se tla bonahala nameng. O tseba sena ka ho utloa khotso le phomolo moeeng oa hau. Se bohlokoa ke hore feela o latelle seo o utloang moea o o etella pele ho se etsa, ka nako ena kelello eseka ea kena tseleng ea hau. **C)** ha u utloa hore u nke likhato tsa tumelo mohlomong u foka letsoho e le ho lia marako kapa bothata bo itseng kapa o hula letsoho ele ho hula se seng lefatsheng la semoea ho li tliša nameng, etsa joalo ka tumelo mme o phethe khato eno ha ho hloka hahala ho fihlella u utloa hore ho phethahetse Moeeng oa hau ka ho utloa phomolo le khotso. Ha feela o so utloe phomolo moeeng o nno o phehelle ka boporofeta le likhato le lipuo hobane ke hona hontso he etsahala semoeeng mme phehello ea hau etla tliša phethahalo `me ha u fihletse phethahalo otlaba le phomolo moeeng oa hau. **D)** Boporofeta bona boka kenyetsetsa liphatlallatso, likhato tsa tumelo, tlhaloso ea Maleme joalo joalo, se bohlokoa ke hore o lumelle moea oa hau hore o phuthullohe joalo ka ha o rapela ka lipuo feela. **E)** Boporofeta nako tse ling bo bitsa lintho tseo o batlang ho li bona ka kotlolloho le ka ho li toba (be specific) joalo ka Ezekile ha a hloka hore moea o kene litopong o ile a bitsa moea ho tsoa n'geng tse nne tsa lefatse. Le uena nako tse ling ha o porofeta ho molemo ho bitsa lintho tseo ka kotlolloho tseo o batlang ho li bona. **Bala Ezekiel 37:1-14 otlo o utloisise matla a boporofeta hantle. Hare porofeta masapo a omelletseeng aa kopana semoeeng, hare tsoela pele mesifa le nama lia hlaha li koele masapo a omelletseeng, ha ntse re tsoele pele moea o oa kena mme ebe bophelo bo ba teng, mona ke pono e bontshang matla a boporofeta a ho fetola maemo a rona.**

RE RAPELA JOANG:

(1) Re etsa thapelo ea likopo ho Ntate ka lebitso la Morena Jesu ka thuso ea Moea O Halalelang (Johanne 16:23-24): Ha re rapela ha re re “Molimo Ntate, Mora le Moea O Halalelang”, empa re rapela ho Ntate ka lebitso la Jesu Krete. Hape ha re rapele ka mabitso a mararo, eleng hore ka lebitso la Ntate, le la Mora le la Moea O Halalelang, empa re rapela ka lebitso la Morena Jesu Krete. Hape ha re rapele ka Jesu Krete (through Jesus Christ) kapa ka lebaka la Krete (for Jesus’ sake) empa re rapela ka lebitso la hae (In Jesus’ name). **(2) Khumamelo, thoriso le teboho li ka ea ho Ntate, Mora le Moea O Halalelang.**

(3) Re rapela ka tumelo (Mareka 11: 24): ha re rapela, re tlameha hore re lumele hore re se re amohetse karabo le pele re e bona ka mahlo a nama, `me ebe re se re leboha ka eona feela. **(4) Re rapela ka lentsoe (1Johanne 5:14):** re rapela re its’etlehile holima lentsoe la Ntate Molimo, `me linako tse ling re rapele litemana li le joalo. Mohlala: Ntate kea leboha hobane ka maqeba a Morena Jesu ke folisitsoe (1Peter2:24) **(5) Re rapela ka leqophe (Luka 18:1):** Re hloka hoba leqophe thapelong hobane linako tse ling ho ka nka nako hore likarabo tsa rona li tlohe boemong ba moea ho tla iponahatsa nameng. Leqophe la rona le tebohong le likhatong tsa tumelo, e seng likopong. Linako tse ling ho hloka hore re qophelle le ho phehella thapelong hofihlella re utloa khotso meeng ea rona ka seo re se rapellang. Khotso ena ke sesupo sa hore seo re se rapellang se etsahetse moeeng, `me se tla bonahala nameng. Ho phehella tjena hase ho hloka tumelo, empa ke ho bonahatsa tumelo e phethahetseng. Tsela eena ea ho rapela e bonahala haholo thapelong ea borapelli (intercession). **(6) Re rapela ka mamello (Baheberu 6:12).** Re hloka mamello thapelong hobane ka linako tse ling ha re rapetse, re hloka ho emela nako ea Ntate Molimo ea ho re fa seo re mo kopileng sona. Linako tse ling ho ka nka nako hore karabo ea rona e bonahale boemong ba nama. Ntate Molimo o oa araba, empa ke boikarabello ba rona ho amohela karabo eno ka tumelo le ho e bonahatsa boemong ba nama

(7) Re rapela ka sebete: (Baheberu 4:16). Re hloka ho tseba boemo ba rona ba hore re bara ba Molimo, `me re boue le Ntate Molimo ka sebete, re tseba hore ha re kopa o oa re araba.

LITOKELO TSA RONA THAPELONG: Re hloka ho rapela ka kuloisiso ea hore re bara ba Ntate Molimo ka sebele le hore re na le tokelo ea ho amohela tsohle tsa hae hobane re bana ba hae ka sebele. (Johanne 16:23-24). Ha re ea tlameha ho rapela joalo ka batho ba sa tsebeng Ntate Molimo.

BOEMO THAPELONG: Ha ho na molao o bonts’ang hore na re tlameha ho rapela joang. O ka lula, o ka ema, o ka khumama, o ka paqama, o ka tsamaea, se bohlokoa ke hore o etse seo u utloang o phomotse hamonate ha u se etsa. **Mmino thapelong:** O ka letsa `mino oa thoriso kapa khumamelo ka nako ea hau ea thapelo ha u rata. `Mino o tla o thusa ho shebana le Ntate Molimo habobebe. Ho phahamisa matsoho thapelong ke sesupo sa ho hlomphe Ntate Molimo le ho mo phahamisa. (1Timotia 2:8). O ka rapela o butse kapa o koetse mahlo, re koalo mahlo e le khato ea tumelo ea ho bonts’a hore re shebane le Ntate Molimo.

TS’OARELO THAPELONG: (Mareka 11:24): Re tlameha ho ts’oarella ba bang joalo ka ha Ntate Molimo le eena a re ts’oaretse. Re ke ke ra amohela letho ho tsoa ho Ntate Molimo ha re sa ts’oarele ba bang, ebile le rona re ke ke ra ts’oareloa.

THAPELO EA MORENA: Thapelo ea Morena e hlahang ka ho (Matteu 6:9-14) ea Ntate oa rona ea maholimong, ke thapelo eo Morena Jesu a ileng a e hlahisa nakong eo a ntseng a le lefats’eng. Empa thapelo ena ke ea selekane sa khale. Ke nakong eo Morena Jesu a ntseng a lokisetsa selekane se secha. Re ke ke ra e rapela ele joalo seleaneng se secha, empa re ka e sebelisa e le mohlala oa hore thapelo ea rona e ka kenyelletsa eng. Mohlala, thapelo ena e kentse thoriso, likopo, pako le ts’oarelo joalojoalo. Lebaka leo ke reng re ke ke ra e sebelisa ele joalo seleaneng se secha, ke hobane thapelong ena, Morena Jesu o re `muso oa Ntate otle lefats’eng, athe seleaneng sena se secha `muso oa Ntate o se o le teng, ‘me o ka hare ho molumeli. Re hloka ho rapela ka kutloisiso ea seo re leng sona le seo re nang le sona seleaneng sena se secha. **Thapelo ea Morena ea Selekane se secha ke ena e ka ho Johanne 17:1-26. E senola seo re se fuoeng seleaneng se secha ka ho lumela ho Krete, le seo Ntate a leng sona ho rona.**

Melemo e akaretsang ea thapelo (1) Thapelo e thusa hore thato ea Ntate Molimo e etsahale lefats’eng joalo ka ha e etsoa leholimong. **(2)** Thapelo e thibela merero ea satane le ho etsa hore e se ke ea atleha. **(3)** E lokolla Ntate Molimo le manyeloi ho sebetsa ha bobebe. Mohlala ke oa Liketso 12 ha Peterose a lokolloa teronkong ka mohlolo ka lebaka la thapelo ena. **(4)** E lokolla mahlohonolo a Ntate Molimo le mohau oa hae (favor) ho sebetsa molemong oa rona.

(5) Ho ea ka Jakobo 5 thapelo e etsa hore matla a mangata a be teng molemong oa rona, ebe joale ha re sebetsa ka tumelo re lokolla matla ana a tlisitsoeng ke thapelo.

(6) Thapelo e bolaea bo rona, e leng ho ipatla le boikhohomoso le mekhoe e mebe eo e bang ne re na le eona. Ha re ntse re rapela re shebane le Morena re fetoha ho ts’oana le eena le haeba re sa elleloe ka nako eno, empa re tla qetella re bona hore re se re fetohile ha nako entse e ea. Khathe nako tse ling re tla hle re bone hang hang mekhoe e meng hore re fetohile. Sena se ka etsahala le haeba res a rapelle mekhoe eno ea rona hobane hoba boteng ba Ntate Molimo feela hoa re fetola. **Thapelo e na le melemo e meng e mengata haholo.**

(6) Thapelo ea thoriso le teboho le kananelo li lokolla Ntate Molimo ho sebetsa ka matla a maholo haholo hape ka boemo bo phahameng molemong oa rona joalo ka ha a lokolla Paulosi le Silase teronkong ka matla a tshabehang, ha a hlolela Israele le morena Johosaphat Ntoa basa phahamisa le sabole, le mehlala e meng e mengata bibeleng. Ke ka hona bibe e reng nako tsohle ha re etsa thapelo, thapelo ea rona e tsamae le teboho le thoriso ka linako

tsohle le ho ananela tseo a seng a li entse (Bafilipi 4:6-7).

- (7) Ha re rapela, re fumana leseli, eleng tsebo ea hore na re nke tsela e fe hape na re ka tsoa joang boemong bo tetebebsang joalo joalo, re fumana tsela (direction), re fumana likhokahano tsa bohlokoa (divine connections), re fumana mohau (favour), maemo a fetoha molemong oa rona le mamati a molemo a buleha molemong oa rona. Ka kakaretso rekare thato ea Ntate Molimo e ntle e ea phethahala maphelong a rona.

Haeba re hloka ho fumana thato le tsela ea Ntate Molimo ka boemo bo bong , mohlomong re tlameha ho nka qeto e kholo ea bophelo ba rona mme re hloka ho utloa maikutlo a ntate Molimo le qeto ea hae , re ka rapela ra mo botsa na maikutlo a hae ke a fe ka taba eno, ra kopa tataiso le leseli eaba re etsa sena se Latelang ho fumana thato ea hae (Matthew 7:7)

- 1) Kopa Ntate Molimo ka thapelo ho tseba thato ea hae boemong bono. 2) O be mahareng (be neutral):** o seke oa lumella maikutlo a hau ho o nkela qeto. O re Ntate soohle seo eleng thato ea hau ke tla se amohela. Ka nako eno eo o ntseng o eme, o eme o rorisa, o rapela o leboha hape o sa tletlebe. Hape o be le mamello **3) Imamele ka hare moeeng:** oa hau ka mora hore o be bohareng. O ikutloe hore na o tla le tabatabelo ea bomolimo (divine desire), Ntate Molimo hangata ha a batla hore re etse ntho, o re fa tabatabelo ea ho e etsa. Joale haeba o rapetse, ole bohareng (neutral) ebe o utloa o ba le tabatabelo e matla, e kaba sesupo sa bobeli se pakang hore ke thato ea Ntate Molimo. Empa le ha hole joalo, ho ntse ho hlakahlala mapaki a mang hobane nako tse ling le litabatabelo tsa rona tsa botho li ka re thetsa. **4) Ahlola tabatabelo eno ka Mangolo (scriptural screening).** Sheba na tabatabelo eno ha e khahlanong le lentsoe la Ntate Molimo, haholo testamente e ncha, hobane Ntate Molimo a keke a bua se khahlanong le lentsoe la hae. **5) Sesupo ka maemo;** haeba e le thato ea Ntate Molimo, o kope hore a o fe sesupo ka maemo, mohlomong a bule lemati kapa a etse hohang e kaba khokahano (connection) kapa se seng se supang hore o ananela boemo bono. **6) Nako ea bomolimo (divine timing);** ha e le nako ea Ntate Molimo ea hore seno se etsahale, o tla utloa litholoana tsa moea li paka, haholo khotso le thabo le sebete. Ha e sobe nako, o tla utloa osa phomola moeeng ebile o hloka khotso le hoja o khotsoe hore seno ke thato ea Ntate Molimo. Hang ha o fumane mapaki ana kaofela a mahlano, joale o mathe ka tumelo e felelletseng le sebete ho etsa seno seo o lumelang hore ke thato ea Ntate Molimo. O se ke oa tsotella maemo ka ntle hobane ha e le thato ea Ntate Molimo, soohle se hloka halang ho phetha morero ono se tla teng.

Haeba seo o neng o se hloka ke tsela (direction), etla tla ekaba ka pono, Toro, boporofeta kapa ka tsela e ngoe joalo ka t'senolo kapa tsebo joalo joalo. Empa le hole joalo, Ntate Molimo o etella motho pele (leads us), ha a qobelle motho ho etsa ntho. Ha motho ana le maikutlo a ho qobelloa, a sena boikhethele ebile a ts'osoa ka bokuli kapa lefu ha a sa etse seno, eebe e le satane a mo qobellang a ikhakahantse joalo ka Moea o Halalelang. Le ha Ntate Molimo a ka re susumetsa ka matla ho etsa thato ea hae, a keke a re qobella empa o tla re etella pele ka Khotso le sebete le lineo tsa Moea o Halalelang.

7) Tsela ea ho etsa seno (divine strategy): Ha Ntate Molimo a o lokollotse ho etsa seno seo ebang o no hloka ho se etsa, kopa tsela ea ho se etsa ebile o ntso hoopla hore linako tse ling a ka o senolela tsela e sa tloaelehang joalo ka ha anare Iseraele e potollohe marako a Jericho ha supa. Uena beha tsela eo a tla e senola tsèbetsong.

LEKUNUTUNG LE MORENA (Matteu 6:5-7)

Morena Jesu o re ruta hore molumeli e mong le e mong o tlameha ho ba le nako letsatsi le letsatsi moo a bang mong le Morena lekunutung (secret place). **Re u kothalletsa ho rapela hora bonyane ho ea holimo ka letsatsi.**

Lekunutung mona u ka rapela mefuta ena ea lithapelo eo re buileng ka eona pele. Empa boholo ba thapelo ea hau e be ka moea e leng ka lipuo le boporofeta. Mona hee ke moo u joetsang Morena tsohle le tse sa u lulang hantle.

Lintlha tsa bohlokoa nakong ea lekunutu le Morena.

1) Fumana sebaka seo u khonang ho ba mong, se khutsitseng se lekunutu. Ekaba phaphusi, kamore, thaba kapa hohle moo u khonang ho ba le Morena u le mong. **(2)** 'Mino o bohlokoa nakong ena. Letsa 'mino oa thoriso le khumamelo, o tla u thusa ho shebana le Morena habonolo. **(3)** E ba le buka le pene kapa fono moo u tla ngola tseo u li senoleloang ka nako ena. **(4)** Nakong ena Ntate Molimo o fana ka tataiso le matlafatso le lits'enolo. Joale ngola tseo u li fuoeng. **(5)** Ena ke nako ea hore u bulehe pela Morena, u mo rorise, u mo khumamele, u rapelle ba bang ho ea ka tataiso ea Moea O Halalelang. Empa hape ke nako ea pako ena le ea ho ipolela libe. Ke nako ea ho joetsa Ntate Molimo mefokolo eohle ea hau. Nako ea ho ithela pela hae u atamele terone ea mohau ka sebete. Ke nako ea ho lla ho eena ha u hlokoletse, empa u etse bonnete ba hore bohlokoang ba hau ha u qose Ntate Molimo ho hang. **(6) Hape o etse thapelo ea ho sebelletsa Morena (ministering to the Lord Haholo nakong ena).**

NAKO EA RETE RETE (retreat); Linako tse ling molumeli a iphe nako e le letsatsi, matsatsi, beke kapa lihora a arohane le batho a ikoalletse lekunutung le Morena. Nako ena e bitsoa ea rete rete. Ka nako ena a itekole, a atamele Morena ka boikokobetso a kope thuso ho eena moo a fokolang kapa a hloka thuso. Molumeli oa e hloka nako ena. E molemo haholo leetong la rona le Morena. Nako ea rete rete molumeli a ka e nka a le mong, e le lelapa kapa e le balumeli ba bangata.

BOPHELO BA LENTSOE (Bakolose3:16, Joshua 1:8):

Molumeli o tlameha ho ba le bophelo ba ho thuisa lentsoe khafetsa. A ke eke a re o balile bible ha `ngoe joale o qetile. O tlameha ho ba le nako moo a leng mong, `me a bale bible ka boitelo bohle. A itloaetse ho buoa a mang ka molomo ka ho a etsa lipolelo tsa tumelo. A qete bible khafetsa ka liphetolelo tse fapaneng. Empa haeba a so ka a qeta testamente e ncha, a qale ka eona, `me

a e qete ka makhetlo khetlo. Ho sehella litemana ka mebala e fapaneng ho ka thusa haholo joalo ka ha ke hlalositse thutong ea bara ba Molimo. Ho tloha mona, a bale libuka tsa batho ba tsamaeang le Ntate Molimo ka katamelole. Empa a se ke a koenya lithuto tsohle, a mpa a li ahlole pele.

HO KOPANNGOA HA BIBELE

Bibele e entsoe ka libuka le Mangolo a ngotsoeng ke bangoli ba ka bang 40 , ba bang ene ele marena, ba bang ele lihoai, ba bang ele baporofeta ba bang ele ba babusi joalo joalo, mme ho nkile lilemo tse ka bang 1500 mangolo le libuka tsena ntse li ngoloa (It was written in a period of 1500 years). Eaba mangolo le libuka tsena lia kopanngoa li etsoa buka e le ngoe. Bibele ke lentsoe la Ntate Molimo le ngotsoeng bukeng molemong oa rona 2 Timotia 3:16-17. Bibele ena le Libuka tse 66. Tse 39 seleaneng sa Khale le tse 27 Testamenteng e ncha.

BOPHELO BA BOITIMO (Mattheu9:14-15):

Morena Jesu o ne a re barutuo ba hae ba tla itima ha a tlohile hobona hobane joale ba se ba tla mo tseba le ho sebetsa le eena ka meea ea bona e tsoetsoeng labobeli hape le eena o tlabana sa a sebetsa ka Moea O Halalelang. Joale boitimo bo re thusa ho elelloa le ho tsamaea le Moea O Halalelang habonolo. Boitimo ke ho itima lintho tseo e leng karolo ea bophelo ba rona ba nama molemong oa boinehelo ho Ntate Molimo. Boitimo ha bo fetole Ntate Molimo, empa bo ka thusa molumeli ho ba boemong bo nepahetseng ba moea hore a be kutloanong e matla le Ntate Molimo. **Boitimo bo lula bo tsamaea le thapelo le boinehelo ho Ntate Molimo. Boitimo bo ka thusa molumeli ka tsela e latelang: (1)** Ho phahamisa boemo ba hae ba moea **(2)** Ho beha nama tlas'a taolo **(3)** Ho lokolla matla a ka hare ho meea ea rona ka botlalo hoo re ka khonang ho fetola maemo oohle ao re hlokang ho a fetola (Mareka 9:28-29) **(4)** Boitimo ha bo re fe matla, empa bo re thusa ho phahamisa boemo ba rona ba moea, 'me ha boemo ba rona ba moea bo phahame, re ka khona ho lokolla matla a Moea O Halalelang a ka ho rona ka katleho. **(5)** Boitimo bo ka ba le melemo ea bophelo bo botle (good health) ka tsela ea hore ha re nka nako re noa metsi a hloekileng resaje, 'mele oka khona ho itlhoekisa kapelenyana habobebe.

Molumeli a ka itima ka mabaka a fe? (1) Taba ea boitimo e pakeng tsa motho le Ntate Molimo, molumeli a ka itima ka mabaka a fe kapa a fe ao a a khethang. E kaba ho matlafatsa kopano ea hae le Ntate Molimo, e kaba ho rapella ntho e itseng **(2)** Balumeli ba ka itima e le sehlopha, 'me ba rapela thapelo ea tumellano, kapa ba ka itima e le lelapa, metsoalle joalo joalo.

Mefuta ea boitimo: Boitimo bo senang lijo le metsi, boitimo bo nang le ho noa metsi feela, boitimo ba ho ja litholoana feela, ho tloha mona, molumeli a ka iketsetsa mefuta ea hae ea boitimo le hore na o itima nako e kae, taba ena e pakeng tsa hae le Ntate Molimo. Mohlala, a ka itima boroko, letsoai, nama joalo joalo. Empa o tlameha ho itima ntho e mo amang. Molumeli o tlameha ho sebelisa bohlole ha a itima, a se ke a itima lijo nako e telele a qala feela, hape a se ke a thahasella ho itima a sa noe metsi, haholo haeba a itima nako e telele. Ho molemo hore a tsebise baetapele ba hae ha a batla ho itima nako e telele haholo haeba a le mocha tumelong.

Tsela ea ho itima: (Mattheu 6:16-19): Nako ea boitimo e lekunutu pakeng tsa motho le Ntate Molimo. Molumeli o tlameha ho hlapa hantle, a ikame, a se ke a bonahala hore o itimme. Empa ha ho ka etsahala hore batho ba tsebe hore o itimme, ha ho bolele hore ho se ho senyehile. Seo Ntate Molimo a sa se batleng ke hore motho a ikhohomose ka hore o phahametse ba bang moeeng. Ntate Molimo o batla hore re phele bophelo ba boitimo. Re se ke ra chakela boitimo ka mora nako e telele, empa re lule re behile nama tlas'a taolo. Ho ka ba molemo ho itima lijo bonyane ha 'ngoe ka beke, mohlomong letsatsi kapa karolo e itseng ea letsatsi, e be joale o itima ha Moea O Halalelang a o susumetsa. **Haele thapelo, lentsoe le boitimo, li tsamaea 'moho. Ke bona boinehelo ba rona testamenteng e ncha.**

AGAPE

Thutong ena re tlo bua ka lerato la Ntate Molimo le bitsoang agape. Empa pele re bua ka agape, re tlo bua ka mefuta e meng ea lerato. (mabitso ana ke a sekherike a tlisitsoeng sekhoeng a hlalosing mefuta ena ea lerato).

STORGE: Mona ke lerato le bang teng pakeng tsa lelapa. Mohlala ke pakeng tsa motsoali le ngoana kapa bana le batsoali joalo joalo.

PHILIA: Mona ke lerato le bang teng pakeng tsa bakhotsi, le baamani (relatives), le baena.

PHILAUTIA: Mona ke lerato leo motho a ithatang ka lona. (self love).

EROS: Mona ke lerato le bang teng pakeng tsa baratani kapa banyalani. Ke lerato le kenyelletsang senama (physical love, romantic and sexual love).

AGAPE: Agape ke lerato la bomolimo le senang liphehelo 'me thutong ena re tlo shebana le mofuta ona oa lerato.

Balumeli bohle ba fuoe agape ho tloha ha ba tsoaloa labobeli, 'me e ba karolo ea semelo sa bona sa moea e leng sa bomolimo se teng meeng ea bona (Baroma 5:5). Ke karolo ea tholoana tsa moea ka hare ho bona. Joale seo ba tlamehang ho se etsa feela ke ho bona hore lerato lena lea hola 'me lea matlafala, 'me sena se etsahala ha ba khetha ho tsamaea ka lerato le ho le beha ts'ebetsong.

Ho ea ka 1 bakorinte 13:1-4, rea bona hore ho Ntate Molimo, agape ke eona ea bohlokoa ho feta lintho tsohle. 'Musong oa hae ho busa tumelo e sebetse ka lerato (Bakhalata 5:6).

SEMELO SA AGAPE

(1 Bakorinte 13:1-13)

(1) Agape ke lerato leo Ntate Molimo ka bo eena a le sebelisang ebile a leng lona. **(2) Agape ea mamella:** motho ea tsamaeang ka agape o khona ho mamella ba bang, ho mamella maemo le ho mamella tsohle. **(3) Agape e mosa:** motho ea tsamaeang ka agape o mosa ebile o qenehela ba bang. **(4) Agape ha e na mohono e leng mona:** motho ea tsamaeang ka agape ha a monele ba bang empa o batla tsoelopele ea bona pele ho ea hae (Bafilipi 2:3). **(5) Agape ha e na boikakaso le boikhohomoso:** motho ea tsamaeang ka agape ha a ikhohomose empa o batla hore ba bang ba hlhelle, ba atlehe le bona. **(6) Agape ha e na mekhoha e mebe:** motho ea tsamaeang ka agape ha a its'oara hampe ebile ha a etse lintho ka tsela e sa lokang moo a shebileng feela hore a atlehe. Ha a na lipuo tse mpe tse tletseng lehloeo le boikhohomoso. **(7) Agape ha e ikhopolele (ha e selfish):** motho ea tsamaeang ka agape ha a inahanele a le mong empa o batla tsoelopele le katleho ea batho ba bang. **(8) Agape ha e halefe:** motho ea tsamaeang ka agape ha a halefe ka tsela ea nama ebile ha a lumelle khalefo ho mo laola, ebile ha a halefe nako e telele le ka khalefo e lokileng ea moea (Baefese 4:26-27) **(9) Agape ha e na lisuoa:** motho ea tsamaeang ka agape ha a ts'oare batho ka pelo ebile ha a be le liqabang le batho. **(10) Agape ha e thabele bokhopo:** motho ea tsamaeang ka agape o mosa 'me ha a thabele bokhopo le ho hlokelo batho toka (injustice). **(11) Agape e thabela 'nete:** motho ea tsamaeang ka agape o thabela toka le 'nete, e seng hore eena kapa ba bang ba phele tlasa thetso. A ke ke a thetsa ba bang molemong oa hae.

(12) Agape e iphapanyetsa tsohle: motho ea tsamaeang ka agape o khona ho iphapanyetsa mefokolo ea ba bang moo a lumelang hore ba tla loka le bona. E iphapanyetsa le maemo a seng hantle ebe e sheba holima lentsoe la Ntate Molimo, tumelo ea hore tsohle li tla loka ho ea ka ts'oanelo. Ka mantsoe a mang motho ea tsamaeang ka agape ha a lule a bona kapa a supa batho liphoso ka linako tsohle. **(13) Agape e lumela tsohle:** motho ea tsamaeang ka agape o lumela seo Ntate Molimo a se buang, hape o lumela hore le batho ba liphoso li ngata le bona ba ka loka ba fetoha seo Ntate Molimo a batlang hore ba be sona.

(14) Agape e ts'epa tsohle: motho ea tsamaeang ka agape o na le ts'epo e tiileng ea hore ba bang ba tla fetoha seo Ntate Molimo a batlang hore ba be sona. E ts'epa hore bophelo bo tla etsahala ho ea ka thato ea Ntate Molimo likarolong tsohle. Le maemong a sa ts'epising, motho oa agape ha a lahleheloe ke ts'epo (hopelessness) empa o lula a tletse ts'epo hobane a tseba bots'epehi ba Ntate Molimo.

(15) Agape e apesa moroalo oa libe (1 Peterose 4:8): motho ea tsamaeang ka agape o apesa ba bang le hara liphoso tsa bona. Ha a ba tsolise ka lits'ebo kapa ka ho ba ahlola le ho ba tsoa, empa o ba thusa ka lerato, ka boikokobetso lekunutung.

Agape e keke ea fela leka mohla. Lineo, boporofeta, maleme a sele a tla khaotsa. Empa ha e le agape eona, e tla lula e le teng. Agape ke phethahalo.

Motho ea holileng tumelong o bonoa ka ho tsamaea ka agape, e seng ka lineo tsa Moea o Halalelang le ha li le bohlokoa le tsona. Ha e le tumelo, ts'epo le agape, li tla lula li le teng, empa e kholo ho tsona ke agape.

Mesebetsi ea Agape.

(1) Agape e ea fana (Johanne 3:16): motho ea tsamaeang ka agape ke motho ea fanang hobane lerato ka semelo lea fana. Re bona ka Ntate Molimo ea re fileng mora oa hae ea inotsi ho re shoela sefapanong.

(2) Agape e fana ka sehlabelo le ka boitelo: Lerato lea fana empa lerato le phethahetseng le fana ka boitelo le ka sehlabelo. Sena re se bona ka Ntate Molimo ea ileng a fana ka mora oa hae ka lebaka la rona, le Morena Jesu ea ileng a iketsa sehlabelo sa libe tsa rona hobane a re rata (Baroma 8:31-33)

(3) Agape e re susumetsa ho mamela Morena Jesu le ho etsa thato ea hae (Johanne 14:15-31).

(4) Agape e re susumetsa ho rata ba bang le ho ba thusa (1Johanne 3:17).

(5) Agape ke eona susumetso ea rona ea ho rata le ho sebelletsa Ntate Molimo le ba bang.

(6) Tsela ea ho bonts'a Ntate Molimo hore re mo rata ka agape ke ka ho rata ba bang (1Johanne 4:20).

(7) Agape e re fa sebete hobane moo lerato le phethahetseng ha hona letsoalo la letho (1 Johanne 4:18). Lerato le phethahetseng le leleka letsoalo. Le mohla re emang ka pela Morena Jesu re tla ba sebete haeba re ne re tsamaea ka agape (1 Johanne 4:16-17).

(8) Agape e ea ts'oarela le ho leballa: motho ea tsamaeang ka agape o ts'oarela le ho leballa ba bang ha bobebe.

TAELO EA MORENA JESU SELEKANENG SE SECHA.

Taelo ea Pele ea Morena Jesu selekaneng se secha ke hore re rate Molimo oa rona ka moea, pelo, mehopolo le ka matla 'ohle a rona.

(1) Ho mo rata ka moea oa rona ke ho mo rata ka botebo bohle ba rona, 'me re iphe eena feela e seng melimo e meng.

(2) Ho mo rata ka pelo eohle ea rona ke ho mo rata ka maikutlo le mehopolo eohle ea rona. Re mo hlanyetse hape re mo thabele le tsohle tsa hae ka maikutlo a rona.

(3) Ho mo rata ka matla a rona ke ho mo rata le ho mo fa tsohle tsa matla a rona. E leng nako, chelete, lisebelisoa le bosebelletsi ba rona ka boitelo bohle.

Johanne 13:34-35. Taelo ea Morena Jesu ea bobeli selekaneng se secha ke hore re rataneng joalo ka ha a re ratile. Hape re rate ba habo rona joalo ka ha re ithata. Ha re rata ba habo rona tjena, re ke ke ra etsa seo re ke keng ra batla ba re etse sona. Hape re tla ba ts'oara ka moo re ka ratang ba re ts'oare ka teng.

Agape e phethahatsa molao oa Ntate Molimo kaofela (Baroma 13:8-10)

Re tsamaea ka Agape joang le ho e holisa maphelong a rona.

1) Tsebo: tseba hore agape ke karolo ea moea oa hau, ha se ntho eo u tlamehang ho e batla kante kapa hole hobane e ka hare ho uena.

2) Khetha ho tsamaea ka agape.

3) Tsamaea ka agape ka tumelo hobane Ntate Molimo o re laetse hore re ratane. Taba ena ha e re na re ikutloa joang.

4) E ba le nako le Ntate Molimo: ha re ba le nako e ngata le eena re qetella re bona lintho joalo ka eena, re ikutloa joalo ka eena, ebile re tsamaea joalo ka eena ka lerato le ka tumelo.

Likamano tsa rona le Ntate Molimo, le balekane ba rona le bana ba borona li tlameha ho qala ka agape pele ho marato a mang.

``TSEPO (Hope) (1Bakorinte 13:13)

Bibele e re ha e le tumelo, ts`epo le lerato, li tla nne li be teng ka ho safeleng . Re se re buile ka tumelo le lerato, joale re tlo ruta ka ts`epo mona, hore ke eng le melemo ea ona.

T`sepo ke ngoana oa bo tumelo, empa ele hore tumelo eona e sebetsa bokhaleng le bo joaleng, ha ts`epo eona e shebile tse tlang ka moso.

Ts`epo ke hoba le bonnete le ho kholiseha ka botlalo hore lintho tsohle tseo Ntate Molimo a reng o tla re etsetsa ka moso, li tla etsahala ele kannete. Ts`epo e its`etlihile holima lentsoe le Ntate Molimo le semelo sa hae sa bots`epahi. Mohlala ke ona. Ke oa Ntate ea ts`episang ngoana oa hae hore batlo ea teropong hosane a lo morekela liaparo le li toy. Ngoana eno oa thaba hobane o lumetse lentsoe la Ntate oa hae, ka hona o tla thaba a phomole (sena ke tumelo). Empa ona le ts`epo ea hore haele hosane (bokamoso), Ntate oa hae o tla feela a mo ise shopong hoea reka tseo a mo ts`episitseng tsona. Sena ke ts`epo.

Re tlo sheba mangolo a buang ka ts`epo hona joale re etse mehlala ka eona.

- 1) Morena Jesu o tla tla hape a tlo re lata (Ts`enolo 1:7)
- 2) `Mele ea rona e tla tsosoa bafung (1 Bakorinte 15:35-58)
- 3) `Mele ea rona etla fetoloa ho ts`oana le oa Morena Jesu, `me retla lokolloa sebeng ka phethahalo le `meleng ea rona (baroma 8:23, Bafilipi 3:21).
- 4) Tsatsi le leng re tla ba le Morena ka ho sa feleng (1 Batesalonika 4:17).
- 5) Re tla kopana le ba habo rona ba seng ba hlokahetse.
- 6) Jeremiah 29:11-14 Ntate Molimo o re merero ea hae ke ho re fa bokamoso bo chabileng le ho re fa ts`epo le katleho lefats`eng lena.

Hona le lintho tse ling tse ngata tseo re li ts'episitsoeng lentsoeng la Ntate Molimo tse tla re etsahalla ka moso.

Mangolo ana kaofela a bua ka bokamoso ba rona balumeli bo chabileng. Ha hona letho leo reka le etsang ka taba tsena tse tlang ho etsahala, hore re leke hore li etsahale ka pelenyana, empa rena le ts'epo ea hore li tla etsahala ka nako ea Ntate Molimo.

MELEMO EA TS'EPO

- 1) **Ts'epo e re fa matla le thabo:** Re lula re tletse matla hobane rea tseba hore bokamoso ba rona bo oa khanya.
- 2) **Ts'epo ha e amane le bokamoso ba kamora lefu feela, empa le bophelong bona. Ntate Molimo o refile ts'epo ea bokamoso bo chabileng (Jeremiah 29:11-14):** Tumelo e tsamaea le tsebo ea lentsoe le ngotsong le ts'enolo ea Moea O Halalelang ka nako ena (present tense). Empa moo re sa tsebeng bokamoso ba rona, re na le ts'epo e tiileng ea hore Ntate Molimo o re reretse bokamoso bo chabileng lefats'eng lena, le hore o ntse a sebetsa tsohle molemong oa rona ba moratang. Joale ka lebaka la ts'epo ena,
- (a) Re fumana matla a ho tobana le letsatsi ka leng ka sebete hobane rea tseba hore Ntate Molimo o re isa moo a re batlang teng le hara mefokolo ea rona ha a re tele. **(b) Ts'epo e re thusa ho ba le kelello e pholileng hobane re tseba hore le ha re so be le litharollo maphelong a rona, tsohle li tla loka kamoso ka lebaka la Ntate Molimo ea phelang. (c) Ts'epo e re fa matla meleng le maikutlong a rona ha re nahana hore re tlo tsoa maemong ao re leng ho ona me bokamoso bo tla ba betere ka lebaka la Ntate Molimo**
- 3) **Batho ba bangata ba sa tsebeng le ho utloisia hore na tumelo e sebetsa joang ba ts'oarelloa ke ts'epo ho fihlela ba ikatametsa moo ba nahanang hore baka fumana thuso ebe joale ha se ba fihlile, ba rutoa tumelo:** Mohlala ke oa mokuli ea sa tsebeng letho ka tumelo, empa ka ho utloa batho ba fola ebe o qala hoba le ts'epo ea hore hase hore ho felile, mohlomong le eena a ka fola a phela. Sena hase tumelo, empa ke ts'epo. Joale ebe ka lebaka la ts'epo ena o ikatametsa kerekeng. Joale kerekeng ebe o rutoa tumelo, ebe joale o oa fola hape bophelo ba hae bo fetohle ruri.

KOTSI EA HO LAHLA TS'EPO

- 1) Batho ba senang ts'epo baa nyahama bophelong ba qetelle ba nkile maphelo a bona nako tse ling.
- 2) Batho ba senang ts'epo ba bona lintho ka tsela e teteletseng (negative).
- 3) Batho ba senang ts'epo ba ka lahlehela ke tumelo
- 4) Batho ba senang ts'epo ba ka bona bophelo bo se na thuso, me satane a ka ba sebelisa habonolo ho etsa lintho tse mpe ho bona le ho ba bang.
- 5) Lintho tse ngata tse mpe li ka etsahalla batho ba senang ts'epo.

TS'EPO ELE BOHLOKOA TJENA, HA E ETSE MOSEBETSI OA HO FETOLA MAEMO HABOBEBE. TS'EPO EKA TATAISA MOTHO HO FIHLELA A ITHUTA TUMELO.

SE FETOLANG MAEMO LEFATS'ENG MONA KE TUMELO. KA HONA MOTHO O TLAMEHA HORE A RUTOE TUMELO, HO BUA, HO NKA LIKHATO, HO LEBOHA PELE A BONA MAEMO A FETOHA JOALO JOALO (Bala thuto ea tumelo ho tseba ka tumelo ea Molimo ka botlalo).

Mangolo a buang ka ts'epo le melemo ea ona ke ana (Isaiah 40:31, Micah 7:7, Baroma 5:3-4, Baroma 15:13, 1Bakorinte 13:13, Jeremiah 29:11, Baroma 15:13, Baroma 12:12, Baheberu 11:1, Isaiah 40:31, Baroma 8:24-24, 1Peterose 1:3 le a mang)

BOETAPELE LE BOIKOKOBETSO

muso oa Ntate Molimo ke muso o nang le boetapele. Ntate Molimo o behile batho ba bang holim'a ba bang. Lintho tsohle musong oa hae li tsamaea ka tlhatlhamano le tatellano. Ho qala leholimong ho tla kerekeng e lefats'eng, ho ea malapeng a bakreste. **Tatellano ea leholimong e tjena: Ke Molimo pele (Ntate, Mora le Moea O Halalelang), ho tle manyeloi a okamelang, ho tle manyeloi a mang, ho tle Likerubime le Lirafime. Ea muso oa Ntate Molimo lefats'eng e tjena: Ke Molimo (Ntate, Mora le Moea O Halalelang) pele, ho tle monna, e be ho tla mosali kamora hae, ho tle bana le lelapa, e be joale ho tla liphoofolo e be li lateloa ke limela.** Hona ho re bonts'a hore, boetapele ke ntho e qaliloeng ke Ntate Molimo me bo tla lula bo le teng ka hosafeleng. Linaheng hona le Marena kapa babusi, ho tle matona, joale e be ho ba le ba bang tlas'a bona, e be joale lethathamano leno le theohe joalo. Sesoleng le sepoleseng u tla fumana tlhatlhamano e ts'oanang, le hohle bophelong.

HOBANENG NTATE MOLIMO A ENTSE EBILE A SEBETSA KA BOETAPELE? A mang a mabaka ke ana; 1) Ke tsela eo a e khethileng ea tsamaiso. 2) Ke eona tsela e khonang ho tisa tsamaiso le ts'ebetso e se nang pherekano. 3) Re hloka boetapele

hore re khone ho hola ha ntle ka boikarabello. 4) Ke eona tsela e nepahetseng ea ho etsa lintho.

MELEMO EA BOETAPELE KE EFENG? E meng ea melemo ea boetapele ke ena; 1) Ha hona le boetapele, lintho li khona ho tsamaea ka nepo. 2) Batho ba khona ho hola hantle ha hona le boetapele. 3) Batho ba khona ho ts'oara pono ea Ntate Molimo ha bobebe. 4) Baetapele ba na le boikarabello ba ho bona hore thato ea Ntate Molimo e ea etsahala.

BOETAPELE KEREKENG: Morena Jesu o behile boetapele kerekeng ea hae. O behile Lineo tsena tse hlano e le lineo tsa boetapele. Lineo tsena ke; baapostola, baporofeta, baevangeli, balisa le baruti (Baefese 4:11-16). Balumeli ba kerekeng e itseng, ba tlameha ho ikokobelletsa moetapele ea behiloeng mono, le boetapele boo a bo khethileng. Ba tsamae ka pono e fuoeng moetapele oa mono. Ba se ke ba tlisa tsamaiso, ts'ebetso kapa pono tsa likereke tse ling tlas'a pono ea mono. Haeba ho na le se sa ba khotsofatseng tsamaisong ea kereke, ba tsebise se no ka boikokobetso 'me haeba ha se ntho e ka fetohang, ba ithute ho amohela, e be ba tsoela pele ka thabo. Haeba ba utloa hore ba ke ke ba khona ho lula kerekeng eno, ba tsoe hantle, ba lokollotsoe ke boetapele. Ba se ke ba seba kapa ba hana tsamaiso hobane joale ba fetoha marabele, 'me sebe sa borabele se ts'oana le sa boloi mahlong a Ntate Molimo (1Samuele 15:23). Marabele ke batho ba hanang tsamaiso ea boetapele, kapa ba hanang ho ikokobetsa. Re tlameha ho utloisisa hore maphelo a rona a semoea (spiritual), ka hona, lintho tse etsahalang nameng li qalile moeeng pele. Ha batho ba fetoha marabele, ts'ireletso le mohau oa Ntate Molimo o oa tloha maphelong a bona (Jakobo 4:6), 'me ha hoba joalo, eng kapa eng e mpe e ka etsahala ka bona.

Tsamaiso ena ea boikokobetso e sebetsa le malapeng le linthong tsohle. PEO

EA MATSOHO (Baheberu 6:1-2)

PEO EA MATSOHO HO FETISA MPHO EA MOEA O HALALELANG LE LINEO LE MAHLOHONOLO A MANG A MOEA.

Peo ea matsoho ke ketso ea tumelo molemong oa ho fana ka mahlohonolo a moea, bolaoli, le/kapa matla. Testamenteng ea Khale, tlhohonolofatso e ne e atisa ho fanoa ka tsela ena. Mohlala ke oa Jakobo ha a fetisa litlhohonolofatso tse tsoang ho Molimo ka ho beha matsoho ho Efraime le Manasse (Genese 48:13-20).

Testamenteng e Ncha, motho ea sa tsoa kolobetsoa o ne a behoa matsoho ho amohela Moea o Halalelang (Liketso 8:17-18 kamora hore basebeletsi ba Molimo ba kolobetse basokolohi ba bakileng, ba ile ba ba beha matsoho, 'me ba amohela Moea o Halalelang). Hape sheba Liketso 19:5-6 le II Timothea 1:6.

PEO EA MATSOHO HO FOLISA LE HO LOKOLLA BATHO MAFUNG LE LIKHATELLONG KA HO FAPANA:

Peo ea matsoho e boetse e tsamaea le thapelo ea tokolloho bakeng sa ba mahlomoleng le ba kulang. Liketso 9:17 e re: "Eaba Ananiase o bea matsoho a hae holim'a hae [Pauluse] a re: 'Saul, ngoan'eso, Morena Jesu, ea ileng a itlhahisa ho uena tseleng ha u ne u tlile, o nthomile hore u boele u bone hape o tlale Moea o Halalelang.' Le Morena Jesu o ne a lula a beha bakuli matsoho.

PEO EA MATSOHO HO BEHA BAETAPELE:

Morero o mong oa peo ea matsoho ke oa ho beoa. Mohlala o fumanoa ho Liketso 6. Mona banna ba supileng e ile ea e ba badiakone ha baapostola ba rapela le "ho ba beha matsoho" (temana ea 6).

Joale, peo ea matsoho e sebeletsa ho bontša hore Ntate Molimo o sebetsa ka basebeletsi ba hae. Ts'ebelletso ena e boleloa e le e 'ngoe ea lithuto tsa motheo tsa kereke ea Morena Jesu ka ho Baheberu 6:2.

PEO EA MATSOHO HO TSOSELLETSA LE HO FETISETSA LINEO TSA MOEA:

Peo ea matsoho hape e sebetsa ntlheng ea ho tsoelletsa litalente le lineo tsa balumeli le ho fetisetisa lineo tse itseng ho balumeli tseo e bang li sebetsa ho ea behang matsoho. Mohlala, Joshua o ile a amohela moea oa bohale ha Moshe a 'meha matsoho (Deuteronoma 34:9, 2Timotia 1:6) Timotia o ile a amohela lineo tsa moea ha Paulosi a 'meha matsoho.

TSAMAIISO LE TS'EBETSO EA BOETAPELE LE BOIKOKOBETSO LITS'EBELLETSONG LE LIKEREKENG

- 1) Haeba hona le moetapele e mong a tlas'a pono ea moetapele e mong, e ba o mo emetse lekaleng le leng la kereke kapa o mo emetse tsoseletsong kapa kae-kae feela. o tlameha ho etsa bonnete ba hore o mo emela hantle, 'me batho bohle ba tsebe hore o ka tlas'a hae. O tlameha ho bua ka tsela e hlonephang moetapele oa hae, 'me e se ke eaka o lekana le eena ka maemo. A se ke a re ke basebetsi 'moho feela, empa a hlakise hore o ka tlase ho moetapele oa hae.
- 2) O tlameha ho hlonepha moetapele oa hae ho tsoa pelong, e seng ponts'eng ea hae feela kapa ea batho ba bang.
- 3) O tlameha ho utloisisa hore Ntate Molimo o file moetapele oa hae pono, 'me Ntate Molimo o tla bua le moetapele ka pono le tsoelopele ea eona, joale eena o tlameha ho utloa ho tsoa moetapele oa hae.
- 4) O tlameha hore a se ke a ipapisa le moetapele oa hae. (Hopola hore satane o liuo ke ho ipapisa le moetapele oa hae).
- 5) O tlameha ho ikokobelletsa tsohle tse hlahang ho moetapele oa hae, e seng feela ho tse monate. A ikokobetse le ha a

haneloa ho etsa ntho e itseng.

- 6) A se ke a imetha ka lineo le litlhohonolofatso tsa hae, empa a imethe ka hore na Ntate Molimo o mo behile kae 'me a ts'epahalle boemo bono.
- 7) Haeba a bitselitsoe ho qala ts'ebeletso ea hae, a se ke a tsoa feela a sa lokolloa, empa a lokolloe hantle. A ithute ho emela nako ea Ntate Molimo. A se ke a tata ka lebaka la cheseho. Ho ints'a ka nako ea hae kapa ka tsela e sa nepahalang ho mo tlosa tlas'a mohau oa Ntate Molimo.

LITHOLOANA TSA BOIKOKOBETSO

- 1) Bible e re joetsa hore Ntate Molimo o phahamisa ba ikokobelitseng (1Peterose 5:6).
- 2) Ntate Molimo o fa mohau ho baikokobetsi, mohau ke bokhoni ba ho etsa seo ba se bitselitsoeng (Jakobo 4:6).
- 3) Boikokobetso ke bona feela tsela ea ho ea pele le Ntate Molimo (Maele 18:12, 1Peterose 5:6).
- 4) Lintho tsohle tse molemo tseo Ntate Molimo a li etsang bophelong ba motho li qala ka boikokobetso lehlakoreng la motho.

LITHOLOANA TSA BOIKHOHOMOSO LE BORABELE;

- 1) Ntate Molimo o hana baikhohomosi (Jakobo 4:6).
- 2) Sebe sa baikhohomoso se ts'oana le sebe sa ho rapela melimo ea bohata, le sebe sa borabele se ts'oana le sebe sa boloi mahlong a Ntate Molimo (1Samuele 15:22-24).
- 3) Boikho homoso bo tla pele motho a e oa, ka mantsoe a mang, baikhohomoso bo lateloa ke ho oa (Maele 18:12).
- 4) Ntate Molimo o tlosa mohau oa hae holim'a baikhohomosi (Jakobo 4:6) 'me ba sala ba le baputsoa, ba tlontlolehile.
- 5) Moo ho se nang boetapele, hona le pherekano le ho itaola (Baahloli 21: 25).
- 6) **BOIKOKOBETSO BOETAPELENG BA NAHA (Baroma 13:1-8).** Bakreste ba tlameha ho ikokobelletsa molao oa naha eo ba phelang ho eona 'me ba ts'epahalle melao ea teng ha e se khahlanong le lentsoe la Ntate Molimo. Ba ka hana molao le tsamaiso ea naha ha fela e le khahlanong le lentsoe la Ntate Molimo.
- 7) **BOIKOKOBETSO LENYALONG (Baefese 5: 22-33).** Basali ba tlameha ho ikokobelletsa banna ba bona manyalong, joaloka ha kereke e ikokobelletsa Krete, hobane monna ke hlooho ea mosali joaloka ha Krete le eena e le hlooho ea kereke. Sesupo sa boikokobetso ba 'm'e ho Ntate Molimo, ke ka boikokobetso ho molekane oa hae. Monna le eena ka tsela e ts'oanang o tlameha ho rata molekane oa hae 'me lerato le ea ikokobetsa. Le monna a ikokobelletse mosali oa hae 'me a mobone e le molekane oa hae, e seng lehlahana la hae.
- 8) **BOIKOKOBETSO BANENG LE BATSOALING (Baefese 6: 1-4).** Bana ba tlameha ho ikokobelletsa batsoali ba bona. Ba ikokobetsa ho tsoa lipelong tsa bona. Le batsoali ba ikokobelletse bana ba bona 'me ba se ke ba ba ts'oara ka tsela e ka ba khokang.
- 9) **Moo re ke keng ra ikokobetsa kapa ra amohela boetapele ba teng, ke moo feela ho etsoang se khahlanong le lentsoe la Ntate Molimo. Ntate Molimo o lula a tla pele linthong tsohle 'me re ikokobelletsa eena pele ka litsela tsohle. Ke teng feela moo re nang le tokelo ea ho hana boetapele kapa hona ho ikokobelletsa bona**

HO FANA

Bible e buoa ka ho fana haholo. Ntate Molimo o lula a re fa lintho, ha a kaba a re kalime. O re file Mora oa hae ea innotsi (Baroma 8:31 le 32).

RE FANA HOBANENG: (1) Re fana hobane re rata Ntate Molimo le batho ba bang **(2)** Re fana hobane re basebetsi 'moho le Ntate Molimo, 'me re nka karolo mosebetsing oa hae (2Bakorinte6:1) **(3)** Re fana hobane ke tsamaiso ea 'muso oa habo rona **(4)** Re fana hobane Ntate Molimo o lebelletse hore re fane (Luka 6:38) **(5)** Re fana hobane ke eona tsela ea ho ea pele 'musong oa Ntate Molimo hape ho fana ho tsamaea le semelo sa rona se ts'oanang le sa Ntate Molimo. Ho fana ho re etsa hore re tsamaee tlas'a tlhohonolofatso ea Ntate Molimo e holim'a rona.

RE FANA JOANG: (1) Re fana ka kutloisiso ea hore na re etsa joang ha re fana **(2)** Re fana re thabile (2Bakrinte 9:6-7) **(3)** Re fana ka tumelo le tebello ea ho ateloa ho feta ka moo re faneng ka teng. Ha re fane hobane re batla ho fuoa, empa re fana hobane re rata, empa re ba le tebello ea ho fuoa hobane Morena Jesu o itse re be le eona (Luka 6:38, 2Bakorinte 9:6-7). Re fana ka tumelo

e seng ka maikutlo kapa maemo. Ho fana ho bonts'a tumelo ea rona ho Ntate Molimo.

RE FANA KA ENG?

(1) RE FANA KA MAPHELO A RONA HO NTATE MOLIMO: ha re mo file maphelo a rona, ha hona letho leo re ke keng ra mo fa lona (Bakhalata 2:20).

(2) RE FANA KA BOSHOMÉ: Boshome ke karolo ea leshome ea seo re se kholang kapa re se fumanang. Boshome ke seo e leng sa Ntate Molimo ka tokelo. **Re fana ka boshome hobane re le litloholo tsa Aborahama, 'me re tsamaea maotong a hae a tumelo (Ha re fane ka boshome hobane re le tlas'a molao oa Moshe, hobane ha re tlas'a ona.** Boshome bo bolela tsena tse latelang: **(a)** Ke ho elelloa Ntate Molimo le hore tsohle tseo re nang le tsona li tsoa ho eena, 'me ke tsela e 'ngoe ea ho ananela taba eno le ho mo leboha **(b)** Ke ho hlompha Ntate Molimo **(c)** Ke ho phetha karolo ea rona ea selekane le Ntate Molimo **(d)** Re fana ka boshome ho ts'ehetsa mosebetsi oa Ntate Molimo le ba re rutang lentsoe (Bakhalata 6:6, 1Bakorinte 9:14, Malakia 3:10) **(e)** Re fana ka boshome hore re tle re tsamaee tlas'a tlhohonolofatso ea Ntate Molimo e teng ho rona rele bana ba hae (Malakia 3:10-12). Re se ntse re hlohonolofalitsoe ka mahlohonolo oohle ho Krete, empa re tsamaea ka tlhohonolofatso ena ha re tsamaea ka tumelo ho Ntate Molimo, 'me boshome ke sesupo se seng sa tumelo ea rona ho Ntate Molimo le ho mo mamela (obedience out of faith). **(f)** Ho fana ka boshome ke sesupo sa ho mamela Ntate Molimo hobane o itse re fane ka boshome ho eena. **(g)** Re fana ka boshome ts'ebelletsong eo re feptjoang lentsoe ho eona kapa mothong ea re fepang lentsoe.

Baheberu 7;7-9 e bontsha hore selekaneng sa rona se secha, mashome a rona a amoheloa ke Morena Jesu ea phelang ka hosafeleng ea bapisoang le Melkhisedeck eo Aborahama a ileng a mo hlompha ka boshome hobane a mo elelloa hore ke Moprista oa Molimo e moholo. Le Rona re Hlompha Morena Jesu ka mashome a rona mme ka ho mofa boshome, re elelloa bohola ba hae le ho motlotlisa. Ha re fane ka boshome joalo ka ba ka tlasa moloa oa Moshe ba neng ba fa boshome ho balevi ba shoang (Baheberu 7;7). Ha re fane ka boshome hobane re tshohile thohako hobane re se re hlohonolalitsoe ka mahlohonolo oohle ho Krete, ' me re kese rohakehe. Empa re fana ka boshome ele seuso sa tumelo le ho hlompha Morena Jesu, ese ka lebaka la ho tshaba thohako

Morena Jesu ha a shoa, o nkile lithohako tsohle holima hae (he became a curse for us) ,me a tiisa le ho lokolla litlohonolofatso le litshepiso tsa Ntate Molimo molemong oa rona (All God's promises are yes and amen). Joale rona re se re hlohonolofalitsoe ka hoohle ho Krete (Baefese 1;3), empa tlhohonolofatso e tla bonahala maphelong a rona ha re tsamaea ka tumelo holima lentsoe le litsamaiso tsa Ntate Molimo, joale re fana ka boshome hobane re utloisisa hore ke tsamaiso (principle) ea ho hlompha Ntate Molimo le ho me beha pele. Ha se hoba re tshoha hore retla rohakeha ha re sa fane ka bona hobane re keke ra rohakeha.

Aborahama o fane ka boshome pele molao o eba teng,' me o ne a etsa seno ho hlompha Ntate Molimo le ho mo ananela. Le rona selekaneng se secha re fana ka boshome ka tsela le kutloisiso eno.

Re fana ka boshome Joang: **1)** Re fana ka boshome ka kutloisiso ea hore re sentse re hlonolofetse ho Krete 'me sena re se etsa ho ananela Ntate Molimo le ho mo bontsha hore rea utloisisa ebile rea leboha hore tsohle tsa rona li tsoa ho eena. **2)** Re fana ka boshome ka tumelo le teboho. Ha re se re fane ka bona joale reka rapela ka tumela ebile re phatlallatsa le ho leboha Ntate Molimo hore maholimo a rona a bulehile licheleteng, me re ngatafallosa ka hoohle, ebile re atleha mesebetsing eohle ea matsoho a rona le hore seseli ha se je mesebetsi ea rona re eme holima Malakia 3:10-14 le mangolong a mang. **Rea lokela ho buoa tjena hobane mahlohonolo oohle a ntate Molimo ho qala ka pholoho, le ha re lumetse ebile re phethile karolo ea rona, a lokolloha semoeeng molemong oa rona, empa re a tisa boemong ba nama ka ho phatlallatsa ebile re rorisa hape re leboha. Ha re SA ETSE tjena, re ka fumana litlohonolofatso tsa rona li salletse semoeeng feela. 3)** Re fana ka boshome re utloisisa hore ka boshome, re hokahanya chelete le matla a rona mesebetsing oa Ntate Molimo oa bosafeleng. Ka hona re fa chelete ea rona boleng ba bosafeleng (eternal value). **4)** Boshome bo etsa hore mesebetsi oa Ntate Molimo o mathe kapelenyana ka bobebe le hore basebelletsi ba hae ba hlokomeloe, tle ba tsebe ho sebetsa ka thabo hape ba ipabole ba sa toute ka thata ka lebaka la litlhoko. **5)** Boshome bo fetola chelete ea rona peo, 'me sena se fa Ntate Molimo monyetla oa ho e atisa le ho atisa mahlohonolo a mang maphelong a rona. **6)** Boshome bo boloka pelo ea rona e se lekhotlisa hape e sa khomarele chelete hape ke tsebiso e hlakileng bophelong ba rona hore Ntate Molimo o tla pele linthong tsohle.

7) Boshome ke tsamaiso (principle) e ke keng ea fela le ka mohla o le mong hobane ha feela Ntate Molimo a beoa pele, tsamaiso ea boshome e tla lula e le teng hobane boshome ke sesupo sa ho mo beha pele le ho mo hlompha. Ke ka hona re bo bonang lilemo tse 430 pele moloa oa Moshe o eba teng, bo fanoa ke Aborahama le bana ba hae, 'me ra bona Ntate Molimo a bo kenya molaong oa Moshe ha a fana ka molao, hape re bona Morena Jesu a bo tsoellisa pele ka ho Matteu 23:23, empa sabata sona a se emisa ka hore o se phethalitsetse.

Molao oa Morena Jesu a o phethalitsoeng ke oa Moshe, ke ka lona lebaka lebaka leo re sa faneng ka boshome re tshohile lithohako jaalo ka ba ka tlasa molao oa Moshe, empa re fana ka bona ka tumelo joalo ka Aborahama (Baheberu7:7). Re nka mahlohonolo a boshome a malakia hobane mahlohonolo oohle a Aborahama le a selekane sa khale ke a rona ho Krete, empa lithohako tsona Morena Jesu o li nkile holima hae (2Bakorinte 1;20). Ka hona mahlohonolo a hlahang ho malakia 3:10 le a mang a tsamaeang le boshome re ka a nka ra a phatlallatsa ka tumelo ha re fane ka boshome hobane ke a rona ho krete.

Ha re fana ka Boshome ho Ntate Molimo ka tumelo, re ka lebella ho bona lehlohonolo (divine favor) le re latela, (divine ideas and connections) e leng mehopolo ea bomolimo e tlang tse molemo ho rona le mamati a bulehileng le ho ngatafallosa hoo re sa tsebeng na reka boloka mahlohonolo a rona hokae, ts'irelletso holima mesebetsi le mahlohonolo a rona le tse ling tse ngata tse molemo.

Ke khotalletso hore motho o fane ka boshome ka bo mong, Lelapa le fane ka boshome ha le amohetse tlhohonolofatso e amang lelapa kaofelo le likhoebo, likereke le li organisation tsa rona le tsona li fane ka boshome hore le tsona tle li bone leholimo le bulehileng ka mahlohonolo holima tsona. Ha re se re fane ka boshome joale, re phatlallatse le ho leboha ka maholimo a bulehileng ka mahlohonolo holima rona, malapa a rona, mesebetsi ea rona, likhoebo, likereke le li organization tsa rona re eme holima malakia 3:10-14 le mangolo a mang. **Phatlallatso ena e ea hloka hape e bohlokoa hobane e tlisa mahlohonolo a lokollotsoeng ke boshome ho tsoa boemong ba Moea hotla bonahala boemong ba nama.**

(5) RE FANA KA MENEHELO: Monehelo ke seo e leng sa rona seo re se fang Ntate Molimo. Menehelo ea rona e tlameha ho ba ka tsela e latelang ho re e amohelehe ho Ntate Molimo. **(1)** E tlameha ho hlomphe Ntate Molimo ka tsela ea hore e be ntho e bohlokoa ho rona, e seng ntho e nyatsehlang (Malakia 1:6-14), **(2)** E tlameha ho tsoa lipelong tsa rona hape re tlameha ho e fana re thabile **(3)** E tlameha ho susumetsoa ke lerato ho Ntate Molimo le ba bang, e seng hobane re ipatla.

(6) RE FANA KA LILOPOTSA (Maele 3:9): Lilopotso ke tse tlang pele phahamisong ea hau. Mohlala, haeba o khola sekete, e be o phahamisoa ka makholo a mahlano, e be o se o khola sekete le makholo a mahlano, katiso eno ea hau ea pele ea makholo a mahlano, ho kaba molemo ha u ka e fa Ntate Molimo kapa katiso (profit) ea hau ea pele ea khoebo kapa e kaba mokholo oa hau oa pele oa selemo. Bible e u ts'episa tlhohonolofatso e kholo ha u ka etsa joalo. Empa ha ho molao o o laelang hore o etse sena, empa ke likhato tsa tumelo tseo o ka li nkang, 'me u tla kotula haholo.

RE FANA HOKAE: (1) Boshome le menehelo e ea ts'ebelletsong eo o feptjoang lentsoe ho eona. Ts'ebelletso eo o feptjoang lentsoe ho eona e kanna ea se ke ea ba ts'ebelletso ea hau ea letsoele. **(2)** Re fana ho ba re rutang lentsoe le ho re hlokomela moeeng. Ho fana ho bona ho fapane le ho fana lits'ebelletsong tsa bona. Ho fana ho bona ke ho fa bona hore ba etse seo ba se ratang ka seo ba se fuoeng (Bagalata 6:6, 1Bakorinte 9:14, Ezekiel 44:30) **(3)** Re fana ho bahloki le mafutsana (Maele 19:17, Bakhalata 2:10) **(4)** Re fana lits'ebelletsong tse ling moo re bonang mesebetsi oa Ntate Molimo o tsoela pele ka matla teng **(5)** Re fana moo Ntate Molimo a re senolelang hore re fane teng, e le lits'ebelletsong kapa e le bathong.

MELEMO EA HO FANA KE E FE? (1) Ntate Molimo o oa thaba ha re fana hobane re ea mo etsisa (Baefese 5:1), hape re phetha karolo ea rona ea bosebetsi 'moho le eena. **(2)** Ha re fana, re ea thusa le ho tlisa molemo ho ba bang, 'me taba ena e thabisa Ntate Molimo **(3)** Ho fana ho tlisa ponahatso ea 'muso oa Ntate Molimo maphelong a rona, ponahatso ea 'muso oa Ntate Molimo ke khotso, thabo, ho ngatafallosa, ho se hloke, ho ruoa, ho phela hantle le ho hlohonolofala linthong tsohle (Tlhohonolofatso ke matlafatso a teng meeng ea rona a re etsang ho re re atlehe linthong tsohle, tsa moea le tsa nama) (Maele 10:22, 11:24 le 25, Luka 6:38). **(4)** Ho fana ke eona tsela ea ho ea pele 'musong oa Ntate Molimo **(5)** Ho fana ke hona ho re behang morerong oa Ntate Molimo ka maphelo a rona, 'me ho re etsa hore re tsamaee ka tlhohonolofatso ea Ntate Molimo e teng maphelong a rona. **(6)** Ho fana ho re etsa seliba seo Ntate Molimo a ka se sebelisang ho ama batho ba bang ka sona.

MELEMO EA HO FANA HAHOLO KA BOITELO KE EFE? (1) Ho fana ka boitelo ho bonts'a tumelo e phethahetseng ho Ntate Molimo, 'me ho re etsa hore re tsamaee ka botlalo le Ntate Molimo **(2)** Ho fana ka boitelo ho etsa hore batho ba bangata ba thusehe kapelenyana, 'me hona ho thabisa Ntate Molimo haholo **(3)** Ho fana ka boitelo ho bula mamati a mahlohali maphelong a rona (Maele 11:24). **(4)** Ho fana ka boitelo ho etsa hore re phethe thato ea Ntate Molimo ka botlalo. Mohlala, ha ngoana oa Ntate Molimo a itima lijo, a itima boroko, a itima lintho tse ngata molemong oa hoba le nako le Ntate Molimo, o tla khona ho tsamaea le Ntate Molimo ka katleho, o tla khona ho utloa Ntate Molimo hantle, 'me a tsamae ka boemo bo phahameng le Ntate Molimo.

Bukeng ea liketso re bona batho ba fana ka matlo le lits'a tsa bona kaboitelo 'me le rona linako tse ling Ntate Molimo a ka re susumetsa ho fana ka tsela e tjena.

LITLAMORAO TSA HO SE FANE: (1) Ha re sa fane, re sitoa ho nka karolo mosebetsing oa Ntate Molimo **(2)** Re sitoa ho tsamaea ka tlhohonolofatso ea Ntate Molimo (tlhohonolofatso ea Ntate Molimo ha e amane le lichelete feela) empa e amane le maphelo a rona ka kakaretso. **(3)** Ntate Molimo o sitoa ho re sebelisa ha re sa fane **(4)** Re sitoa ho ea pele le Ntate Molimo ha re sa fane hape litsela tsa rona lia koaleha (Maele 11:24).

HOBANENG NTATE MOLIMO A BATLA EBILE A ENTSE TSELA EA HORE BANA BA HAE BA RUE LICHELETENG LE LINTHONG TSE LING TSA NAMA: (2Bakorinte 8:9, 3Johanne 1:3, Maele 13:22):

(1) Ntate Molimo ke Molimo ea lokileng, 'me o batla hore bana ba hae ba phele ha monate ba sa hloke letho. O batla lelapa le iketlileng **(2)** O batla hore bana ba hae ba hape leruo la lefats'e hobane o ne a etselitse bona lefats'e qalong, empa Adma o ile a le fa satane ka ho se mamele Ntate Molimo. Lefats'e lena re le hapa ka tumelo, ka ho buoa mantsoe a tumelo le ho nka likhato tsa tumelo. **(3)** Ntate Molimo o batla hore re rue hore re tle re khone ho haha 'muso oa hae lefats'eng. 'Muso o hola ha batho ba pholoso, ba hola moeeng, 'me mesebetsi ena eohle e hloka chelete e ngata (Deutronoma 8:18). **(4)** Ntate Molimo o batla hore

bana ba hae ba thuse bahloki (Bakhalata 2:10).

HO TSOA LIKOLOTONG KA TSELA EA NTATE MOLIMO: Ntate Molimo ha a batle ha re phela ka likoloto. Ha a batle ha bana ba hae ba fetoha lekhoba la letho`me sekoloto se etsa motho lekhoba (Baroma 13:8). Ha se sebe ho ba le sokoloto, empa ha se thato ea Ntate Molimo e phethahetseng, ebile ha a batle ha u ka ba le sekoloto se sehloho seo o sitoang ho se patala. Ntate Molimo o nts`itse ba bangata likolotong bibeleng, `me le uena u tla u nts`a ha u ka lumela ka tsela e nepahetseng. **Hore u tsoe likolotong ka tsela ea Ntate Molimo le ho phela ka holim`a likoloto, u tlameha ho tseba le ho etsa tsena tse latelang:**

(1) Tseba selekane sa hau le Ntate Molimo, ho ea ka selekane sa hau le eena, u tlameha ho phela holim`a likoloto (Deutromoma 28:12-14). **(2)** Ts`epahalla Ntate Molimo ka ho phetha lentsoe la hae, mohlala, ka ho fana ka karolo ea leshome, ho ts`oarella, ho mo fa menehelo e mo hlompang. **(3)** Etsa ho ea ka lentsoe le buuoang la Ntate Molimo (rhema). Etsa seo a o senolelag sona, mohlala, ha a re u fane u fane, ha a re u etse se seng u se etse. **(4)** Lula u buoa ka molomo hore u tsoile likolotong. **(5)** Nts`a ba bang likolotong ho sa tsotellehe hore na li nyane ha kae, Ntate Molimo o tla lula a o etsetsa seo u se etsetsang ba bang. **(6)** Lula o leboha Ntate Molimo ka hore u tsoile likolotong. **(7)** Hokahana (be partnership) le mosebetsi oa Ntate Molimo kapa le mosebelletsi oa Ntate Molimo. Mohlomong o fane ts`ebelletsong eno kapa mosebelletsing eno kapa o etse se seng se molemo ts`ebelletsong kapa mosebelletsing eno. Ho hokahana le mosebetsi oa Ntate Molimo ho tlisa tlhohonolofatso bophelong ba motho. Mehlala 2Marena 4:4-8, mona mohlolohali enoa o ile a lokolloa sekolotong sa hae ka lebaka la ho hokahana le Elisha, mohlanka oa Molimo. Bafilipi 4:19, Marena 6:18). **(8)** E ba le boits`oaro, o se ke oa lula o ikeketsetsa likoloto ha u ntse o batla ho tsoa ho tse ling. Ithute ho kopa Ntate Molimo lintho tseo o li ratang (Mattheu 7:7-12).

Sena seo se ke ngotsoeng ke ts`ebetso ea tumelo feela. Tumelo e lula e sebetsa ha e sebelisoa ka tsela e nepahetseng hobane tumelo e tla lula e sebetsa ha e sebelisoa ka tsela e nepahetseng. Ha u lula u etsa tsena, Ntate Molimo a ka etsa ho hong feela ho o lokolla sekolotong. Mohlala: motho e mong a ka se patella, se ka nyamela ka mohlolo, u ka fumana mosebetsi u mong u ka u thusang ho patala sekoloto sena, kapa ho ka etsahala ntho e `ngoe feela e mohlolo ho o lokolla sekolotong sena. Ha u tsoile likolotong, u phele holim`a likoloto. U tla khona ho phela holim`a likoloto ha u phela ka tsamaiso ea `muso oa Ntate Molimo, e leng ea ho jala le ho kotula

BAQELI, BAKALIMI LE BAJALI

BAQELI (Beggars)

- 1)** Baqeli ke makhoba (slaves), re bona ka Lazaro a neng a rata Morena empa a futsanehile a phela ka ho qela. Morena Jesu o re re fane joale eena o ne a khethile ho qela. Ha u qela u fuoa ke batho ho tsoa semelong sa botho se timanang.
- (2)** Baqeli ba lekanyetsoa (limited) ke seo ba se fuoeng ke batho. **(3)** Baqeli ha ba tsamaee ka lehlohonolo la Morena hobane lehlohonolo lena le lokolloa ke ho fana (Maele 11:24) **(4)** Baqeli ba Keke ba khona ho phetha morero oa Ntate Molimo ka bona. Ho qela ha se tsamaiso ea `muso oa Ntate Molimo.

BAKALIMI (Borrowers)

Ho kalima ha se sebe empa ha se thato ea Ntate Molimo e phethahetseng ho bana ba hae (Lipolelo 28:12-13) (Baroma 13:8-10)

(1) Bakalimi ke bahlanka ho ba ba kolotang (servants) (Maele 22:7) **(2)** Bakalimi ba lekanyelitsoe ke seo ba se kalinngoeng **(3)** Bakalimi baa ema. Ba tlameha ho emela ho fuoa seo ba se kalinngoeng **(4)** Bakalimi ba ka touta (stressers). Ba touta ka thata ha ba tlameha ho lefa likoloto empa chelete e le sieo. Sena Ntate Molimo ha a se batle baneng ba hae.

BAJALI (sowers, givers)

1) Bajali ba hlohonolofetse (Liketso 20:35. Maele 11:24) Sena se bolela hore ba na le matlafatso ea Ntate Molimo holima meea ea bona e etsang hore seo ba se etsang se atlehe. Leha ba ka ba qala fatsh`e, tlhohonolofatso ena e tla etsa hore mesebetsi ea bona e atlehe. **(2)** Bajali baa phomola ha ba toute (Mareka 4:27) e re mojali oa jala ebe o oa phomola ka tumelo, a lebelletse hore Ntate Molimo a holise peo ea hae ka mohlolo le ha eena a sa tseba na e hola joang. O bona eena lintho li ntse li mo etsahalla feela ka tsela e mohlolo. **(3)** Bajali baa atleha le ho ateloa hobane Ntate Molimo ke eena a atisang peo ea bona ha ba jetse (2 Bakorinte 9: 6). 'Me lintho tsa bona li sebetsa ka mohlolo ka tsela e phahametseng kelello. Ha ba jetse Ntate Molimo a ka sebelisa batho le maemo a fapaneng molemong oa bona Luka 6:37-39. **(4)** Nako tse ling bajali ha ba eme nako e telele hobane hang ha ba jetse ka tumelo ho ka etsahala mehlolo e meholo e tlisang likarabo le liphunyelletso ho bona. **(5)** Bajali ha baa lekanyetsoa. Bajali ha ba jetse ka tumelo, ho ka etsahala se mohlolo feela ka tsela e senang tekanyo hobane ke Ntate Molimo a ba etsetsang.

NTLHA TSE BOHLOKOA TABENG EA PEO LE MOJALI

(1) Peo ke sohle seo e leng sa hau seo u fanang ka sona. Ekaba nako, chelete, tshebelletso eo u fanang ka eona, liketso tse mosa, tse mohau joalo joalo kapa eng kapa eng eo e leng ea hau.

Ke peo hobane seo u se etsetsetsang ba bang Ntate Molimo le uena o tla u etsetsa sona ka tsela e phahametseng eo u entseng ka eona.

Seo e leng sa hau (your possession) se ka fetoha peo ha u fana ka sona ka tumelo. Ha feela ntho e le ea hau e so fetohile peo, ha e

na matla a ho ata. Empa hang ha u e fetola peo, e qala hoba le matla a ho ata joalo ka peo feela ha e kentsoe mobung.

(2) Peo e jaloa e le khato ea tumelo empa kotulo e tla ka mohlolo e tlisoa ke Ntate Molimo ka tsela ea hae.

(3) Motho o kotula seo a se jetseng, le seo a se buileng le tseo a sa li kopang. Mohlala ke Solomone. O jetse liphoofolo empa a kopa bohlae. 'Me o ile a fumana bohlae le liphoofolo le leruo le le ngata le bohloomphehi, tseo a neng a sa li kopa. Joalo ka tholoana feela ea sefate sa li apole, u jala tholoana empa u kotula sefate se felletseng se nang le makala le makhasi le liapole tse ling tse ngata, 'me tsena li bohlokoa kaofela. Makala a ka etsa patsi le furniture, makhasi a fana ka oxygen hape ekaba meriana, liapole ke lijo e bile lina le lipeo tse ling ka hare ho tsona joalo joalo.

(4) Peo ea hau e ka o sebelletsa lefats'eng lena le lefats'eng le tlang hobane Ntate Molimo haa ka ba le bale mesebetsi e metle eo re mo etsetsang. E tla bua lefats'eng lena le lefats'eng le tlang.

(5) Peo ea hau e ka u bulela mamati a maholo le ho u kopanya le batho ba bohlokoa bophelong ba hau. Peo u e jala ka tumelo, ebe u e noesetsa ka lipolelo le ka lithoriso ebe joale u oa e buela hore na o lebelletse eng ebe joale u lebella kotulo ea hau. Ntate Molimo o tla etsa bonnete ba hore u kotula seo u se jetseng le seo u se buileng le tse ling tse ntle tseo e bang u ne u sa li nahana.

(6) Re ka jalla eng kapa eng eo re e hlohang kapa re e lebelletseng ho Ntate Molimo. Se bohlokoa ke tumelo le ts'enolo ea hore na o etsa eng ka ho jala. U ka jalla boemo bo bocha, u ka jalla ho fela ha boemo bo itseng bophelong ba hau. Kutloisisong ea hau le ka tumelo, ha u fana ka peo ea hau u utloisisa hore ha peo ea hau e shoa, e tlo shoa le boemo bono boo u sa bo rateng, 'me ha e hlaha ka 'mele o mocha e hlaha le boemo bo bocha boo u bo lebelletseng bophelong ba hau.

(7) Peo ea hau u e jala mobung o motle, e leng moo u bonang mosebetsi oa Ntate Molimo kapa mohau le tlolo ea Ntate Molimo teng. Peo e fuoang bahlanka ba Ntate Molimo le mosebetsi oa hae, ke tsona tse sebetsang ka pelenyana le ka tsela e holimo hobane ka ho etsa seno u fa Ntate Molimo ka sebele, 'me re bona tsena bibeleng moo bahlanka ba Molimo ba fuoeng lintho. Re se re hlalositse taba ena pele thutong ena.

Hape re ka fana ka eona moo re senoleloang teng e le bathong feela le mafutsaneng, empa boemo bona bo fapane le ho fa mosebetsi oa Ntate Molimo le bahlanka ba Ntate Molimo ka kotlolloho empa le eona e bohlokoa.

Karolo engoe hape e bohlokoa ke ho jala batsoaling ba rona ba moea le ba nama

(8) Nako tse ling re ka jala ka sehlabelo ka ntho e kholo, e bohlokoa ho rona ho ea ka tumelo ea rona kapa ts'enolo ea Moea o Halalelang ho rona. Sena hangata Ntate Molimo o u susumelletsa ho se etsa ha a batla ho tlisa se seng se seholo maphelong a rona.

E EANG KA LEFATS'E LOHLE

Morena Jesu o tlike ho tla nka boemo ba motho ba sebe le ho ba sera sa Molimo, 'me o tlike ho tla re fa boemo ba ho ba bara le metsoalle ea Molimo joalo ka eena. Morena Jesu o qetile mosebetsi ona kaofela oo a neng a o tletse, 'me ha hona motho le ea mong ea tlamehang ho timela. Moputso oa sebe o lefuoe ka botlalo, joale ho setse feela hore batho ba tsebe 'nete eno, 'me ba pholosoe. Batho honajoale ba timela ka lebaka la ho hloka tsebo (Hosea 4:6). Joale Morena Jesu o re file thomo ea ho ea ka lefats'e lohle, 'me re etse batho barutuo ba hae (Mareka 16:15-18). O re ha ntse re bolella batho evangeli, mehlolo le liponts'o li tla latela.

HO EA KA LEFATS'E LOHLE KE HO ETSA ENG?

(1) Ho ea ka lefats'e lohle ke ho isa molaetsa oa Krete ka lefats'e lohle: Ha se hakaalo hore e mong le e mong a rona o tlameha ho ea lichabeng ka nama a lo bolela evangeli. Empa ke hore e mong le e mong oa rona a ise molaetsa oa Krete lichabeng ka lineo tsa hae. Mohlala: ba bang ba ea ka nama ho ea bolela evangeli, ba bang ke ho ts'ehetsa evangeli ka lichelete le limpho tsa bona, ba bang ke ho rapella evangeli, ba bang ke ho koetlisa ba bang ba pholositsoeng. Ho etsa tjena ke ho ea ka lefats'e lohle.

(2) Ho ea ka lefats'e lohle hape ke ho bolela evangeli moo o fihlalleng teng: Ke ho bolella batho ba pela hau evangeli. Mohlala: mosebetsing, motseng, Balumeli bohle ba tlameha ho nka karolo thomong ena. Balumeli bohle ba tlameha ho nka karolo thomong, 'me ha ba hapuoe ba tlameha ho etsoa barutuo (Mattheu 28:18-20, Baefese 4:11-17). Ba tlameha ho tlosoa boemong ba bosea ba isoe boemong ba bara ba Molimo ba Molimo ba bonahalitsoeng.

TSELA E BOBEBE EA HO BOLELLA BATHO KA MORENA JESU.

1) Atamela motho ka hlomphe, **(2)** se ke oa qala ho supa motho liphoso, bo lithatho le lifaha joalo joalo, U se ke oa buoa ka lireke ha u qala, empa u buoe ka bibe feela. **(3)** Botsa motho potso e ka mo etsang hore a e lellloe tlhoko ea hae ea Morena Jesu bophelong ba hae. Mohlomong o mo botse hore na ho tlo etsahala eng ka eena ha a hlokahala. Ba bang ba ka re ha ba tsebe, ba bang ba ka re ba ea leholimong hobane ha ba etse lintho tse mpe, ba bang ba tla buoa litho tse ling tse ngata. Hlakisetša motho hore motho o pholoso ka mohau feela ka ho lumela ho Jesu Krete ka pelo ea hae. **(4)** Ha u bolella motho ka Morena Jesu, o qobe ho sebelisa lentsoe ho pholoso, empa o sebelise lentsoe, tsoalo ea bobeli. Lebaka ke hobane, lentsoe lena pholoho le na le meeelo e mengata e fapaneng bathong. Ba bang ba nahana hore mohlomong o bolela hore e be bapholoso, ba bang ba nahana hore batho ba pholositsoe kaofela ha Morena Jesu a shoa sefapanong joalo joalo. Mohlomong o ka balla motho Johanne 3:3, 'me a utloisisa hore ho tsoaloa labobeli ke eona feela tsela ea ho kena 'musong oa Ntate Molimo. **(5)** Balla motho Baroma 10:9, 'me

o mo hlakisetse hore ho tsoaloa la bobeli ke hona ho pholoso, empa o tlameha ho lumela ka pelo e seng ka kelello. Ho lumela ka pelo ke ho lumela ka tsela eo Ntate Molimo a re fang eona lentsoeng la hae. Ho lumela ka tsela ea Ntate Molimo, ke ho lumela ho Molimo Ntate Ka Jesu Krete feela, e seng batho ba bang kapa bafu. Mo balle Deutronoma 18:9-14, 1Timotia 2:5, Johanne 14:6, Liketso 4:12 le a mang. A utloisise hore o tlameha ho furalla litumelo tse ling tse ka thoko ho bibe, 'me u lule u tiisa hore ke eona tsela ea Ntate Molimo ea ho lumela ena. **(6)** Joale fa motho monyetla oa ho pholoso, o rapele le eena thapelo ea ho inehela ho Morena Jesu. Thapelo ena ha e na mantsoe a khethehileng, empa e tlameha ho kenya mantsoe a bonts'ang hore motho o amohela Morena Jesu, 'me o oa lumela hore o ile a shoa sefapanong a ba a tsoha bafung. Mohlala: Morena Jesu, ke ea o amohela bophelong ba ka. Ke ea lumela hore o ile oa shoa sefapanong ka lebaka la libe tsa ka, 'me o ile oa tsoha bafung ka letsatsi la boraro. Ke ea lumela hore ke Uena Morena le Mopholosi. Amen. U ka rapela thapelo e joalo kapa oa kenya mantsoe a hau a mang, empa ho molemo ke hore karolo ena e hlakelle. **(7)** Joale, hlaketsa motho hore o se a pholositsoe kapa hona ho tsoaloa labobeli. Ke ntho e le 'ngoe ho pholoso le ho tsoaloa labobeli. A amohele 'nete ena ka tumelo, e seng ka maikutlo, 'me a qale ho bala bibe ea hae haholo ho tloha testamenteng e ncha, 'me ha a etsa joalo o tla hola kapele moeeng. A se ke a qala ka ho bala ea khale empa a qale ka e ncha. **(8)** Joale, memela motho kerekeng, 'me o mo hlalose ka bo ho fosahala ha bo lifaha le bo lithatho joalo joalo (litaola le tse ling joalo ka bo lithakhisa) joalo joalo. 'Me motho eno o tlameha ho li furalla haeba o ne a li sebelisa, 'me a lo lichesale ho li lahla. U hopole hore ho etsa liponts'o le ho sebetsa ka lineo ho tla thusa haholo, 'me u ka sebetsa ka tsona neng kapa neng. O ka li etsa pele o buoa le motho, u ka li etsa mahareng a puo ea lona, u ka li etsa ka mora hore u bue le motho. Ho molemo ha u ka etsa ho hong ho mohlolo pele u buoa le motho hobane seno se tla mo kholisa ka pelenyana, 'me o tla mamela seo o se buoang. Lineo le liponts'o tsena tsa Moea O Halalelang li ka sebetsa ka linako tsohle ka likhato tse hlano tsa tumelo.

MELEMO EA HO EA KA LEFATS'E LOHLE: **(1)** Re thabisa Ntate Molimo hobane re nkela se bohlokoa ho eena holimo (Luka 15:1-10) **(2)** Re famana phahamiso 'musong oa hae le moputso oa khanya ea hae (Daniele 12:3), **(3)** Re nkeloa holimo le ho hlompheua leholimong (mattheu 18:1-6) **(4)** Re ateloa haholo maphelong a rona ka hohle, linthong tseo re li hlohang le tseo re li batlang (Mattheu 6:25-34) **(5)** Re ke ke ra soaba ka letsatsi la kahlolo hobane re tla be re entse mosebetsi oa Ntate Molimo ka phethahalo (1Johanne4:17), re tla ba le khotsofalo ea hore ba bang ba tsebile Ntate Molimo ka rona.

LITLAMORAO TSA HO SE E KA LEFATS'E LOHLE: **(1)** Ntate Molimo ha a no thaba ke rona, 'me mali a batho bao re neng re fuoe mosebetsi oa ho ba fihlella ka evangeli a tla batloa holim'a rona haeba ba timetse (Ezekiele 3:16-22, Liketso 18:5-7) **(2)** Re tla nkeloa fats'e 'musong oa Ntate Molimo **(3)** Mosebetsi ea rona e tla cha, ka mantsoa a mang Ntate Molimo o tla nka mosebetsi eo re e entseng e sena thuso hobane re ne re sa beha 'muso oa hae ka pele (2Bakorinte 5:9-12). **(4)** Re tla fumana boemo (position) e tlase leholimong **(5)** Lineo tseo Ntate Molimo a re fileng tsona li tla theoha ka ts'ebetso kapa li nyamele (Mattheu 24:14-30), hape re tla theoha maemong a rona bophelong bona le bophelong bo tlang. **Molumeli o tlameha ho beha evangeli ka pele ka hohle. Ka nako ea hae, ka lichelete ka matla a hae le ka tsohle. A bone hore o haha 'muso oa Ntate Molimo, 'me batho ba pholoso.**

MANYELOI

Manyeloi ke eng? Ke meea e entsoeng ke Ntate Molimo (Pesalema 148:2, 5, Bakolose 1:16). Lebitso "lenyeloi" le bolela "morumuoa". Morumuoa ena e fapane le ea Moapostola. Ea Moapostola e bolela moemeli, ka mantsoe a mang, ea emetseng ea mo romileng (e leng ambassador), ena eona e bolela ea ronngoeng (e leng messenger).

SEMELO SA MANYELOI: Manyeloi ka meea e senang nama le mali, empa le ha hole joalo, a khona ho iponahatsa joalo ka batho (Genese18:2, 16). Manyeloi ha se batho empa ke libopuoa tse fapaneng le batho, empa le oona a na le khetho le kutloisiso joaloka batho. Manyeloi a mang a leholimong, a mang a lefats'eng ha a mang oona a ntse a tsamaea leholimong le lefats'eng ho phetha thato ea Ntate Molimo (Mareka 13:32). Manyeloi ke meea e sa shoeng, ebile a halalela, ke ho bolela hore a arohane le bobé (Luka 20:34-36). Manyeloi ke basebelletsi ba Ntate Molimo (Baheberu 1:13-14). Manyeloi a ka tlas'a bara ba Molimo ka boemo le ka matla hobane bara ba Molimo (e leng rona Bakreste), re lutse le Krete letsohong le letona la Molimo Ntate, hape rona re karolo ea 'mele oa Krete (Baheberu 1:4, Baefese 1:19-23, 2:6). Bara ba baholo ho feta basebelletsi.

MEFUTA EA MANYELOI: Bibe e senola "Manyeloi a okamelang (Arc angels)", Likerubime le Lirafime, le Manyeloi a nang le matla le puso (Baefese 3:10, Bakolose 1:16), le manyeloi a mang a mangata-mangata a sebelletsang le a khumamelang (Baheberu 1:13-14, Ts'enolo 5:11). Bibe e senola manyeloi a okamelang a mabeli: **(1)** Mikaele: O senoloa e le lenyeloi la nto le okametseng manyeloi a nto 'musong oa Ntate (Ts'enolo 12:7) **(2)** Gabariele eena o bonahala e le lenyeloi le rongoang ho fetisa melaetsa ea merero ea Ntate Molimo e meholo (Daniele 8:15-26, Luka 9:21-27, 1:11-20, 2638).

LIRAFIME: lentsoe "serafime" le bolela "ea tukang". Lentsoe lena le hakahangoa le mollo o tukang oa boteng ba Ntate Molimo.

(Isaia 6:1-8). Lirafime li bonahala li na le maoto le matsoho le mapheo.

LIKERUBIME: Likerubime li bonts'oa li na le mapheo, 'me li ea fofa, li na le maoto le matsoho, empa li senoloa ka mefuta e fapaneng, tse ling li na le lifahleho tse peli (Ezekiele 41:18), tse ling lifahleho tse 'ne (Ezekiel 10:21). Boholo ba nako li ne li hlokomela lintho tse halalelang selekaneng sa khale.

MESEBETSI E AKARETSANG EA MANYELOI: **(1)** Manyeloi a etsa thato ea Ntate Molimo, mesebetsi ea ona boholo e hokahane le mosebetsi oa kreste oa ho lopolla batho (Matt1:20-24, 2:13, Ts'enolo 14:6-7) **(2)** Manyeloi a sebetsa le Moea O Halalelang le bara ba Molimo ho etsa thato ea Ntate Molimo (Baheberu 1:14, Mattheu18:10) **(3)** A sebelletsa balumeli, a shebana le phutheho ea Bakreste, a fetisa melaetsa e tsoang ho Ntate Molimo, A tlisa likarabo tsa thapelo hape linako tse ling a thusa balumeli ho hlalosa litoro le lipono. **(4)** A matlafatsa balumeli liqholotsong tsa bona (Matt4:11, Luka 22:43), a sirelletsa ba ts'abang Ntate Molimo (Pesalema 34:7) **(5)** A ahlola lira tsa Ntate Molimo le ho loants'a matemona (Ts'enolo 12:7-9, Liketso 12:23). **(6)** A nkela ba hlokahetseng ba pholositsoe leholimong (Luka 16:22).

Mesebetsi eohle eo Ntate Molimo a e etsang bophelong ba molumeli, o sebetsa le manyeloi. Ho na le manyeloi a sebelletsang ka lipholisoe (Johanne5:1-6), Ho na le a sebetsanang le likahlolo tsa Ntate Molimo le a sebetsanang le ho tlisa mahlohonolo le katleho baneng ba Ntate Molimo.

RE SEBETSA JOANG LE MANYELOI: **(1)** Ha re a khumamele (Ts'enolo 19:9-10, Bakolose2:18) **(2)** Ha re tsamae re qoqa le ona ntle le ha Ntate Molimo a re senolela kapa ha a itliahisa ho rona. **(3)** Re se ke ra ratana le oona kapa ra shebana le oona ho feta tekano, re tlameha ho shebana le Ntate Molimo joalo feela, e seng manyeloi. **(4)** Ha rea rapele. **(5)** Ha re tsamae re kopa ts'irelletso kapa lintho tse ling ho ona. Ha re li kopa ho Ntate Molimo, ena o laela manyeloi ho li phetha, ha rea tlameha ho leboha manyeloi.

LENYELOI LA MORENA: Hangata ha bibe e buoa ka lenyeloi la Morena, 'me e ngotsoe ka litlhaku tse kholo, e ebe e buoa ka Ntate Molimo ka boeena. Le hlaha ho (Genese 22:11-15, 31:11-13, Exoda3:2) le mangolong a mangata

MANYELOI A OELENG: Ho ea ka Genese 6:1-8, hona le Manyeloi a sa kang a boloka taelo ea Ntate Molimo ka tsela e tjena. Ntate Molimo o na lumelletse Manyeloi a na ho hlaha e le batho hore a tle a fetisetse melaetsa ha bobebe ho batho le ho etsa mesebetsi e meng eo Ntate Molimo a neng a batla ho e etsetsa batho. Re bona taba ena ka ho Genese 18 moo Ntate Molimo a hlahang le Manyeloi a mabeli e ka ke banna ba bararo.

Manyeloi ana a ne a ile a sebelisa bokhoni ba ona a ho nka 'mele le libopeho tsa batho eaba a ilo etsa thobalano le bomme. Bibe e re manyeloi ana a etsa bana le bomme bana 'me bana ba ona baeba liqhobane (Giants). Mme liqhobane tsena tsa etsa bokhopo bo boholo ebile tsa ruta batho liphiri tsa lefats'eng la Moea tse sa lokang. Bibe e re lefats'e le ile la tlala bokhopo (violence) ka lebaka la liqhobane tsena. Ke ka lebaka lena Ntate Molimo a ileng a timetsa lefats'e lohle ka moroalo oa metsi ka nako ea Nooe. Ke moo a neng a leka ho boloka botho bo hloekile (human race) hobane joale ho ne ho se ho na le bana ba tsoetsoeng e le karolo ea motho le lenyeloi.

Manyeloi ana Ntate Molimo o ile aa ahlola ka ho a tlamella lihlehang lefifing le lehlo, 'me a tla lula mono ho fihlella aa isa lets'eng le tukang ka mollo le sebafole (Jude 1:6-7 le 2Peter 2:4) Manyeloi ana a oele kamorao ho satane le matemona, hobane satane o oele qalong ea lefats'e, khathe ana a oele lefats'e le se le na le lilemo tse 1556.

LIABOLOSILE MATEMONA

LIABOLOSILE KE MANG? Liabolosi e ne le lenyeloi, e ne e le e mong a manyeloi a okametseng leholimong. Lebitso la hae e ne e le mphetlatlatsane, e leng hore "naledi ea mesong". O ne a bitsoa joalo hobane o ne a khanya ka khanya ea Ntate Molimo (Isaia 14:12-16). E ne e le kerubime e sirelletsang (Ezekiele28: 11-19). Lebitso satane le bolela "moqosi". O ile a kenoa ke boikhohomoso, 'me a hana puso ea Ntate Molimo. O ile a latloa ke karolo e le 'ngoe ho tse tharo tsa manyeloi a leholimo (Ts'enolo 12:3-5, 9-10). Ntate Molimo o ile a ahlola manyeloi ana kaofela a hanneng puso ea hae, 'me a a lahlela lefats'eng, a ba a ba amoha khanya ea hae. A ile a utloa ka mafu a fapaneng, a mang a hlanya, a mang a fofala, a mang a fetoha litututsebe . Diabolosi le matemona ba sa ntsane a lumelletsoe ho sebetsa lefats'eng nakoana e itseng ho fihlela Morena Jesu a a isa lets'eng la mollo qetellong. Matemona le Liabolosi ha ba hohle ka nako e le 'ngoe, ha ba tsebe lintho tsohle, ebile ha ba matla oohle. Empa a sebetsa ka likhokahano libakeng tse fapaneng, 'me a khona ho fetisetsana melaetsa. Satane (e leng lebitso le sebelisoang ho akaretsa liabolosi le matemona) o se a ahlots'oe, 'me ba salletsoe ke ho isoa lets'eng la mollo feela. Ka hona, ba tletse letsoalo le lengata, 'me ba ts'aba Ntate Molimo le bana ba hae (Jakobo 2:19, Luka10:19). Satane o ka tlas'a bana ba Ntate Molimo ka matla. Morena Jesu o mo amohile matla kaofela, se setseng feela ke bohale bo lits'ila feela ba ho thetsa batho.

Matemona ke meea (spirit beings), empa a iponahatsa ka libopeho tsa liphoofolo hangata.

MESEBETSI EA LIABOLOSİ LE MATEMONA (MESEBETSI EA SATANE): (1) Satane o halefetse Ntate Molimo, joale o batla ho iphetetsa, empa ha ho seo a ka khonang ho se etsa ho Ntate Molimo, joale o iphethetsa ka ho hlekefetsa batho hobane a tseba hore Ntate Molimo o oa ba rata. (2) Ho ea ka Johanne 10:10, mesebetsi ea satane ke ho utsoa, ho bolaea le ho timetsa. Satane o hloile Ntate Molimo le batho bohle, 'me o batla ho ba hlekefetsa ka mafu, bofutsana, lithohako, khatello le tse ling. (3) Satane o batla ho kena 'meleng ea batho, 'me a ba sebelise ho etsa bobbe ba hae, le ho hlekefetsa bona. (4) O batla ho timetsa bakreste (1 Peterose 5:8) (5) Le satane o bitsa batho feela joalo ka Ntate Molimo, 'me a ba fe matla a ho etsa mehlolo. Joalo ka ha Ntate Molimo a bitsa batho (Baapostola, baporofeta, baevangeli, balisa le baruti) le satane o bitsa ba hae (Mathuela, lisangoma, linohe, maselamese (magiscians), ba khumamelang satane le bohle ba rutang thuto e khelohileng e sa tlotlising Jesu e le eena feela Morena oa rona, tsela e isang motho ho Molimo le mopholosi (Deutronoma 18:9-14, Meetlo 19:31, 1 Johanne 4:1-6).

RE SEBETSANA JOANG LE MATEMONA/ SATANE

- 1) Re a leleka bophelong ba rona le ba batho ba bang ka matla a Krete a ka ho rona, e leng ka lebitso la Jesu (Mareka 16:17). Re ea a tlama, 'me re a leleke ka lebitso la Jesu.
- 2) Matemona ha a batle ho tsoa bathong, ka hona, ha u a leleka a ka batla ho shata. Ka hona, molumeli o tlameha ho leleka matemona ka sebete, ka tumelo e tiileng, ka likhoka tsa moea. A se ke a tsoha ha e ka aa shata kapa hona ho loana, empa a eme senna, 'me a ts'oarelle polelo ea hae ea tumelo. Matemona ha a na matla a ho hana ho tsamaea ha molumeli a a leleka ka tumelo e tiileng.
- 3) Ha re qoqe le ona, hape ha re bue le ona ntle le ha ho hloka hla, kapa ha Ntate Molimo a re senolela (Luka 4:33-36, Luka 4:41, Mareka 5:1-17)
- 4) Ha re a ts'ohe ho hang kapa hona ho a ts'aba (Luka 10:19)
- 5) Re se ke ra ba le phehello e kholo ho ona le liphiri tsa ona (Ts'enolo 2:24)
- 6) Re se ke ra thabela kapa ra lumella ponahatso ea ona (Mareka 1:23-27, 32-35)
- 7) Re se ke ra a lumella ho bua ntle le ha ho hloka hla: mohlomong re batla hore batho ba bone hore matemona ke lintho tse teng, hore ba rutehe. **'Nete ke hore, ha ho hloka hla hore matemona a bue kapa a iponahatse hore a tle a khone ho tsoa mothong (Mareka 1:23-27, 32-35). Re ka e etsa feela hore moloko ona o bone hore matemona a teng, 'me ba tsebe ho re lentsoe la Ntate Molimo ke 'nete. Le ha ho le joalo, e seke ea e ba ntho ea khafetsa kapa tloaelo ho buisana le matemona.**
- 8) Ka linako tse itseng, ho ka nka balumeli hore ba bitse matemona ka mesebetsi ea ona hore ba a leleke ka katleho maphelong a batho, mohlala; moea oa lefu, moea oa bofofu, moea oa botutu-tsebe tsoa! Joalo-joalo (Mareka 5:25 le 26).
- 9) Ha re ea tlameha ho latella lithuto tsa ona, 'me e be re qetella re li ruta liphuthelong tsa rona, mohlala; bafu ba mahaheng, kapa mang-mang o oa loea, kapa lithuto tsohle tse sa pakoeng ke Testamente e ncha bibeleng (1 Timotia 4:1-12).
- 10) Ha re ea tlameha ho lumela liqoso tsa ona tsa leshano bathong ba bang (Johanne 8:44-45), bo hore nkhono mang-mang o oa loea, kapa ke ena ea nkhamang bosiu. Matemona a khona ho nka libopeho tsa batho ba phelang kapa ba shoeleng kapa manyeloi kapa basebeletsi ba Molimo, e be a hlaha ka tsona bathong ho tliša pherekano le ho phetha mesebetsi ea ona (2 Bakorinte 11:14). Ho bohlokoa ke hore na molaetsa o fetisoang na o tsamaea le thuto ea testament e ncha na? Ha o sa tsamaee le eona, ke matemona a sebetsang. Hape, ha Ntate Molimo a lokolla motho khatellong e itseng, a keke a qosa ba bang kapa hona ho ba qolla hore ke bona ba u entseng joalo, ka hona, lipuo tse joalo li tsoa ho satane.
- 11) Re tlameha ho senya mesebetsi ea ona (1 Johanne 3:8), e leng; Ho arohanya batho le Ntate Molimo, bokuli, lefu, lithohako, khatello, bofutsana le bohloki joalo-joalo. Matemona ha a lelekuoe mothong a ka leka ho khutla, joale motho eo ea lokollotsoeng o tlameha ho amohela Morena Jesu, a tlatsoe lentsoe la Ntate Molimo le Moea O Halalelang, 'me a hole tumelong (Matteu 12:43-46).
- 12) Re se ke ra sebelisa lipuo tsa ona ha re buoa, mohlala: ra bitsa lintho bo kokoana, kapa sejeso, kapa lithokolosi. Lipuo tse tjena li hlaha ho ona matemona ka batho bao a ba sebelisang. Rona re tlameha ho bitsa matemona le mesebetsi ea ona, seo bibe e se bitsang ona.
- 13) Re se ke ra fumana ts'enolo ho tsoa ho ona, empa re fumane ts'enolo ho hlaha ho Moea O Halalelang le bibeleng feela. Mohlala, ha letemona le buoa ho hong, re se ke ra kholoa hono, empa re fumane seo re se hloka ho tsoa ho Moea O Halalelang. U se ke oa nka khato holim'a se buuoeng ke letemona.
- 14) Re se ke ra a nkela hloohong ha a re paka kapa hona ho a natsa. Mohlala: ha a buoa a re motho ea itseng o matla, kapa re ea mo ts'aba, kapa moruti mang mang o kotsi haholo. Morena Jesu o ne a sa a lumelle ho mo paka kapa ho bolela hore na ke mang. Re batle bopaki bo tsoang ho Ntate Molimo, e seng satane.
- 15) Re se ke ra etsa hore batho ba elelloe kapa ho bona matemona ho feta Ntate Molimo ka ho nna re buoa ka ona, kapa re batla hore a iponahatse lits'ebelletsong tsa rona. Ha re buoa ka Ntate Molimo le mesebetsi ea hae, re ea mo tlotlisa, ha re buoa ka satane le mesebetsi ea hae, re ea mo tlotlisa le eena.
- 16) Re se ke ra fa satane matla a maholo ho feta ao a nang le ona ka ho nna re re ke ena ea entseng lintho tse itseng maphelong a rona. Boholo ba bakreste ba etsa libe ka lebaka la ho tsamaea ka nama, kapa ba sotleha ka lebaka la ho

hloka tsebo le ho se tsamae ka tumelo. Ha mokreste a tsamaea ka tsebo ea seo a leng sona ho Krete, le seo a nang le sona, hape a tsamaea ka tumelo le bohloeki le Ntate Molimo, satane ha a na matla a ho mo etsa letho. Satane o na le matla ao a a fuoang ke mokreste feela bophelong ba hae.

- 17) Re se ke ra bona matemona ka mora ntho e `ngoe le e `ngoe. Ka mantsoe a mang, re se ke ra re lintho tsohle li etsoa ka matemona tse sa thabising. Lintho li etsoa ke batho ka khetho ea bona, `me khetho ea motho e matla ho feta letemona. Ke `nete hore matemona a ka susumetsa batho ho etsa ho hong, empa khetho ea motho e matla ho feta matemona.
- 18) Matemona a rata ho shejoa (Attention) le ho tlisa pherekano le ho tlontlolla batho bao a ba hlekefetsang, haholo ha ba le hara batho ba bang. Ka hona, re se ke ra a lumella ho nka mahlo a batho liphuthehong tsa rona. Mohlala: haeba e mong a ntse a ruta, e be letemona le se le iponahatsa ka e mong har'a phutheho, e be mohlomong o oa hoeletsa kapa o etsa moferefere, eno a isoe kantle, a lo rapelloa ke ba bang hobane balumeli bohle ba ka leleka matemona bathong, thuto eona e tsoele pele. Moruti a se ke a tlohela ho ruta eaba o shebana le letemona, hobane hona ke hona morero oa letemona leno.
- 19) Re se ke ra kenya balumeli letsoalo la hore matemona a tla kena ho bona ha a tsoa mothong e mong, ha hona moo Morena Jesu kapa baapostola kapa bibe le ka kakaretso e tjhong joalo, hono ke thuto e senotsoeng ke matemona e lekanang ho ts'osa balumeli hore ba tle ba ipulele matemona ka lebaka la letsoalo nakong eo ba bang ba lokolloang ho ona. Molumeli a se ke a ts'oha hore matemona a tla kena ho ena.
- 20) Re se ke ra etsa hore batho ba ipulele matemona ka ho ba etsa hore ba etse likhato tsa tumelo le tebello ho matemona, joalo ka ho ba hemisa re re ba tlameha ho hlatsa ho re letemona le tsoe ho bona, kapa ho tlameha hoba le ponahatso e `ngoe nameng hore letemona le tsoe. Ha se setlamo hore ho be le ponahatso e itseng mothong ha letemona le tsoa ho eena. Matemona ke meea, ka hona, ha ho hloka hore a bonahale ha a tsoa bathong. Ke `nete hore ho kaba le ponahatso, empa ha se setlamo hore e be teng. Re se ke ra leka ho tlisa ponahatso ka nama, kapa hona ho thahasella hore e be teng. Re se ke ra fa batho mehopolo kapa maikutlo a hore ba na le matemona ho bona. Motho ea pholositsoeng o tlameha ho rutoa ho bona Ntate Molimo, e seng satane. A elellloe bohlo ba Ntate Molimo bophelong ba hae, e seng ba satane. Balumeli ba etsoe **"God conscious, e seng devil conscious"**
- 21) a) Re tsebe hore letemona le ka iponahatsa ka motho, `me la buoa ka eena, e le ka tlas'a susumetso ea letemona leno. `Me ka nako eno motho eno a ka buoa lintho tse ngata a sa ikutloe hore na o ntse a re eng, mohlomong a oele kapa a ntse a eme kapa a lutse. A butse mahlo kapa a a koetse, kapa a ntse a etsa ho hong, joalo ka bo ho bilika joalo joalo. Ka nako ena a ka buoa liqoso bathong, a bitsa batho baloi, a re bafu ba mahaheng kapa mepoto e meng e mengata. Le eena a ka ipitsa moloi kapa le satanist kapa moloi kapa a buoa leshano ka eena. Motho eno ha a hlaphoheloa, e be ha a tsebe tseo a neng a ntse a li buoa kapa le ha e ba a ntse a hopola hore na o ne a ntse a re eng empa joale a se a sitoa ho paka hore litaba tseno ke linnete, ke sesupo sa hore ke letemona le neng le ntse le buoa ka ena ka tlas'a susumetso ea letemona leno e fosahetseng. Ntho tse buuoeng mono ke mashano a maholo a qositseng batho ba se nang molato. Ka hona, re tlameha ho sebetsa ka temoho ea meea, re se ke ra lumella masaoana a joalo liphuthehong tsa rona kapa hohle feela moo letemona leno le batlang ho iponahatsa teng.
- b) Empa le Eena Moea O Halalelang a ka susumetsa motho ho buoa tse mpe tseo a li entseng kapa tseo a li etsang. Moea O Halalelang o tla susumetsa motho eno ho buoa ka eena hobane a batla ho mo arohanya le bophelo bono ba sebe, a ke ke a qosa ba bang ka leshano. Motho eno ha a tloha tlas'a susumetso ea Moea O Halalelang, e be o ntse a tseba lintho tseo a neng a ntse a li buoa, ebile a ntse a tiisa hore ke `nete o ne a li etsa, ke sesupo sa hore e ne e le Moea O Halalelang ea neng a susumetsa motho eno. Mohlala, haeba ho na le motho eo e leng moloi phuthehong ea rona, e be o ts'aroa ke Moea O Halalelang, e be o oa ipolela, `me e be le ha a hlaphohetsoe o ntse a tiisa taba ea hore e ne e le moloi pele a lokolloa, hono ke mosebetsi o nepahetseng oa Ntate Molimo oa tokollo. E ne e le Moea O Halalelang ea neng a susumetsa motho eno.
- 22) Matemona a rata ho o iponahatsa moo a lokolotsoeng teng, joale re tlameha ho lemoha taba eno. Haeba moruti ea ts'oereng phutheho a rata ha matemona a iponahatsa, a tla lula a iponahatsa sebakeng sena, `me ho iponahatsa ha ona ha ho bolele hore aa tsoa bathong. A aba a mpa a batla ho tlisa pherekano feela. Ke `nete hore ho ka ba le ponahatso ha a tsoa, empa le teng a tla iponahatsa ha a lokohile ho etsa joalo, ka hona re tlameha ho ba le temoho ea meea maemong a joalo. Ha re sa thabele ponahatso ea ona, a ke ke a iponahatsa fela habonolo.
- 23) Molumeli a ka leleka matemona bathong ba bangata ka nako e le `ngoe, kapa a ka leleka matemona mothong ka bo mong. A ka a leleka ka mantsoe a tumelo feela a akaretse, kapa a ka a leleka ka likhato tse fapaneng tsa tumelo. Ka menahano, likhato kapa mantsoe a tumelo.
- 24) Matemona ka ho fapana a ka khona ho lula a le mangata mothong a le mong. A ka khona ho lula ka bongata bo se nang tekanyo. `Me a ka khona ho bonahatsa mesebetsi ea oena e fapaneng ka motho eno.
- 25) Motho a ka khona ho ipulela matemona ka ho etsa lintho tse itseng: mohlala: ho shebella lintho tse sa hloekang le ho li mamela, ka ho sebelisa lintho tse khahlanong le bibe le (mohlala: lithatho, lithare tsa setso, lithakhisa le lintho tse ling joalo joalo). Ho etsa lintho tseo e kang bo magic, ho tsamaea ka nama (Bakhalata 5:19), ho lumela lintho tse fosahetseng tse khahlanong le bibe le. Ho lumela thuto e khelohileng, ho tsamaea ka letsoalo. Ho lebella ponahatso ea matemona ho uena. Likhato tse bonts'ang tebello ea ponahatso ea matemona ha li lokolle batho empa li etsa hore

matemona a iponahatse ka bona, le haeba a ne a ntse a le sio ho bona. Joalo ka bo ho hemisoa ho thoe o tlameha ho hlatsa.

- 26)** Matemona a lokolloa ke tumelo le mantsoe le likhato tsa eona hore a sebetse lefats'eng. Mantsoe a mabe (e leng lithohako)

a buuo ka tumelo a lokolla matemona ho a phetha. Mantsoe a tlisang lefu, ho utsoa le ho timetsa a lokolla matemona ho sebetse hobane matemona a sebetsana le mesebetsi eno (Johanne 10:10). Lithohako li phethoa ke matemona, e seng Moea O Halalelang. Tumelo ea Molimo e sebetsa ka lerato la Molimo, ka hona ha e rohake, e ea hlohonolofatsa. Thohako e fapane le kahlolo ea Ntate Molimo e lokileng. Kahlolo ea Ntate Molimo e susumetsoa ke toka ea hae, 'me ha e buuo ke molumeli, e phethahatsoa ke Moea O Halalelang. Thohako eona e buuo ka pelo e mpe kapa e hlokoletseng, 'me e phethahatsoa ke matemona. Motho ea pholositsoeng a ka khona ho ithohaka kapa ho rohaka ba bang. 'Me ha thohako eno e ka phethahala, e ebe e phethahalitsoe ke matemona.

Empa le ha ho le joalo, thohako e ke ke ea khona ho sebetse mothong ea pholositsoeng ebile a tseba boemo ba hae ho kreste (Genese 12:3, Lipalo 23:21-24, , Baefese 1:3). Motho ea pholositsoeng ha a rohakehe, empa matemona a ka nka monyetla ho ena haeba a sena tsebo. Re litloholo tsa Aborahama, ka hona re ke ke ra rohakeha. Ho rohakeha ba re rohakang.

Motho ea rohakang ba bang o sebetse le matemona, 'me o itheholela boemong ba satane, ka hona, ba tla fumana kahlolo e ts'oanang le ena.

- 27)** Leraba le leholo la satane ke ho etsa hore motho a shebane le eena, a nne a lule a mo khalema a mo leleka. **Hona ke leraba la satane.** Ha molumeli a khalemetse satane, a se ke a nna a lula a shebane le ena, empa a iphanyetse seno seo e bang satane o mo etsa sona, e be o shebana le Ntate Molimo ka tumelo, e be o haha tumelo ea hae lentsoeng la Ntate Molimo.

Re tsamaea ka tlhlo holim'a satane ha re shebane le Ntate Molimo, ebile re tsamaea ka tumelo.

- 28)** Matemona a rata ho tlisa lits'oants'o tse mpe le ho buoa lintho tse mpe kelellong ea molumeli kahlanong le ba bang kapa le Ntate Molimo, e be joale a qosa molumeli ka hore ke eena ea ntseng a li buoa. **Hona ke leraba la khale la satane.** Molumeli o tlameha hore a seke a amohela mashano a satane kapa hona ho kopa ts'oarello ka ona, hape a se ke a ikutloa a le molato ha seno se etsahala hobane ha se ena ea ntseng a se etsa. A khaleme satane, hape a iphanyetse tseno tsa satane, e be o shebana le Ntate Molimo ka tumelo le ho ikaha tumelong.

- 29)** Matemona a rata ho qosa, ho bolaea, ho utsoa le ho timetsa (Johanne 10:10). A etsa mesebetsi ena ea ona a sebetse ka litoro, lipono, boporofeta ba bohata, liketselletso bathong le litsela tse ling tse ngata. Motho o tlameha ho re a se ke a nkela mesebetsi ea satane hloohong kapa hona ho shebana le eona, ho sa tsotellehe hore na e tla ka tsela e feng. Hore na ke ka lipono, litoro, boporofeta ba bohata, letsoalo la lefu kapa tsela e 'ngoe feela. Eena a lumele le ho shebana le seo Ntate Molimo a se chong feela lentsoeng la hae, 'me tsohle tse buuoang li fapane le seo Ntate Molimo a se chong, a se ke a se lumela hobane ke leshano la satane. Satane ha a na matla a ho re etsa letho ha re tsamaea ka tumelo lentsoeng la Ntate Molimo le ka sebetse. Satane o khona ho etsa seo molumeli a m lumellang ho se etsa feela.

Matemona a na le mekhahlelo e fapaneng le matla a fapaneng. Mekhahlelo ea matemona ke ena e latelang Baefesi 6:10-18. (1) Meea e busang: ke eona e matla ka ho fetisisa e rerang le ho fana ka litaelo. **(2) Meea e laolang:** eena e sebetsana le ho susumetsa babusi le balaoli ho nka liqeto tse khahlanong le Ntate Molimo joalo joalo. **(3) Meea e renang holima lefats'e la lefifi:** ena e nka monyetla moo batho ba leng lefifi ka ho hloka tsebo eleng lona leseli la lentsoe la Ntate Molimo. E sebetsana le ho thetsa batho likelellong tsa bona **(4) Meea e khopo e sebakeng:** Meea ena ke e sebetsanang le ho etsetsa batho bokhopo. **Hona le matemona a sebetsang sebakeng, lefats'eng le leatleng kapa metsing. Matemona a khona ho sebelisa batho le liphoofolo ho etsa mesebetsi ea ona e mebe.**

Matemona a lokolloa ho sebetse ha bonolo ke batho ka li aletara, haholo baloi le bo sangoma le mathuela joalo joalo. Empa le batho bao e seng baloi ba ka lokolla matemona ho sebetse mme rea hlalosa meleng e latelang, ebile boholo ba nako ba a lokolla ba sa elelloe.

MATEMONA LE BATHO BA SA PHOLOSOANG: **(1)** Matemona a ka khona ho kena meeng ea batho ba sa pholosoang, 'me a iponahatsa ka bona ho phetha mesebetsi ea ona. Boholo ba batho ba nang le matemona meeng ea bona ba mohlomi kapa literonkong kapa ke batho ba fapaneng hlooho, ba bang ba lula bo mabitleng joalo joalo. **(2)** Matemona a ka kena kelellong ea batho ba sa pholosoang, 'me a ba susumetsa ho etsa lintho tse mpe le ho ba le likhatello tse fapaneng. **(3)** Matemona a ka khona ho hlekefetsa batho ba sa pholosoang 'meleng ea bona, 'me e be ba ba le mafu a fapaneng kapa likhatello tse fapaneng tsa 'mele.

MATEMONA LE BATHO BA PHOLOSITSOENG (1) Matemona ha a khone ho kena moeeng oa motho ea pholositsoeng hobane moeeng oa hae ho lula Moea O Halalelang. Moea oa hae o nchafalitsoe ka tsoalo ea bobeli (2 Bakorinte 6:14-16). Empa le ha hole joalo, matemona a ka khona ho kena kelellong ea batho ba pholositsoeng, 'me a ba susumetsa ho etsa lintho tse itseng kapa ho ba le likhatello tse itseng kapa hona ho ba hlekefetsa 'meleng ea nama ha ba ka ba a lumella hobane ba na le matla a ho hana, le ho a leleka neng kapa neng. Ntho e ka bulelang satane lemati bophelong ba motho a pholositsoeng ke bo ho shebella le ho mamela lintho tse sa hloekang (Bafilipi 4:8). Hape matemona a ka sebetse maphelong a batho le ha a se ka hare ho bona, ba pholositsoe kapa ba sa pholoso.

Bibele e re re se ke ra fa satane sebaka le se senyane maphelong a rona (Baefese 4:27). Se ka bulelang satane lemati maphelong a rona ke lintho tse **kang lilekane tsa bosatane le li aletara**, bo ho tsamaea ka nama (Bakhalata 5:19), ho halefa ka nama le ho khoheha (Baefese 4:2628), Boikhohomoso, letsoalo le ho nka likhato holim'a lona kapa ho buoa mantsoe a lona. Ho touta le ho le ho tsitsipana, ho shebella le ho mamela lintho tse sa hloekang, ho hloka tsebo le borabele, ho se ts'oarele le ho hlokofoala, ho phela bophelo bo sa hloekang ba sebe le ho buoa mantsoe a sa tsamaeeng le seo Ntate Molimo a se buoang ka rona.

HO TSOA HA MATEMONA MOTHONG (Luka 11:24-27): Matemona ha a tsoile ho motho, a tla leka ho khutla. Joale motho ea lokollotsoeng o tlameha ho amohela Morena Jesu, a tlatsoe lentsoe la Ntate Molimo, a tlatsoe Moea O Halalelang hape a hole lentsoeng la Ntate Molimo. Letemona le tla leka ho tla le matemona a mang a mabe ka ho fetisisa ha a khutlela ho motho, 7 e emetse phethahalo, ka mantsoe a mang, le tla tla le meea e meng e mengata ho ea kamoo le khonang ka teng. Letemona ha le tsoa mothong, ho ka ba le liponahatso tse itseng linako tse ling, empa ha se setlamo hore li be teng. Linako tse ling motho a ka hlatsa, a ka bohla, a ka hoeletsa, a ka thimola, a ka sesa kapa a ka utloa a hloka ho ithoma. Ke tse ling tsa lisupo tse ka bang teng ha letemona le tsoa mothong, empa ha se setlamo hore ho be le ponahatso ka linako tsohle. Hangata matemona a tsamaea ho sena ponahatso ea letho kante ho motho, haholo ha motho eno a ntse a hola tumelong. Ha re tsamaea ka tumelo, ka lerato le ka bohloeki, re lula re beile satane tlas'a rona.

HO ROBA LIALETARE TSA MATEMONA:

Aletare ke moo moea o fuoeng tumello ea ho sebetsa. Selekaneeng sa khale ha motho a kena selekaneng le moea o itseng e le oa Ntate Molimo kapa oa satane, hangata ho ne ho tla beoa majoe kapa ho etsoe mohahonyana o monyane e le sehopotso sa hore sebakeng seno letsatsing leno ho ile haeba le tumellano pakeng tsa motho le moea ono, 'me ho tloha letsatsing leno moea ono o fuoe tumello ea ho sebetsa bophelong ba motho eno le lapeng la hae joalo joalo. Le pusong ea ntate Molimo lialetare li ne li sebetsa 'me batho ba ne ba utloisisa hore ha ba isa limpho kapa ba ea aletareng ba ne ba ea moo Ntate Molimo a iponahatsang teng hoba aletareng ke teng moo moea o fuoeng tokelo ea ho iponahatsa. Hape Aletareng ke moo semoea se kopanngoang le nama.

Selekaneng se secha ha ho sa hahoa lialetare empa lialetara li ka tolokoa e le likereke tsa bo bona kapa libaka tsa thapelo kapa moo re fumanang matla le botataisi ba semoea. Hangata bophelo ba motho ba kante bo susumetsoa le ho busoa ke aletare eo a hokahaneng le eona e le e ntle kapa e mpe.

Joale ba habo rona ka ho hloka tsebo, hangata ba ile ba ea ho matemona ba lo batla thuso ba ea ho bo sangoma le mathuela joalo joalo eaba lilekane lia etsoa, 'me ba nehela maloko a bo bona koafela joalo joalo. Joale u fumana ho se ho na le thohako e sebetsang lelokong mohlomong ea lefu kapa bofuma kapa ho se atlehe kapa ho sitoa ho fihlella katleho tse itseng joalo joalo. Empa taba ena hase hore e tjena malapeng oohle.

O tseba joang haeba hona le aletare ea matemona khahlanong le uena kapa lelapa/leloko leno. Hangata o tla bona ka ho iphetha ha bomalimabe bo itseng joalo joalo (evil pattern). Hangata ha hoba joalo ke hoba hona le meea e lits'ila e lokollotsoeng khahlanong le lelapa leno, nako tse ling e le baholo ba rona ka ho se tsebe, nako tse ling e le mesebetsi ea boloi joalo joalo.

Joalo ka motho ea pholositsoeng ke tlo u fa lintlha tsa ho roba li aletare tse bang li sebetsa khahlanong le uena kapa le ba heno. O fuoe matla ho kreste ebile o lokollotsoe lithohakong tsohle ebile ha ho na aletare e nang le matla holima hau empa u tlameha hore u nke matla (Take authority) holima mesebetsi ena ea matemona 'me o lokolle tlholo ea Kreste holima meea ena le mesebetsi ea oona, ho tloha mona u ka fumana meea ena e bolotsana e nka menyetla hoba o sena tsebo u le molumeli kapa ho se na molumeli a emang khahlanong le eona le mesebetsi ea oona. Satane ha a balehe feela ho ba o pholositsoe empa o lelekoa ka likhoka ka lebitso la Morena Jesu. U hopole le Morena Jesu, Satane o lekile ho mo hlasela, le 'bo Paulosi o ne a ntse a ba hlasela. Ke ka lebaka lena Bibele e reng re mo hanele (resist) maphelong a rona, 'me o tla re baleha (Jakobo 4:7).

Joale re heletsa li Aletare tsee tsa Matemona joang maphelong a rona le a bo rona.

1) Tsebo: Tseba hore na u mang ho Kreste, tseba hore u hlatsuoe ka mali a hae hape u fuoe matla holima meea ena. Ekanna eaba ke nnete hore meea ena e fuoe tumello ke baheno le pele o ba teng, empa tseba hore ha u se u pholositsoe Mali a Morena Jesu a lefile melato eohle 'me u na le tokelo ea ho emela uena le ba lelapa, le ba leloko.

2) Ema sekheong ka thapelo ea Borapelli (intercessory prayer) Joale thapelong ena rapela ka lipuo hape joale ebe u ema khahlanong le meea ena le mesebetsi ea teng. Nako tse ling ho oa hloka hore u bitse meea ena ka mesebetsi ea teng. Mohlala: Moea oa lefu kea u leleka lapeng, moea oa ho qhala manyalo joalo joalo. Ha u rapela ka lipuo Moea O Halalelang o tla u etella pele. Empa u rapele ka likhoka hape u rapele ka leqophe ebe o tsoelapele ka thapelo ena ka phehello ekaba lihora, matsatsi, libeke kapa likhoeli ho fihlella u bona liphetofo kapa u utloa khotso le kholiseho moeeng oa hau. Hopola hore u kene ntoeng, 'me ha oa ikemela u le mong. Hopola matla a lipuo le boporofeta. U rapele o eme holima lentsoe la Ntate Molimo le buang ka tokolloho ea hau le ea ba heno.

3) Linako tse ling u ka fumana hore meea ena e fuoe tumello ea ho sebetso ka lebaka la libe tsa baholo ba rona kapa tsa rona, joale rapela thapelo ea pako le boikokobetso haeba uena u butse lemati ka sebe, kapa emela ba heno ka pako mesebetsing ea lefifi eo ba e entseng ka ho hloka tsebo kapa ka lebaka la borabele. Joalo ka Morena Jesu fela ha a rapella baetsalibe a ema sekheong bakeng sa bona le uena ba rapelle u eme sekheong bakeng sa bona. (Isaiah 53:12). Ho etsa sena ho tla hlokisa meea ena matla hobane joale u tla bo kentse lelapa/ leloko lena tlasa mali a Morena Jesu 'me melato e se hlakotsoe (Job22:30) hobane meea ena e ile ea fuoa matla ke mesebetsi eno ea lefifi. Taba ena e ntse e ts'oana le ea Aborahama ha a rapella sodoma le Gomorrah, le rona re fuoe matla a ho ema sekheong re rapelle ba tsoileng thatong ea Ntate Molimo, 'me ka ho Jobo 22:30 Ntate Molimo o re otlala lokolla ba molato ka lebaka la rona ba emeng hantle le eena. **Ts'ebetso ena e ka sebetso hohle moo re rapellang baratuo a ba rona ba khelohileng. Mangolo a buang ka ho rapella ba sa lumelang a mang ke ana (Luka 23:34, Liketso 7:60) Joalo ka moprista, o ema sekheong o rapella hore thato ea Ntate Molimo e etsahale.**

4) Nako tse ling ho ka hloka hlahla sehlabelo, e le sa thapelo ea boitimo, sa thoriso, mohlomong sa ho itima boroko kapa sa ho fana ka se seng se bohlokoa. Latella tataiso ea Moea O Halalelang ha u ntse u rapela.

5) Etsa Liphatlalatso tsa tokolloho le tsa mahlohonolo holima bophelo ba hau, ba lelapa le ba leloko. Lithohako li lokollotsoe ka mantsoe, le lithohonolofatso li lokolloa ka mantsoe. Joale u fane ka thoriso e matla haholo e leqophe hoba thoriso e lokolla mahlohonolo a Ntate Molimo kapele ebile ka tsela e phahameng.

6) Nako tse ling u ka hokahana le motlotsuo oa Morena Molimo eaba oa u rapella, kapa a rapela le uena kapa oa jala bophelong ba hae kapa oa li etsa kaofela tsena tse boletsoeng.

Ka thapelo ena e leqophe e tsamaea le thoriso le boporofeta le liphatlalatso, ha hona aletare ea satane e tla ema ka pela hau. Ha u ka phehella ka tsena tse ngotsoeng, li tla oa bu! 'me tokolloho e be teng.

HO PHETHA MORERO OA NTATE MOLIMO KA BOPHELO BA HAU:

Ntate Molimo o na le morero ka ngoana e mong le e mong a hae. Ho na le litsela tse tharo ka pele ho motho tseo a ka li tsamaeang. Ke tsela eo Ntate Molimo a mo khetheseng eona, ke tsela eo motho a ka ikhethelang eona le tsela eo satane a ratang hore motho a e tsamae. Morero oa Ntate Molimo o amana le ho tliša molemo bathong ba bang le ho haha 'muso oa hae, morero oa motho ke o fihlella seo a se ratang bophelong ba hau. Morero oa satane ke hore motho a fetohle se khahlanong le Ntate Molimo, mohlala: sehloa, letaoa, sekoeta, senooe, lethuela, sangoma joalo joalo. Morero oa motho le oona ha o oa fosahala ha feela o se khahlanong le oa Ntate Molimo kapa o sa setise oa Ntate Molimo. O fosahetseng ke oa satane.

MONA RE SHEBANA LE MORERO OA NTATE MOLIMO KA NGOANA OA HAE: Morero oa Ntate Molimo ka ngoana oa hae, ke ho haha 'muso oa hae le ho o bonahatsa lefats'eng. 'Musu o hola ha batho ba pholoso ebile ba hola moeeng le ha thato eohle ea Ntate Molimo e phethahala. Thato ea Ntate Molimo ke hore batho ba pholoso, bakuli ba fole, bahloki ba thusoe, likhutsana li hlokomeloe le ho etsa lintho tse ling tse tlišang molemo maphelong a batho. Morero oa Ntate Molimo ka bana ba hae o oela tlas'a likarolo tsena tse peli tse akaretsang, e leng Marena le Baprista (Ts'enolo 1:6). Marena ke ba ts'ehetsang ka lichelete le limpho tsa bona, baprista ke ba ka sehloohong khasong ea evangeli. Joale ho tle mesebetsi e meng e bohlokoa joalo ka bo borapelli, ea bo ho thusa bahloki, ho hlabolla, ho hlokomela likhutsana le maqheku joalo joalo. Bana bohle ba Ntate Molimo ba na le karolo eo ba e bapalang 'musong oa Ntate Molimo. (Baroma 12:5-9). Mohlala ke hore Ntate Molimo o batla hore bana ba hae ba mo emele mesebetsing eohle e lefats'eng, joalo ka bo ho ba lingaka, li akhente, bo rapolotiki, ba ahloli, ba hoebi, ba li papali (sports people) le tse ling. Seo a se batlang ke hore u emele 'musu ho seo u se etsang hape u hahe 'musu ka mesebetsi oa hau.

PITSO LE TS'EBETSO (CALLING AND FUNCTION)

Ha ho tluoa morerong oa Ntate Molimo, hona le pitso le mesebetsi (calling and function). U ka bitsetsoa ho ba mots'ehetsi oa evangeli ka lichelete, eaba u etsa likhoebo tse ngata tse fapaneng e le ts'ebetso ea hau. Ts'ebetso e tlameha ho ts'ehetsa pitso. U ka bitsetsoa lineong tse hlano tsa Morena Jesu e le pitso ea hau, eaba hape u tlo kena khoebong kapa mesebetsing o mong e le ts'ebetso ea hau, 'me sepheo sa mesebetsi ono e le ho ts'ehetsa pitso ea hau. U ka bitsetsoa ho ba morapelli kapa ea khumamelang e le pitso ea hau, eaba u etsa mesebetsi e meng e le ts'ebetso ea hau molemong oa ho ts'ehetsa pitso ea hau. **PITSO E KA HOLIMO HO TS'EBETSO: Pitso e tsoa ho Ntate Molimo 'me ke boikarabello boo Ntate Molimo a bo fang motho, boo motho a tlamehang ho bo phetha ha a le lefats'eng ha ts'ebetso eona e ka ea fetoha nako le nako empa molemo oa eona ke ho ts'ehetsa pitso ea motho.**

MOLUMELI O FUMANA MORERO OA NTATE MOLIMO JOANG: (1) O tlameha ho batlana le Ntate Molimo ka oona

(Jeremiah29:13, Mattheu7:7-9). **(2)** Morero oa Ntate Molimo o senoloa hanyane ka hanyane, joale molumeli a ts'epahale ka bonyane boo a bo senoletsoeng **(3)** h o o tseba ho fapane le ho o phetha. Ho o phetha ho nka ho utloa Ntate Molimo letsatsi le letsatsi, 'me u etsa seo o fuoeng boikarabello ba ho se etsa. Ha molumeli a tsamaea le Ntate Molimo ka katamelo, morero oa hae e tla ba karolo ea mehopolo le maikutlo a molumeli. Molumeli o tla utloa a batla ho etsa seno seo Ntate Molimo a se batlang. Le ha a ka fuoa boporofeta, kapa a ba le litoro kapa lipono ka morero oa Ntate Molimo, empa o tla lula e le karolo ea maikutlo le mehopolo ea hae.

MOLUMELI O PHETHA MORERO OA NTATE MOLIMO JOANG: (1) Molumeli o tlameha ho ba le bophelo ba boinehelo bo sa khaotseng. **(2)** O tlameha hoba le tsebo le kutloisiso ea lentsoe le litsela tsa Ntate Molimo **(3)** O tlameha ho phela ka tumelo le sebete le litholoana tsa moea. **(4)** O tlameha ho tsamaea ka bohlae le ka nako ea Ntate Molimo, hape e be motho ea ikokobelitseng ka hohle. **(4)** A shebane le mosebetsi oo Ntate Molimo a mo ts'epileng ka oona, 'me a se ke a ipapisa le ba bang. **(5)** A phele bophelo ba teboho le ho ananela seo Ntate Molimo a se entseng bophelong ba hae, a se ke a tletleba kapa hona ho tata ho feta tekano **(6)** A koetlele seo a se bitselitsoeng. Mohlala, haeba e tloba ngaka, a koetle ka boitelo. **(7)** A se ke a ema khahlanong le batho ba sebelisoang ke Ntate Molimo haeba a sa ba utloisise. **(8)** A kene kerekeng e phelang, 'e tsameang le Ntate Molimo ka Moea, 'me a se ke a ba le melingoana e meng ka pele ho eena.

KOETLISO EA NTATE MOLIMO: Ntate Molimo o fetisa bana ba hae koetlisong pele ba ka sebelletsa ka tsela eo a ba bitselitseng eona ka botlalo. Ka nako ea koetlisa, Ntate Molimo o tlosa tse ka thibelang ngoana oa hae ho phetha morero oa hae. Mohlala: ho ba bitselitsoeng ho tla ts'ehetsa 'muso oa hae ka lichelete, o tlosa lerato la chelete le boikhohomoso joalo joalo. Ho ba bitselitsoeng boetapele ka kerekeng, nakong ena Ntate Molimo o tlosa lerato la ho tlotleha (e leng ho hlompheua ka tsela e phahameng haholo) le bo takatso ea leruo joalo joalo. Koetliso ena e ama bophelo ba nama le ba moea. E ka kenyelletsa hape ho ea sekoalong ho ea ithutela seno seo o hlohang ho ba sona. Nako ea koetliso e tsoa ho Ntate Molimo le ho mamela ha motho.

LINTHO TSE KA U THIBELANG HO PHETHA MORERO OA NTATE MOLIMO: (1) Boikhohomoso, ho phela sebe le ho tsamaea ka nama (Bakhalata 5:16-22), Borabele, ho hloka tsebo ea lentsoe le litsela tsa Ntate Molimo, ho tsamaea ka letsoalo le lipelaelo, ho hlokofoa le ho se ts'oarele. Ho tata le ho ba botsoa ho ka o setisa haholo. Ho lula u ema khahlanong le mosebetsi oa Ntate Molimo le bao a ba sebelisang, ka mantsoe kapa ka liketso le ho rohaka. (Baroma 12:4, Jakobo3:9-13).

KAHLOLO EA NTATE MOLIMO: (1Peterose 4:17): Ntate Molimo ke moahloli e moholo oa batho bohle, ba pholositsoeng le ba sa pholosoang. Molumeli o tlameha ho tseba Ntate Molimo ka mahlakore a hae ohle hore a tle a tsamaee ka katleho le eena. A mo tsebe e le Ntate ea lerato, hape a mo tsebe e le moahloli ea hlohang ho ts'ajoa. Ntate Molimo o re ahlola khafetsa ha re ntse re tsamaea le eena re le bana ba hae. Kahlolo ea Ntate Molimo ho bana ba hae ke khalemo ea motsoali ho bana, 'me ke molemong oa ho re thusa hore re phele bophelo bo mo khahlisang. Kahlolo ea Ntate Molimo ho bana ba hae e tsamaea ka tsela e latelang:

(1) Ntate Molimo o buoa le rona bo'ngoeng ha re fosa, e kaba ka bibe, ka mehopolo, ka toro kapa pono, empa e ba lekunutung. **(2)** Ha re sa mamele, o senola litaba tsa rona tse soabisang bathong ba fokolang ka palo **(3)** Haeba re ntse re sa mamele, o li senola bathong ba bangata **(4)** Haeba ntse re sa mamele, o buoa le rona ka maemo, a ka koala mamati a mang kapa a thatafatsa maemo a mang mababi le rona **(5)** Haeba ntse re sa fetohe, o tla re theola maemong ao a re fileng ona **(6)** Haeba re phehella ka bophelo bo lits'ila, re tla itlosa tlas'a ts'irelletso ea hae, mohlomong matemona a qale ho re hlekefetsa ka mafu le maemo a teteletsang le lintho tse ling tse joalo, 'me re fumane lira tsa rona li se lina le matla holima rona. **(7)** Haeba molumeli a ntse a sa bake ka nako ena, Ntate Molimo a ka tlosa ba bang lefats'eng pele ho nako hore ba se ke ba qetella ba lahlehetsoe ke pholoho ea bona, empa ba bang a ka ba tlohela ba phehella ka bophelo bono ba bo rabele hofihlella ba lahleheloa ke pholoho ea bona, taba ena e tla tsoa qetong ea Ntate Molimo le kholong ea molumeli eno le bothateng ba pelo ea hae.

PAKO LE PUSELLETSO: Haeba molumeli a ka itekola, 'me a baka mekhoeng ea hae e mebe, Ntate Molimo o tla mo ts'oarela, 'me a mo buselletse seo e bang se ne se mo lahlehetse. Empa puselletso ea hae e tla tsoa ho Ntate Molimo le hore na molumeli eno o itela ha kae ho batla Ntate Molimo. Ba bang puselletso ea bona ha e na ho ba beha moo ba neng ba le teng pele, ba bang e ka ba beha teng, ba bang ba ka feta boemo boo ba neng ba le ho bona. Ho tsoa hore na molumeli o itela joang.

MOLUMELI O TLAMEHA HO PHELA JOANG: Molumeli o tlameha ho phelela Ntate Molimo ka boikokobetso bo boholo le ho mo ts'aba. A mo rate haholo le ho mo ts'aba, 'me a mo hlomphe haholo. A tsamae thoko le bobbe, 'me a se ke a khaotsa bophelo ba hae ba boinehelo. E be motho oa 'nete pela Ntate Molimo, 'me ha a mo foselitse, a kope ts'oarelo a se ke a iphapanya.

KAHLOLO EA NTATE MOLIMO HO LEFATS'E (E LENG BATHO BA SA PHOLOSOANG): Kahlolo ea Ntate Molimo ho lefats'e ke karohano e sa feleng le Ntate Molimo lets'eng le tukang ka mollo le sebafole. Empa le ha hole joalo, Ntate Molimo o rata hore batho bohle ba pholoso, 'me ho se ke ha ba le ea mong ea timelang (1Timotia 2:3-6). Empa bohle ba hanang Morena Jesu maphelong a bona ba lokeloa ke lets'a la mollo.

SEBE (Baroma 6:14)

Lentsoe, “sebe” le bolela “ho etsa seo e seng thato ea Ntate Molimo”. Ho na le mefuta e `meli ea libe, ke libe tseo motho a li etsang (**sins of commission**), mohlala, ha motho a etsa bohloa kapa bosholu. Hape hona le libe tseo motho a sa etseng seo a tlamehang ho se etsa (**sins of omission**). Mona ke haeba motho a tlameha ho etsa ho hong, eba ha a etse seno, mohlala, ho se be le bophelo ba thapelo, ho se ts`oarele joalo joalo. Tlas`a mefuta ena hona le likarolo tse fapaneng tsa libe. Ke libe tsa liketso, ke libe tsa puo le tsa menahano. Tsa liketso ke ho etsa liketso tse sa lokang mahlong a Ntate Molimo, tsa puo ke ho buoa tse sa lokang mahlong a Ntate Molimo, `me tsa menahano ke ho lumella menahano e sa lokang kelellong ea hau mahlong a Ntate Molimo. Ho ba le monahano o sa lokang kelellong ea hau ha se sebe, empa ho e lumella ebile u nka likhato holim`a eona ho fosahetse. Satane le eena a ka akhela mehopolo e fosahetseng likelellong tsa rona, empa hase sebe ha mohopolo o mobe o hlaha kelellong ea hau, empa ha u ka e lumella hore e lule kelellong ea hau u oa fosa. Tsela ea ho hlola mehopola e sa nepahalang ke ka ho thuisa lentsoe la Ntate Molimo, ho le tlatse kelellong ea hau le ho le buoa ka molomo. Ha u e loants`e ka ho shebana le eona ebe u lula u e khalema khafetsa, ho etsa joalo ho tla u kenya litlamong feela. **Sebe se ts`oana le nooa ea tlhoare (phython), nooa ena e ea o thatela, e o robe masapo, e u koenye ha e qeta e u hlatse. Sebe se senya bophelo ba motho, ebe qetellong o tlo sala a lahlehetsoe ebile a sulafalletsoe. Se ea thetsa hobane se bonahala e ka se monate ka nako eno, empa litlamorao tsa sona lia baba. Libe tsohle li metso e meraro: Ke ho khala ha mahlo, ho khala ha nama le boikhohomoso. Libe tsohle li hlaha metheong ena (1Johanne 2:15-17).**

Libe ha li lekane ho Ntate Molimo. Libe tsohle li mpe, empa ha li lekane ka boima ho Ntate Molimo (1Johanne 5:16-18). Hona le libe tse isang motho karohanong le Ntate Molimo le tse sa mo ising karohanong le eena. (Temaneng ena, ho boleloa karohano le Ntate Molimo ha hothoe lefung. Mona ke lefu la moea, `me le ka tlisa litholoana tsa lefu nameng, mohlala, bokuli, lefu pele ho nako nameng le tse ling tse mpe). Ka mantsoe a mang, motho ha a phela libeng tsena o lahleheloa ke kutloano le Ntate Molimo, `me o qala ho ba thoko le Ntate Molimo, `me haeba a sa lokisi litaba tsa hae le Ntate Molimo, o tla qetella a lahlehetsoe ke pholoho ea hae, ka mantsoe a mang, a shoele moeeng. Libe tse isang motho karohanong le Ntate Molimo ke tse senolang bothata ba pelo ea motho. Mohlala, Ho se ts`oarele, boikhohomoso, bohloa, borabele, bosholu, lipolao, botaoa le tse ling tse hlahang ka ho **bakhalata 5:16-22, 1Bakorinte 6:9-12, Ts`enolo 21:8** le litemaneng tse ling. Ke tlo hlalosa libe tse hlahang litemaneng tsena ka bon`goe: **Bohlola:** ke ha motho ea nyetseng kapa ea nyetsoeng a etsa thobalano ka ntle ho lenyalo. **Bofebe:** Ke thobalano bathong ba sa nyalanang. **Bootsoa:** ke ho rekisa `mele. **Ho rapela medimo ea bohata. Boloi:** ke ho loa le ho sebelisa lithatho. **Lehloeo:** ke ho hloea ba bang. **Mona:** ho monela ba bang. **Bohale:** ho halefela ba bang le ho ba harsh. **Likhang le liphapang le likhaohano:** ho se tsamaea ka bon`goe. **Mohono:** ke mona le ho se thabele katleho ea ba bang. **Lipolao:** ho bolaea ba bang. **Botaoa:** ho taoa. **Meharo:** ke ho khala. **Bonyollo:** ke ho ja ho feta tekano. **Ho jana maotoana:** ke botabana (homosexuality). **Bosholu:** ho utsoa ka litsela ka ho fapana. **Lits`ebo:** ke ho seba ka ba bang ka sepheo sa ho ba senya seriti le ho bua ba bang hampe. **Leshano:** ke ho se bue nnete le ho hloka bots`ephehi ka litsela tsohle. **Mangolong ana Paulosi o bua ka bophelo ba motho ea sa pholosoang, `me oa hlakisa hore rona ka hobane rese re hlatsuoe, re pholositsoe, ebile re le `musong oa Ntate Molimo re se ke ra phela bophelo bona bo tjena hobane re thakhsitse nama le litakatso tsa eona (1 Bakorinte 6:11, Bakhalata 5:24). Joale haeba molumeli a iphumana a oele kapa a sokola ka tse ling tsa libe tsena, a ee ho Ntate Molimo ka tumelo, a bake a kope thuso ea hae ebe joale e o etsa qeto ea hore o tlohella mesebetsi eno ea nama. Ha `mamorao retlo ruta ka ho tsamaea ka tlhoho holima sebe thutong eona ena.**

Motho ea pholositsoeng ha a lokela ho phehella ka bophelo ba sebe e le bophelo ba hae (lifestyle of sin). Ka mantsoe a mang, haeba motho ea pholositsoeng a phehella ka libe tse kang tsena, a ka qetella a thatafetse pelo haholo hobane o etsa se khahlanong le semelo sa hae, hape o ithatafalletsa Moea O Halalelang ea re thusang hore re se ke ra oa sebeng. Moea O Halalelang o leka ho buoa le molumeli ka makhetlo, ka litsela tse fapaneng pele a etsa sebe se itseng. **Ka mantsoe a mang, motho ea phehellang ka libe tsena o tla thatafala pelo ho fihlella eena a itlosa pela Ntate Molimo. Ntate Molimo a keke a mo leleka empa motho ke eena ea tla itlosa pela hae. Bala thuto e hlahlamang e hlalosang ho koeneha ea sebe se sa ts`oareloeng ho utloisisa taba ena hantle. Taba ena hase hore e etsahala ka pelenyana feela, Ho ka nka nako ho thatafala pelo,**

LIBE TSE KHOLO HO FETA TSOHLE: Libe tse kholo ka ho fetisisa tse bileng li ikhethileng ke tsena tse latelang. Sa pele ke sa ho hana Morena Jesu kapa ho mo koenehela ha u ile oa mo tseba. Sa bobeli ke sa ho se ts`oarele (**Mattheu 18:21-35**) (**Mareka 11:25**). **Sebe se seng se kotsi se bulelang libe tse ling mamati ke sebe se boikhohomoso (Jakobo 4:6-7, Maele 18:12). Ntate Molimo o theola ba ikhohomosang empa o hauhela ba ikokobetsang.** Boikhohomoso bo etsa hore motho a ts`epe boena le matla a hae a nama, a hana melato ea hae, a rate ho tlotleha mahlong a batho, a its`irelletse ka leshano moo a batlang ho sirelletsa seriti sa hae, a ipapise, a monele ba bang le tse ling. Boikhohomoso bo etella ho oa pele. Boikokobetso bona bo etella phahamiso pele.

LIBE TSE SE NANG KOTSI E KHOLO: Libe tse ke keng tsa thatafatsa motho habobebe ke tseo a li etsang ka ho se elelloe kapa ka lebaka la bongoana moeeng. Tsena ha li amane le bothata ba pelo ea hae, empa li amana le kholo ea hae. Le ha hole joalo, molumeli o tlameha ho sebetsana le libe tseno hobane ha a sa sebetsane le tsona pelo ea hae e ka thatafala.

HO THATAFALA HA PELO: Haeba molumeli a phehella ka bophelo ba sebe, o qala ho thatafala pelo. Ka tsela e tjena. Haeba molumeli a etsa sebe lekhetlo la pele, o ikutloa ka hare ho eena hore ha a etsa hantle. Ha a kopa ts'oarelo ho Ntate Molimo, o tla khutlela kutloanong le Ntate Molimo. Haeba a se etsa hape, o tla utloa a se hantle moeeng oa hae, 'me ha a kopa ts'oarelo, o tla ts'oareloa. Haeba a se etsa hape le hape, o tla ikutloa a se a sa ts'oenyeha haholo ha a se etsa, hona ke sesupo sa hore pelo ea hae e ntse e thatafala. Haeba a fihlella boemo ba hore a etse sebe ebe ha a sa utloa letho ho eena le mo ts'oenyang, ke sesupo sa hore o se a thatafetse pelo, 'me ha a sa khona ho utloa Ntate Molimo hantle. Boemo bona bo kotsi haholo, 'me molumeli o tlameha ho khutlela ho Ntate Molimo ka pelenyana, 'me a lokise litaba le eena. Haeba a sa lokise litaba le Ntate Molimo, 'me a boela kutloanong le eena, o tla iphumana a se a khona ho etsa libe tse ling habonolo, 'me letsoalo la Ntate Molimo le se le tloha ho eena. Ha hoba tjena, Ntate Molimo o tla tlameha ho mo ahlola ka tsela e boima, moo a lekang ho mo khutlisetsa tseleng. A ka senola litaba tsa hae bathong ba bangata, a ka thatafatsa maemo a hae, a ka itlosa tlasa ts'irelletso ea Ntate Molimo 'me a hleketsoa ke matemona kapa a ka mo nka, a mo tlosa lefats'eng pele ho nako ea hae, e le hore a se ke a qetella a lahlehetsoe ke pholoho ea hae, e be lebitso la hae le tlosoa bukeng ea bophelo, e be o qetella a fumana tsuo e tla fuoa ba sa lumelang, e leng lets'a le tukang ka mollo le sebafole. Ba bang bona a ka ba lumella hore ba khaohane le eena ho ea ka khetho, kholo le bothata ba lipelo tsa bona 2Bathesalonika 2:11 le 12. Joale, molumeli o tlameha ho hlokomela pelo ea hae ka hohle hohle, a e boloke e le bonolo (sensitive) haholo ho Ntate Molimo. **Ho thatafala pelo hase ntho e etsahalang ka pelenyana. Ho ka nka nako motho a ntse a thatafala ho fihlella a ipona ase a le thoko le Morena. Rona re tlameha ho bona hore re boloka lipelo tsa rona ka hohle hohle (Maele 4:23).**

Taba ea sebe esale e le nto a le balumeling ba bibeleng. Mona Moapostola Paulosi o hlalosa nto a e kahare ho balumeli ka ho Baroma 7:19-25. Le Moapostola Peterose o bua ka eona ho 1 Peter 2:1. Baheberu 12:4 le eona e hlalosa nto a ena ekahare ho balumeli. Le bukeng ea 1Bakorinte 3, nto a ena re e bona e hlakile. Ntoa ena ha e qale balumeling ba hona joale empa esale e le teng ho tloha bakreseteng ba pele. Molumeli ha a hlale sebe ka qeto feela e its'etlehang holima matla a hae, le hoja qeto e le bohlokoa. O tlameha ho rutoa ho tsamaea ka tlhoho holima sebe, 'me ke seo re tlo shebana le sona thutong ena.

Semelo sa nama.

Nama eo re phelang ka hare ho eona ha e so lopolloe. Bible e ea hlakisa hore e tla lopolloa ha Morena Jesu a tla. Baroma 8:23. Joale nama e khotsofatsoa le ho feptjoa ke sebe, 'me ha e sa thakhisoa, molumeli o tla iphumana a lula a oela libeng.

SEMELO SA NAMA

(1) nama e ea ipatla (selfish) (2) nama e ea ikhohomosa (3) nama ha e nke boikarabello (blameshift) (4) nama e ea khala (lustful)

MOLUMELI O OELA SEBENG JOANG (Jakobo 1: 13-18). Molumeli o tlameha ho utloisisa hore ha se Ntate Molimo ea mo lekang kapa ho mo susumetsa ho oela sebeng. Ntate Molimo ha a fe bana ba hae limpho tse joalo. Eena o fa bana ba hae limpho tse ntle feela. Ntate Molimo ha a eke (tempt) motho ho mo lia sebeng, empa o leka (test) tumelo ea motho ho mo matlafatsa. Ho eka motho ke ho mo khoatha bofokoling boo a nang le bona hore a qetelle a oele sebeng, mohlala ke ho nonosa motho joala, ea neng a noa pele a pholoso, hore a qetelle a oele sebeng sa ho noa hape. Ntate Molimo eena ha a re leka, o re fetisa boemong bo itseng hore tumelo ea rona e phethahale, Jakobo 1:2-9. (Mohlala ke oa ho lekoa ha Aborahama, Genese 22, Goliata e ne e le teko ho Iseriele, empa e ile ea bonts'a boholo ba Ntate Molimo ha Davida a 'molaea, joalo, joalo.

Molumeli o oela sebeng ka mabaka a latelang. (1) Ha a tlosa mahlo a hae ho Ntate Molimo, ebe o itumella hore a hoheloe ke ntho e mpe, ebe e tsosa litakatso tsa nama tse sa nepahalang, ebe joale molumeli o nka khato holim'a tsona. Sena ke sona seo Jakobo a se bolelang ha a re motho o huloa le ho hoheloa ke litakatso tsa hae. **(2)** Molumeli o lula a na le khetho ka linako tsohle pele a etsa sebe, 'me o etsa sebe hobane a khethile ho se etsa. **(3) Le satane a ka eka motho ho etsa sebe, empa bible e ea hlakisa hore motho o ntse a na le khetho le ha a ekoa ke satane, 'me a ka khetha ho se etse sebe. (James 4:7-9) (1Peter 5:8-9).**

LITLAMORAO TSA SEBE: (1) Sebe se utsoa kutloano (fellowship) le Ntate Molimo. 'Me thabo, khotso le sebete seo re bang le sona ka lebaka la kutloano le Ntate Molimo lia nyamela ha sebe se kene pakeng tsa rona le eena. **(2)** Sebe se etsa hore motho a lahleheloe ke matla (Authority) a moea le a nama. Mohlala, samsone le ba bang. (Samsone o ile a lahleheloa ke matla a hae, 'me

a sitoa le ho phetha morero oa Ntate Molimo ka lebaka la sebe (Baahloli 13-17)) **(3)** Sebe se theola molumeli maamong a hae `musong oa Ntate Molimo (demotion). **(4)** Sebe se bulela satane lemati bophelong ba motho. Ntho e bulelang satane lemati bophelong ba molumeli ke ho hloka tsebo le sebe. (Mohlala ke oa Davida ha a nka mofumahali oa motho, ebile a susumetsa hore motho eno a bolaoe ntoeng hobane a ts'aba hore monna eno o tla fumana hore Davida o entse hore mosali oa hae hore a be `meleng. Ha monna enoa a qeta ho bolaoa ntoeng, Davida o ile a nka mosali enoa a monyala. Empa ngoana eno ea hlahleng ka bohloka o ile a shoa. Eaba Ntate Molimo o lopolla boemo bono ka mora hore Davida a kope ts'oarelo, a ba a hlalisa Solomone ka Davida le `me eno (Bathsheba). Empa ho tloha letsatsing leno khotso e ile ea baleha lelapeng la Davida, ngoana e mong oa hae a beta ausi oa hae, eaba e mong ena o bolaoe eno ea betileng ausi oa bona. Ngoana oa hae, Abosalome a tsohela Davida matla, a leka ho nkela Davida `muso oa hae, Davida a qetella a ile ntoeng le Abosalome ngoana oa hae. Abosalome a bolaoa ntoeng ke sesole sa Ntate oa hae, joale taba ena ea lula Davida ha bohloko. Empa tsena tsohle li qalile ka mora sebe sa hae. Ka mantsoe a mang, sebe sa hae se ile sa bulela satane lemati, `me a khona ho tisa pherekano lelapeng la Davida. **Litaba tsena kaofela li fumaneha ho 2Samuele 11-19. Mohlala ke oa mokreste ea ka etsang sebe sa bofebe (thobalano pele ho lenyalo) eaba o ts'oaroa ke Hiv. Ntate Molimo o tla mo ts'oarela ha a kopa ts'oarelo, empa a ka iphumana a tlameha ho phela ka hiv, kapa a tlameha ho holisa ngoana a sale monyane haeba o ile a ba `meleng. Empa le ha hole joalo, Ntate Molimo a ka folisa mokreste hiv ea bakileng e le ka `nete, ebile a lumela Ntate Molimo hore a mo folise.**

Ntla eaka ke hore ho ka ba le litlamorao tse sa tlohang kapa tse ka liehang ho tloha kapa tsa liehisa morero oa Ntate Molimo bophelong ba motho ka lebaka la sebe. **(5)** Sebe se beha motho tlas'a kahlolo ea Ntate Molimo. Ntate Molimo o tlameha ho ahlola sebe ka lebaka la toka ea hae. Kahlolo ena ho motho ea pholositsoeng ke khalemo ea motsoali ho ngoana oa hae **(6)** Sebe se etsa hore motho a seke a phetha morero oa Ntate Molimo ka bophelo ba hae. Mohlala ke oa marena a mangata a Iseriele le ba seleaneng se secha, joalo ka bo Judas joalo joalo. Ba bangata ha ba phethahatsa morero oa Ntate Molimo ka botlalo maphelong a bona ka lebaka la sebe.

**MOLUMELI O TSAMAE A JOANG KA TLHOLO HOLIM`A SEBE: (1)** O tlameha ho its'etleha holim`a mohau oa Ntate Molimo.

Ka mantsoe a mang, a its'etlehe holima matlafatso ea Moea O Halalelang e teng bophelong ba hae, e mo tsamaisang ka tlhoho holim`a sebe. A seke a leka ho loants'a sebe ka matla a hae ka nama (Baroma 6:14) (Bafilipi 2:12le 13). **(2)** Molumeli o tlameha ho utloisisa hore sebe ha se karolo ea semelo sa hae. Semelo sa hae sa `nete, ke sa ho loka le khalalelo (Baefese 4:24). Sebe ke ntho e hlahang ka ntle ho eena. Ka hona, a elelloe semelo sa hae sa ho loka le khalalelo (righteousness conscious) ho feta ho elelloa sebe (sin consciousness). A se ke a lula a ntse a nahana ka sebe kapa a ts'ohile hore o tla etsa sebe. Ha a nahana ka ho loka le khalalelo ea hae, o tla e phela habobebe. **(3)** Molumeli a utloisise hore o shoele sebeng. Ka mantsoe a mang, o arohantsoe le sebe. Sebe hase karolo ea moea oa hae (Baroma 6:1-15). Lefu le bolela karohano, ka mantsoe a mang, ho shoa nqeng ea sebe, ke ho arohang`oa le sebe. **(4)** Molumeli a nchafatse kelello ea hae (baroma 12:1 le 2). Molumeli o etsa sebe ka lebaka la kelello e sa nchafalang kapa ho tsamaea ka nama. Ka mantsoe a mang, eena o nts'itsoe lefats`eng, empa o ka fumana hore o ntse a na le lefats`e ka hloohong. Le ha motho eane oa khale a se a shoele, o ka fumana hore kelello e ntse e nahana joalo ka motho eana oa khale linthong tse ling. Joale, u tlameha ho nchafatsa kelello ea hae, `me a nke qeto ea hore o khaohana le sebe. **(5)** Molumeli a behe nama tlas'a taolo ea moea oa hae o nchafalitsoeng. Nama ena le litloaelo tse mpe hobane eona ha e so lopolloe. Moea o nchafalitsoe ka tsoalo ea bobeli, empa nama eona e tla lopolloa ha Morena Jesu a khutla. Ka hona, nama e tlameha ho beoa tlas'a taolo ea moea. Sena re se etsa ka khetho re its'etlehele mohaung oa Ntate Molimo le ka khetho. **(6)** Molumeli o tlameha ho ba le bophelo ba boinehelo bo sa khaotseng (e leng ba thapelo, lentsoe le boitimo). Bophelo ba boinehelo bo re boloka kopanong e matla le Ntate Molimo, `me le ha re etsa liphoso tse nyane, o oa re thiba. Bo etsa hore lipelo tsa rona li lule li le bonolo ho eena. **(7)** Molumeli e be motho oa `nete mahlong a Ntate Molimo. Ka mantsoe a mang, a be joalo ka khalase. Haeba a sokolo ka ntho e itseng, a kope thuso ho Ntate Molimo ka boikokobetso ba `nete. Ka ho etsa tjena, o tla lula a fumana mohau oa ho hlola boemo bono, `me a keke a oa sebeng, Jakobo 4:6. Haeba a oele sebeng, a kope ts'oarelo, a se ke a iphanya feela (1 Johanne 1:9). **Molumeli ha a qeta ho kopa ts'oarelo ka sebe seo a se entseng, a lokise moo a sentseng moo ho khonahalang. Mohlala: haeba o ne a utloisitse e mong bohloko, a tsamae a lo kopa ts'oarelo ho eena. Haeba motho e ne e le lesholu pele a pholoso, o tlameha ho khutlisa lintho tsa bosholu ha a se a pholositsoe. Tsamaiso ena e sebetsa hohle moo ho nang le pako le ts'oarelo ea libe. Molumeli o tlameha ho lokisa moo a khonang ho lokisa teng. (Restitution)** **(8)** Molumeli a tsamae ka lerato le boikokobetso. Ha molumeli a tsamae ka lerato a ke ke a iphumana a oele sebeng. Sebe se tsamae le ho ipatla (self). Joale, motho ea tsamaeang ka lerato, ha a tsamae ka ho ipatla, empa o batla tsoelopele ea ba bang pele ho ea hae.

KELELLO: Molumeli o tlameha ho sebetsana le kelello ea hae haholo ka ho e nchafatsa ka lentsoe la Ntate Molimo (Baroma 12:1-3). Kelello e bohlokoa haholo kholong ea mokreste. Kelello ke lemati le isang moeeng oa motho. Satane ha a batla ho lia mokreste, o akhela mehopollo e fosahetseng kelellong ea molumeli (2Bakorinte 10:3-6). Ntoa ea molumeli e kholo e kelellong ea hae. Kelello e sa nchafatsoang e tla thibela motho ho tsamaea le Ntate Molimo ka botlalo (Baroma 8:6-10). E ka fumana bothata ba ho lumela lentsoe la Ntate Molimo, kapa ea fumana satane a khona ho e fa mehopollo e mebe joalo joalo. Ka hona, molumeli o tlameha ho ipha nako e ngata a shebane le lentsoe la Ntate Molimo le lintho tse bomolimo. A se ke a lumella lintho tsohle hore li kene kelellong ea hae ka ho itumella ho li shebella le ho li mamela haeba li sa hloeka (Bafilipi 4:8). A shebelle le

ho mamela tse lokileng feela. Ka ho etsa tjena, kelello ea hae e tla lula e elelloa lintho tsa Ntate Molimo feela, `me e sa elelloe letho la lefats`e le la satane. Tsela ea ho nchafatsa kelello le ho tlosa mehopolo eo satane a e behileng kelellong ea motho, ke ho buoa seo Ntate Molimo a se buoang ka rona lentsoeng la hae, e seng hore o shebane le mehopolo eno e be o lula o e khalema kapa o ikutloa o le molato ka eona.

Linako tse ling batho ba ba le mathata le boitshoaro bo seng hantle kapa ba be le likhathello tse seng hantle tseo ba sa tsebeng na li tsoa kae. Joale o ka fumana hore hona le metheo e fosahetseng karolong ea kelello. Mehlala ke Ena **1) Motho o ka fumana a eba le khalefo e sa laoleheng le bohloko (bitterness) kapa a lula a tetebetse.** O ka fumana hore motheo ke bohloko bo ileng ba hlhela motho khale boo a sa sebetsanang le bona. Le haeba a se a lebetse se mo hlahetseng, empa li pontsho (symptoms) otlala fumana ntse li le teng. Tharollo ke hore motho a tsoarele a fole mme khalefo eno e tla feela. **2) Motho o ka fumana a ipatla, a batla ho hlhella** khathe bothata ke ho ikutloa a le monyane ka hare (insecurity le low self esteem). Tharollo ke ho ipona le ho ikamohela ka moo Ntate Molimo a mo bonang ka teng a khaohane le li pehelo (standard) tsa batho. **3) Motho a ka iphuma a sokola ka mona,** lebaka ka hobane a sa tsebe na eena ke mang ho Krete le hore na ena o fuoe eng ke Ntate Molimo. Tharollo ke ho fumana na ena o abetsoe eng ke Ntate Molimo, `me a shebane le Ntate Molimo le ho phetha morero oa hae ka bophelo ba hae. **4) Nako tse ling motho a ka iphumana a le letsoalo.** Lebaka ke hobane tumelo ea hae e fokola. Tharollo ke ho tseba lentsoe la Ntate Molimo le ho le beha tshebetsoeng. **5) Motho a ka iphumana a ikhohomosa ebile a batla ho lula a hlhelletse,** lebaka ke hoba motho ha a so itsebe ka botebo hore na ke mang ho Krete. Tharollo ke ho itseba hore na ke mang ho Krete le hore na o na le eng ho eena, me sena se tla mo thusa hore a lule a ikokobelitse a sa hloke ho ipaka bathong (to prove a point). **6) Linako tse ling o ka fumana hore motho o ile a nenoa (rejection),** joale o fumana a sa khone ho amohela lerato kapa hona ho tsèpa batho ha bobebe. Motho ea tjena o tlameha ho amohela lerato la Ntate Molimo, `me a tsebe hore Ntate Molimo o mo amohetse hape le ena a ikamohela `me a utloisise hore hase lerato la batho le bontshang bohlokoa ba hae. **7) Motho e mong o ka fumana a sitoa ho amohela ho tsoa ho Ntate Molimo kapa ho tsamaea le eena hantle ka lebaka la ho itsoa (condemnation).** Motho ea tjena o tlameha ho amohela tsòarelo ho tsoa ho Ntate Molimo hape le eena a itsòarele. Ha a fokola, a ee ho Ntate Molimo ka sebete ka mefokolo ea hae ebe o kopa thuso le ho amohela mohau otlala mo thusa ho tsoa mefokolong eno. Motho a ka i nkela fatshe a inyatsa (inferiority) ekaba ka labaka la ho i tsoa ka lebaka la boitsoaro, libe le mefokolo ea hae. Tharollo ke ho amohela tsòarelo ea Ntate Molimo le ho itsòarela le ho ipona ka moo Ntate Molimo a o bonang ka teng. **8) E mong o rata ho (laola) controla batho le ho lula a supa liphoso (criticize).** Motho a tjena hangata o ikutloa a le monyane ka hare ho eena `me o fumana khotsofalo le ho ikutloa a le bohlokoa ha e le eena a laolang kapa ha a supa liphoso kapa a nyenyefatsa ba bang. Motho ea tjena o tlameha ho fumana boleng (value) ea hae ho Krete le ho fumana seo ena a se fuoeng ke Ntate Molimo.

Ha molumeli a sokola ka boitshoaro bo liehang ho fetoha, a shebe na ha ana liqhobosheane (strong holds) kelellong ea hae. Haeba a li fumana, a sebelise lentsoe la Ntate Molimo ho li heletsa ka ho itseba na ke mang ho Krete le hore na Ntate Molimo o reng ka eena e be o bua lentsoe le Ntate Molimo holima boemo bono le hore o lokollohile ka lebitso la Morena Jesu. Kelello e nchafetseng e khona ho etsa thato ea Ntate Molimo hantle le ho koalla satane mamati oohle hoba lintho tsena tseo re buileng ka tsona e kaba mamati ho liabolosi hore a khone ho sebela motho ka leshano le ho leka ho sebetsa bophelong ba hae.

Re se re hlakisitse thutong ea liabolosi le matemona hore ho na le li aletara tsa matemona tse ka etsang liqhobosheane (strong holds) semoeeng, me re hlalositse na re li heletsa joang. Empa mona ekaba liqhobosheane tsa kelello, kapa tsela eo kelello e seng e bona lintho ka teng (mind sets) ' me tsena li ka sukulisa haholo hoba ha li hloke thapelo feela hore li tlohe empa li ka nka bo ho fola maqebeng a khale le ho itseba le ho matlafatsa tumelo joalo joalo. Taba e bohlokoahali e ntse e le hore re kope thuso ea Moea O Halalelang hore a re bontshe hore na metheo ea rona e fosahetse kae re tle re tsebe ho e lokisa le tseo e bang ha lia ngoloa mona.

NAMA: Molumeli o tlameha ho beha nama tlas`a taolo ea moea oa hae o nchafalitsoeng. Re hlalositse taba ena thutong ea bara ba Molimo. Nama re e thakhisa ka ho shebana le Ntate Molimo ka thapelo, lentsoe le boitimo re its`etlehlile mohaung oa hae. Joale nka qeto ea hore u khaohana le sohle se sa nepahalang (Mareka 9:42-49). Ke tlo o ngolla mefuta ea libe tseo batho ba sa li elelloeng habonolo. Lits`ebo, ho ja hofeta tekano, botsoa, bosholu (ka tsela ea piracy, e leng ho bo ho kenya `mino oa motho ho computer ea hau empa u sa u patella, kapa lifilimi tseo u sa li rekang kapa tse ling tse joalo empa monga tsona a sa lumela), ho se rapele, ho ipatla, ho batla ho bonahatsa `mele oa hau ho bohle ka ho apara hampe, bo gay le bo lesbian (e leng ho jana maotoana) ho ba boi le tse ling. Bona hore u khaohana le libe tsohle, `me u phelela Ntate Molimo ka khalalelo.

HO HLOLA HO ITSOA (How to overcome condemnation)

Nama ka lebaka la boikhohomoso ba tlholeho, le hoja e khalla sebe, ha e se fumane joale e ea itsoa (condemns themselves). Sena ke karolo ea nama e sa lopolloang.

Joale, joalo ka ngoana oa Ntate Molimo, re tlameha re hlokomele kotsi ena haholo ea ho itsoa hobane taba ena ekaba matla haholo haeba molumeli a sa tsebe ho e hlola.

Ho itsoa ke ho ikahlola le ho ikutloa u sa lokeloa ke letho letsoang ho Ntate Molimo le ho sitoa ho its`oarella. Ho bonolo ho ts`oarella ba bang ho feta ho its`oarella. Judas o ile a ipolaea ka lebaka la ho itsoa. Peterose o ile a lla habohloko a ba a khutlela mosebetsing oa hae oa pele ka lebaka la ho itsoa. Batho ba bangata le bahlanka ba Morena ba oele ebile ba tlohetse pitso tsa bona ka lebaka la ho itsoa.

Motheo oa ho itsoa ke boikhohomoso. U sitoa ho amohela hore ke uena ea ka etsang seno. Joale u sitoa ho its`oarella.

Boikhohomoso ke ho ts'epa bo uena.

Joale re ka hlola ho itsoa joang.

(1) Amohela ts'oarelo ho tsoa ho Ntate Molimo. **(2)** Le uena o its'oarele. **(3)** Tseba hore Ntate Molimo ha a na ho fetola tsela eo a ikutloang ka uena le ho fetola morero oa hae ka uena **(4)** rapela khahlanong le mehopolo ea ho itsoa hoba e tsoa ho satane **(5)** beha boemo bono kapa sebe seno kapa takatso eno ho Ntate Molimo ka thapelo hape o ipehele meeli e ka u thusang hore o se ke oa khutlela sebeng sena habonolo.

BALUMELI BA KA ETSA SEBE HOBANENG

- 1)** Takatso tse mpe (lust). Ena ke karolo ea motho oa nama oa kantle 'me molumeli o tlameha ho rutoa ho e hlola le ho e laola.
- 2)** Maemo a bophelo. Ha ntse re hola nama ea rona e ba le litlhoko tse itseng, 'me joale ha ree so fumane tsela e nepahentseng ea Ntate Molimo ea ho araba litlhoko tseno, ka baka la khatello ea nama le boima ba litlhoko tseno re ka iphumana re oele sebeng. Haholo tsa ho ratuoa le tsa thobalano. Ke litlhoko tsa tlholeho tseo re tlamehang hore li arajoe lenyalong.
- 3)** Boemo (situations). Nako tse ling maemo ao re iphumanang re le ho oona a ka re isa sebeng. Mohlomong a tlala, kapa tsietsi eo re leng ho eona. Ke ka lebaka lena Morena Jesu a reng re rapelle hore re se ke ra oela molekong. Sena se ka etsahala haholo ka lebaka la boemo.
- 4)** Satane. Le satane a ka re eka hore re oe sebeng empa hangata o hloka lemati le tumello e tsoang ho rona ho etsa sena.
- 5)** Lefats'e. Lefats'e leo re phelang ho lona le na le tsamaiso e khahlanong le Ntate Molimo le 'muso oa hae, joale u ka fumana balumeli ba etsa sebe ka lebaka la susumetso (influence) ea lefats'e lena leo re phelang ho lona le batho ba pela rona.
- (6)** Batho le metsoalle; balumeli hangata ba oela sebeng ka lebaka la susumetso e tsoang bathong le metsoalleng ea bona.

HO LAOLA TAKATSO EA THOBALANO LE HO HLOLA SEBE SA THOBALANO KA THOKO HO LENYALO

Ena taba e ka fana ka bothata haholo hobane e amana le litlhoko tsa botho tse tebileng haholo. Banna ba fuoa takatso ena e le holimo ka tlholeho, ha basali bona ba fuoe takatso ea ho ratoa. Ntate Molimo o ne a rerile hore sena se phethahale lenyalong. Joale taba ena e ba bothata ka mabaka a latelang.

1) Nakong ena eo re phelang ho eona, lenyalo ha le tle ha bobebe, ebile ha le cheape, empa nama le litlhoko tsona ha li qale ho phela ha batho ba nyalane feela, tsona li tla phela le ho itseka motho a nyetse kapa a sa nyala. Ka hona ho ka ba boima ho emela lenyalo. Ke lebaka leo Paulosi a itseng ho betere ho nyala ho fapana le ho cha. Ka mantsoe a mang, takatso e bapisoa le mollo haholo mothong oa monna (1 Bakorinte 7:9)

2) Taba ena e thata hobane ke tlholeho. Libe tse ling ke tseo motho aka ithutang tsona ha a ntse a hola, khathe ha e le thobalano, motho o bopelletsoe le likaralo tsa eona ho hlaha tsoalong ea hae, 'me ha a ntse a hola likarolo tsena li qala ho ba le litlhoko. Ka hona taba ena e thata hobane ke tlholeho.

3) Nama e ea e thabela; taba ena e thata hobane nama e ea thabela. Joale ha motho a se na tsebo ea eona ho ka ba thata ho iphaphanya.

EMPA LE HA HOLE JOALO, NTATE MOLIMO O RE KETSO ENA E ETSOE LENYALONG FEELA. JOALE MONA KE TLO U BONTS'A HORE NA U KA LAOLA MAIKUTLO ANA JOANG LE HO HLOLA SEBE SA THOBALANO KA THOKO HO LENYALO

Sena sebe ha se na linatla (champions) hobane se amana le litlhoko tse tebileng tsa botho, ke ka lebaka lena Paulosi a reng re seke ra leka ho se loants'a empa re se balehe (1Bakorinte 6:18-20).

1) Its'etlehe mohaung oa Ntate Molimo. Mohau ke matlafatso ea semoea e tla u thusa ho laola nama le karolo ena.

2) Beha meeli. Sebe sa thobalano kantle ho lenyalo se itshetleha haholo holima boemo (atmosphere). Joale qoba libaka tse u ka fumanang u oele ha bobebe.

3) Baleha: nako tsohle Paulosi ha a bua ka sebe sena o re balumeli ba balehe hobane sena ho thata ho se loants'a. Hobane se amana le litlhoko tsa rona tse tebileng (1 Bakorinte 6:18-20). Joale ho baleha ke ho sutha ha u utloa e ka u ka fokola. Se ke oa leka ho loana, empa baleha. 'Mele oa fetoha ha o se o le tlasa teko ena, 'me o ka iphumana o oele habobebe.

4) Se ke oa itsoa ha u utloa litakatso. Hona ke tlholeho. Ha se sebe ho ba le litakatso.

5) Nako le Ntate Molimo le bophelo ba boinehelo. Se re hlalositse pele hore bophelo ba boinehelo bo re thusa ho laola nama le sona sebe sena. Haeba u utloa e ka u se u sokola haholo, e ba le nako e ikhethileng le Ntate Molimo (retreat) ea thapelo le boinehelo ekaba lihora, matsatsi kapa libeke. E tla u thusa haholo tabeng ena.

6) Haeba u utloa ehlile u hloleha, e ba le motho kapa batho bao u ka buang le bona ba u thusa tabeng ena, hape oa ba le boikarabello ho bona. 'Me ha u ka iphumana u oele ho sona u se ke oa itsoa empa u bue le Ntate Molimo, u kope ts'oarelo hape u balehele ho eena. U hopole Ntate Molimo o ts'oarela sebe sena joalo ka mesebetsi e meng feela ea nama, empa e le hore feela se ka ba le litlamorao tse boima nako tse ling tsa bo bana le mafu le ts'enyeho ea maikutlo (emotional damage).

HO SEBETSANA LE MOENA EA OELENG SEBENG (Bakhalata 6:1)

- 1) Mo atamele ka bonolo, se ke oa mo seba kapa oa mo kobisa kapa oa mo hobosa.
- 2) Haeba u utloile litaba ka motho, fumana lehlakore la hae. U ka fumana hore taba eno ke nnete, kapa e ekelitsoe kapa ke leshano. Taba ea moqosi e lula e ka nnete ho fihlela moqusuo a ipuelella(Maele 18:17).
- 3) Haeba motho a o fositse. Mo late lekunutung pele, haeba a u hlola lata ba bang ba fokolong pele u ka isa taba ena ka pele ho kereke Mattheu 18:15-20.
- 4) Coverer ngoaneno u se ke oa mo tsolisa ka lits'ebo hape o mo bonts'e mohau 1 Peter 4:8. Jakobo 2:13. Mo thuse ho tla pakong ka lerato le lekunutu, u tla mo hapa habonolo ka ho etsa tjena. U se ke oa ahlola le ho supa menoana, empa u thuse oa heno ka lerato le bonolo (mattheu 7:3-5)

SEBE SE SA TS`OARELOENG (Mattheu 12: 31-33)

Thuto ena ea sebe se sa ts`oareloeng e tlisitse pherekano e ngata bathong ka lebaka la tlhaloso e fosahetseng. Thutong ena re tl'o hlalosa ka botlalo hore na sebe se sa ts`oareloeng ke eng hape na ke bo mang ba ka se etsang.

Sebe se sa ts`oareloeng ke ho nyefola Moea O Halalelang****SEBE SE SA TS`OARELOENG (HO NYEFOLA MOEA O HALALELANG) HA SE HO ETSA TSENA TSE LATELANG:

- 1) Ha se ho oela sebeng se itseng, hobane re ka ts`oareloa ha re kopa ts`oarelo (1Johanne 1:9).
- 2) Ha se ho etsa sebe u tseba hore ke sebe, boholo ba libe li etsoa li tsejoa hore ke libe ka lebaka la ho fokola ha nama, empa le tsona li ea ts`oareloa ha motho a baka ka `nete.
- 3) Ha se ho tsamaea ka mesebetsi ea nama (bakhalata5:19), mesebetsi ea nama e mebe empa e ea ts`oareloa ha motho a e furalla, me a baka.
- 4) Ha se ho bua hampe ka Moea O Halalelang ka lebaka la ho hloka tsebo.
- 5) Ha se ho bolaea motho
- 6) Ha se ho ba le monahano o mobe ka Moea O Halalelang, kapa Morena Jesu kapa Molimo Ntate. Satane o rata ho akhela menahano e mebe likelellong tsa batho, e be o ba qosa ka hore ke bona ba e nahanneng.

Sebe se sa ts`oareloeng ha se sebe se shebaneng le Moea O Halalelang, empa se shebane le Morena Jesu. Ho nyefola Moea O Halalelang ke sebe se shebaneng le Morena Jesu. Ka tsela e tjena, mosebetsi oa Moea O Halalelang ke ho paka Morena Jesu e le Mora oa Molimo, joale ho nyefola Moea O Halalelang ke ha molumeli a ila a tseba Morena Jesu e le Mora oa Molimo, me a hola tsebong le tumelong ea hae, a tsebana le Morena Jesu ka botebo le ka `nete, ebe o oa mo latola kapa o oa mo furalla. `Me ebe o tseba ntho eo a e etsang. O etsa sena ka kelello e felletseng. Ho mo latola kapa ho mo furalla ha se ho oa sebeng kapa ho tsamaea ka nama. Empa ke ho mo tlohela o ea tumelong e ngoe, kapa ho mo tlohella ebe o latela liabolosi kapa lefats`e. Le ha hole joalo, sebe sena se ka etsoa ke bakreste ba itseng feela. Ha se bohle ba ka khonang ho se etsa sebe sena.

TOKISO EA PHOSO PHETOLELONG EA BAHEBERU 10:26

Baheberu 10:26-32: Temana ena e na le phoso e nyane ea phetolelo, `me e qetella e fana ka moelelo o sele. Ke tla e hlalosa, ke be ke e lokise hore u tle u fumane kutloisiso e nepahetseng ea karolo ena. Temana ena ea 26 e re "Ha re etsa libe ka boomo, re se re fumane tsebo ea `nete...". Mona u hloka ho hlakeloa hore mongoli o ne a sa bue ka libe tse ngata, empa o ne a bua ka sebe se le seng feela. E tlameha hore e balehe tjena , "Ha re etsa sebe ka boomo, re se re fumane tsebo ea `nete...". O ne a bua ka sebe sa ho koenehela Morena Jesu. Buka ena ea Baheberu, e ngolletsoe batho ba neng ba amohetse Morena Jesu, joale ka baka la ho hlekefetsoa ka lebaka la tumelo ea bona, ba ne ba se ba batla ho khutlela tumelong ea bona ea pele, e leng ea bojuta, empa ba se ba tseba hore Jesu ke Mora oa Molimo. Joale Mongoli o ne a ba khalema, a ba eellisoa kotsi ea ho koeneha ba tseba `nete. Ela hloko hore temana ea 29 e ntse e hlalosa hore ea hatikelang Mora oa Molimo tlas'a maoto a hae, a bile a rohaka Moea O halalelang , na o lokeloa ke kotlo e ka kang. Ho hatikela Mora oa Molimo tlas'a maoto, ke ho latola Morena Jesu le ho mo furalla, ka ho etsa joalo, motho o rohaka Moea O Halalelang.

TSELA EA HO TSEBA HA MOLUMELI A SA SE ETSANG

Pele ke hlalosa hore na ke bakreste ba joang ba ka se etsang, ke tlo hlalosa hore na molumeli a ka tseba joang ha a se a se etsa, hobane satane o rata ho qosa balumeli ka hore ba se entse, empa ba sa se etsa.

- 1) **Haeba mokreste a ena le ts'oenyeho ea hore na o se entse kapa a na le mehopolo e joalo, ke ho bonts'a hore ha a se etsa.** Motho ea se entseng a ke ke a batla letho le Ntate Molimo, ebile a ke ke a ts'oennngoa kapa a ts'oha taba ea hore na o se entse.
- 2) **Le ha hothoe mokreste o phetse bophelo bo lits'ila ba sebe, ebe o batla ho khutlela ho Ntate Molimo, ke ho bonts'a hore ha a se etsa.** Motho ea se entseng a ke ke a batla ho khutlela ho Ntate Molimo. Ha motho a se etsa, Moea O Halalelang o oa mo tlohela, 'me a ke ke a batla kapa a ts'oennngoa ke letho la Ntate Molimo. Molumeli o tena a batla ho khutlela ho Ntate Molimo hobane Moea O Halalelang a ntse a mo susumelletsa ho khutla.
- 3) **Ha se sebe se ka etsoang ka phoso.** Haeba mokreste a eba le menahano kapa lits'oants'o tse nyefolang Moea O Halalelang kapa Morena Jesu kapa Molimo Ntate kelellong ea hae, ha ho bolele hore o se entse, hobane satane o rata ho bua lipolelo tse lits'ila likelellong tsa bakreste, me a ba qose ka hore ke bona ba ntseng ba li nahana. Ha mokreste a ba le mehopolo e joalo, o tlameha hore a se ke a kopa ts'oarelo ka eona hobane ha se eena ea ntseng a bua lintho tseno, ebile a se ke a its'oenya le hanyane feela ka eona. Eena a e tlose kelellong ea hae feela ka lebitso la Jesu. (2Bakorinte10:4-6) Ha a qeta ho e khalema, a iphapanye feela me a itsoelle pele ka bophelo, ka thabo le khotso ea Morena. A se ke a lula a e khalema ha e hlaha hape a se ke a ikutloa a le molato, empa a iphapanyetse eona. Satane o batla bakreste ba shebane le eena. **Hona ke leraba la hae.** Khathe bakreste ba tsamaea ka tlhoho holima satane ha ba shebana le Ntate Molimo.

KE BAKRESTE BA JOANG BA KA SE ETSANG? (bala Baheberu 6:4-7)

- 1) **Ke ba kileng ba bonts'oa leseli: ho bonts'oa leseli ke ha Moea O Halalelang a bonts'a motho hore ke moetsalibe me o hloka ho pholoso.**
- 2) **Ke ba kileng ba latsoa neo ea leholimo: Ho latsoa neo ea leholimo ke ho amohela Morena Jesu. Joale, batho bana ba ile ba bonts'oa hore ba lefifing, eaba ba amohela Morena Jesu, ba'a pholoso.**
- 3) **Ba be ba abeloa Moea O Halalelang: Ho abeloa Moea O Halalelang ke ho tlatsoa Moea O Halalelang. Ba nts'itsoe lefifing, ba amohela Morena Jesu, ba ba ba tlatsoa ka Moea O Halalelang.**
- 4) **Ba latsoa lentsoe la Molimo le monate: Ho latsoa lentsoe la Molimo le monate, ke ho hola lentsoeng le kutloisisong ea lona. Ho hola tumelong ebile ho tseba ka ho ikutloela hore lentsoe la Ntate Molimo le ea sebetsa. Ho nka lilemo tse ngata hore motho a hole lentsoeng le tumelong.**
- 5) **Ba latsoa matla a lefats'e le tlang ho tla: Ho latsoa matla a lefats'e le tlang ho tla, ke ho khona ho sebetsa ka lineo , lits'ebetso le litsamaiso tsa Moea O Halalelang. Joale hona ho bolela hore, balumeli bana ba ile ba hola tumelong ea bona ebile ba khona ho sebetsa ka lits'ebetso, lineo le litsamaiso tsa Moea O Halalelang. Ba hola linthong tsena kaofela.**

Ho thoe bana ba tjena, ba ke ke ba khona ho baka ha ba ka ba koeneha. Ho koeneha ha se ho oa sebeng se itseng kapa ho tsamaea ka nama. Ho koeneha ho nka ho thatafala ha pelo ea mokreste a holileng tumelong, ebe o qetella a furalletse Morena Jesu. Batho ba joalo ba ke ke ba batla ho baka.

Ha fela motho a batla ho baka, ke ho bonts'a hore ha a etsa sebe sena. Motho ea se entseng a ke ke a batla ho baka. **Ka ho koenehela Morena Jesu, batho ba nyefola Moea O Halalelang ea ntseng a ba pakela Jesu e le Mora oa Molimo. (Mona ea rutang a etse mohlala oa 'me ea ileng a se etsa le ntate moruti ea ileng a se etsa joalo ka ha ke o etsa bukeng ea International training centre, 'me a o etse hantle ka tsela eo ke o etsang ka eona).**

Ke Ntate Molimo feela ea ka supang batho ba se entseng. Ka kelello feela re ke ke ba khona ho tseba, ebile ha se taba ea balumeli ba bang hore ba tsebe hore na ke mang ea se entseng kapa ea sa se etsang.

BAKRESTE BA KE KENG BA KHONA HO SE ETSANG : Hona ho bonts'a hore masea le bana moeeng ba ke ke ba khona ho se etsa. Le ha ba ka re baa koeneha, ba ke ke ba khona hobane ha ba tsebe ntho eo ba e etsang. Sebe sena se nka motho ea holileng moeeng, 'me ea thatafetseng pelo haholo. Le ha ho le joalo, ke Ntate Molimo feela ea ka supang ba se entseng.

KOTSI EA HO TSAMAEA KA NAMA (Bakhalata 5:19-22): Kotsi ea ho tsamaea ka nama le ho phela bophelo ba sebe ke hore bakreste ba ka thatafala lipelo ho fihlela ba qetella ba koenehile. Ha se ntho e fihlillehang ha bonolo ho koeneha, hobane Ntate Molimo o sebetsa ka thata ho thiba mokreste ea tsoang tseleng. O leka ho mo thiba ka hohle hohle, hoo ka linako tse ling a ka mo nkang pele a lahlehelo ke pholoho ea hae. Ka ho cho joalo, ke bolela hore a ka mo bolaea a mo isa leholimong pele a koeneha (1 Bakorinte11:32

KUTLOANO LE LENYALO (DATING AND MARRIAGE)

Taba ena ea kutloana (dating) le lenyalo li tlisitse pherekano ka kerekeng ka lebaka la ho hlokoa ha kutloisiso le tsebo e hlakileng ka taba ena bibeleng.

KUTLOANO

Bibeleng, ho ea ka moetlo oa bajuda, batsoali ba ne ba khethela bana ba bona balekane. 'Me hangata, ba ne ba tla kopana mohla ba nyalanang, kapa motho oa ausi o ne a tla behelletsoa ke abuti, e be ba tlo nyalana ka letsatsi le khethiloeng. Ha se hangata batho ba ne ba tla ba likamanong tsa lerato pele ba nyalana joalo ka rona matsatsing ana. Ka hona, ha hona litemana tse ngata tse buoang ka kutloano bibeleng kapa tse e otlolang ka botebo hobane bibe e ne e shebane le Bajuda le moetlo oa bona haholo. Empa le ha hole joalo, bibe e fana ka mangolo a bonts'ang hore na balumeli ba tlameha ho ts'oarana joang kutloanong.

Lintlha tse bohlokoa tseo re hlohang ho li tseba ka kutloano (Likamanong tsa lerato).

- 1)** Taba ea kutloano e tlameha hoba lipakeng tsa batho ba pholositsoeng feela (2Bakorinte 6:14-17). **(2)** Molumeli a ka kena kutloanong feela haeba a ikemiselitse ho nyala. Ka mantsoe a mang, kutloano e tlameha ho isa lenyalong. Haeba molumeli a so be le maikutlo a ho nyala, ha a lokela ho kena kutloanong. *Ha re phele joalo ka ba lefats'e lena ba jolang, 'me ba chench batho ba utloanang le bona khafetsa.* **(3)** Molumeli a ka kena kutloanong ha feela a tseba seo morero oa Ntate Molimo o leng sona ka bophelo ba hae, hape a phethehile ho Ntate Molimo, ebile a khotsofetse ka boemo ba hae le Ntate Molimo a ntse a le mong. Ha ho bohla hore molumeli ea so kang a itseba le ho phethahala ho Ntate Molimo a kene kutloanong. **(4)** Molumeli a rapele pele a kena kutloanong ha a utloa hore ke nako le hore Ntate Molimo o mo lokollotse, a rapelle tataiso ea Ntate Molimo le bohla ba hae, le hore a fumane motho ea nepahetseng. Motho ea nepahetseng ke motho eo le tla khona ho phetha morero oa Ntate Molimo le eena. *Bibile ha e bonts'e hona le motho a le mong feela eo u mo khethetsoeng ke Ntate Molimo eo le tla nyalana le eena, empa e bonts'a hore u ka kena lenyalong le eo u mo ratang ha feela a le moreneng (a pholositsoe) (1Bakorinte 7: 39 le 40).* Empa le ha ho le joalo, Ntate Molimo o tseba motho eo le ka nyalanang le eena hore le tle le phethe Morero oa hae le eena ka botlalo, *'me linako tse ling o ntse a re khethela balekane ba rona joalo ka motsoali ea lerato ea batlang se molemo maphelong a rona, empa taba ena re tla e hlalosa haholo ha re buoa ka lenyalo. Ka hona, ho molemo hore molumeli a batlane le Ntate Molimo pele a kena kutloanong hape a emele nako ea Ntate Molimo, a se ke a tata. Ka nako e nepahetseng, Ntate Molimo o tla mo lokolla ho kena likamanong tsa lerato le molumeli e mong ha ena a shebane le Ntate Molimo.* **(5)** Molumeli a se ke a sheba bo ka ntle ba motho feela ha a kena kutloanong, empa a etse bo 'nete ba hore o kena kutloanong le motho ea ratang le ho chesehella Morena Molimo. **(6)** Molumeli a se ke a kena kutloanong feela hobane a ikutloa a le bulutu, empa a kene ka tataiso le ka nako ea Morena Molimo ka bophelo ba hae. **(7)** Thobalano pele ho lenyalo ha e ea lumelloa kutloanong kapa liketso tse ka isang thobalanong. Thobalano pele ho lenyalo e bitsoa bofebe bibeleng (1Bakorinte 6:9-12). **(8)** Balumeli ba kutloanong ba hahe maphelo a bona a moea 'moho, ba be le motheo o motle oa bophelo ba bona ba moea. Ho etsa tjena ho tla ba thusa hore ba tsitse maphelong a bona le likamanong tsa bona tsa lerato. **(9)** Molumeli o tlameha ho utloana le motho a le mong feela ka nako, 'me a mo ts'epahalle ka hohle hohle. **(10)** Balumeli ba tsebise boetapele ha ba kena kutloanong. **(11)** Molumeli a botse Ntate Molimo ka thapelo le ho emela karabo ea hae pele a kena kutloanong. A se ke a hatella maikutlo a hae haeba a hloka khotso ka taba eno, a mpa a emele hore Ntate Molimo a tiise taba eno ka makhetlo pele a itumella ho kena kutloanong eno. A se ke a kena ka lebaka la lintho tsa nama tseo a li bonang ho motho eno a reng o oa mo rata. Mohlala: eaba o shebile koloi ea hae kapa chelete ea hae. **Molumeli a etelloe pele ke Moea O Halalelang pele a kena kutloanong.**

Haeba mokreste a le kutloanong le motho ea sa pholosoang kapa ea pholositsoeng empa ea sa itellang ho tsamaea le Ntate Molimo kapa ea mo lielang sebeng sa thobalano pele ho lenyalo ebile a sa batle ho fetoha kapa ea mo tlosang pela Ntate Molimo ka tsela e fe kapa e fe, kapa ea sa tliseng molemo ho eena ka tsela e fe kapa e fe, kapa ea ka mo setisang ho phetha morero oa Ntate Molimo ka bophelo ba hae, kapa e be Ntate Molimo o senola hore ba arohane hobane hase karolo ea morero oa hae ka eena, le haeba motho eno a sena phoso, o tlameha ho arohana le eena kapelenyana hang ha a kholisehile ka taba eno ea karohano. A arohane le eena pele ba kena lenyalong hobane ha a se a kene lenyalong ba se ba tlanngoe ho phela 'moho ke lenyalo, 'me ba ke ke ba tsoa feela ha bonolo. Molumeli a emele Ntate Molimo ho mo kopanya le molumeli ea nepahetseng. A se ke a ba le qenehelo ea ho tsoela pele le motho eno ho hang hape a se ke a ts'oha hore a keke a nyaloa hobane Ntate Molimo o tla mofa motho ea nepahetseng bophelong ba hae. Balumeli ba bangata ba oele tumelong ea bona, ba bang ba iphumana ba le manyalong a teteletsang ha ba bang bona maphelo a bona a senyehile ka lebaka la ho kena likutloanong li sele. Phoso ke hore ba kene ba sa ka ba botsa Ntate Molimo ka taba eno (Mattheu 10:28-40), Deutronoma 13:6 e senola maikutlo a Ntate Molimo ho ba batlang ho o tlosa pela hae. Ke Molimo o boulelang (Exoda 20:3-6).

LENYALO:

Lenyalo le hlotsoe ke Ntate Molimo (Genese 2:18-25). A mang a mabaka ao Ntate Molimo a entseng lenyalo ka ona ke ana: **(1)** O batla hore batho ka kopano ea bona ka lenyalo ba utloisise kopano ea bona le eena (Baefese 5:29-33) **(2)** O batla hore lefats'e le tla batho ba ts'oanang le eena, 'me o khethile hore batho ba ngatafale ka lenyalo (Genese 1:26-29). **(3)** O batla hore batho ba be le bathusi le balekane ba tlo ba thusa ho mo sebelletsa le ho ja lefa la bophelo 'moho (Genese 2:18). **(4)** O batla ho re fa balekane bao re tlo natefelo ke bophelo ba moea le ba nama le bona le hore re tsebe monate le mofuthu oa ho ba karolo ea lelapa re le bana le ho ba le monate oa ho holisa bana re le batsoali. **(5)** Ntate Molimo o batla hore re be le moo re reng ke lapeng, moo re ikarabellang teng.

(6) Bible e lumella molumeli ho nyalala molumeli e mong. Ha hona temana e supang hore Ntate Molimo o khethetse molumeli e mong molekane a le mong feela lefats'eng (soul mate), empa le ha hole joalo, molumeli o tlameha ho ipha nako le Ntate Molimo le ho batlana le eena ntlheng ea molekane. Linako tse ling Ntate Molimo a ka re kopanya le balekane ba rona ka tsela e mohlolo, moo re iphumanang re sena boikhethelo. Moo re fumanang taelo ea hore motho ea itseng ke eena eo re tlamehang ho nyalana le eena. Mohlomong Ntate Molimo a ka buoa ka toro, pono, lentsoe le utloahalang kapa boporofeta ho tsoa ho moporofeta ea holileng ts'ebetsong ea boporofeta (Ntate Molimo o buoa litaba tsa manyalo le balumeli ba holileng ntlheng ea ho mo utloa feela, e seng le balumeli bohle), kapa ka tsela e 'ngoe e mohlolo (spectacular). Feela, haeba Ntate Molimo a buile le e mong, o tla e paka le ho e mong. Molumeli ha a tlameha ho lumela ho kena lenyalong feela empa eena a so kholisehe hore ke thato ea Ntate Molimo ka eena. O na le tokelo ea hore Ntate Molimo a mo tiisetse taba eno le eena. Ha a fose ha a etsa joalo. Empa le ha hona le balumeli ba utloanang feela le haeba ho se letho le mohlolo le etsahetseng hore ba utloane, ho sena toro kapa pono kapa lentsoe le utloahalang kapa boporofeta, le bona ba ka kena lenyalong. E ntse e le la Ntate Molimo le lona *(Ha re ea tlameha ho tlama batho ka hore ba tlameha ho lorana pele ba nyalana kapa ho etsahale ho hong ho mohlolo. Bible e lumella balumeli ho nyalana ha feela bobeli ba bona e le balumeli ho Krete, ha ho thoe ba lorane pele).*

Lintlha tse bohlokoa tseo re hlohang ho li tseba lenyalong la Sekreste.

- 1)** Lenyalo la Sekreste le tlameha hoba lipakeng tsa batho ba babeli ba pholositsoeng feela, e motona le e mots'ehali (2Bakorinte 6:14-16). **(2)** Lenyalo ke selekane se tlamehang ho felisoa ke lefu feela **(3)** Lenyalo la Sekreste le tlameha ho ts'oana le kopano ea Krete le Kereke ea hae, ka tsela ea hore mosali a ikokobelletse monna oa hae joalo ka ha kereke e ikokobelletsa Krete le hore monna a rate mosali oa hae joalo ka ha Krete a ratile kereke ea hae ebile a itelletse eona (Baefese 5:21-33) (Ho mo rata ho nka ho mo hlokomela, ho mo fa nako le tsotello, ho bona hore o oa thaba le ho khotsofala bophelong). **(4)** Monna le mosali e tlameha ho ba metsoalle e meholo ka ho fetisisa (best friends) hape e be ba rapelang 'moho (prayer partners). **(5)** Banyalani ha baa tlameha ho ba le metsoalle e meng ka ntle ho lenyalo ba sa ts'oaneng le bona ka botona kapa bots'ehali, bo 'me ho Ntate ea nyetseng ba tlameha ho ts'oana kaofela mahlong a hae, e be bo 'me feela, a se ke a khetholla e mong har'a bona eaba o re eno ke motsoalle oa hae ea khethehileng, le mothong oa 'me joalo feela ka bo ntate. Haeba hona le motsoalle oa 'me kapa oa ntate, e be motsoalle oa lelapa leno la banyalani, e seng e be 'me e mong e ba motsoalle oa ntate e no ea nang le molekane, e mpe e be motsoalle oa lelapa la bona. **(6)** Ea pholositsoeng ha a tlameha ho hlala molekane oa hae feela ka lebaka la hore ha a pholoso haeba ba ntse ba phelisana ka khotso lenyalong (1Bakorinte 7:12-17). Banyalani ba se ke ba timana thobalano, ntle le ka tumellano mahlakoreng a bona ba le babeli (1Bakorinte 7:5-7). Lenyalo le etsa batho ntho e le 'ngoe, ka hona 'mele oa Ntate e se ele 'mele oa 'me le oa 'me e se e le oa ntate (1Bakorinte 7:1-5). **(7)** Thobalano e tlameha ho ba lipakeng tsa banyalani feela, 'me e felle ho bona feela. Thobalano ka ntle ho lenyalo ke bohloka mahlong a Ntate Molimo. (Bakhalata 5:19-22, Baheberu 13:4, 1Bakorinte 6:9-12). **(8)** Banyalani ba tlameha ho ts'oarelana ka mehla le ho hlokomela malapa a bona, ba se ke ba beha mosebetsi ka holimo ho malapa a bona.

LITLHOKO TSE TEBILENG LENYALONG PAKENG MOTHO OA MONNA LE MOSALI:

Motho oa monna o na le litlhoko tse peli tse kholo ebile eleng tsa motheo. (1) Ke ho hlompheua. (2) Ke ea thobalano. Ka lebaka la kutloisiso ena, mosali a bone hore o hlomphe monna oa hae ka hoohle. Ho mo hlomphe ho kenyelletsa ho ikokobelletsa ena, ho mo buisa ka boikokobetso le ha ntate a kaba liphoso, a etse hore Ntate a ikutloe hore ke eena Morena ka tlung. A seke a mo seba bathong ba bang hape a mobone ele moetapele. A mo tsèpahalle. Mosali hape a bone hore o khotsofatsa molekane oa hae kamoreng. 'Me a bone hore 'mele le kelello ea hae o oa li koetlisa hore a lule a khotsofatsa molekane oa hae.

Motho oa mosali ona le tlhoko ea ho ratuoa. Ho ratuoa ho bolela ho fuoa nako. Ho hlokomeloa ka hoohle. Ho bolelloa khafetsa hore o oa ratoa. Ho fuoa limpho le chelete ke monna oa hae le ha ena a ntse ana le ea hae hobane ketso ena e tiisetse mosali hore molekane oa hae o oa morata e le kannete. Taba ena e fihla joalo kelellong ea mosali. Ho rata Mosali

ke ho mo utloisisa le ho mo mamella ka ha basali ka batho ba maikutlo. Hape ke ho mo etella pele ka ha basali ke bathusi ka hona ba hloka moeta pele eo ba tla mo thusa.

Ka hona, monna a ikoetlisetse taba ena ea ho rata mosali oa hae, 'me a etse hore mosali oa hae a khotsofale hape a ikutloe a le bohlokoa.

Banyalani ba be le nako ea ho bua hore na ba rata eng hape na ba khotsofatsoa ke eng manyalong a bona le hore na ha ba rate eng. Lipuisano li bohlokoa haholo hape li ka thiba lintho tse ngata tse sa hlokahaleng.

TLHALANO LE HO NYALA/NYALOA HAPE (DIVORCE AND RE-MARRIAGE): Ntate Molimo o hloile tlhalano (Malakia 2:14-17). Ha se morero oa hae hore batho ba hlalane. Ena morero oa hae ke hore batho ba nyalaneng ba phele 'moho ho fihlella ba hlokahala kapa Morena Jesu a khutla. Empa le ha hole joalo, hona le moo Ntate Molimo a lumellang tlhalo teng. **(1)** Ke moo e mong lenyalong a fumanoang ka bohlola. Ea sitetsoeng o lokolotsoe hore a ka hlala a ba a nyala hape (Mattheu 19: 1-10). **(2)** Kapa haeba motho a hlokahalletsoe ke molekane, o lumelletsoe ho kena lenyalong hape.

Le ha hole joalo, lintho tse ngata lia hlaha manyalong, tse ling bibeke ha e ea buoa ka tsona. Batho ba arohana ka mabaka a fapaneng. Ba bang ba otloa ke balekane ba bona, ba bang ba qabane le balekane ba bona ka mabaka a mangata a fapaneng, 'me ba qetella ba hlalane. Ba bang ba arohantsoe ke batsoali kapa ba ha lelapa joalo joalo. Kaofela maphelo a rona a ne a lobokane pele re amohela Morena Jesu. Ba bang ba hlalile kapa ba hlaloa pele ba pholoso. Empa ha motho a le ho Krete, e se e le 'Mupuo e mocha. Ka hona, tlhalo ea hae pele a amohela Krete ha e sa le ntho e teng. Ka hona, Ntate Molimo o tla mo fa molekane e mong bophelong bona bo bocha ho Krete. 'Me maemong a na a tjena, moo bibeke e sa hlakisang hore na re tlameha ho etsa joang, re tseba hore Ntate Molimo o utloisisa maemo a rona le tseo re tobanang le tsona, le hore o sebetsa le rona ka mohau eseng ka molao. Ka hona, ha rena tokelo ea ho ahlola kapa ho supa menoana ha molumeli a nyala hape, eo e bang lenyalo la hae la pele ha le ea atleha kapa hona ho mo tlama ka molao oa hore ha a tlameha ho nyala hape bophelo ba hae kaofela kapa re re a emele lefu la molekane oa hae oa pele. Ntate Molimo o tseba lipelo tsa batho, 'me o sebetsana le rona ho ea ka hore na o re fumana re le maemong a joang. Ntse re hopola hore o oa ts'oarela ha re fositse, a ba a lopolle maemo ao re keneng ho oona joalo ka ha ile a etsa ho Davida le ba bang. (Rona feela re tlameha ho kena lenyalong ka khetho le kutloisiso ea hore ha re ea ikemisetse ho tsoa ho hang tlas'a maemo a fe kapa a fe....). Empa ea tsebang Ntate Molimo e be o hlala molekane oa hae ka ntle ho mabaka kapa hobane a khalletse ho nyala e mong, o tla fumana kahlolo e boima. Ntate Molimo o re ahlola ho ea ka tsebo ea rona ho eena.

HO AHLOLA THUTO

Bibeke e re joetsa hore re ahlole thuto eo re e fuoang, re seke ra koenya lithuto tsohle feela joalo ka masea (Baefese 4:14). Lithuto tse khelohileng li ngata, me li ntse li ata ho ea pele, 'me ha molumeli a sa tsebe ho ahlola thuto, o tla iphumana a jele thuto e sele.

RE AHLOLA THUTO JOANG? Ntho ea pele eo re hlokanang ho e tseba, ke hore lithuto tse khelohileng ha li tsoe ho batho ba lahlehileng feela. Le bona batho ba pholositsoeng ba ka ruta lithuto tse khelohileng (1 Timotia1:3-8, 2Timotia2:15) Tsela ea ho ahlola thuto ke ho sheba hore na thuto e rutoang e pakoa ke testamente e ncha. Le teng ho be le mangolo a mabeli kapa a mararo a pakang thuto eno e rutoang (Mattheu18:16). Temana ena ea hore lintho tsohle li pakoe ke bopaki ba lipaki tse peli kapa tse tharo e senola tsamaiso ea 'muso oa Ntate Molimo. E hlalile pele ka ho Lipolelo 19:15, me Morena Jesu a nna a e sebelisa testamenteng e ncha. Tsamaiso ena e sebetsa linthong tsohle tsa 'muso oa Ntate Molimo. Haeba thuto e tsoa seleaneng sa khale, e tlameha hore ebe Morena Jesu ha a e emisa testamenteng e ncha kapa ebe o e tsoellisetse pele. Ha re nke mohlala ka thuto ea Sabata le ea boshome. Li hlaha seleaneng sa khale li le peli. Ha ho tlhoa thutong ea Sabata, Morena Jesu o hlakisa hore o tlele ho phethahatsa molao oa moshe (Mattheu5:17), 'me testamenteng e ncha Sabata ha se sa sebetsa (Mattheu 12:1-14, Bakolose2:16-18). Empa ha re sheba thuto ea boshome, le ha e hlaha seleaneng sa khale, testamenteng e ncha ha ho na moo Morena Jesu, baapostola kapa bibeke e e thibelang, ebile Morena Jesu o ile a bolella bafarasi hore ba etsa hantle ka ho bo nts'a (Mattheu23:23), empa a re ba se ke ba sia lerato le mohau. Le ha hole joalo, thuto ea boshome e bile teng le pele molao oa Moshe o eba teng. Re e bona ka Ntate oa rona, "Aborahama" eo rona balumeli re tsamaeang maotong a hae (Genese14:1821)(Bakhalata3:6-9) Joale tsamaiso ea bibeke ke hore, "haeba thuto ea seleaneng sa khale e sa emisoe testamenteng e ncha, e tsoela pele testamenteng e ncha e le tsamaiso ea 'muso oa Molimo. Baapostola ba Morena Jesu bukeng ea liketso ba ne ba theha tsamaiso ea kereke holima mangolo a selekane sa khale moo Morena Jesu a neng a sa bafa tsamaiso le tlhakisetso.

Mohlala: 1Bakorinte9:6-15, Paulosi o nkile thuto ena seleaneng sa khale, ea hore ba rutoang lentsoe ba ts'ehetse ba ba rutang ka limpho tsa nama, empa e ntse e sebetsa testamenteng e ncha. Joale lithuto li tlameha ho tsamaea le testamenteng e ncha bibeleng, me li pakoe ke mangolo a mabeli kapa a mararo ho bonts'a hore ke thuto e hlahang ho Ntate Molimo, me eo re hlokang ho e beha ts'ebetsong.

Mehlala ea lithuto tse khelohileng tse tummeng: (Lithuto tse khelohileng ke tseo ke li tebisitseng ka mongolo)

1 Bokuli bo hlaha ho Molimo, liketso 10:38 le mangolo a mangata ligospeleng a re joetsa hore Morena Jesu o ne a folisa bokuli hobane ele khatello ea satane.**2 Bakreste ba tlameha ho futsaneha, ke sebe ho ba morui,** testamenteng e ncha e ea re joetsa hore Morena Jesu o ile a futsaneha hore re tle re rue (2Bakorinte 8:9). **3 Ho ba le chelete ke sebe,** bibe le ha e re hoba le chelete ke sebe, empa e re LERATO LA CHELETE ke motso oa libe tsohle (1Timotia6:10). **4 Ho hloka hlahala moemeli a ka re thusang ho ea ho Molimo:** Testamenteng e ncha e re joetsa hore ha re le ho Krete re se re le ho Ntate, me re na le litokelo tsa ho bua le eena ka lebitso la Jesu, ha re hloke moemeli ekang Moshe kapa moemeli oa mofuta ofe kapa ofe. (Johanne 14:23, 16:23, 26-28) **5 Re rapela Molimo oa Ntate kapa `me mang mang:** Morena Jesu o itse ka ho Johanne20:17, Ntate ke Ntate oa ka le Ntate oa lona, ke Molimo oa ka le Molimo oa lona, o ne a bonts'a hore re se re na le litokelo tse ts'oanang le tsa hae ho Ntate. Joale ho fosahetse hore ho rapeloe Molimo oa mang mang hobane hono ho khaola `nete ea hore Ntate oa Morena Jesu, ke Ntate oa rona ka tsela e ts'oanang, thapelo eno e etsa haeka motho ea itseng o betere ho feta ba bang.

6 Molumeli o tlameha ho sotleha pele a ka tsamaea ka litl'hohonolofatso tsa Ntate Molimo: Testamenteng e ncha e re joetsa hore re se re hlohonolofalitsoe ka litl'hohonolofatso tsohle ho Krete, ho setseng ke ho ba le tsebo ea lentsoe le ho tsamaea ka lona (Baefese 1:3, Hosea 4:6). **7 Molumeli o tlameha ho hula ka thata, me a tobane le liqholotso pele a ka fumana bohlale ba Molimo:** Bohlale ba Molimo bo tlosoa ke ho tseba lentsoe la Molimo mme bo lokolloa ke ho le phetha 1 Bakorinte1:30. Krete ke eena bohlale ba Molimo ka ho rona, me ha re ka tsamaea ka lentsoe ho tloha ha re le fumana, re ke ke ra sotleha (Bakolose1:27). **8 Moea O Halalelang o oa tsamaea ha re etsa sebe:** Moea O Halalelang ke eena a re thusang ho tsoa sebeng ha re se entse, me ke eena ea re tataisang hore re khutlele kutloanong e tiileng le Ntate oa rona, Moea O Halalelang o tla lula a ena le rona ho fihlela, ha fela re ntse re le ho Krete (Johanne14:16). **7 Re ke ke ra ts'oareloa ha re entse sebe ka boomo:** Sebe se sebe, me ha re ea tlameha ho se etsa ka boomo. Empa ha re entse sebe ka boomo ka lebaka la ho fokola ha nama, kapa re sa elelloa, re tla ts'oareloa ha re ipolela libe tsa rona ka `nete, re bile re baka ho tsona (1Johanne1:9).

8 Morena Jesu o tla ka nako e itseng, Mohlala ke selemo sa 2012: testamenteng e ncha e re joetsa hore ha ho na motho ea tsebang nako ea ho tla ha Morena Jesu (Matteu24:36). **Motho ke nama feela, `me ha a hloka hahetse ho thotse tuu, me ho felile ka eena:** Testamenteng e ncha e re joetsa hore motho ke moea o phelang ka hare ho nama, `me ha a hloka hahala a pholositsoe, o ea leholimong, ha a hloka hahala a sa pholoso, o ea lihleleng, eseng mahaheng. (Mareka9:42-50, 2Bakorinte5: 1-6, Bafilipi 1:23 le 24) **9 Bakreste ba ke ke ba eba bo li- akhente, bo ra -lipolotiki le baahloli joalo joalo:** Bakreste ba tlameha ho nka maemo ana, hore ba tle ba khone ho emela `muso oa Molimo linthong tsena kaofela. **10 Ho na le batho ba khethetsoeng ho pholoso le ba khethetsoeng ho timela:** Testamenteng e ncha e ea hlakisa hore Ntate Molimo o batla hore

batho bohle ba pholosoe (1Timotia2:3-6). Morena Jesu o re re e ka lefats'e lohle, me re joetse **batho bohle** evangeli. (Matteu28:18-20) **11 Iseraele ea nama e khethehile ho Ntate Molimo ho feta lichaba tse ling:** Testamenteng e ncha e ea hlakisa hore ho Krete ha ho sana Mojuta kapa Molichaba, empa re se re le ntho e le ngoe ho Krete (Baefese2:13-18, Bakhalata 3:26) Batho ba Israele ka nama ba tlameha ho pholoso ka tsela e ts'oanang le lichaba tse ling.

12 Lineo tsa Moea O Halalelang li emisitse ho sebetsa ka nako ea Baapostola ba pele ba Morena Jesu: Testamenteng e ncha e ea bonts'a hore balumeli ba tla tsamaea ka lineo tsa Moea O Halalelang ho fihlela Morena Jesu a khutlile (Matteu 28:18- 20, Mareka 16:15-20) **Ha ho sa na baapostola kapa baporofeta matsatsing a rona:** Testamenteng e ncha e senotse hore Morena Jesu o fane ka lineo tsena tse hlano tsa baapostola, baporofeta, baefangeli, balisa le baruti ho koetlisa `mele oa Krete. Ha hona moo ho itsoeng tse ling li tla tloha. **13 Ke baetapele feela ba ka etsang mehlolo kapa ba sebetsa ka lineo tsa Moea O Halalelang:** Testamenteng e ncha e ea hlakisa hore mehlolo, liponts'o le lineo li tla tsamaea le BALUMELI BOHLE, ho sa tsotelehe hore na ke moruti kapa sehoai (Mareka 16:15-19). **14 Balumeli baka sebelisa balepi ba linako (Zodiacs):** Mona re bua ka ntho tsena tse buoang ka hore ha o hlahile neng otl'a fumana mahlohonolo a fe joalo joalo le ho sheba maphelo a batho ka linaledi. Joalo ka bo hore motho ke capricorn kapa scorpio joalo joalo. Ntate Molimo ha a lumelle taba ena hohang, `me o batla hore re itsebe ka lentsoe la hae feela. Deutronoma 18:10-14 e bua ka sena ha e hanyetsa balepi ba linako.

LITHUTO TSE HLOKANG TLHAKISO

**1 Bo `me ha ba lumelloa ho ruta ka kerekeng:** Ntate Molimo esale a bitsa bo `me ho tloha seleaneng sa khale le se secha. Testamenteng e ncha ere "Ho Krete ha hona monna kapa mosali, lekhoba kapa molokolloa, Mojuta kapa Molichaba (Bakhalata3:26-29) (1Bakorinte 11:11). `Nete ke hore, ho Krete, tsohle tseo Ntate Molimo a ka lietsang ka `motho oa monna, a ka lietsa le ka motho oa Mosali. Seo Paulosi a neng a se bolela ka ho 1Bakorinte14:34-36 le 1Timotia2:11-14 ha are ha a lumelle motho oa Mosali ho ruta, e ne e le ka lebaka la tsamaiso ea linako tseno. Ka kerekeng, bo `me ba ne ba lula lehlakoreng le leng,

bo ntate ho le leng. `Me ho ne ho rutoa ka ho botsana lipotso, ene ele tsela ea tloaelo le moetlo ea ho ruta. Joale ho nno ho etsahale hore ha motho oa Ntate a ntse a ruta, ebe motho oa `me o se a phahloha feela ka ho botsa potso, kapa ka ho hlahisa ho hong. Joale Paulosi o ne a bona ele ho hloka hlonepho ho etsa joalo, le ho se bonts'e boikokobetso, ke lona lebaka leo a neng a re bo `me ba ithute ka ho khutsa, hape ba botse banna ba bona hae ha bana le lipotso. Taba ena ha e bolele hore bo `me ha ba bitsoi ke Ntate Molimo, kapa ha ba lumelloa ho ruta. Paulosi o ne a lokisa boemo ba nako eno feela.

**2 Bo `me ha ba lumelloa ho Kenya masale kapa ho ikhabisa:** Lebaka leo Paulosi a neng a re bo `me ba seke ba ikhabisa ka mekhabiso e turu ka ho 1Timotia 2:9-11 ke hobane o ne a elelloa hore batho ba bo `me ka nako eno ba ne ba se ba apara ka tsela ea ho elelluo a le ho shejoa, me e ne e se e tletse bo bona haholo. Paulosi o ne a khalema taba eno, ea hore molumeli a seke a sheba bo kante ho feta bo kahare. Empa ha se sebe ho re motho oa `me a ikhabise, hobane Paulosi o ne a tena a ngola seno hobane boikhabiso bo ne bo se bo tsoa tseleng. Ho bolelang hore ke ntho ene ntse e etsoa.

3 Bo `me ba tlameha ho lula ba roetse hloohong:** Ka nako ea Paulosi, ho roala ha bo `me hloohong ho no ho bonts'a ho hlonepheha le ho ikokobelletsa molekane oa hae le ho bots'a hlomphe. Hona e ne ele moetlo oa bona ka nako eno. Ho roala ha bo `me hloohong hase tsamaiso ea sekreste, empa e ne e le moetlo oa sechaba seno seo Paulosi a neng a se ngolla. Ka hona, ha se sebe ha motho oa `me a sa roala hloohong ka kerekeng. **3.1 Bo Ntate ha ba tlameha hoba le moriri o moholo: Ka nako ea bo Paulosi le moetlo oa bona, moriri o moholo ho bo ntate e ne ele tlontlollo. Ke litaba tsa moetlo oa Majota, eseng lithuto tsa Sekreste. Le taba ea ho se roale ha bo Ntate ke taba ea hlonepho le meetlo.

**4 Bo `me ha ba tlameha ho tena marikhoe:** Batho ba bangata ba nka taba eno ho lipolelo 22:5. Empa seo Ntate Molimo a neng a se bolela ke hore motho oa `me a seke a leka hoba Ntate, kapa motho oa ntate a leka ho ba `me. Joalo ka li "gay le li lesbian". O ne a sa etse molao oa hore bo `me ba seke ba ba tena marikhoe. Ha hona phoso ha motho oa `me a tenne borikhoe bo etselitsoeng bo `me.

5 Ke phoso ho ja nama ea fariki: Thuto ena e hlaha melaong e neng ele meetlo ea bana ba Isiraele, eo Morena Jesu a e phethahalitseng ha a theha selekane se secha (Matteu 5:17, Matteu 15:10-12, Baroma 14:14)

LIPOTSO TSE THATA TSA BIBELE:

1) Ho etsahalang ka bana haba hloka hloka? karabo, bana ba ea leholimong hobane semelo sa sebe hase so tsohe ka hare hobona hape haba soka ba fihlela lilemo tseo ba ka ikarabellang (age of accountability). Lilemo tsena lia fapana ka ban aka ho fapana (Baroma 7:9). **(2) Caine o nyetse mang ka ho Genese 5:3-4?** Adama le Eva ba ile ba ba le bana ba bang `me kaine o ile a nyala e mong oa bana babo. Sena Ntate Molimo o ne a se lumelletse qalong hobane ene ele bona feela batho ba teng lefats'eng ka nako eno. **(3) Ntate Molimo o tsoa kae ?** Ha re sheba Genese 1:14, re bona Ntate Molimo a etsa nako. Joale rona re hlahela lefats'eng leo re leng tlasa nako `me tsohle lefats'eng lina le qalo le qetello. Joale likelello tsa rona li nahana ka tsela ea nako hobane re hlahetse nakong. Empa rea bona hore nako e entsoe ke Ntate Molimo, `me eena ha a tlasa nako ho hang hobane nako e entsoe ke eena. Joale eena ha hona moo a tsoang teng empa qalo le nako litsoa ho eena.

2) Batho ba pholositsoeng ka linako tse ling ba ka ruta tse ling tsa lithuto tsena ka lebaka la ho hloka kutloisiso, empa hono ha ho bolele hore ha baa pholoso kapa bana le moea o sele. Seo ba se hloka feela ke thuto le kutloisiso e hlakileng.

Empa feela, hona le ba nang le moea o sele oa anti Krete (e leng sera sa Krete). Joale re tlo shebana le litumelo tse khelohileng tse tsamaeang le meea esele.

LITUMELO TSE KHELOHILENG TSE TSAMAEANG LE MOEA OA ANTI KRESTE (1 JOHANNE 4:1-7): Se buoang hore na tumelo e itseng e khelohile, ke hore na ba re eng ka Morena Jesu:

- 1) Ba hanang hore Jesu ke Molimo, ba khelohile (Johanne 1:1,14,18)
- 2) Ba hanang hore Jesu ke Mora oa Molimo, ba khelohile (Johanne 3:16)
- 3) Ba hanang hore Jesu o tsoetsoe ka mohlolo, ka moroetsana maria, ba khelohile.
- 4) Ba hanang lefu la Jesu le tsoho ea hae, ba khelohile
- 5) Ba hanang hore Jesu ke eena feela tsela le `nete le bophelo, ba khelohile (Johanne 14:6)
- 6) Ba lumelang hore ho na le tsela e `ngoe e isang motho ho Molimo haese Jesu feela, ba khelohile (Liketso 4:12) **7) Ba reng Jesu e ne ele moporofeta kapa mosebetsi oa mehlolo feela, ba khelohile.**
- 8) Ba hanang hore Jesu o ile a tla lefats'eng ka nama, ba khelohile
- 9) Ba lumelang hore moetapele oa kereke ea bona a ka ba isa ho Molimo, ba khelohile.
- 10) Ba lumelang ho moetapele oa bona ea phelang kapa ea shoeleng, hore eena ha `moho le Jesu batla ba isa ho Molimo, ba khelohile.
- 11) Bohle ba latolang Jesu ka litsela tse fapaneng ba khelohile.
- 12) Ba lumelang bafung, ntse ba re ke balimo le litlhareng tseo tsa bona, ba nka karolo boloing, ba ipulela matemona, ba

khelohile. (Lipolelo/Liotronoma 18:9-14)

- 13)** Ba buang ka Jehovah Molimo kapa ba lumela ho eena, empa ba sa lumele ho Jesu, ba khelohile (1Johanne4:15, 1Johanne5:9-12, Johanne14:6). Ha ho na motho a ka eang ho Ntate haese ka mora. Ea se nang mora ha a na Ntate.

Bohle ba lumelang tsena, ba na le moea o sele, ha baa pholoso, `me ba keke ba khona ho pholoso ntle le hore ba amohele le ho lumela thuto e nepahetseng ka Jesu. Le ha ho le joalo, u e le hloko hore batho bana ba nang le moea o sele (e leng baporofeta ba bohata kapa bo anti-Kreste) ba ka khona ho etsa mehlolo e thetsang (Matteu 24:4-7, 2 Bathesalonika 2:9-11). Mehlolo e thetsang ke mehlolo ea `nete empa e pakang leshano leno le rutoang. Ka hona, re se ke ra lumela ka lebaka la mehlolo feela, empa re utloe thuto pele.

Lihlopha tsena tse rutang lithuto tse khelohileng, tse khamnoang ke moea oa liabolosi, eleng ona moea oa anti Kreste, li tsebahala ha bobebe. O ka li eelloa ka tse latelang

- 1) Le ha baka sebelisa bibe, hona le buka e ngoe eo ba ka e sebelisang e ngotseng ts`enolo e sa hlaheng bibeleng. Kapa ba bang bona ba fetotse bibe hore e tsamae le thuto ea bona
- 2) Hangata ba iketsa lesakana la nkope, me ba nahana hore ntle le hore motho e be karolo ea bona, a ke ke a khona ho bolokeha.
- 3) Ba bang u ka ba bona ka ho beha moetapele boemong ba Ntate Molimo, ba mo rapela kapa ba rapela ka eena. U tla fumana hore moetapele oa bona o phahamisitsoe ho feta Morena Jesu.

Litumelo tsena li hlaha ka bongata, ka mabitso a fapaneng. Bathehi ba bang ba tsona ba qalile ba pholositsoe, eaba ba kheloha tseleng.

HO BALA BIBELE KA TSELA E NEPAHETSENG

Molumeli o tlameha ho bala bibe ka tselo e nepahetseng hore a e utloisise ka nepo. Bibe ke buka e kholo haholo eo motho a tlamehang ho utloisisa hore na buka eno eo ae balang e ne e ngoloa ha ho etsahala eng, `me e ngolletsoe bo mang joalo joalo. Ho tseba lintho tseno ho tla u thusa hore u utloisise hore na hobaneng mongoli a ngotse tseno tseo a li ngotseng, `me hona ho tla u thusa ho khona ho toloka bibe hantle. Mohlala ke ha Moapostola Paolosi a re ho Bakorinte, ho molemo ha motho a sa nyale ka lebaka la mats`oenyeho a nakong eno. Ea balang o tlameha ho utloisisa ho re na ho ne ho etsahalang ka nako eno eo Paolosi a neng a ngola lengolo leno. O ne a sa re ho molemo hore batho ba se ke ba nyala, empa ka lebaka la mats`oenyeho a neng a le teng matsatsing ao, hone ho le betere ha motho a itulela a le mong. Ho molemo hore molumeli a bale ho re na buka eno e ne e ngolloa bo mang ka nako eno. Libebe tse ling li ngotse hore na litaba tseno li ne li ngolloa bo mang ha ho etsahala eng. **Ntle le hore motho a bale bibe ka kutloisiso, a ka e etsa hore e buoe seo a se batlang ka ho sotha litemana le haeba seno seo a se buoang e se thuto ea bibe. Lintlha tse bohlokoa ke tsena ha re bala bibe.**

- 1) Molumeli a bale buka kapa khaolo kaofela, a seke a bala temana feela hobane ha a tlo utloisisa se buuoang. Kapa a bale sehlooho le litaba tse se latelang kaofela.
- 2) Ha ho oa lumelleha hore motho ea balang kapa ea rutang bibe a ka etsa thuto ka temana e le `ngoe ho tsoa bibeleng. Hore ntho e be thuto e ka rutoang, e tlameha ho ba le mangolo a mabeli kapa a mararo a pakang seno se ngotsoeng, `me a tiisa taba eno ebile li tliisa moelelo o ts`oanang.
- 3) Molumeli o tlameha ho bala bibe kaofela ka makhetlo khetlo haeba a batla ho e utloisisa ka botebo le ho e manolla ka nepo hobane litaba tsa topollo li qala ho Genese `me li fella ho ts`enolo.
- 4) Molumeli a se ke a tsekella ho tseba lintho tsohle le tse sa senoloang bibeleng. Moo bibe e buoang, re ka buoa, moo e thotseng, re tlameha ho thola, moo e sa hlakisang, le rona re se ke ra tsekella ho hlakisa, re mpe re buoe re re bibe ha e ea hlakisa, re se ke ra tloha ra fumana re se re etselletsa bibe.
- 5) Re se ke ra fa litemana moelelo oo re o ratang, re mpe re fumane hore na tsona li ne li re eng.

Molumeli o hloka ho utloisisa ha a bala bibe hore lintho tse ngotsoeng bibeleng li ngotsoe ho ea ka moo li neng li buuo ka teng, empa ha ho bolele hore lintho tseno tse neng li buuo e ne e le linnete kaofela tseo re ka li nkang eaba re se re re ho joalo bophelong. Mohlala: Ha Morena Jesu a le sefapanong, e ile eare ha a meketsa ka lentsoe, ba mo mametseng ba ile ba re o bitsa Elia. Taba ena e ngotsoe ho ea ka moo e builoeng ka teng, empa taba eno e ne e se `nete hobane o ne a sa bitse Elia. O tla fumana testamenteng ea Khale batho ba buile lintho tse ngata tseo ba neng ba li buoa

ka kutloisiso ea bona e fokolang. Lintho tseno li ngotsoe ho ea ka moo ba li buileng ka teng, empa tse ling e ne e se li `nete tsa bophelo kapa tsa Ntate Molimo, empa e ne e le mehopolo ea bona feela, mohlala o mong o hlaha ho Jobo 1:20. Jobo mona o re Jehova o mo file, ebile Jehova o mo amohile, ha ho bokoe lebitso la Jehova. Taba ena e ngotsoe ho ea ka moo Jobo a e buileng ka teng, empa temana ena ha se `nete ea bibebe hobane e ne e se Ntate Molimo a mo amohileng tsona. Rona ba balang, re ea elelloa hore e ne e le satane ea mo utsoelitseng. Joale re ke ke ra etsa thuto ea hore Ntate Molimo o tla o fa a be a u amohe.

Ka hona, lintho tsohle tse ngotsoeng bibeleng, re tlameha ho li bapisa le testamente e ncha le seo Morena Jesu a se tlisitseng ho rona. Re li bapise le lipuo tsa Morena Jesu hobane ke eena ponahatso ea `nete ea Ntate Molimo ka phethahalo.

HO UTLOISISA TESTAMENTE EA KHALE: Hore motho a utloisisa testamente ea khale, o tlameha ho utloisisa kutloisiso kapa puo ea Baheberu ka nako eno. Ha ke bolele hore u tlameha ho utloisisa puo ea Seheberu, empa u tlameha ho utloisisa tsela eo ba neng ba utloisisa lintho ka eona. Lintlata tse tla u thusa ho utloisisa testamente ea khale ka kotlolloho ke tsena tse latelang.

Lintho tsohle tse neng li etsahala, ba ne ba utloisisa hore ke Ntate Molimo ea li entseng kapa ea li lumelletseng hobane ba ne ba nka hore o na le matla a ho li thibela, `me ha a sa li thibela, ba ne ba utloisisa hore ke eena ea li lumelletseng. Joale, ha ba buoa, ba ne ba tla re Ntate Molimo ke eena ea entseng ntho haeba ba utloisisa hore o e lumelletse. Ka hona ha u bala testamente ea khale, nako tse ling ha ho thoe Ntate Molimo o entse ntho e itseng, nako tse ling ho boleloa hore feela o li lumelletse. Hape ba ne ba sena ts`enolo ea satane le mesebetsi ea hae joalo ka rona testamentseng e ncha. Mehlala: 1Samuele 19:9 e re moea o lits`ila o tsoang ho Jehova o ea ho Saule. Temana ena ha e bolele hore Ntate Molimo o ile a romela moea o lits`ila ho Saule, empa o ile a lumella moea o lits`ila ho ea ho Saule. O no o sa tsoe ho eena, empa eena o ne a tlositse ts`irelletso ea hae feela ho Saule, joale letemona leno le khona ho mo hlekefetsa. Mohlala o mong o hlaha ka ho 2 Samuele 24:1-2. Temana ena e re Ntate Molimo o ile a susumetsa Davida hore a bale sechaba sa Israele. Empa ha o sheba ka ho 1Liketsahalo 21:1, e re satane ke eena ea susumelitseng Davida ho bala sechaba sa Israele. Joale hantle ke mang ea susumelitseng Davida. Se etsahetseng ke hore Davida o ile a ruoa haholo, `me eena le Israele ba khoehla boinehelong ba bona ho Jehova, eaba Jehova o tlosa karolo e `ngoe ea ts`irelletso ea hae holima bona, eaba satane o khona ho susumetsa Davida hore a bale sechaba, hobane ha Ntate Molimo a tlosa ts`irelletso ea hae, lemati le ile la bulehela satane, `me a khona ho susumetsa Davida. Joale, hobane ke Ntate Molimo ea lumelletseng boemo bono, joale ka ho 2Samuele ho ngotsoe hore ke Ntate Molimo ea mo susumelitseng.

Mohlala o mong ke oa Elia le Elisha. (2 Marena 2:1-19)

Ho Marena 2:9, Elisha o ile a kopa bobeli (double portion) ba tlolo (kapa matla) a Elia. Ha a cho joalo, o ne a sa bolele hore o kopa hoba le matla a Elia habeli, empa o ne a bolele hore o kopa ho nka sebaka sa Elia sa boetapele holima mosebetsi oa hae le holima baporofeta ba bang. Ha hothoe ngoana o fuoe bobeli (double portion), ho no ho boleloa hore o fuoe boetapele holima ba bang bojalefeng ba motsoali oa bona. Ke sona se etsahetseng ka Elisha. O ile a fuoa boetapele holima baporofeta ba bang.

Mohlala o mong ke o hlahang ka ho moekelesia 3:21, mona moekelesia o oa ipotsa hore na ho etsahala eng ka moea oa motho le oa liphoohofolo ha li shoa. Re k eke ra nka temana ena eaba re se re re liphoohofolo li na le moea. Bibebe e re ke motho feela ea fuoeng moea (spirit), empa ha e bue joalo ka liphoohofolo le limela. Ka hona, liphoohofolo ha lina moea joalo ka batho. Tsona ke nama le kelello/pelo feela (soul and body). Moekelesia o ne a ipotsa feela hobane a se na tsebo e phethahetseng. Joale, molumeli o tlameha ho ahlola lithuto tsohle ka `nete ea testamente e ncha. Morena Jesu ke eena ea tlisitseng `nete ka botlalo ba eona (Johanne1:17). Joale, molumeli o tlameha ho etsa bonnete ba hore ha a bala, o utloisisa ka tsela eo testamente ea khale e ngotsoeng ka teng. A utloisisa hore ka linako tse ling ha bibebe ere Molimo o etsa tjena, linako tse ling ho boleloa feela hore o lumelletse boemo bono, e seng hakaalo hore ke eena ea bo susumelitseng kapa ea bo entseng.

TUKISO EA LIPHOSO TSA PHETOLELO LE MEELELO E FOSAHETSENG KA LEBAKA LA LIPHOSO TSA PHETOLELO.

Bibebe e phethahetse, `me e na le matla ohle a ho fetola bophelo ba motho (2Timotia3:16). Ke lentsoe la Ntate Molimo ka sebele le ngotsoe pampering. Ha ho motho ea ka eketsang kapa a fokotsa ho tsoa ho eona. Empa joale, bibebe e ne e ngotsoe ka Seheberu, Sekherike le Selatin se senyane ha e ngoloe, joale ea nto fetoleloa senyesemaneng le lipuong tse ling tse ngata tsa lefats`e. Joale ho ile ha e ba le liphoso ha e ntse e fetoleloa lipuong tse ling. Ha se liphoso tse kholo tse ka lahleng motho ea balang, empa tse ling li fetoleloa moelelo oa se neng se buuo. Joale, mona re tlo li lokisa. Hona ha ho bolele hore re fetola bibebe, empa re lokisa liphoso tseno tse entsoeng ha bibebe e fetoleloa lipuong tse ling.

Luka 23:43: temana ena e baleha tjena ka phetholelo e ntjha ea bibe le ea Sesotho: **A re ho sona: “Ruri kea o bolella, kajeno o tla ba le `na paradeising.** Mona ho na le phoso ea phetolelo. Ha o bala temana ena e ngotsoe tjena, e se ka Morena Jesu o ne a re ba tla ba le sesinyi paradeising tsatsing lona leno ha a re kajeno. Khathe Morena Jesu o ne a sa bolele hore ba ea paradeising kajeno leno. E tlameha ho baleha tjena: **“Ruri kea o bolella kajeno, o tla ba le `na paradeising.** Khfutso e tlameha ho ba ka mora kajeno, e seng bolella. **Seo Morena Jesu a neng a se cho ke hore o mo bolella kajeno hore tsatsing le leng ba tla ba le motho eno paradeising.**

Johanne 9:1-6, Ha o bala temana ena ho tloha temaneng ea 3, e re: **ha se eena ea entseng sebe leha e le batsoali ba hae, empa e le hore mesebetsi ea Molimo e bonahale ho eena.** Ha o bala temana ena, e se e ka Ntate Molimo o fofalitse motho eno hore a tle a tlo mo folisa, khathe Morena Jesu ha a cho joalo. Temana ena e tlameha ho baleha tjena: **ha se eena ea entseng sebe leha e le batsoali ba hae, empa leha ho le joalo, ha mesebetsi ea Molimo e bonahale ho eena.** Morena Jesu o ne a re ha se sebe sa hae kapa sa batsoali ba hae se mo entseng hore a hlahe a sa bone, empa o hlahile a le joalo ka lebaka la ho oa ha motho le litlamorao tsa teng. Empa a re, leha ho le joalo, ha mesebetsi ea Molimo ea ho folisa e bonahatsoe ho eena.

Johanne 14:12-14, Ha o bala temana ena ho tloha temaneng ea 13, e re: **eng le eng eo le e kopang ka lebitso laka ke tla e etsa, hore Ntate a tlotlisoe ka Mora. Ha le kopa eng kapa eng ka lebitso laka ke tla e etsa.** Ha o bala temana ena, ese eka Morena Jesu o re re kopa mehlolo ka lebitso la hae. Ntlheng ena Morena Jesu o ne a buoa ka ho etsa mehlolo le mesebetsi eo a neng a e etsa. O ne a sa buoe ka thapelo ea likopo joalo ka ho Johanne 16:26, moo a reng re tla kopa Ntate ka lebitso la hae. Ha re kopa, re kopa Ntate ka lebitso la Morena Jesu. Empa ntlheng ena ha a buoe ka likopo, empa o buoa ka ho etsa mehlolo. Mehlolo re e laela ka lebitso la Jesu. Re etsa litaelo kapa litlaleho ka lebitso la Jesu ha re etsa mehlolo. Mohlala ke oa Peterose ha a folisa seritsa ka ho Liketso 3:6. O ile a re, “ka lebitso la Jesu Krete oa Nasaretha ema, o tsamaee!”. Hona e ne e le taelo ka lebitso la Jesu. Morena Jesu o ne a buoa ka sena ka ho Johanne 14:12-14. Ke litaelo tsa rona tsa serena.

Baheberu 10: 26, temana ena e baleha tjena: **Ha re etsa libe ka boomo empa re se re fumane tsebo ea `nete, ha ho sa na sehlabelo se ka tlosang libe tseno.** Bukeng ena, mongoli o ne a ngolla Baheberu ba neng ba hlekefetsoa ka lebaka la tumelo ea bona ho Krete, joale bane ba se ba batla ho koenehela tumelo ea bona ea Sekreste, ba khutlele tumelong ea bona ea se Juda. Joale mongoli enoa o ne a ba eellisoe kotsi ea ho etsa sebe seno sa ho koeneha ka boomo o ntse o tseba `nete ea hore Morena Jesu Krete ke Mora oa Molimo. Temana ena e tlameha ho baleha tjena: **Ha re etsa sebe seno ka boomo, empa re se re fumane tsebo ea `nete, ha ho sa na sehlabelo se ka tlosang sebe seno.** Mongoli o buoa ka sebe se le seng seo e sale a buoa ka sona ho tloha qalong ea buka ea Baheberu.

TLHALOSO EA MEKETE EA SEKRESTE

PASEKA: Re keteka Paseka hobane ke ka letsatsi leo Morena Jesu a ileng a re shoela ka lona.

NYOLOHELO: Re keteka nyolohelo hobane ke letsatsi leo Morena Jesu a ileng a nyolohela leholimong ka lona.

KRESEMESE : Hase hore Morena Jesu o hlahile ka la 25 Ts'itoe hantle hobane bibe le ha e hlakisi hore na o hlahile ka letsatsi le feng, empa e ne e le ka bo tsona linako tseno. Joale, ha re keteka Kresemesa, re keteka tsoalo ea Morena Jesu.

LIBUKA TSA BIBELE LE BANGOLI BA TSONA LE KHUTSUFATSO EA TL`ALOSO EA TSONA

- 1) **Genese:** ke buka ea pele bibeleng, `me e ngotsoe ke Moshe. E bua ka qaleho ea lefats`e le tlholeho le motho le ho thehoa ha sechaba sa Iseraele ka Aborahama.
- 2) **Exoda/phallo:** Ke buka ea bobeli bibeleng `me e ngotsoe ke moshe. E hlalosa ka moo Moshe a ileng a lokolla sechaba sa Israele Ekhepeta kateng. Le ka moo Jehovah a thehileng selekane sa khale le ba ntlo ea Iseraele ka Moshe.
- 3) **Meetlo/ Levitike:** buka ena e ngotsoe ke Moshe, `me e bua ka melao, meetlo le lihlabelo tsa sechaba sa Iseraele.
- 4) **Numere/lipalo:** Buka ena e ngotsoe ke Moshe, `me e bua ka sechaba sa Iseraele ho tloha ha ba tsoa Ekhepeta, `me ba lelera lehoatateng, hape e bua ka melao le meetlo ea sechaba sa Iseraele.
- 5) **Deutonomia/Lipolelo:** Buka ena e ngotsoe ke Moshe, `me ke pale ea Baiseraele pele ba ka kena Kanana.
- 6) **Joshua:** Buka ena e ngotsoe ke Joshua, `me e bua ka bophelo ba Iseraele tlasa boetapele ba Joshua, ha ba hapa Kanana le ho tsitsa teng.
- 7) **Baahloli:** Buka ena ho belaeloa e ngotsoe ke Samuele, `me e buoa ka bophelo ba Israele kamora lefu la Joshua ha e busoa ke baahloli le lintoa tsa bona tse ngata le ho oa ha Israele tumelong, le ho khutlela ho Jehovah ho fihlela ho ba le morena Isereale le puso e hlakileng.
- 8) **Ruthe:** Buka ena ho belaeloa e ngotsoe ke Samuele, `me e bua ka mosali ea bitsoang Ruthe a ileng a amohela Molimo oa

Majuta, le tumelo ea bona le sechaba sa bona le ha ena ene ese Mo Iseraele ka tsoalo.

- 9) **1 Samuele:** Buka ena e ngotsoe ke Samuele, Gad le Nathan `me e bua ka sechaba sa Iseraele ha ba tloha tlasa baahloli ba ea tlas'a `muso oa serena sa Saule le Davida.
- 10) **2 Samuele:** Buka ena e ngotsoe ke Samuele, Gad le Nathan `me e bua ka sechaba sa Iseraele ha ba tloha tlasa baahloli ba ea tlas'a `muso oa serena sa Saule le Davida. Buka ena ke tsoelopele ea 1 Samuele.
- 11) **1 Marena:** Buka ena ekare ha e ea ngoloa ke motho a le mong empa ke batho ba bangata ka nako tse fapaneng, E bua ka bophelo ba Morena Davida, eo ha a se a tsofetse a ileng a khetha mohlahlami oa hae le marena a mang a latetseng, ebe e qetella ka puso ea morena Ahaba oa Iseraele monna oa Jesebele.
- 12) **2 Marena:** Buka ena ekare ha e ea ngoloa ke motho a le mong empa ke batho ba bangata ka nako tse fapaneng, E bua ka bophelo ba Morena Davida, eo ha a se a tsofetse a ileng a khetha mohlahlami oa hae le marena a mang a latetseng, ebe e qetella ka puso ea morena Ahaba oa Iseraele monna oa Jesebele. Buka ena ke tsoelopele ea 1 Marena.
- 13) **1 Liketsahalo/ Likronike:** Buka ena e belaelloa e ngotsoe ke Ezra `me e bua ka histori ea Maiseraele ho tloha ho Adama ho ea fihla ho Morena Cyrus.
- 14) **2 Liketsahalo/ Likronike:** Buka ena e belaelloa e ngotsoe ke Ezra `me e bua ka histori ea Maiseraele ho tloha ho Adama ho ea fihla ho Morena Cyrus. Buka ena ke tsoelopele ea 1 Liketsahalo.
- 15) **Esera:** Buka ena e ngotsoe ke moprista le mongoli Ezra, `me e bua ka nakong eo Bajuda ba neng ba khutla Babilona moo ba neng ba ts'oeroe teng ba ea Jerusalema, hape ba qala ho tsosa tempele ea Morena e neng a helelitsoe.
- 16) **Nehemia:** Buka ena e suptjoe e ngotsoe ke Ezra, `me e shebane le ha Iseraele e tsoa babilona joale e qala ho tsosa marako a Jerusalema le ho tsoselletsa tumelo le boinehelo ba bona ho Jehovah.
- 17) **Esthere:** Buka ena e suptjoe e ka e ngotsoe ke Mordecai, `me e bua ka mosali oa mojuta ea neng a le Persia oa lebitso la Hadassah empa a tsejoe e le Estere eo ileng ea ba mofumahali Persia ha a nyaloa ke morena oa teng, `me o ile a thibela ho balaoa ha Bajuda ba neng ba le Persia ka sehlooho. Bajuda e ne e le bats'oaruoa naheng ea Persia ka lebaka la ho se mamele Jehovah.
- 18) **Jobo:** Buka ena e ngotsoe ke Jobo `me ke buka e buaong ka bophelo ba Jobo le botataisi ba ho lula o lumetse ho Ntate Molimo hara bophelo ba mats'oeneyho le mahloko.
- 19) **Lipesalema:** Buka ena e ngotsoe ke Morena Davida le ba bang joalo ka Asaph, bara ba Korah le Solomone. Buka ena e ts'etse lifela tsa bolumeli tsa sechaba sa Majuta le lithoko.
- 20) **Maele/Liprovebia:** Buka ena e ngotsoe ke Morena Solomone, `me e bua ka lipuo tsa bohlae, likeletso le likhothalletso molemong oa bophelo bo lokileng le bo atlehileng.
- 21) **Moeklesia:** Buka ena e ngotsoe ke Morena Solomone, `me o bua ka lebaka la bophelo, botho, tabatabelo ea bohlae le thabo.
- 22) **Sefela sa Solomone/Sefela sa lifela:** Buka ena e ngotsoe ke Morena Solomone, `me e bua ka lerato le lenyalo, lithoko le lipina tsa lerato le tjena.
- 23) **Esaea:** Buka ena e ngotsoe ke moporofeta Isaiah ea neng a phela `musong oa Judah, `me buka ena o ngotse karolo e `ngoe ha Iseraele e tsoa Babilona ba qala ho phela e le sechaba se lokollohileng naheng ea habo sona.
- 24) **Jeremia:** Buka ena e ngotsoe ke moporofeta Jeremia `me e bua ka bophelo ba moporofeta Jeremia le melaetsa ea hae ho sechaba sa Judah.
- 25) **Lillo tsa Jeremia/Koliamalla:** Buka ena e ngotsoe ke Jeremia `me e senola lillo le bohloko ba hae ha Jerusalema e oa , sechaba se isoa Babilona.
- 26) **Esekiele:** Buka ena e ngotsoe ke Moporofeta Esekiele, ea neng a phela ka nako eo Iseraele eleng Babilona.
- 27) **Daniele:** Buka ena e ngotsoe ke moporofeta Daniele, ha sechaba sa Iseraele se ts'oeroe Babilona hotsoa Jerusalema. Buka ena e tletse lipono tsa bokamosa ka maphelo a ma Juta le ba lefatshe.
- 28) **Hosea:** Buka ena e ngotsoe ke moporofeta Hosea, `me buka ena e shebane le ha meloko e leboea ea Iseraele e oa (fall of the northern kingdom of Israel). Hosea o ile a nyala seotsoa Gomeroa ka taelo ea Ntate Molimo e le ho bonts'a ho se ts'epahale ha Ba Iseraele ho Jehovah. (Northern kingdom e ne e le meloko ena ea Iseraele: Asher, Dan, Ephraim, Gad, Issachar, Manasseh, Naphtali, Reuben, Simeon le Zebulun.
- 29) **Joele:** Buka ena e ngotsoe ke moporofeta Joele, `me eona e bua ka pako, kahlolo, ho ts'oloha ha Moea o Halalelang le puselletso le katleho ea Judah.
- 30) **Amose:** Buka ena e ngotsoe ke moporofeta Amos, `me e bua ka molaetsa oa toka, ho loka, khalalelo le kellelliso ea likahlolo tse tlang.
- 31) **Obadia:** Buka ena e ngotsoe ke moporofeta Obadia, `me e bua ka boporofeta bo lebileng sechabeng sa Edom.
- 32) **Jonase:** Buka ena e ngotsoe ke moporofeta Jonase, `me e buoa ka bophelo ba Jonase thomong ea hae Ninife.
- 33) **Mmikiea:** Buka ena e ngotsoe ke moporofeta Micah, `me e bua ka molaetsa oa toka le boits'oaro le boporofeta. Micah o bile a porofeta hore Mesia o tla hlahela Betlehema.
- 34) **Nahume:** Buka ena e ngotsoe ke moporofeta Nahume, `me e bua ka kahlolo e tlang le ho oa ha `muso oa Assaria, haholo teropo ea teng e kholo e leng ea Ninife.
- 35) **Habakkuke:** Buka ena e ngotsoe ke moporofeta Habakkuke, `me e hlahisa puisano ea Habakkuke le Molimo, hape e ngotsoe pele Jerusalema e oa, bajuda ba isoa Babilona.

- 36) Sofonea:** Buka ena e ngotsoe ke moporofeta Zephaniah, `me buka ena e bua ka kahlolo, pako le ts'epo. Hape e tumme hobane e ne e bolela kahlolo ea Judah khahlanong le ho rapela melimo ea bohata, bo khopo le ho khathalla Morena Molimo.
- 37) Hagai:** Buka ena e ngotsoe ke moporofeta Haggai, `me ene ele pitso ea sechaba sa Molimo se tsoang Babilona hore se tsose tempele ea Morena.
- 38) Sakaria:** Buka ena e ngotsoe ka moporofeta Zachariah, `me e kentse boporofeta, lipono le melaetsa ea Ntate Molimo sechabeng sa hae.
- 39) Malakia:** Buka ena ho belaeloa e ngotsoe ke Ezra empa ha ho hlake hantle. Eona e bonts'a ha Malakia a bua le batho, ka tsa boits'oaro, tsa khumamelo, tsa ho fana le ho tlotla Jehovah ka se mo loketseng.

MANGOLO A TESTAMENTE E NCHA

- 1) Matteu:** Buka ena e ngotsoe ke Moapostola Matteu, `me eena o ne a ngolla Bajuta a ba tiisetse hore Morena Jesu ke eena eo Bajuda ba neng ba mo emetse, le hore ke eena eo ho neng ho porofetoa ka eena seleaneng sa khale.
- 2) Mareka:** Buka ena e ngotsoe ke Mareka ea neng a tsamaea le Moapostola Peterose, `me eena o ne a bua ka Morena Jesu empa a shebile mesebetsi ea hae ea mehlolo haholo. (Mareka ene ese e mong oa baapostola ba 12 ba Morena Jesu)
- 3) Luka:** Buka ena e ngotsoe ke Luka ea neng a tsamaea le Paulosi boholo ba nako, `me eena o ne a shebile Morena Jesu le ho mo hlalosa ho tsoa lehlakoreng la hae la botho. (Luka e ne e se e mong oa ba apostola ba 12 ba Morena Jesu).
- 4) Johanne:** Buka ena e ngotsoe ke moapostola Johanne, `me eena o ne a senola Morena Jesu e le Mora oa Molimo. O ne a shebane le bomolimo ba hae le bophelo ba hae ho tsoa semoeeng.
- 5) Liketso:** Buka ena le eona e ngotsoe ke Luka eo e neng e le ngaka (medical doctor), `me mona Luka o ne a ngola a hatisa liketso tsa baapostola ba sebetse le Moea o Halalelang.
- 6) Baroma:** Buka ena e ngotsoe ke Paulosi a ngolla balumeli ba lulang teropong e kholo ea Roma. Bukeng ena Paulosi o hatella le ho hlalosa tokafatso ka tumelo ho Morena Jesu Kreste, le mohau oa Molimo o fumanoang ho Jesu Kreste.
- 7) 1 Bakorinte:** Buka ena e ngotsoe ke Paulosi a ngolla balumeli ba lulang Korinte, e leng teropo e fumanehang Greece tsatsing lena. O ne a ngola buka ena a lokisa likarohano le liphoso tse ngata kerekeng ea Korinte.
- 8) 2 Bakorinte:** Buka ena e ngotsoe ke Paulosi a ngolla balumeli ba lulang Korinte, e leng teropo e fumanehang Greece tsatsing lena. O ne a ngola buka ena a lokisa likarohano le liphoso tse ngata kerekeng ea Korinte. Buka ena ke tsoelopele ea **1Bakorinte. Korinte e ne e le sebaka se seholo se tletse Baroma, Bakherike le Bajuta.**
- 9) Bakhalata:** Buka ena e ngotsoe ke Paulosi a ngolla balumeli ba lulang Galatia (e leng Turkey ea tsatsing lena). Taba kholo bukeng ena ke tokollohoe fumanoang ho Kreste le ho lokafatsoa ka tumelo.
- 10) Baefese:** Lengolo lena le ngotsoe ke Paulosi a ngolla balumeli ba lulang Efese e fumanehang Turkey kajeno. Lengolo lena le shebane le bojalefa ba rona ho Kreste boholo.
- 11) Bafilipi:** Buka ena e ngotsoe ke Paulosi a ngolla balumeli ba lulang Philippi (Greece ea tsatsing lena). Lengolo lena Paulosi o le ngotse a le teronkong `me lengolong lena o khothatsa Bafilipi le ho ba khothalletsa ho lula bat habile ho Morena.
- 12) Bakolose:** Lengolo lena le ngotsoe ke Paulosi a ngolla balumeli ba lulang Kolose (E fumanehang Turkey tsatsing lena). Lengolong lena Paulosi o bua haholo ka boholo ba Morena Jesu le borena ba hae.
- 13) 1 Bathesalonika:** Lengolo lena le ngotsoe ke Paulosi a ngolla balumeli ba lulang Thesalonika (e fumanehang Greece kajeno). Mona Paulosi o ngolla balumeli bana a lokisa maemo a neng a tobane le kereke ka nako eno.
- 14) 2 Bathesalonika:** Lengolo lena le ngotsoe ke Paulosi a ngolla balumeli ba lulang Thesalonika (e fumanehang Greece kajeno). Mona Paulosi o ngolla balumeli bana a lokisa maemo a neng a tobane le kereke ka nako eno. Lengolo lena ke lengolo la bobeli la Paulosi balumeling ba Thesalonika.
- 15) 1 Timotia:** Lengolo lena le ngotsoe ke Paulosi, a ngolla Timotia eo neng e le moetapele e monyane ka lilemo hape e le mosebetsi `moho le Paulosi. Lengolo lena le fana ka tataiso ea boetapele le tataiso ea bolisa ba phutheho.
- 16) 2 Timotia:** Lengolo lena le ngotsoe ke Paulosi, a ngolla Timotia eo neng e le moetapele e monyane ka lilemo hape e le mosebetsi `moho le Paulosi. Lengolo lena le fana ka tataiso ea boetapele le tataiso ea bolisa ba phutheho. Lengolo lena ke nts'etso pele ea lengolo la **1 Timotia.**
- 17) Tite:** Lengolo lena le ngotsoe ke Paulosi a ngolla Tite eo e neng e le mosebetsi `moho le eena, `me Paulosi o mo tataisa ka tsa ts'ebelletso sebakang sa Crete (Island of Crete). Mona Paulosi o hatella taba ea thuto e hlakileng, boits'oaro le ho qoba lithuto tse arohanyang batho.
- 18) Filemone:** Lengolo lena le ngotsoe ke Paulosi a ngolla Filemone, e neng e le molumeli a neng a qabane le mosebelletsi oa hae ea bitsoang Onesimus. Paulosi o kopa hore Filemone a ts'oarele Onesimus le ho mo amohela hape.
- 19) Baheberu:** Lengolo lena ho belaeloa hore le ngotsoe ke Paulosi empa ha hoa hlaka hantle hobane Paulosi o lula a itlhakisa mangolong a hae ohle empa ho lena ha a hlakisa hore ke eena empa litaba li ts'oana le tsa hae. Mona mongoli o ngolla bakreste bao e neng e le Baheberu ka tsoalo, `me ba tlohile tumelong ea Bojuda (Judaism), ba se ba amohetse Morena Jesu le sekreste. Mongoli o bonts'a batho bana hore Morena Jesu ke eena mora oa Molimo ea moholo le hore o bohlokoa ho feta Moshe le hore selekane sa khale e ne e le sets'oants'o feela sa selekane se secha. O ba bonts'a le kotsi

ea ho koenehela Morena Jesu ba se ba mo tseba e be ba khutlela tumelong ea bona ea Bojuda. O bua sena hobane Baheberu ba ne ba nahana ho khutlela tumelong ea bona ea pele ea Bojuda ka lebaka la litlhekefetso tseo ba neng ba kopane le tsona.

- 20) Jakobo:** Lengolo lena le ngotsoe ke Jakobo, ngoanabo Morena Jesu. O ne a ngolla baena ka bohlokoa ba tumelo e bonahalang ka mesebetsi le boits'oaro bo botle.
- 21) 1 Peterose:** Lengolo lena le ngotsoe ke Peterose, 'me o ne a ngolla balumeli hore ba mamelle mahlomola le litsietsi, ba ikokobetse hape ba phele khalalelo.
- 22) 2 Peterose:** Lengolo lena le ngotsoe ke Peterose 'me mona o ne a ngolla balumeli hore ba ikitlaetse ho hola moeeng, ba qobe lithuto tse khelohileng le ts'episo ea hotla ha Morena Jesu.
- 23) 1 Johanne:** Lengolo lena le ngotsoe ke Johanne, 'me Johanne o bua ka ho ba le kutloano le Ntate Molimo, ho tsamea ka lerato, ho mamela litaello tsa Morena Jesu le bonnete ba pholoho ea rona ka Krete le bo anti krete ba leng teng lefats'eng.
- 24) 2 Johanne:** Lengolo lena ke la bobeli la Johanne, 'me mona Johanne o bua ka ho tsamaea ka 'nete ea Ntate Molimo le ho tsamaea ka lerato le ho hlokomela ba rutang thuto e khelohileng.
- 25) 3 Johanne:** Lengolo lena ke la boraro la Johanne, 'me mona o khothatsa ba ts'ehetsang balumeli ba sebelletsang ka bots'epehi. Hape o ehlisoa balumeli ka kotsi ea motho ea bitsoang Diotrephes.
- 26) Jude:** Lengolo lena le ngotsoe ke Jude, ngoanabo Jakobo le Morena Jesu oa nama. Jude o bua ka ho loanela tumelo ea rona khahlanong le baruti ba bohata le lithuto tse khelohileng.
- 27) Ts'enolo:** Buka ena e ngotsoe ke Moapostola Johanne, 'me o e ngotse e le mots'oaruoa Patmos. Buka ena e bua ka bofelo, tlhoho ea Morena Jesu qetellong le morero oa Ntate Molimo ka lefats'e lohle.

BOEMO BA MOEA

LEHOLIMO, LEFATS'E LE LECHA, LEFATS'E LA MOEA, SEFUBENG SA ABORAHAMA, LIHELE LE LETS'A LA MOLLO.

LEHOLIMO

Maholimo a mararo ho ea ka bibelet. Ha re bala bibelet, re tlameha ho fumana hore na temana eo re e balang e bua ka leholimo le feng.

- 1) Leholimo la pele le boemong ba nama (natural realm).** Leholimo la pele ke mona moo o tla fumana maru le boputsoa, moo pono ea mahlo a rona a nama e fellang teng. Ke moo ho nang le linaleli le lihloliloeng tse ling tsa leholimo joalo ka bo khoeli joalo joalo (The universe).
- 2) Leholimo la bobeli le boemong ba moea.** Re ke ke ra le bona ka mahlo a nama, empa ha re ka tsoa nameng ea rona eaba re ba boemong ba moea re tla le bona. Leholimong lena ho sebetse matemona ka mekhahlelo e fapaneng ea ona (Baefese 6:10-13). Le manyeloi a mang a sebetse mona.
- 3) Leholimo la boraro le boemong ba moea.** Ha le bonahale ka mahlo a nama, empa re ka le bona ha re ka tsoa nameng ea rona eaba re ba boemong ba moea. Mona ke moo Terone ea Ntate Molimo e leng teng. Mona ho na le balumeli ba hloahetseng lefats'eng. Ba leholimong ka 'mele ea bona ea moea. Hona le manyeloi le libopuoatse ling tsa leholimo. 2Bakorinte 12:1-5). Hona le lithoriso le khumamelo le thabo e hlollang (Ts'enolo 4:1-11). Leholimong lena ha hona letho le bohloko kapa le lebe. Ha ho na bokuli, lefu, bohloki, bofutsana kapa matemona. Lintlha tse bohlokoatse ka leholimo: 1) Re tla tsebana ha re kopana. 2) Mehopolo ea ba lahlehileng e tla tlosoa maphelong a rona. (3) Leholimong hona le mesebetsi e meng e tlabe e etsoa, etlabe ese pina le khumamelo feela. (4) Hona le khotso le thabo e hlollang. (5) Literata tsa leholimong ke tsa khauta. (6) Se re kenyeng leholimong ke sehlabelo sa Morena Jesu le mali a hae le semelo se secha seo re se fuoeng hare amohela morena Jesu maphelong a rona, empa se buoang ka boemo le meputso ea rona leholimong ke hore na re sebellitse Ntate Molimo joang ha rele lefats'eng. (7) Hona le setsoalle le meqoqo leholimong empa ha hona lenyalo le litakatso tsa lenyalo.

Leholimong re keke re ea ka 'mele ena ea rona ea nama. Empa re ka kena ka 'mele ea moea kapa 'mele ea semoea. 'Mele oa moea ke 'mele ea rona e tsoang nameng ha re hloka hla, 'ha 'mele ea semoea e le 'mele ea nama le masapo e tlotlisitsoeng, e leng 'mele o ts'oanang le oa Morena Jesu ka mora tsoho ea hae bafung. Rea tseba hore Morena Jesu o ile leholimong ka 'mele o tjena. 'Mele ona ke 'mele o khonang ho etsa lintho tsa nama le tsa moea. Morena Jesu o ne a khona ho ja eleng ketso ea nama, empa hape o ne feta mabote feela a nyamela a hlaha bakeng tse fapaneng eleng se etsoang ke 'mele ea moea.

LEFATS'E LE LEHOLIMO LE LECHA (TS'ENOLO 21:1-27): Lefats'e le leholimo le lecha ke libaka tseo Ntate Molimo a tlo li etsa. Leholimo lena le lecha ke la pele 'me le tsamaea le lefats'e le lecha. Bibele e ea hlakisa hore lefats'e le leholimo la khale li tla felisoa 'me ho tla le tse ncha. Ha ho thoe ho tla ba le lefats'e le lecha ho boleloa hore Ntate Molimo o tla tlosa bobele bohle lefats'eng lena 'me a le nchafatse. **Lefats'eng lena ho tla phela balumeli ka 'mele ea bona e tlotlisitsoeng. Lefats'eng le lecha ho tla phela balumeli bohle ka 'mele ea bona e tlotlisitsoeng.** Ho tla be ho khonahala ho etsoa lintho tsa nama le tsa moea. Re tla be re ts'oana le Morena Jesu kamora tsoho ea hae. Mona Morena Jesu o tla be a phela le rona ka bo eena. Ka ho cho joalo ke bolela hore o tla be a phela le rona ka 'mele oa hae o tlotlisitsoeng. **Jerusalema e ncha, e tla be e le ntlo kholo ea lefats'e le lecha (Ts'enolo 21:2-5).** Lefats'eng lena ho tla be ho se na lefu, bokuli, lithohako, sebe le tsohle tse mpe (Ts'enolo 21:4). Liphoofole le limela li tla be li le teng (Isaia 65:17-25, 66:22) Ho tla be ho sena lenyalo le litakatso tsa lenyalo (Matteu 22:29-33) Re tla phela ka ho sa feleng lefats'eng le lecha le Molimo oa rona (Ts'enolo 1:3). **Lefats'e le lecha le boemong ba semoea moo re tla be re phela ka 'mele ea rona ea semoea. 'Mele oa semoea ke 'mele oa nama le masapo o tlotlisitsoeng o ts'oanang le oa Morena Jesu ka mora tsoho ea hae. Boemo ba semoea ke boemo ba moea bo kopane le ba nama ponahatsong.**

LEFATS'E LA MOEA: Le lefats'eng lena leo re phelang ho lona, ho na le lefats'e la moea leo re sa le boneng ka mahlo a rona a nama. Lefats'e lena re sebetsa le lona ka tumelo. Lefats'eng lena ho sebetsa Moea O Halalelang, manyeloi, matemona le liabolosi.

SEFUBENG SA ABORAHAMA: Sebaka sena e ne e le moo bafu ba hlokaletseng ba lumela ho Jehova ho ea ka tsamaiso ea selekane sa khale ba eang teng. Bafu bohle ba hlokaletseng ba lumela ho Jehova ba ne ba lutse mono, ba emetse mohla Morena Jesu a tlang ho ba lata. Bo-Ntate Aborahama, Samuele, Davida le ba bang ba bangata ba ne ba lutse mona. Ho ne ho na le khotso, ho se na bohloko ba letho (Luka 16:22). Sebaka sena se ne se atamelane le lihele 'me batho ba ho sona ba ne ba khona ho bona batho ba lihelong (Luka 16:23). Li ne li arohantsoe ke lengope le leholo (Luka 16:26). Empa ka mora hore Morena Jesu a shoe e ile ea re ha a tsoha bafung a nyoloha le batho ba neng ba mo emetse sebakeng sena. Ha ba qeta ho tsamaea sefuba sa Aborahama se ile sa felisoa.

LIHELE: Lihele ke sebaka sa kahlolo seo Ntate Molimo a se etselitseng liabolosi le manyeloi a hae (Matteu 25:41). Ke 'nete hore ha joale liabolosi le matemona a mang ha a hlokoletsoe lihelong (1 Peterose 5:8). Hona ke ka lebaka la sebe sa Adama hobane joale o ile a fa liabolosi senotlolo sa lihele (e leng matla a lefu), empa Morena Jesu o ile a mo amoha sona ka ha a tsoha bafung (Ts'enolo 1:17-19). Lihele ha li ea etsetsoa motho, empa batho bohle ba hanang Morena Jesu maphelong a bona, ba tlameha ho fumana kahlolo e ts'oanang le ea liabolosi hobane ho hana Krete ke ho latela liabolosi. Lihele li boemong ba moea empa li fumaneha botebong ba lefats'e ka bolulo (Baefese 4:9). Lihelong hona le lillo le litsikitlano tsa meno ka lebaka la bohloko (Matteu 24:51, 25:30). Hona le mollo o sa timeng le liboko tse sa shoeng (Mareka 9:42-50). Hona le lenyora le litlhokofatso (Luka 16:23-25). Ha hona phomolo lihelong. Lintho tsohle tse mpe li ea fumaneha lihelong, mohlala: tlala, lenyora, mafu ka botlalo ba ona, lehloeo. Litsebe tsa Ntate Molimo li koetsoe ho batho ba lihelong. Hona le batho hona joale lihelong. Ke batho ba hlokaletseng lefats'eng ba sa amohela Morena Jesu kapa ba mo furalletse ka ho khetha ho mo koenehela ha ba ne ba motseba pele. (Baheberu 9:27). E ntse e le batho ba felletseng empa ba ile ka 'mele ea bona ea moea. Ba utloa tsohle tse etsahalang ho bona 'me ba ntse ba na le khopolo e felletseng ea maphelo a bona a lefats'eng le ea batho ba habo bona ba setseng lefats'eng (Luka 16:27-31). Ba tla ba mono ho fihlela ba isoa lets'eng la mollo. **Sebaka sena se loketse baetsalibe ba hanneng Morena Jesu hobane ke sona feela se ka khotsofatsang toka ea Ntate Molimo, hobane Molimo eo re mo sitetsoeng rele batho ha a fele, ka hona kahlolo ea rona e tlameha hoba e sa feleng. Hape ke Molimo o halalelang ea senang bobele hohang kapa lefifi le le lenyane, ka hona sebe sa rona se khahlanong le eena ka botlalo. Hape Molimo eo re mo sitetsoeng o boholo bo senang tekanyo, ka hona sebe sa rona se khahlanong le eena ka tsela e senang tekanyo. Joale, sebaka sena ke sona feela se ka khotsofatsang toka ea Ntate Molimo. Kaofela re ne re lokeloa ke sebaka sena, empa Ntate Molimo o re bonts'ite mohau ka Morena Jesu, 'me bohle ba amohelang Morena Jesu baa pholosoa, athe ba mo hanang ba amohela toka e ba lokelang. Se isang motho lihelong ke semelo sa sebe seo re hlalileng rena le sona ka lebaka la Adama, empa se buang ka kotlo, boemo le kahlolo ea motho lihelong ke mesebetsi ea hae e mebe. Lihelong batho ntse ba hopola maphelo a bona a lefats'eng le ba habo bona. Ba lapile, ba nyoruo, ba khathetse, ha bana matla, ha ba khone ho hema, joale ba hlokoletsoa ke mollo le matemona le libupuo tsa lihele. Lihele ke sebaka se boemong ba moea. Kotlo engoe le engoe e tlameha ho bolaea motho lihelong, empa batho ha ba khone ho shoa joalo ka ha re shoa boemong ba nama mona lefats'eng ka tsela ea ho thola ebe ha re sa utloa letho. Lihele ke ponahatso ea lefu ka botlalo.**

LET'SA LA MOLLO: Lets'a la mollo ke sebaka se seng sa kahlolo ea Ntate Molimo. Ha joale ha ho so be le motho kapa letho lets'eng la mollo. Qetellong, liabolosi, matemona ohle, baporofeta ba bohata, batho bohle ba lihelong, le lihele ka botsona li tla isoa lets'eng la mollo le bohle bao mabitso a bona a leng sieo bukeng ea bophelo. Ba tla ba mono ka ho sa feleng ba ntse ba hlokoletsa. Le liabolosi o tla be a hlokoletsoa le matemona oohle. (Ts'enolo 20:10-15) Lets'a la mollo ke qetello ea tsohle tse mpe. Lets'a la mollo le boemong ba semoea joalo ka Jerusalema e mocha feela. 'Me mona batho batla isoa ka 'mele a bona ea semoea empa e sa tlotlisoang 'me re hlalosa taba ena thutong e latelang. Ka mantsoe a mang, batho batla tsosoa bafung ba nto ahloloe

pele terone e ts'oeu e ts'abehang ea Borena ba Jehovah ebe joale ba isoa lets'eng la mollo ka ho sa feleng. **Lets'a la mollo ke sebaka se boemong ba semoea (sena se bolela hore ke boemong ba nama bo kopaneng le ba moea joalo feela ka lefats'e le lecha.**

BOFELO

Joaloka balumeli, re tlameha ho utloisisa le ho elelloa hore re phela matsatsing a bofelo. Ka nako ea bo-Johanne, lilemo tse likete li peli tse fetileng, e ne e le hora ea ho qetela (1Johanne2:18). Ho bolelang hore hona joale ke motsotso oa ho qetela. Morena Jesu o tla khutla hape haufinyane ho tla lata kereke ea hae (Liketso 1:9-12). Thutong ena ke tlo hlalosa hore na ho tla etsahala eng qetellong. Ka makhetlo bibeleng, Morena Jesu ka boena le baapostola, ba bua ka ho khutla ha hae. Seo ke se ngotseng thutong ena ke khutsufatso ea lintlha tse tla ba teng bofelong. **Ha se hore hakalo li tla etsahala hantle ka tatellano ena e ngotsoeng mona hobane le bibe le ha e fane ka tatellano e hlakileng (hape ha ke ea hlalisa lintho tsohle tse tlang ho etsahala qetellong, empa ke lekile ho khutsufatsa le ho bebofatsa tse ling tsa lintho tse tlang ho etasahala qetellong).** U ele hloko hore buka ea Ts'enolo e ngotsoe ka lits'oants'o, 'me hore motho a e utloisise hantle, o tlameha ho utloisisa hore na lits'oants'o tseno li bolela eng. Mohlala: sebata se bua ka Anti-Kreste (Anti Kreste ke sera sa Kreste, eleng ponahatso ea 'muso oa liabolosi lefats'eng o tlang ho bonahatsoa ke batho ba khahlanong le Kreste). Khanyapa e ka ho (Ts'enolo 12) e bua ka liabolosi, ha linaledi tsa leholimo tsona li bua ka manyeloi. Joale ho molemo hore molumeli a se ke a e nka 'me a e ruta ele ka mokhoa oo e ngotsoeng feela, empa a ithute ho utloisisa lits'oants'o le moelelo pele. Hape buka ena e bua ka bokhale, bojoale le bokamoso. E bua ka pele lefats'e le etsoa, bohareng ba lefats'e le bofelo ba lona. Sepheo sa buka ena, ha se hore molumeli a utloisise ntsha e 'ngoe le e 'ngoe ea se tla etsahala ka tatellano, empa ke hore molumeli a tsebe hore tsohle li tla etsahala ho ea ka morero oa Ntate Molimo le ka nako ea hae, hape le hore ba amohetseng Morena Jesu ba tsebe hore ba na le bophelo bo sa feleng 'me ba tla ba le Morena ka ho safeleng. Lintho tse etsahalang tse supang matsatsi a bofelo li ngata. Matsatsi a bofelo a qalile ha Moea O Halalelang a qala ho sebetsa le Kereke ea Morena Jesu (Liketso 2:17). Matheu 24:4-15 e hlalisa tse ling tse tla etsahala ka matsatsi a bofelo. Ho tla hlaha baporofeta ba bangata ba bohata, ho tla ba le lintoa tse ngata le lisisinyeho tse ngata tsa lefats'e le tse ling tse ngotsoeng litemaneng tsena.

HO KHUTLA HA MORENA JESU (1 Bathesalonika 4:13-18).

Bibele e ea hlakisa hore Morena Jesu o tla khutla lekhetlo la bobeli. Morena Jesu e sale a ea leholimong ka 'mele oa hae o tlotlisitsoeng, a lula letsohong le letona la Ntate. Hajoale, Morena Jesu o ntse a sebetsa le Kereke ea hae ka Moea O Halalelang. Empa o tla khutla ka 'mele oa hae oa semoea, e leng 'mele oa hae o tlotlisitsoeng oa nama le masapo. Ha a khutla, ho tla etsahala tse latelang:

- 1) Bafu ba hloka hantseng ba mo amohetse le ba hloka hantseng selekaneng sa khale ba neng ba lumela ho Jehova, meea ea bona e leholimong e tla kopana le 'mele ea bona 'me ba tla tsosoa bafung ka 'mele e tlotlisitsoeng e ts'oanang le ea Morena Jesu ka mor'a tsoho ea hae. **Meea ea bafu ba hloka hantseng selekaneng sa khale ba lumela ho Jehova e ile ea ea leholimong ka mor'a tsoho ea Morena Jesu bafung. Matteu27:52-54 e ea hlakisa hore mafika a ile a petsoha, 'me mabitla a bahalaleli a buleha, 'me ba tsoa mabatleng a bona. Re hlalositse thutong ea Molimo ha re bua ka Morena Jesu, hore bafu bana ha baa tsoha ka 'mele ea nama, empa ba tsohile ka 'mele ea moea, mabitla a bulehile semoeeng, 'me hape re ile ra hlalosa hore temana ena ke boporofeta feela ba se tla etsahala qetellong ka nama (1Bathesalonika 4:15-18, 1Bakorinte15:20-27, 42-54, Bafilipi 3:20 le 21).**
- 2) Ba tla beng ba ntse ba phela ha Morena Jesu a khutla, 'mele ea bona e tla fetoloa ka ho panya ha leihlo ho fetoha 'mele e tlotlisitsoeng (1 Bathesalonika 4:17, Bafilipi 3:20, 1 Bakorinte15:52) (3) Balumeli bana bohle ba tla nkeloa holimo ho ea kopana le Morena marung (1 Bathesalonika 4:17). (4) Ba tla tsamaea le eena ho ea leholimong ka 'mele ea bona e tlotlisitsoeng. Morena Jesu o tla khutla hona mono marung, 'me a khutlele leholimong le kereke ea hae. (5)Ho tla ba le mokete oa lenyalo la Kreste le kereke ea hae leholimong (Ts'enolo 19:6-10). (6) Balumeli ba tla ba le Kreste

leholimong nako e itseng e sa hlakisoang hantle bibeleng. **(Ho tla ba le tse ling tse ngata tse etsoang leholimong ka nako eno). (7) Ho tla ba le nako ea meputso ho ea ka moo emong le emong a phethileng morero oa Ntate Molimo ka bophelo ba hae (2Bakorinte 510).**

HO TLA BO HO ETSAHALA ENG LEFATS'ENG?

- 1) Ho tla be ho ntse ho na le bophelo lefats'eng. Balumeli ba 'nete ba tla be ba le sieo lefats'eng, ba nketsoe leholimong. Empa hono ha ho no emisa tsoelopele ea bophelo lefats'eng (Matheu 24:36-45). (2) Nakong eo Morena Jesu kreste a khutlang ka eona, kereke ea hae e tla be e tsamaea ka ponahatso e phethahetseng ea bara le barali ba Molimo ba holileng, e tla be e busa lefats'eng, me e tla be e lemalitse liabolosi le 'muso oa hae oohle (Ts'enolo 13: 3). Seo bibe le e

se bolelang ha e re sebata sa pele se ne se na le leqeba le ka bolaeang la sabole, e buoa ka leqeba le lebe haholo leo diabolosi le `muso oa hae ba le fumaneng ka lebaka la lentsoe la Ntate Molimo le neng le buuo ke kereke ha e sa ntsane e le teng lefats`eng. (Sabole e bolela lentsoe la Ntate Molimo). **(3)** Ka nako eno, puso ea liabolosi e tla iponahatsa ka `muso o itseng lefats`eng o tla be o busoa ke sera sa kreste (anti Christ) (1Bathesalonikka 2:5-8). Temana ena e re joetsa hore ea thibelang ponahatso ea liabolosi ka botlalo ba eona lefats`eng ke Moea O Halalelang ka kereke. Hang ha kereke e tlosoa lefats`eng, satane o tla bonahatsa `muso oa hae lefats`eng ka botlalo. Ha ho buuo ka anti kreste ho buuo ka `muso o khahlanong le Kreste, e leng `muso oa diabolosi empa a sebelisa batho ba o etelletseng pele ba mo emetseng lefats`eng. Batho bana ba tla fuoa matla ke satane a ho etsa mehlolo le limakatso tse tla thetsa batho. Mabitso a anti-Kreste a fapaneng ke: sebata (Ts`enolo 17:8,16, 19:19-20), sebata se tsoang ka har'a leoatle (Ts`enolo 13:1-10), Ea khopo (2Bathesalonika 2:3-5). Ho ntse ho na le mabitso a mang a anti Kreste ao ke sa a ngolang. **(4)** Batho bohle ba tla qobelloa ho amohela `muso ona oa sera sa Kreste le lets`oao la oona matsohong kapa liphatleng tsa bona, e leng 666 (Ts`enolo 13:11-18). **(5)** Ba le hanang ba ke ke ba lumelloa ho reka kapa ho rekisa, `me ba tla bolaoa ka sehlooho (Ts`enolo 13:16-18). **(6)** Ho tla ba le batho ba pholosoang ka nako eno, empa joale ba tla tobana le mats`oenyeho le lithekefetso tse kholo ka lebaka la tumelo ea bona, hape ba tla bolaoa (Ts`enolo 11:13, Ts`enolo 13:15, 14:6-14). **(7)** Puso ena e tla tsoela pele nako e itseng, `me e tla bonahala eka e molemo bathong ba e amohetseng (Ts`enolo 13:13-15). **(8)** E tla ka ho ba le khotso le bo`ngoe lefats`eng, `me lintho tsohle li tla tsoela pele ho ea ka tloaelo, ho tla bo ho ntso ho nyalana ho nyalisoa, `me hona le `muso o le mong o busang lefats`e lohle, `me o tla bonahala o tisa molemo lefats`eng ho ba lahlehileng.

HO TLA HA MORENA JESU LE BALUMELI LEFATS`ENG KHETLO LA BORARO (LETSATSI LA MORENA)

- 1) Morena Jesu o tla khutlela lefats`eng le balumeli ka `mele ea bona e tlotlisitsoeng (Juda1:14).
- 2) Morena Jesu o tla felisa puso ea sera sa Kreste, a ba a hlole sera sa Kreste ka khanya ea hae le ka lentsoe la hae (2Bathesalonika 2:8).
- 3) Batho bohle ba amohetseng puso ea sera sa Kreste le lets`oao la sona ba tla isoa lets`eng le tukang ka mollo le sebaole (Ts`enolo 14:9-12).
- 4) Liabolosi le batho bao a neng a ba sebelisa ho etella `muso oa hae pele lefats`eng le bona ba tla isoa lets`eng la mollo (Ts`enolo 20:10).
- 5) Bafu ba sa lumelang ba tla tsosoa le bona ho ea ahloloa ke Ntate Molimo pela Terone ea hae e tlotlehang. Ba ke ke ba e ba le `mele e tlotlisitsoeng empa batla tsosoa bafung le bona ho tla ahloloa. Meea ea bona e liheleng e tla kena `meleng ea bona `me ba tsosoe batlo ahlolaloa lefats`eng moo ba sitiloeng ba ntse phela hona teng. Libe tsohle tsa bona li tla tsoha le bona, hobane ha li ka ba tsa hlatsuoa ka mali a konyana, `me ba tla ahloloa ho ea ka mesebetsi ea bona (Liketso 24:15, Johanne 5:28-29). Bana ba tla tsohela ho ea tsuong e sa feleng, lets`eng le tukang ka mollo le sebaole. Lets`a la mollo le boemong ba semoea joalo ka lefats`e le lecha. Le lihele ka bo tsona li tla tlosoa bohareng ba lefats`e li isoe lets`eng la mollo, hobane Ntate Molimo o tla ba a tlo nchafatsa lefats`e. Qetello ea bohle ba sa amohelang Morena Jesu, ea liabolosi le matemona, baporofeta ba bohata le tsohle tse mpe ke lets`a la mollo (Ts`enolo 20:11-15).

Ho bonahala hore tsohle tseo Ntate Molimo a li etsang lehlakoreng la leseli, o li etsa ka ho ts`oana lehlakoreng la lefifi. Mohlala: Bafu ha ba hloka hla ba pholositsoe, ba ea leholimong ka `mele ea bona ea moea. Ka tsela e ts`oanang feela, ba hloka hla ba sa amohela Morena Jesu ba ea liheleng ka `mele ea bona ea moea

Joale ka tsela e ts`oanang, bafu ba lumetseng ho Morena Jesu ba tla tsosoa bafung, meea ea bona e kene `meleng ea bona e be `mele ea bona e tsosoa ese ele `mele e tlotlisitsoeng, ebe ba phela lefats`eng le lecha le Morena Jesu a le teng hara bona. Ka tsela e ts`oanang, ba hloka hla ba sena Morena Jesu, meea e bona e liheleng e tla kena `meleng ea bona e shoeleng, ebe le bona ba tsosoa bafung ka `mele E SA tlotlisoang. Ba tla fuoa matla fela a ho ema pela Terone ea Ntate Molimo e ts`abehang ho tla ahloloa ho ea ka mesebetsi ea bona. Ebe ba isoa lets`eng le tukang ka mollo le sebaole. Ba tla ba mono ka `mele ea bona ea semoea empa e sa tlotlisoang, `me batla ba mono ka ho sa feleng. Satane morena oa bona o tla be a le hara bona le ena a hlokoatsoa. Lets`a la mollo le boemong ba semoea joalo ka lefats`e le lecha.

Taba ena e re bonts`a likahlolo tse peli tseo batho batlo tobana le tsona. Ea pele ke ea balumeli pela setulo sa Kreste ho e aka Bakorinte 5:5-9. Ena ke kahlolo ea ba amohetseng Morena Jesu ea meputso. Mona balumeli ba tla putsoa ho ea ka moo ba sebellitseng Ntate Molimo ka teng ha ba sale lefats`eng. Bible e re joetsa hore mesebetsi ea balumeli bohle e tla feta mollo oa Kreste oa kahlolo. (Mollo oa Kreste oa Kahlolo hase mollo oa lihele). `Me mesebetsi ea rona e tla lekoka ka mollo ona. Haeba mesebetsi ea rona e mamella mollo ona oa Kreste

e sa che, motho ka bo mong otlafumana moputso oa hae ho tsoa ho Morena (1 Bakorinte :3:14). Empa ha mesebetsi ea rona e ka cha, rona retla pholosoa empa re tla ba le tahlehelo e kholo (1Bakorinte 3:15).

Ntate Molimo o ahlola lebaka le merero ea rona eo re etsang lintho ka eona. Soohle se sa etsoang ka lerato le tlotlisong ea Morena Jesu li tla cha. Joale leholimong ho tla ba le batho ba pholositsoeng ba tla ba le tahlehelo e sa feleng ho ea ka moo ba ileng ba iphelela feela ba sa behe `muso oa Ntate Molimo pele maphelong a bona, la ba tla natefelo ke meputso e sa feleng ea ho ea ka moo ba ileng a itella Morena Jesu ka teng.

Kahlolo ea bobeli ke ea ba se nang Morena Jesu. Ena ke ea terone e ts'oeu e `tshabehang eo batho bohle ba tla ema pela terone ea Morena Jesu ho tla ahloloa ka mesebetsi ea bona ba nto isoa lets'eng la mollo le sebabole. Ntate Molimo o etsa sena hobane batho ba tlameha ho ahlololea lefats'eng moo ba sitiloeng teng.

Joalo feela ka ha motho a ka etsa tlolo ea molao naheng e itseng eaba o balehela naheng e n'goe, ha a ts'oaroa, o khutlisetsoa moo a tlosetse molao a nto ahlololea teng (T'senolo 20:10-15).

LEFATS'E LE LECHA: Ntate Molimo o tla etsa lefats'e le leholimo le lecha. `Me Jerusalema e mocha e tla ba ntlo kholo ea lefats'e le lecha (Ts'enolo 21-22). Leholimo lena ke la pele le la bobeli leo ho buuoang ka lona, ha se leholimo leo Ntate Molimo a leng ho lona, e leng la boraro. Balumeli bohle ba tla phela lefats'eng le lecha le Ntate Molimo le Morena Jesu Krete ka `mele ea bona e tlotlisitsoeng. Le Moea O Halalelang o tla ba a ntsa a phela ka hare ho bona (Johanne 14:6). Lefats'eng le lecha ho tla bo ho sena lefu, sebe, bokuli, lithohako le eng kapa eng e mpe (Ts'enolo 22:3-6). Hape ho tla bo ho sena lenyalo le litakatso tsa lenyalo lefats'eng lena le lecha (Matheu 22:23-33). **Ho utloisisa mafats'e a moea ka botebo, bala thuto ea boemo ba moea.**

SELALLO (LUKA 22:14-21)

Selallo ke eng? Selallo ke sejo le seno tse re hopotsang `mele oa Krete o ileng oa bolaoa le mali a Krete a ileng a ts'oloha sebakeng sa pholoho ea rona. Ha re ja selallo re ikhopotsa lefu la Morena (Luka 22:19). **Hona ha ho bolele hore bohobe bo jeoang bo fetoha `mele oa Krete moeeng kapa seno se fetoha mali a Krete; Se etsahalang ke hore bohobe bo emela `mele oa Krete, ha seno sona se emela mali a hae. Ha se setlamo hore ho jeoe bohobe bo senang tomoso kapa veini ea `nete e taeang. Ho ka sebelisoa mofuta e fapaneng ea bohobe kapa likuku kapa sejo se seng se ka re hopotsang `mele oa Krete. Hape ho ka sebelisoa seno (drink) sefe kapa sefe se tla re hopotsa mali a Krete. Hangata ho sebelisoa drink ea morara e khubelu.**

Re ja selallo joang? (1Bakorinte 11:17-34) Pele ke hlalosa hore na selallo se jeoa joang, ke tla qala ka ho hlalosa phapang pakeng tsa kereke eo Paolosi a neng a e ngolla le likereke tsa hona joale tabeng ea ho ja selallo. Ka nako ea Paolosi, balumeli ba ne ba kopana mantsiboea ho ea ja selallo. Ba ne ba hlile ba se ja e le lijo tsa mantsiboea. Joale ho ne ho etsahala hore ba bang ba fihle pele ho ba bang, ebe ba se ba ja ebile ba noa haholo hoo ba bang ba fihlang morao ba fumanang lijo li se li felile. Ba ne ba se ba ja ba inahanetse lijo feela, ba sa elelloe hore ba kopanetse ho tla ja `mele oa Morena le ho tla noa mali a hae. Hona ho ile hoa tlisa kahlolo ea Ntate Molimo ho bona. Ke hona hoo Paolosi a neng a ho bolela ha a re ba ja ka tsela e sa lokelang. **Ho ja selallo ka tsela e sa lokelang ke ho se ja o sa elelloe hore ke `mele le mali a Morena. Senoelo sena e ne e se senoelo se taeang seo ba se noang. Paulosi ha a re e mong oa khora kapa o noele o ne a ba khalema ka hore ba jele kapa ba noele ho feta tekano `me ba bang ha ba fumana letho (1Bakorinte 11:20-22), e seng ka botaoa. Hobane Paulosi o khalema botaoa ka thata mangolong a hae, `me hoja e le botaoa, a ke be a sa re ba lo noella hae (1Bakorinte 11:22).** Empa feela likerekeng tsa hona joale selallo ha se jeoe ka tsela e ts'oanang le ea kerekeng ea nakong eno. Ha se jeoe e le lijo tsa mantsiboea. Hangata se jeoa e le karoloana ea bohobe le seno sa morara kapa ka tsela efe kapa efe eo kereke e ka e khethang. **Joale ke tlo hlalosa hore na selallo se jeoa joang;**

- 1) Re tlameha ho elelloa hore sejo le seno tseno li emetse `mele le mali a Morena Jesu. (2) Re tlameha ho seja ka kutloisiso ea hore na se bolela eng. Ha re ja selallo, re bolela le ho ikhopotsa lefu la Morena ho fihlela a khutla (1 Bakorinte 11:26). (3) Selallo se ka jeoa ke batho ba pholositsoeng feela. (4) Re tlameha ho hopola seo lefu la Morena se se tlotlisitsoeng ho rona, e leng likamano tse ntle le Ntate Molimo, bophelo, pholo, katleho, mahlohonolo le tsohle tse ntle `me re lebohe ka tsona. (5) Re se je ka teboho ho Morena Jesu. (6) Selallo se ka jeoa ke molumeli a le mong, kapa ke lelapa la balumeli kapa ke sehlopha sa balumeli kapa ke putheho ea balumeli kerekeng. Se ka jeoa ka linako tsohle tseo molumeli kapa balumeli ba li khethang. (7) Se ka jeoa e le bohobe bofe kapa bofe kapa senoelo sefe kapa sefe se ka re hopotsang mali a Krete. (Empa e seng se taeang). **Ho ja selallo ho bolela eng?**
- 1) Ke nako ea ho ikhopotsa lefu la Morena Jesu le tsohle tseo le li tlotlisitsoeng molemong oa rona.
- 2) Ke nako ea kopano le Morena Jesu le balumeli ba bang.
- 3) Ke ho elelloa le ho bolela selekane se secha se thehiloeng ka mali a Krete.
- 4) Ke ho leboha Ntate Molimo ka seo a re etselitsoeng sona.

PASEKA LE SELALLO:

Ho ea ka selekane sa khale, bana ba Iseraele ba ne ba keteka Paseka. Paseka ke eng hantle, hape rona e re ama joang. **Lentsoe Paseka le bolela (Passover), kapa, “ho feta”. E bitsoa Paseka hobane e ne e le ha Lenyeloi la lefu le feta bana ba Iseraele ka lebaka la mali a konyana a neng a tlotsitsoe mamating a bona.**

Iseraele e ne e le bokhobeng Egepeta lilemo tse 450 kaofela. Joale hoa etsahala hore Jehova a ba lokolle Egepeta ka liponts'o, limakatso le likahlolo tse ts'abehang holim'a Ma Egepeta. O ile a otlala Ma Egepeta ka likotlo tse leshome (Exoda7-15). Empa Faro Morena oa Egepeta o ile a ithatafatsa pelo, a hana ho lokolla bana ba Iseraele ho fihlela kotlo ea leshome, e leng ea ho bolaea matsibolo (First born) oohle a Egepeta a batho lea liphoofole. Bosiung boo lenyeloi la lefu le tlang ho bolaea matsibolo a Egepeta ka bona, Jehova o ile a buoa le Moshe hore a laele bana ba Iseraele hore ba nke konyane e tona e se nang sekoli kapa mofokolo kapa bokuli bofe kapa bofe. Ebe baa e bolaea hape ba e bese. Ebe ka mali a eona ba tlotsa lemati la ntlo ea bona. 'Me moo ho nang le mali, lenyeloi la lefu le neng le tlisa kahlolo ea Jehova le tla feta feela le sa bolaea letsibolo la lelapa leno. Ho ne ho thoe ba je konyana eno e besueong ka bohobe bo senang tomoso le ka meroho e babang. Ha fela hoa eba joalo bosiung bono, Matsibolo ohle a Egepeta a shoa, empa ba Iseraele ba phela, 'me ba tsoa Egepeta bosiung bono. Hoo ho bolela eng ho rona ba Testamenteng e ncha? Tsena tsohle tse etsahetseng Selekane sa khale ke liriti feela tsa Testamente e ncha. Ke lits'oants'o feela tse porofetang ka Krete. Morena Jesu o ile a thakhisoa ka Paseka. Iseraele ea selekane sa khale e emetse Kereke selekane se secha.

- 1) Jehova o itse ba bolae konyana e senang sekoli selekane sa khale, **hona ho ne ho supa Morena Jesu, ea neng a se na sebe, eleng Konyana ea Molimo e senang sekoli (Johanne 1:29 , 1Peterose 1:19)**
- 2) Ho itsoe ba tlotse mamati a matlo a bona ka mali a konyana eno, 'me moo ho nang le mali a konyana, kahlolo ea Ntate Molimo e tla feta. **Hona ho supa hore batho ba hlatsuoeng ka mali a Morena Jesu ba pholoso a kahlolong ea Ntate Molimo (Baroma 5:8-12)**
- 3) Ba ne ba tlosoa Egepeta tsatsing leno. **Ha re hlatsuo a ka mali a Morena Jesu re pholoso a, re tlosoa 'musong oa lefats'e , 'me re kenngoa 'musong oa Ntate Molimo.** (Egepeta e emetse 'muso oa lefats'e, e leng 'muso oa satane (2Bakorinte 4:4). Ka mantsoe a mang, tsamaiso ea lefats'eng lena e tlisoa le ho busoa ke satane, ke hona ho boleloang ha ho thoe ke morena oa lefats'e lena.
- 4) Bana ba Iseraele ba ne ba tlameha ho ja konyana eno e hlabiloeng. Lelapa le leng le le leng le ne le tlameha ho ja nama ea konyana ka lona tsatsing leno, ho ne ho supa hore ba elelloa le ho ikamahanya le konyana eno e shoeleng sebakeng sa bona. **Le rona selekane se secha, ha re ja selallo, re ea elelloa, rea ikamahanya rea hopola, rea ananela ebile re phatlalatsa lefu la Morena le re phelitseng ho fihlela a khutla (1Bakorinte11:26).**
- 5) Lefu la konyana ha ba le Egepeta feela, ke lona le ba pholositse kahlolong ea Jehova ka nako eno, ho tloha mono ba ne ba se ba ja Paseka selemo se seng le se seng ho hopola pholoho le tokollo ea bona Egepeta. **Lefu la Morena Jesu la sefapano kholekhotla le mali a hae a ts'olohileng, ke lona le re pholositse hape le hlatsoitseng libe tsa rona (Baheberu7:27, 9:11-13), ha re ja selallo, re etsa seikhopotso feela (Luka 22:19). Le rona re hlatsuo hang feela ka mali a Krete ha re ne re lumela ho eena.**
- 6) Konyana ena e ne e tlameha ho joa le bohobe bo se nang tomoso le ka meroho e babang. Bohobe bo senang tomoso e ne e le sesupo sa karohano pakeng tsa Iseraele le Egepeta, meroho e babang e ne e le ho hopotsa bana ba Iseraele bokhoba le bohloko boo ba tsoang ho bona Egepeta.
Le rona Krete ke konyana ea rona ea Paseka, ka lefu la hae re tlositsoe lefats'eng bokhobeng le pusong ea satane, hape re arohantho le sebe le lefats'e ka mali a hae (1Bakorinte 5:6-9). Tomoso e lekanngoa le sebe. Joale, tsena tsohle tse entsoeng selekane sa khale, ha bana ba Iseraele ba nts'oa Egepeta, e ne e le sesupo kapa seriti sa seo lefu la Krete le re etsatsang sona (Baheberu10:1-6). Rona bakreste ha re keteka Paseka, ha re keteke ha Iseraele e nts'oa Egepeta, empa re keteka lefu la Morena Jesu le re tlisitse ho Molimo, 'me ha re ja selallo, re e ikhopotsa lefu leno la Morena Jesu le tsohle tseo le re tlisitse tsona.

BOHLABOLLI (COUNSELLING)

Bohlabolli ke tsoelopele ea mosebetsi oo Morena Jesu a o tletseng oa ho boelanya batho le Molimo, ho busetsa batho sebakeng se nepahetseng ho Ntate Molimo, le ho lokisa moo sebe se sentseng maphelong a batho. Bohlabolli ba `nete bo supisa batho ho Morena Jesu e le eena tharollo ea bophelo ka kakaretso. Bohlabolli bo qala pele ka ho boelanya batho le Molimo. Bohlabolli ke ho hlabolla kapa ho eletsa motho e mong ea nang le bothata bo itseng. Ke ho mo etsa hore a elelloe le ho bona boemo ba hae ka tsela eo Ntate Molimo a bo bonang ka eona, le ho nka likhato tse nepahetseng boemong bono. Bohlabolli bo kenyetsetsa ho khothatsa le ho matlafatsa ea hlabolloang. Empa haholo ke ho mo etsa hore a bone ka tsela eo Ntate Molimo a bonang ka eona boemong bono. Bohlabolli ba bibeletse bo its'etleha holim'a lentsoe la Ntate Molimo. **Molumeli ea hlabollang o tlameha ho etsa tsena tse latelang ka nako ea tlhabollo:**

- 1) **A its'etlehe holim'a Moea O Halalelang le bohlae ba hae.** O tlameha ho elelloa le ho mamela Moea O Halalelang ka nako ea tlhabollo, a seke a ts'epa bohlae ba hae ba botho. A sebetse ka lineo tsa Moea O Halalelang ka nako ea tlhabollo. Mohlala: Tsebo, temoho ea meea le bohlae haholo. Ho hlabolla tjena ho bitsoa bohlabolli bo boporofeta. Moea O Halalelang ke eena mohlabolli e moholo.
- 2) **Mohlabolli o tlameha ho tseba lentsoe la Ntate Molimo ka botebo** le ho le manolla hantle ka ts'oanelo.
- 3) **Mohlabolli o tlameha ho utloisisa hore motho ke moea `me boholo ba mathata a batho a qala moeeng.** Mohlabolli a se ke a shebana le kelello ea motho feela, le ha le eona e le bohlokoa.
- 4) **Mohlabolli a elelloe lefats'e la moea ka nako ea tlhabollo hobane mathata a mang a tlišoa ke matemona,** joale o tla khona ho elelloa tsena ka neo ea temoho ea meea.
- 5) **Mohlabolli a ithute ho mamela batho, a se ke a ba kena hanong ha ba ntse ba buoa,** le ha a ka utloa ba buoa ntho e se nang kelello. Boholo ba batho ba itlhokela feela motho ea tla ba mamela. Ketsahalo eno ea ho mameloa feela e se e ntse e tliša pholo mothong ea imetsoeng.
- 6) **Mohlabolli a lumelle motho a lle, a se ke a bonahala a ts'oha kapa a makala ha motho a lla.** A se ke a leka ho motholisa ka pele ha motho a lla, empa a mo lumelle ho nts'a se ka hare.
- 7) **Mohlabolli a se ke a hlokofoa ha `moho le motho ea hlabolloang e be joale o se a fokola a sitoa ho mo thusa.** A ka mo utloela bohloko (compassion), empa feela a se ke a hlokofoa le eena. Ka mantsoe a mang, mohlabolli o tlameha ho theohela boemong ba ea hlabolloang, e be joale o mo thusa ho tsoa boemong bono ka ho mo shebisa lintho ka mahlo a Ntate Molimo, a tle a khone ho ba boemong bo nepahetseng ho Krete, a se ke a oa le eena eaba joale ba lla `moho, ba se ba hloka thuso ba le babeli.
- 8) **Ho hlokofoa le motho ke ho nka mathata a hae o a etsa a hau, ka hona, mohlabolli o tlameha hore a se ke a nka mathata a motho e mong a a etsa a hae,** empa o tlameha ho thusa motho ho isa mathata ano ho Ntate Molimo ka ho mo tataisa ka mangolo le ho thusa tumelo ea hae hore e matlafale ho Ntate Molimo.
- 9) **Mohlabolli a ithute ho buisa batho ka boikokobetso le tlhompho e kholo** ho sa tsotellehe hore na ba ba kae ho eena le hore na boemo ba bona ke bofe bophelong.
- 10) **Mohlabolli a se ke a halefela motho ea hlabolloang ha a elelloa hore ke phoso ea hae e bakileng mathata,** a hopole hore motho eno o tena a tla tlhabollong hobane a hloka thuso, `me le rona Ntate Molimo ha a re halefele ha re ikentse mathateng e be re tla ho eena re hloka thuso, empa o re thusa ka lerato.
- 11) **Mohlabolli a bolelle ea hlabolloang `nete, empa a e buoe ka lerato, hlomphe le boikokobetso,** a mo utloele bohloko joale ka ha Krete le eena a re utloela bohloko.
- 12) **Mohlabolli a se ke a bonahala a makala kapa a ts'oha ha motho a mo bolella ntho e mpe eo a e entseng.** Le ha eba ntho eo e mo nyarosa, a se ke a bonts'a kantle hore o ts'ohile kapa hona ho nyaroha, empa e be motho ea iketlileng ea bonahalang a phomotse.
- 13) **Mohlabolli a se ke a nka monyetla ka ea hlabolloang** hobane a fokola. Ea hlabolloang a seke a utloa ha eka o tlameha ho lefa ho hong kapa ho etsetsa ea mo hlabollotseng ho hong hobane a le tlasa khatello. Ho tloha mono, a seke a nka monyetla ka ea hlabolloang ka tsela e fe kapa e fe.
- 14) **Mohlabolli a be le pelo ea bosebelletsi:** a hlabolle ba bang hobane a ba rata `me a batla ho ba thusa. A se ke a hlabolla feela hobane a ichebetse litaba tsa hae.

LINTLHA TSE BOHLOKOA KA MOHLABOLLI LE KA NAKO EA TLHABOLLO

- 1) **Mohlabolli o tlameha hoba motho ea nang le kopano e tiileng le Ntate Molimo ea lentsoe, thapelo le boitimo.** Hape a bonahatse litholoana tsa moea bophelong ba hae (Bakhalata 5:22).
- 2) **Mohlabolli o tlameha ho khona ho boloka lekunutu, a se ke a seba ka litaba tsa batho.** Ho seba ke sebe se sehlo mahlong a Ntate Molimo. Haeba mohlabolli a fumane taba e mo imelang ho tsoa ho ea hlabolloang, a se ke a e buoa le

batho bohle, empa a e buoe le moruti kapa e mong oa baetapele ba koetlileng hore a mo thuse kapa a tle a tsoele pele ka tlhabollo eno.

- 3) **Mohlabolli a lule ka tsela e nepahetseng le ea hlabolloang**, Ba se ke ba atamelana haholo, hape ba se ke ba lula ka tsela e belaetsang, haholo ha e le e motona le e mo ts'ehali.
- 4) **Mohlabolli le ea hlabolloang ba lule moo ba bonoang ke batho ba bang ha e le e motona le e mo ts'ehali empa e seng moo ba khonang ho ba utloa**, haeba ba le ka phapusing (ofising), ba bule lemati hanyane hore ba khone ho bonoa ke ba bang, empa ba se ke ba ba utloa.
- 5) **Mohlabolli le ea hlabolloang ba se ke ba khomarelana ka maikutlo nakong ea tlhabollo**. Nako ea tlhabollo ke nako e kotsi haholo hobane joale batho baa ipulelana, ka hona, ho khomarelana ka maikutlo e kaba ntho e etsahalang habonolo ka nako ena haholo ha e le e motona le e mo ts'ehali. Ha mohlabolli a sa koetla, o tla khomarelana ka maikutlo le ba hlabolloang ha bobebe ha eba ba fapane botoneng le bots'ehaling, 'me baka qetella ba oele bohlohleng ba maikutlo, 'me bono bo ka isa bohlohleng ba nama. Motho oa Ntate o tlameha ho khomarelana le mosali oa hae feela ka maikutlo le ka nama, le oa 'me' joalo feela.
- 6) **Mohlabolli a etse bo'nete ba hore ea hlabolloang ha a fumane a se a ts'eliseha ha ana le eena feela haholo ha e le e motona le e mots'ehali**, ka hona, mohlabolli o tlameha ho lula a supisa ea hlabolloang ho Jesu Krete mohlabolli e moholo. A hla a balehise ea hlabolloang lipuong tse joalo, empa ka bohlale. Mohlala: lipuo tsa bo hore, "ke uena feela ea khonang ho nts'elisa".
- 7) **Mohlabolli le ea hlabolloang ba se ke ba fetoha ba rapelang 'moho** (Prayer partners) ka mora nako ea tlhabollo ha e le e motona le e mots'ehali. Ha ho oa nepahala hore motho oa 'me' a be le prayer partner ea motho oa ntate ha e se molekane oa hae kapa a eang lenyalong le eena. Empa ha e le batho ba bo 'me' ba le babeli, ha se phoso ha e ka ba barapeli 'moho (prayer partners). Empa ha e le motho oa Ntate le oa 'Me' ho fosahetse ha e se balekane kapa ba eang lenyalong. Thapelo ke ntho e tlisang katamelo e kholo le ho ipulelana, ka hona e etsa batho hore ba be ntho e le 'ngoe moeeng, 'me joale ho bobebe hore le nameng ba atamelane haholo, joale motho oa 'me kapa oa Ntate ea nang le molekane ha a tlameha ho atamela bo 'me kapa bo ntate ba bang haholo. Thapelo e lumelletsoeng bibeleng ke ea hore motho a rapele a le mong lekunutung le morena, ebe joale haeba a ena le motho ea rapelang le eena khafetsa ba le babeli, e be molekane oa hae kapa ea ts'oanang le eena ka botona kapa ka bots'ehali. Joale e be hoba le sekheo se seholo ka mora mona, e be joale eba thapelo ea balumeli ba bangata ea kopano kapa ea tumellano.

LITHUTO TSA BAETAPELE (1Timotia 3:1-14)

Mona ke lithuto tsa bohle ba boetapeleng ho sa tsotellehe hore na ke ba bitselitsoeng lineong tse hlano tsa Morena Jesu kapa ba sebelletsang e le baetapele kerekeng, kapa ba etelletseng pele ka tsela e fe kapa e fe. Ntate Molimo o tl'o re ahlola ho ea ka boikarabello boo a re fileng bona. 'Me ho hlakile hore ba boetapeleng ba tla fumana kahlolo e boima ho feta ba bang. Ke 'nete hore baetapele ba fuoa mohau o mongata ka lebaka la boikarabello boo ba nang le bona, empa ha ba ka ba bapala, kahlolo ea bona e tla ba boima haholo ho feta ba bang. Morena Jesu ke mohlala o phethahetseng oa moetapele ea phethahetseng. Ke eena mohlala o hlakileng oa hore na Ntate Molimo o batla moetapele ea joang. Re tlameha ho lula re imetha ka eena ka mehla, hobane re tlameha ho ts'oana le eena. Balumeli ba phethahetseng ba tla ts'oana le eena. **Joale, re tl'o sheba hore na bophelo ba moetapele bo tlameha ho ba joang. Moetapele o tlameha hore a phethehe lintlheng tsena tseo re tlo buoa ka tsona.**

- a) **Botho ba hae:** Ha o arohanya moetapele le mosebetsi oa hae, ke hore na ke motho ea joang bo'ngoeng ba hae. Bohle ba tseba ho kenya mampokisi ka pela batho, e be ba hlaha e ka ba lokile, empa se bohlokoa ho Ntate Molimo ke hore na o joang lekunutung ha ho se na ba u bonang. Mohlala ke ho arohanya moruti le phutheho le lineo tsa hae. Se bohlokoa ke hore na ke motho ea joang ka tlung kapa bo'ngoeng. Ntate Molimo o ahlola pelo. Ntate Molimo o shebane le hore na u fetoha eng ho feta hore na u ka etsa eng.
- b) **Molaetsa oa hae:** Moetapele oa mokreste o tlameha ho tseba lentsoe la Ntate Molimo ka botebo. A le tsebe ka hohle hohle. O tlameha hore a qete bibe le ka makhetlo makhetlo. Ha a ruta, a rute 'nete ea hona joale, a se ke a ruta tse sa re ameng testamenteng e ncha. O tlameha ho khona ho hlalosa selekane se secha le sa khale ka nepo, a arole lentsoe ka nepo (2 Timotia 2:15), hape a buoe 'nete ka lerato. A tsebe ho ahlola thuto ka nepo. Ho khetholla e fosahetseng ho e nepahetseng.
- c) **Ts'ebelletso:** Litholoana li tlameha ho bonahala ts'ebelletsong ea hae. Haeba e le moruti kapa moevangeli kapa a na le e 'ngoe ea lineo tse hlano tsa Morena Jesu, o tlameha hore ho be le ponahatso ea matla a Moea O Halalelang le lineo tse ling tsa Moea. A sebelletse ka lentsoe le ka Moea. 'Me litholana li bonahale ts'ebetsong ea hae. Litholoana ke batho ba amohelang Morena Jesu, ba holang moeeng le ba thusehang ka litsela tse fapaneng, mohlala: lipholiso, tlhohonolofatso joalo joalo. Moetapele o tlameha ho ipabola ka lineo tseo a li fuoeng.

- d) **Kholo:** Moetapele o tlameha ho ba motho ea holileng moeeng, ea bonahatsang litholoana tsa moea (Bakhalata 5:22). E seng ea bongoana, ea lulang a ngala kapa ea hlokang mamello. A khone ho ts'etjoa ke batho, e be motho oa lentsoe la hae, ha a itse o tla etsa tjena a etse joalo, ha a sa khona kapa a bona hore ha a na ho khona, a hla a hlakise esale nako. Kholo e bonahala ka litholoana tsa moea e seng ka lineo.
- e) **Botsitso:** Moetapele o tlameha ho tsitsa mosebetsing oo Ntate Molimo a mo fileng ona, a seke a ipapisa le ba bang, kapa hona ho kheloha mosebetsing ono. A seke a lumella letho hore le tlose mahlo a hae mosebetsing oo a o filoeng ke Ntate Molimo.
- f) **Boikokobetso:** Moetapele o tlameha ho ba motho ea ikokobelitseng pela Ntate Molimo le pela batho. Ea ikokobelletsang Ntate Molimo o tla ikokobelletsa ba bang. A ikokobelletse boetapele bo holim'a hae ka pelo ea hae eohle, e seng ponts'eng ea ba bang feela. A se ke a lekanya hore o betere ho ba bang, empa a elelloe hore tsohle ke ka mohau.
- g) **Bohloeki:** Moetapele o tlameha ho phela ka bohloeki mahlong a bohle, ba pholositsoeng le ba sa pholosoang. Bohloeki lipuong le liketsong tsa hae. Haele motho ea nang le molekane, a ipehele marako ho ba sa ts'oaneng le eena ka botona kapa bots'ehali. A se ke a ba le metsoalle ea batho ba sa ts'oaneng le eena ka botona kapa bots'ehali. Molekane oa ha eke ena motsoalle oa hae oa hlooho ea khomo. Ho atamelana haholo le ba sa ts'oaneng le uena ka botona kapa bots'ehali ho jala peo, 'me ha e hola, batho bano ba babeli ba tla khomarelana ka maikutlo ba etse bohloka ba maikutlo, ke moo ba qalang ho hopolana ha ba arohane, 'me ba kanna ba qetella ba khomarelana ka nama. A se ke a etsa ntho kapa a buoa ntho eo a ke keng a e buoa kapa a etsa ha molekane oa hae a le teng hobane e bonts'a ho hloka bots'epehi. Ha e le motho ea so kang a nyala, a phele ka bohloeki ponts'eng ea bohle, 'me a se ke a buuo hamphe ke batho. A ts'oare ba fapaneng le eena ka botona kapa bo ts'ehali joalo ka bana babo (1Timotia 5:1-3). Ha a fumane ea tla nyalana le eena, e be taba e tsebahalang, 'me ba phele ka bohloeki mahlong a bohle.
- h) **Lerato la chelete:** Moetapele e tlameha hoba motho ea shoeleng leratong la chelete. Lerato la chelete le ea bolaea (1Timotia 6:6-11). A bone bohlokoa ba chelete e le ho atisa 'muso oa Ntate Molimo. A se ke a etsa mosebetsi oa Ntate Molimo hobane a khannoa ke chelete kapa hore na o tla fumana eng ka ho o etsa. A sebelise chelete molemong oa kholo ea 'muso. A utloisisa hore Ntate Molimo ke eena ea mo atisang litlhohonolofatsong. A se ke a petetsa lintho moo a shebileng leruo, mohlomong a ba a sebelisa chelete ea ts'elletso hamphe. **A se ke a khetholla batho ka hore na bana le eng. A se ke a khetholla ba ruileng ho ba hlokang, empa a rate batho bohle 'me a ba ts'oare ka ho ts'oana (Jakobo2:1-14).**
- i) **Lebaka la ho etsa lintho:** Moetapele o tlameha ho etsa lintho hobane a sebelletsa Ntate Molimo, e seng hobane a batla ho bonoa ke batho. O tlameha hore a shoe lithorisong tsa batho, empa a batlane le thoriso e tsoang ho Ntate Molimo (Johanne 7:18). A se ke a rata ho sebelletsoa, empa a be le pelo ea bosebelleksi (Matheu 18:1,20:28). A se ke a ba tsietsing ea ho bonahatsa seo a nang le sona kapa seo a ka se etsang, empa a etse lintho ha ho hloka hla.
- j) **Mekhoa:** Moetapele o tlameha ho sebelisa mekhoha e otlohlileng ha a etsa lintho. E se ke eaba motho ea thetsang ka matsoe kapa ka liketso. E be motho ea bonolo ea buoang lipuo tse otlohlileng tse sa hlohlonts'eng litsebe. Le ha a khalema, a khaleme ka hlonepho le ka boikokobetso. A se ke a ba rofo kapa bohale kapa hona ho pheha likhang. A se ke a pheha khang ka lentsoe la Ntate Molimo.
- k) **Boits'oaro (Attitude):** Moetapele o tlameha ho ba bonolo ho batho bohle, ba pholositsoe kapa ba sa pholoso. A se ke a halefa ka pelenyana. E be motho ea har'a batho ba bang, ea ts'oarehang. A ithute ho ikamahanya le batho ba nkeloang fats'e bophelong. A se ke a tenehela batho kapa hona ho ba buisa hamphe. E be motho eo boteng ba hae bo thabeloang ka baka la bonolo le mofuthu oa hae. E be motho ea etsetsang batho botle, le ho bua batho hantle. A khone ho boloka lekunutu. E be motho ea ts'oarelang kapelenyana, ea sa tateleng ho ahlola.
- l) **Ts'ebeliso ea matla (Authority):** Moetapele o tlameha ho sebelisa matla a hae holima ba bang ka bohlale le ka lerato. A se ke a rohaka ba bang (Baroma 12:14) (Ba rohakang ba ipeha boemong ba baloi le satane, matemona ke ona a phethang lithohako tse buuoang ke batho, ba pholositsoe kapa ba sa pholoso, ho rohaka ho fapane le ho ahlola. Ntate Molimo o phetha likahlolo, satane o phetha lithohako). A khaleme ka tiio le ka hlonepho. A bonts'e hlonepho ho ba baholo ho eena le ha a ba lokisa moo ba fositseng. A se ke a lumella masaoana mosebetsing oa Ntate Molimo. A sebelise matla a hae ha ho hloka hla, a se ke a ts'aba letho. A se ke a ts'aba batho.
- m) **Lenyalo:** Lenyalo la hae le bonts'e sets'oants'o se ts'oanang le sa Krete le kereke ea hae. A ts'oare lelapa la hae ka nepo. Lelapa la hae le tsitse le bana ba hae ba holisoa ka ts'abo le hlomphe ea Morena. Lapeng, Ntate Molimo o tla pele, e be lelapa, e nto ba mosebetsi oa Ntate Molimo. A se ke a beha mosebetsi oa Ntate Molimo pele ho lelapa la hae (1Timothy3:4-6). Lelapa le se ke la oa ka lebaka la hore o shebane le mosebetsi oa Ntate Molimo feela. A khone ho arola nako ea hae ka bohlale.
- n) **Lipuo tsa hae:** Moetapele a se ke a buoa baetapele ba bang hamphe, haholo bao a sa ba utloisiseng. A mpa a batle ho utloisisa pele. A se ke a seba ho hang. E se ke eaba motho ea lipuo li tala kapa ea tellang ka hanong.

**HONA JOALE RE TLO SHEBA MEHLALA EA BAETAPELE LE BATHO BA BANG BAO E NENG E SE BAETAPELE BIBELENG, `ME RE ITHUTE HO TSOA MAPHELONG A BONA.** Biblele e ea hlakisa hore lintho tsena li ngolletsoe rona e le mehlala eo re tlamehang ho ithuta ka eona. `Me mona ke ngolla baetapele le balumeli bohle hobane litaba tsena li re ama bohle ba lumetseng.

Adama: Adama o ile a roba taelo ea Ntate Molimo ka lebaka la mosali oa hae (Genese 3:6); baetapele ba bang ba roba litaelo tsa Ntate Molimo ka lebaka la susumetso ea batho ba pela bona. **Molumeli o tlameha ho ts'oara le ho phetha taelo ea Ntate Molimo ho sa tsotelehe hore na e tla mo qabanya kapa hona ho mo arohanya le batho.**

Aborahama: Aborahama o ile a leka ho phethatsa ts'episo ea Ntate Molimo ka nama ha a bona e lieha ka tlas'a susumeso ea mosali oa hae (Genese 16:1-5). Ba bang ba leka ho phetha lits'episo tsa Ntate Molimo ka nama ha ba bona li lieha, nako tse ling ka baka la khatello e tsoang bathong kapa boeletsi bo fosahetseng ba batho, nako tse ling le ha ho ntse ho sena batho ba ba susumetsang. **Ka hona, molumeli o tlameha ho emela nako ea ntate Molimo ea ho etsa lintho, a se ke a khathala matla.**

Esau: O ile a nehela tokelo ea hae ea bojalefa joalo ka letsibolo ka lebaka la lijo feela hobane a lapile, eaba o tlo e llela ka morao (Genese 25:29-34). Balumeli ba bang ba ka nehelana ka boemo boo Ntate Molimo a ba fileng bona bo amanang le bosafeleng (eternity) ka lebaka la sebe sa nakoana feela. **Molumeli o tlameha ho tiisetse har'a liteko le liqholotso, `me a lule a eelloa seo Ntate Molimo a leng sona hape a mo fileng sona bophelong ba hae.**

Samsone: O ne a fuoe matla a phahameng haholo ke Ntate Molimo, `me o ne a ena le bokhoni ba ho lokolla Iseraele lireng tsa bona habobebe, empa ka baka la ho hloka boits'oaro le ho latela litakatso tsa nama, ha a kaba a phetha morero oa Ntate Molimo ka bophelo ba hae, le matla ano a ile a mo lahlehela (Baahloli 13-17). Ba bang ba fuoe lineo le tlolo ke Ntate Molimo ho phetha mesebetsi e boikarabello bo boholo, e tlang ho tliša tse molemo bathong ba bangata, empa ka lebaka la ho hloka boits'oaro le ho tsamaea ka nama, ba sitoa ho etsa seo ba se bitselitsoeng hape ba qetelle ba lahlehetsoe kapa ba theohile maemong a bona. **Ea bitsetsoeng, ebile a tlotsitsoe ke Ntate Molimo, a kokobele ha a eelloa boikarabello boo Morena a mo fileng bona, a tlöse sebe sohle bophelong ba hae, `me a inehle ho Ntate Molimo ka botlalo.**

Moshe: Moshe o ile a leka ho phetha mesebetsi oa ntate Molimo a sa ea koetlisong ea hae, ebile Ntate Molimo a so mo lokolle le hona ho mo tlotsetsa mesebetsi ono (Exoda 2:11-16). Pitso o ne a e utloa ka hare, ea hore o tlameha ho lokolla bana ba Iseraele Egepete le bokhobeng ba eona, empa nako ea Ntate Molimo e ne e so fihle. O ile a leka ho lokolla Mo Iseraele khatellong ea Mo Egepete, empa joale a ba a bolaea Mo Egepete, ka morao ho mono a tlameha ho baleha. Ka mora koetliso ea Ntate Molimo e mo nkileng lilemo tse 40, ea eba hona a khonang ho lokolla bana ba Iseraele Egepete ka katleho, ebile biblele e ne e se e mo bitsa motho ea kokobetseng ho feta bohle lefats'eng, hobane koetliso ea Ntate Molimo e ea kokobetsa, e nts'a bobele le boikhohomoso mothong. Balumeli ba bang ba leka ho phetha morero oa Ntate Molimo ba so e koetlisong hape Ntate Molimo a so ba lokolle, kapa hona ho bafa mohau (tlolo) ea ho etsa mesebetsi ona, joale o fumana ba tliša lefu bakeng sa bophelo, e be ba ikenya tšietsing. **Ka hona, molumeli a seke a tatela ho etsa lintho, le ha eba a fumane boporofeta bah ore o tla etsa hona kapa hane. A ithute ho tsamaea ka nako ea Ntate Molimo le ho amohela koetliso ea hae. (Bala ka koetliso ea Ntate Molimo thutong ea ho phetha morero oa Ntate Molimo ka bophelo ba hao)**

Moshe: Moshe o ile a sukulisa ha a bitsoa ke Ntate Molimo me a mo fa mesebetsi oa ho ea Egepete a ilo lokolla sechaba sa Iseraele. O ile a icheba liphoso le mefokolo ea hae (Exoda 3:11, 4:10, 13). Ba bang ba balumeli ba ikhella fats'e, ba icheba mefokolo le liphoso tsa bona ha Ntate Molimo a ba fa mesebetsi. **Molumeli a utloisise hore ha Ntate Molimo a mo fa mesebetsi kapa boikarabello bo itseng, ke Eena ea tla mo fa matla le bohlale ba ho bo phetha, a se ke a sukulisa Ntate Molimo, empa a bo amohele ka boikokobetso.**

Moshe: Moshe o ile a hloleha ho kena kanana ka lebaka le khalefo e se nang taolo e ileng ea etsa hore a fosetse Ntate Molimo ka ho otlala lefika empa a tlameha ho buoa le lona (Lipalo 20:1-13). O ne a halefetse phutheho ea hae ea bana ba Iseraele ka lebaka la ho se lumele ha eona. Baetapele ba bang ba halefela phutheho kapa ba ba etelletseng pele ha ba bona ba lieha ho hola kapa ho utloisisa kapa ho tlohela lefats'e le sebe. **Baetapele ba nang le boikarabello bona ba be le mamello ho ba ba okametseng, ba se ke ba ba kobisa kapa hona ho ba halefela hara batho, kapa ba etsa ho hong ho soabisang.**

Joshua: Joshua e ne e le moeta pele ea matla ka ho fetisisa. Ebile ke eena ea bonahalitseng puso ea Ntate Molimo ho feta ba bang bohle Iseraele, empa ka mora hore a hloka hale, Iseraele e ile ea rapela melimo e meng, ea kheloha tseleng e nepahetseng hobane Joshua o ne a sa koetlisa motho kapa batho ba tla tsoellisa mesebetsi oa hae pele ha a hloka joalo ka ha Moshe a ne a mo koetlisitse (Baahloli 2:8-14). Baetapele ba bang ha ba koetlise batho hore ba khone ho etsa seo ba

se etsang hobane bat s'oha hore mabitso a bona a tla theoha, kapa ba bang ba lekane le bona. Ho etsa joalo ke boikhohomoso le thetso ea satane, hobane Ntate Molimo o tla lula a u phahamisa ha uena u ntse u phahamisa ba bang. Ebile ha re ea fuoa mosebetsi oa ho phahamisa mabitso a rona, empa lebitso la Krete. Moetapele o tlameha ho koetlisa ba bang le ho fetisetsa seo a nang le sona ho bona, hore `muso oa Ntate Molimo o tlo o ate ka pelenyana ka matla. Ba ele hloko hore Ntate Molimo o ba ts'epa ka ba bang hore ba ba thuse hore ba fihlelle seo ba se bitselitsoeng, e seng hore ba ba hatelle ba ba khukhumetse, ba ba laole hape ba je ka bona. Ba tlameha ho ba etsa barutuo ba Morena Jesu e seng barutuo ba bona. Ha ba tlameha ho lokolla e mong hore a il'o ikemela, ba etse joalo ka thabo, ba ikutloe ba hlompheue ke Ntate Molimo hore a ba ts'epe ka bophelo ba ngoana oa hae hore a mo thuse hore a fihlelle moo Ntate Molimo a mo batlang teng. Morena Jesu o re ha a tla ho tlasebeletsoa, empa o tlele ho tla sebelletsa ba bang le ho itella bona. **Baetapele ba tlameha ho sebelletsa ba bang le ho itella bona. Ka mantsoe a mang, ba batle tsoelo pele ea ba bang ka hohle hohle.**

David: Davida o ne a tsamaea le Ntate Molimo ka boikokobetso le ka boitelo ha a so ka a fumana maemo le leruo le phahameng. Empa ha a se a phahamisitsoe ke Ntate Molimo, a se ruile haholo, a qala ho khoehlisa boinehelo ba hae, `me a qetella a oele sebeng sa bohloa le sa ho bolaea (2Samuele 11:1-27). Balumeli ba bang ba khoehlisa boinehelo ba bona ho Ntate Molimo ha ba qala ba tsamaea ka tlhohonolofatso ea Ntate Molimo le katiso le maruo a hae. **Balumeli ba tlameha ho lula ba tile ho Ntate Molimo, `me ba ikokobelitse ebile ba ts'oere bophelo ba bona ba boinehelo ka matla ho sa tsotelehe hore na ba se ba atlehile kapa ba atile ha kae bophelong.**

Gehazi le Judase Iscariota: Bana ba ile ba lahlehela ke mosebetsi eo Ntate Molimo a neng a ba file eona ka lebaka la ho rata chelete le leruo (2Marena5:15-27, Matheu27:1-6). Hona le balumeli ba bang ba ratang leruo, `me ba bona mosebetsi oa Ntate Molimo e le tsela e `ngoe ea ho ruoa, bana ba tjena ba ke ke ba tsoeella le Ntate Molimo (Matheu 6:24).

Molumeli o tlameha ho se ratane le chelete, empa a sebelise chelete ho aha `muso oa Ntate Molimo.

Peterose: O ile a latola Morena Jesu ka lebaka la ho ts'aba batho (Matheu 26: 69-75). Ba bang ba pata `nete ea hore ba pholositsoe ha ba le hara batho ba itseng. **Molumeli o tlameha ho emela Morena Jesu ka sebete maemong ohle (Matheu 10: 32-34)**

Peterose: O ne a ntse a tsamaea holima metsi hantle ka tumelo, empa o ile a ts'oha ha a qeta ho utloa lifefo hape a bona maqhubu ka mahlo a hae Matheu 14:22-34). Hona le balumeli ba tsamaeang ka tumelo, empa ba qetelle ba ts'oha ebe ba qala ho tsamaea ka pono le ka kutlo ha ba tobana le liqholotso tsa tumelo. **Balumeli ba tlameha ho loana ntoa ea tumelo ha ba tobana le maemo a fapaneng, hape ba boloke tumelo ea bona le polelo ea eona maemong ohle. Ba se ke ba sheba lintho ka nama empa ba phehelle ka tumelo.**

Thomase: O ile a belaela ha ho thoe Morena Jesu o tsohile bafung, a batla ho mo bona pele (Johanne 20:24-30). Balumeli ba bang ha ba lumele hore Ntate Molimo a ka etsa mehlolo e itseng pele ba e bona, kapa ha ba lumele hore lits'ebetso tse ling tsa Ntate Molimo ke linnete pele li etsahala ho bona. **Molumeli o tlameha ho tsamaea ka tumelo e phethahetseng ho Ntate Molimo a se na lipelaelo. A lumele lentsoe la Ntate Molimo ka botlalo.**

Eli: Eli e ne e le moprista e moholo, empa ha a ka ba a khalemela bana ba hae ba baprista ha ba phela bophelo bo lits'ila empa ba fuoe mosebetsi oa Morena. Qetellong Ntate Molimo o ile a mo tlosa bopristeng le ba lelolo la hae (1Samuele 2:12-18, 27-36). Baetapele ba bang ha ba khalemele ba ka tlase ho bona, ha ba ba lokise ha ba fosa, ka hona, Ntate Molimo o tla ba ahlola hobane ha ba phethe boikarabello ba bona. **Moetapele o tlameha ho khalemela ba ka tlase ho eena ha ho hloka hloka, ba hloka khalemo e boima, a ba fe khalemo e boima, ba hloka e bobebe, a bafe e bobebe. A se ke a ts'aba ho sebelisa matla a a fuoeng ke Ntate Molimo.**

Bara ba Arone: Bara ba Arone ba ile ba bolaoa ke mollo oa Jehovah ha ba etsa mollo o sa lumelloang ke Ntate Molimo (Meetlo/Leveticus 10:1-4). Balumeli ba bang ba rata ho sebelletsa Ntate Molimo empa ba se na tsebo, e be ba iketsetsa kapa ba ithutela tsa bona feela tse sa lokang. **Molumeli o tlameha ho ruteha haholo litseleng le lentsoeng la Ntate Molimo, `me a sebelletse Ntate Molimo ka tsebo e nepahetseng. Ke boikarabello ba hae ho fumana tsebo.**

Gideon: Ntate Molimo o ile a mo sebelisa ho lokolla Iseraele lireng tsa eona, eaba ka morao ho mono o se a rata botlotlehi, o se a inkela holimo haholo empa e le Ntate Molimo ea mo phahamisitseng. Baetapele ba bang ba rata ho tlotleha maphelong a batho. Ka mantsoe a mang, ba hlompheue ka tsela e phahameng ho feta tekano, ba bang ho qeteloe ho rapeloa ka bona kapa ho rapeloa molimo oa bona, ba bang ba iketsa melimo ea batho (Baahloli 8:24-28). **Ha Ntate Molimo a sebelisa moetapele ka matla kapa a mo sebelisa ho tisa liphepho tse molemo maphelong a batho, a se ke a rata botlotlehi eaba o se a batla ho ts'oants'oa le Molimo. Ha a lule a ikokobelitse, `me a tsebe hore tsohle li etsoa ka mohau. Ba bang ba rata ho putsoa ka mosebetsi eohle eo ba e entseng kapa ba e etsang, joalo ka Gehazi**

le ba bang bibeleng. Morena Jesu o itse ha re entse mosebetsi, re se ke ra batla moputso hobane re entse seo re neng re hloka ho se etsa. Ba bang ba rata hore mesebetsi eohle ea bona e bonoe kapa e tsejoe hobane ba ipatla, Morena Jesu o ne a rapella batho lekunutung linako tse ling hobane o ne a sa tsekella setumo, empa o ne a khannoa ke lerato la Ntate Molimo. Ba bang ha ba itukise ho etsa seo Ntate Molimo a se batlang ho fihlella ba shoella lehoatateng joalo ka bana ba Iseraele (Moloko oa pele). Ha Ntate Molimo a u fa mosebetsi, itukise ka hohle hohle. Etsa bonnete ba hore ha u bala bibehe, u bala ka batho bana ba neng ba tsamaea le Ntate Molimo, u ithute ka bona u se ke be oa qetella u phetile liphoso tsa bona le uena.

Mona re tlo sheba batho ba ileng ba ba ka hara maemo a mabe ka ho fetisisa bibeleng le hore na ba ile baa ahlola joang. (Worst case scenarios)

Aborohama: Ntate Molimo o ile a mo bitsa a se na ngoana a le lilemo li 75 ha mofumahali oa hae a le 65. Ka matla a tumelo e bonahala ka pono, polelo ea molomo, ka mamello, ka boiphapanyo ha a iphanyetsa maemo asa thabising le thoriso Aborahama o ile a fumana ngoana ka tsela e mohlolo. Mona re ithuta ho lumela Ntate Molimo hara maemo a teteletsang ka ho ba le pono ea Ntate Molimo ka pela rona bosiu le mots'ehare. **Mona re ithuta hore Ka ho lula re bua seo Ntate Molimo a reng re sona ka nako tsohle. Ka ho iphanyetsa maemo a sa thabising ebe re shebana le seo Ntate Molimo a se buileng feela le ho lula re mo rorisa ka seo a reng re sona le Pele re se bona. Ebe joale re ba le mamello ho fihlela seo Ntate Molimo a se buileng se etsahalang. Ka nako ea mamello ha re topele empa re ema re thabile ntse re rorisa (Baheberu 6:12).**

David: Morena Davida le banna ba hae ba neng ba mo latela ba ile ba fumana bana le basali ba nkuoe le matlo a chesitsoe. Banna ba hae ba bahale ba neng bana le eena ba ile ba lla haholo ha ba fumana boemo bona ebile ba nahana ho bolaea Davida hobane ba ne ba beha molato holima hae. Empa Davida o ile a imatlafatsa moreneng 'me a sheba moo Ntate Molimo a mo nts'itseng teng a ananela le ho rorisa Ntate Molimo hara boemo bono. Ntate Molimo eaba o re a ee ntoeng a ilo lata tseo ba li nketsoeng 'me ba fumana batho bohle ba neng ba nkuoe ka khapo ea lira tsa bona. **Mona re ithuta hore ha rele mathateng, kapa re iphumana re lahlehetsoe kapa rele tsietsing, re seke ra lla eaba re lahla ts' epo. Empa re shebe morao hore na Ntate Molimo o re nts'itse hokae ebe joale re qala ho mo leboha le ho ananela tseo a li entseng Pele maphelong a rona nakong ea ho feta. Sena setla re beha boemong moo re khonang ho utloa tataiso ea ntate Molimo e re isang tlholong le ho re re fumane puselletso ea tse re lahlehetseng. Empa ha re ka lla, ra ikutloela bohloko, ra qosa Ntate Molimo kapa ra mmona ale molato, reka iphumana re shoelletse boemong bono resa fumana phunyelletso.**

Josefa: Ntate Molimo o ile a fa Josefa pono ea hore e tlo ba mobusi, empa a iphumana a rekisitsoe ke bana babo a rekiselitsoe Egepeti, a ba a iphumana a ile teronkong ka baka la ketselletso. Empa Josefa o ile a boloka tumelo le attitude e ntle ho Ntate Molimo 'me ka letsatsi a tloha teronkong, a etsoa tonakholo. **Mona re ithuta hore le ha re ka ba hara mathata, liketselletso le litsietsi re se ke ra fumana re qosa Ntate Molimo kapa re mo sheba hampe. Ka nako e nepahetseng, Ntate Molimo o tla fetola maemo molemong oa rona a re etsetse maemo ka boomo (create situations) a tlo re phahamisa.**

Mofumahali Estere: Israele e ne e tlo bolaoa 'me qeto e nkuoeng e tekenetsoe ke morena e le qeto e ke keng ea fetoloa ho hang. Empa ka matla a thapelo le boitimo boemo bono bo ile ba fetoloa molemong oa Iseraele. **Mona re ithuta hore ho sa tsotellehe na maemo a joang kapa na a mpefetse ha kae, ka matla a thapelo le boitimo e tsamaea le thoriso maemo a tla lula a fetoha molemong oa rona.**

Morena Johoshafat le Iseraele. Ka nako ena Iseraele ene e patetsoe ke lira tse kholo haholo tseo ka matla a nama ba kekeng ba hlola ntoa tlasa maemo a fe kapa a fe. Empa Ntate Molimo o ile a re ba ee Ntoeng ba behile barorisi ka Pele. 'Me ba ile ba hlola ntoa habobebe ka Baka la thoriso le paulosi le silas ba ile ba lokolloa teronkong ka mohlolo ka lebaka la thoriso. **Sena se re ruta hore na hosa tsotellehe na maemo a mabe ha kae. Re behe thoriso ho Ntate Molimo ka Pele eseng litletlebo le letsoalo 'me ka ketso ena Ntate Molimo o tla fetola tsohle molemong oa rona.**

Davida le Saule.

Saule o ile a fosa taelo ea Ntate Molimo ka ho se bolae liphoofolo ha ho ne ho itsoe a bolae tsohle mono ntoeng. Empa a hana ho ikokobetsa ka 'nete ha a bonts'oa molato oa hae, eaba ka lebaka leno Ntate Molimo o mo tlosa sereneng. Davida eena o ile a etsa sebe se seholo sa ho robala le mosali oa motho eaba o etsa hore monna eno a bolaoe ntoeng. Empa ka lebaka la ho robeha, ho ikokobetsa le ho baka, Ntate Molimo o ile a mots'oarela eaba ha a motlose setulong sa hae sa borena joalo ka Saul. Empa le ha hole joalo, Davida o ile a fumana litlamorao tse boima ka lebaka la ketso ena.

Mona re ithuta ho baleha mesebetsi ea nama le boikohomoso hobane Ntate Molimo ha a li rate hape lina le litlamorao tse mpe tse bohloko. Empa ha re ka ra iphumana re oele joalo ka Davida kapa Saule, re ikokobetse haholo pela Ntate Molimo hape re bake ele kannete. Sena seka etsa hore Ntate Molimo a re tsoarele le hore buselletsa.

Morena Manesa. Morena enoa e ne ele morena ea fosahetseng ka ho fetisisa bibeleng. One a bolaea, a loea, a rapela melimo ea bohata, a etsa le tsohle tseo Jehovah a li hloileng. O ile a qetella a ts'oeroe a tlosoa naheng ea hae. Ha a se a ts'oeroe, o ile a ikokobetsa haholo 'me a baka. Ntate Molimo o ile a utloa thapelo ea hae' me a musetsa naheng ea habo. **Sena se re ruta matla a boikokobetso le pako. Ha re ka ikokobetsa ele kannete ra baka mesebetsing ea rona e swabisang hosa tsotellehe na serele hole hakae le Ntate Molimo. O tla re ts'oarela, a re atametse pela hae' me a re buselletse tse re lahlehetseng.**

Jobo. O ile a hlalhoa ke mats'oenyeho le litsietsi tse ngata haholo. Empa ha akaba a etsa sebe ka ho qosa Ntate Molimo ka ho fosa. Qetellong o ile a folisoa ka hohle a ba a buselletsoa habeli ho feta ka moo a lahlehetsoeng ka teng.

Sena se re ruta hore le ha re ka feta hara mathata a mefuta futa, re se ke ra iphumana re qosa Ntate Molimo joale ka ha e ka ke eena sera. Re lule pela hae le haeba re sa utloisise na ho etsahalang. Re kope kutloisiso ka boikokobetso moo re se nang eona.

Daniel le Abednego, Shadraka le Meshak: Ba phonyohile sebopi sa mollo le lemena la li tau ka lebaka la ho ts'oarella tumelo ea bona ha ba shebane le lefu. **Le rona re ts'oarelle tumelo ea rona le bots'epehi ho Ntate Molimo ho sa tsotellehe na maemo a joang.**

TUMELO EA BOHARENG: Ha re tsamaea le Ntate Molimo. Ha a re bitsa kapa a refa mosebetsi o itseng ho monate ke thabo le nyakallo. Ha seno se phethahala seo ho itsoeng retla se etsa kapa re tla se fihlella ke thabo le nyakallo. Empa bohola ba mathata ke bohareng mona Pele re fihla phethahalang ea ts'episo. Re tlameha ho ba le tumelo e tiileng ha re le bohareng mono moo re sa utloisising. Mohlala ke Davida. Ntate Molimo o mo latile e le molisana, 'me a mo tlotsetsa Serena, empa kamora hore a bolae kholiata, o ile a qala ho baleha Saule, a tsamaea a iphetola lehlanya e ka lintho li mpefala ho feta. Qetellong ke moo a fumanang matlo a chele, bana le basali ba hapuoe. E ne e ka lintho tsohle li ntse li ba thoko le pono ea Ntate Molimo ka eena. Empa o ile a boloka tumelo, le polelo le thoriso le boits'oaro (attitude e leng botle pela Ntate Molimo ha a sa utloisise tsena tse etsahalang kaofela). Le rona ha re le bohareng ba morero oa Ntate Molimo, re so bone ts'episo e phethahala, re tiee, re boloke tumelo le thoriso le attitude e ntle pela Ntate Molimo re kholisehile hore eena o na le matla a ho phethahatsa seo a re ts'episitseng sona.

LITHUTO TSA BA BITSELITSOENG LINEHONG TSE HLANO TSA MORENA JESU (Baefese 4:11-17)

Balumeli ba bitselitsoeng lineong tse hlano tsa Morena Jesu (Baapostola, Baporofeta, Baevangeli, Balisa le Baruti) ba tlameha ho tseba le ho etsa tsena tse latelang.

- 1) Ntate Molimo o u file pitso eno hore u koetlisetse balumeli ts'ebelletso ea Molimo. Ka mantsoe a mang, balumeli ba hole tumelong ea bona, ba tsamaee ka botlalo ba bora le borali ba bona, 'me ba phethe karolo ea bona ea bosebelletsi 'Musong oa Ntate Molimo. Ba se ke ba khukhumetsa balumeli, ba ba hatella, ba bona e le lisebelisoa tseo ba ka jang ka tsona. Morena Jesu o u file boemo bono hore u bone hore balumeli ba phetha morero oa Ntate Molimo ka maphelo a bona. Ba be le pelo ea bosebelletsi, e seng ea ho sebeletsoa.
- 2) Ba lule ba koetla ka bo bona, ba eketsa tsebo ea bona ea lentsoe le litsela tsa Ntate Molimo.
- 3) Ba tsoselletse lineo le lipitso le litalente tse fapaneng tsa balumeli, 'me ba ba fe monyetla oa ho sebelletsa ka tsona.
- 4) Ba etse batho barutuo a ba Morena Jesu, e seng ba bona. Ka mantsoe a mang, ba sebelletse ho hlalisa sets'oants'o sa Morena Jesu maphelong a balumeli ba ba etelletseng pele (Baroma 8:29). Morena Jesu ha a re re etse batho barutuo, o ne a re re ba etse barutuo a ba hae.
- 5) Ba bonahatse litholoana tsa moea maphelong a bona (Bagalata 5:22). Ba be bonolo bathong bohle. Ba se ke ba pheha likhang ka Bibebe.
- 6) Ba khone ho sebelletsa ka lentsoe le ka Moea O Halalelang. Ka mantsoe a mang, ba qhaqhohle lentsoe ka nepo hape ba khone ho bonahatsa Moea O Halalelang le lineo tsa hae.

TSELA EA HO RUTA EVANGELI: Lentsoe "evangeli" ka bo lona le bolela "molaetsa o molemo (good news)". Ke molaetsa o molemo oa pholoho ea Ntate Molimo ka Morena Jesu Krete. Ka mantsoe a mang, ha se molaetsa o mobe, o ts'osang, o tlišang tsuo. Evangeli ho ea lahlehileng, ke hore ka Jesu Krete, le eena a ka fumana poelano le Ntate Molimo, libe tsohle tsa hae li hlatsuo maling a Morena Jesu ho sa tsotellehe hore na li mpe ha kae (2Bakorinte 5:17-21). Evangeli ho ea kulang, ke hore Morena Jesu o ile a nka mafu a hae, hore eena a tle a foliosoe hape a phele bophelo ka ntle ho bokuli (1Peterose 2:24). Evangeli ho ea futsanehileng ke hore Morena Jesu Krete o ila a futsaneha hore a tle a rue (2Bakorinte 8:9). Evangeli ho bohle ho sa tsotellehe ho re na ba tobane le maemo a fe bophelong ke hore Morena Jesu o tšile ho tla u nts'a boemong bono bo seng monate hore u tle u phele boemong bo phahameng ba tlhola, matla le khanya ea Ntate Molimo. Morena Jesu o tšile ho u fa bophelo ka botlalo ba bona (Johanne 10:10). Ke eona evangeli ea 'nete ena. **Evangeli ke hore bohle ba lumetseng ho Morena Jesu ba entsoe bara ba Molimo joalo ka eena, 'me tsohle tsa hae ke tsa bona. Ba fuoe botlalo bohle ba Molimo le tsohle tsa hae joalo ka eena.**

- 1) **Ha re ruta, re tlameha ho senolela le ho bonts'a batho seo Krete a ba entseng hape a ba etselitseng sona.** Mosebetsi o so o felile. Bibebe e re Ntate Molimo o re file tsohle tseo re li hlokanang ho phela bophelo ba bomolimo (2 Peterose 1:3-5). U se ke oa ruta joalo ka ha eka batho ke hona ba tlamehang ho etsa ho hong hore ba khole kapa ba fumane seo Ntate Molimo a ba fileng sona ka mohau oa hae. Empa u ba bonts'e lefa la bona ho Krete, 'me u ba rute ho

tsamaea ka tumelo hobane ke hona ba tla khona ho phela boemong ba bojalefa ba bona ha ba tsamaea ka tumelo. Mohlala: U se ke oa re, “molumeli o tlameha ho rapela ka thata hore a tle a fuoe matla holima satane”. Empa u hlakise hore molumeli ke ea hlotseng satane ho tloha ha a tsoaloa la bobeli, empa joale o tlameha ho tsamaea ka tumelo hore a bonahatse tlhoho ea hae holima satane. Matla re a fuoe ka mohau. ‘Me ha re rapele hobane re shebane kapa re batla ho hlola satane, empa re rapela hobane re rata Ntate Molimo hape re batla ho ba le nako le eena.

- 2) **Ruta molumeli seo Ntate Molimo a mo entseng sona le seo a mo fileng sona.** Mohlala: u se ke oa re, “molumeli o tlameha ho ba le lerato. Bonts`a balumeli hore ba se ntse ba e na le lerato ho tloha ha ba tsoaloa labobeli, empa ba tlameha ho tsamaea ka lona. Ruta molumeli ho tsamaea ka tumelo hobane semelo sa bomolimo se moeeng oa hae se nang le litholoana tsa moea se bonahatsoa ka tumelo. U se ke oa re, “molumeli o tlameha ho ba le tumelo”, empa bonts`a molumeli ho re o se a ntse a na le tumelo ho tloha tsoalong ea hae ea bobeli, empa joale o tlameha ho sebitsana le ho holisa tumelo ea hae. Molumeli a se ke a fumana a senya nako a ntse a batlana le seo a nang le sona ka hare ho eena.
- 3) **Ruta molumeli ho tsamaea le Ntate Molimo.** E se ke ea hlaha joalo ka ha eka ho tsamaea le Ntate Molimo ke ntho e thata e hole, e khethetsoeng balumeli ba itseng lefats`eng. Empa bonts`a molumeli hore ke tokelo ea hae ho tsamaea le Ntate Molimo joalo ka mora kapa morali. A utloe hore le eena o na le boikarabello ba ho hola tumelong ea hae le bophelong ba hae le Ntate Molimo. A se ke a nahana hore moruti oa hae ke moemeli oa hae. Molumeli a tlatsoe Moea O Halalelang, a khone ho rapela ka lipuo, hape a rutoe tsela ea ho rapela, a tle a khone ho etsa seo a se rutiloeng le ha a le mong. A rutoe ho re na a ka khona ho utloa Ntate Molimo joang, a tle a khone ho ikutloela Ntate Molimo bo`ngoeng ba hae. A khone ho phetha morero oa Ntate Molimo ka bophelo ba hae.
- 4) **Molumeli o tlameha ho rutoa ho ipalla Bibe le ho e beha ts`ebetsong, a tle a khone ho ikemela bongoeng ba hae.** A hole ho tloha boeeng ho ea fihla boreng le boraleng. A rutoe ho tsamaea ka tumelo, a tle a khone ho tsamaea le Ntate Molimo ka katleho bo`ngoeng ba hae. A utloisise hore Ntate Molimo ke Ntate oa hae joalo ka ha feela e le Ntate oa Morena Jesu le Ntate oa moruti oa hae. Molumeli a elelloe Ntate Molimo ho feta satane. A bone li nnete tsa `muso oa Ntate Molimo ho feta liphiri tsa `muso oa satane. Ntate Molimo a phahamisoe, satane eena a theholoe kelellong ea molumeli.

THUTO EA EA RUTANG E TLAMEHA HO KENYA LINTLHA TSE LATELANG. (1) Bonts`a batho `nete eo u rutang ka eona ho tsoa Bibeleng ka litemana, hore na ke seo Ntate Molimo a se fileng kereke, kapa seo a batlang hore ba se etse, kapa eng kapa eng eo u rutang ka eona. E ts`ehetse ka mangolo. **(2) Bonts`a batho hore na ba ka phela joang boemong bono.** Ho se ke ha e ba le motho le ea mong ea ipotsang hore na joale o tla etsa joang hore a fihlele boemo bono. Mohlala: ha u re balumeli ba phele khalalelo, u ba rute hore na ba ka its`etleha joang holim`a mohau oa Ntate Molimo hore ba tsamaee ka semelo sa bona sa khalalelo. Ha u re batho ba rapele, u ba rute tsela ea ho rapela. Ha u re ba tsamaee ka tumelo, u ba rute hore na ba tsamaea joang ka tumelo, u ba etsetse mehlala, u be u etse liponts`o tsa Moea O Halalelang tse pakang thuto ea hau. Ha u ruta ka ho busa le borena ba rona, hlakisa tsela ea ho busa u be u e bonahatse. U hlakise hore re busa ka tumelo ea rona, e phethahatsoa ka mantsoe le likhato, `me ho molemo ha u ka li bonahatsa. **(3) Thuto ea hau e se ke ea tsoa ba mametseng (Ka mantsoe a mang, e se ke ea tsamaea le tsuo).** Mohlala: oa re batho ba u mametseng ke baetsalibe ba se nang thuso kapa oa bitsa batho lintho tse soabisang. U se ke oa halefela ba u mametseng. Le ha u khalema, u khaleme ka lerato, ka hlompho eohle. **(4) Thuto ea hau e kenyelletse ho hlalosa tsela ea ho etsa lintho hore molumeli a khone ho iketsetsa bongoeng.** E se ke ea ba ho buoa ka tsona feela hoo molumeli a tla ipotsa hore na o tla etsa joang ha a sa a le mong. **(5) Thuto ea hau e amane le batho le maphelo a bona.** E se ke ea eba ntho eo batho ba sitoang ho ikamahanya le eona. U be u etse mehlala e bonts`ang hore na thuto ea hao e ka tlisa molemo joang mathateng kapa maemong ao batho ba tobanang le ona. Mohlala: u ka etsa mohlala ka moo motho a ka sebelisang tumelo ea hae ho fumana mosebetsi kapa seo a se hlokang. U be u etse mohlala oa tataiso ea hore na a ka etsa eng thutong eona eno ea hao. Mohlala: U ka joetsa ba u mametseng hore ba ngole lebitso la mosebetsi oo ba o batlang fats`e, eaba ba qala ho leboha Ntate Molimo hore ba o fumane. U etse mehlala eo batho ba ka e behang ts`ebetsong ha bobebe. Kapa mohlomong molumeli a ka ngola lebitso la ngoana oa hae ea tsoileng tseleng kapa a ts`oara senepe sa hae, `me a qalella ho mo bitsa seo a batlang ho se bona ho eena. Har`a thuto ea hau, ha ho na le `nete e bohlokoa eo u batlang hore bamameli ba hao ba etse bo`nete ba hore ba e ts`oarella, u re ba e bue ka mora hao, empa ba ipue hore ba phela `neteng eno. Ba se ke ba re ke hona ba tla e phela, empa ba se ba e phela. Mohlala: Ha u ruta ka `nete ea hore re ruile ka hohle hohle ho krete, ha phutheho e u sala morao ka polelo ea tumelo holima `nete ena, ba tla re “ke morui e moholo ho Krete”, e seng, “ke tla ruoa ho Krete. Li`nete tsohle tsa lentsoe la Ntate Molimo li se li phethahetse ho Krete. **(6) Boholo ba lithuto tsa hau e be haholo tse matlafatsang, tse ts`elisang le tse khothatsang. E be tse senolelang momameli oa hau bojalefa ba hae joal`o ka mokreste le hore na o phela joang ka bona.** Li etse hore ba u mametseng ba elelloe seo baleng sona le seo ba nang le sona ho Krete, Seo Ntate Molimo a leng sona ho bona, le likamano tsa bona le eena, le seo lelapa la bo bona le leng sona le ts`ebetso ea lelapa la bo bona (e leng `muso oa Ntate Molimo). Lithuto **tsa Morena Jesu li ne li senola lintlha tseno boholo. O ne a ruta ka Molimo, a ruta ka `muso oa Molimo le tsamaiso ea ona hape a ruta ka bora ba Molimo ebile a bo bonahatsa. Bibe le e re re latele mohlala oa hae.** Thuto ea hau e se ke ea lula e khalema. Balumeli ba hola ka pele ha u ba

bonts'a seo Ntate Molimo a seng a se entse. Mohlala ke oa Liketso 26:15-19. Thomo ea Morena Jesu ka Paolosi e ne e le ho ea lokolla balichaba lefifing le ho ba tsebisa ka bojalefa ba bona ho Krete. Hona ke thomo e fuoeng kereke ka kakaretso. Ho lokolla batho lefifing le ho ba senolela bojalefa ba bona ho Krete Jesu. Bojalefa ke tsohle tseo Ntate Molimo a re fileng tsona ho Krete ka mohau oa hae. Ho kenyelletsang, likamano le kutloano le eena, matla holim'a lefats'e le satane le `muso oohle oa hae, bophelo ba bomolimo, katleho, leruo, bophelo ba thabo, khotso le khanya ea Molimo joalo joalo. **(7) Qetellong ea thuto ea hao u fe batho monyetla oa ho etsa boitlamo ba hore ba tla beha `nete eno ts'ebetsong eo ba e rutiloeng hobane Bible e re re be baetsi ba lentsoe e seng bautloi ba lona feela. (8) Re susumetse batho ba sa pholosoang ka matla a maholo hore ba amohele Morena Jesu. Re ba bonts'e kotsi ea bophelo ba sebe, empa re ba hlakisetse hore seo Ntate Molimo a se batlang ke hore ba boelane le Eena, `me re rapele le bona ha ba khetha ho amohela Morena Jesu. `Me ha ba se ba amohetse Morena Jesu, re ba rute ka bophelo bona bo bocha ho Krete ka botlalo ba bona.**

TSELA EA HO HABA KEREKE E MATLA

TSELA EA HO TLISA BATHO KEREKENG: Ho tlisa batho kerekeng ho bonolo haholo. Ke hore feela u bonts'e hore tlhoko eo batho ba nang le eona ba ka fumana karabo ea eona kerekeng. Batho ba tlas'a khatello, `me ba se ntse ba batla moo ba ka balehelang teng. Litsela tsa ho etsa sena li ngata haholo.

- 1) E kaba ho sebetsa ka lineo le liponts'o tsa Moea O Halalelang. Ha hona ntho e hohelang batho ho feta lineo le liponts'o tsa Moea O Halalelang. Mohlomong ho folisa ba kulang, kapa ho lokolla ba hatelletsoeng, kapa thero kapa thuto e matla e hlabollang batho. Ena ke tsela ea pele eo Ntate Molimo a rerileng hore re hape batho ka eona. Re ka bonahatsa lineo le liponts'o tse na seterateng, sealemoeeng, ka television, ka internet, ka likoranta, ka ho ts'oara litsoselletso kapa litsela tse ling tse ngata tse fapaneng. Batho ba tla lula ba tla ha ho na le ponahatso ea Moea O Halalelang joalo feela ka ha ba ne ba tla ho Morena Jesu.
- 2) E kaba ka ho fana ka se molemo ho tsoa kerekeng eno. Mohlala: lijo, liaparo, tlihabollo le lintho tse ling tse tlisang molemo bophelong ba motho.
- 3) Re tlameha ho bitsa batho ka tumelo. Re ba bitse ka tumelo thapelong le lipolelong tsa rona tsa tumelo. Ha re buoa re re batho ba tle kerekeng kapa ts'ebelletsong ea rona, Moea O Halalelang o tla phetha mantsoe a rona a tumelo `me a susumetse batho hore ba tle. Re ts'oana le Ntate Molimo, `me ha re sebetsa ka tumelo, re fumana litholoana tse ts'oanang le tseo a tla li fumana ha a etsa mosebetsi o itseng (Pesalema 2:8).

TSELA EA HO BOLOKA BATHO KEREKENG: Ho tlisa batho kerekeng ho bonolo haholo, empa ho boloka batho kerekeng hase ntho e bonolo haholo. Ho tlameha ho ba le lintlha tse latelang kerekeng hore batho ba lule ba se ke ba tsamaea.

- 1) **Kamohelo e mofuthu le mofuthu oa kereke ka kakaretso. Empa ntho e kholo ka ho fetisisa ke mofuthu oa moetapele oa kereke eno.** Batho ba qalang ho tla ba utloe ba amohetsoe ha monate hape ba hlomphehile haholo. Ka hona, ba ka sehloohong ho amohela ba bang, bo li usher joalo joalo, ba koetlisoe haholo ho ba batho ba bonolo ba buisang batho hantle, hape ba bonye (smile) haholo le batho. Le ha phutheho e kaba bonolo, ha feela moruti a le bohale, batho ba tla tsamaea. Ho ntse ho ts'oana, le ha phutheho e se mofuthu, ha moruti a le mofuthu, ba bangata ba tla tiisetse, `me ba lule ka lebaka la moruti.
- 2) **Thuto e fanang ka bophelo le tlihabollo:** Thuto ea moruti e tlameha ho fana ka bophelo le tlihabollo ho ba mo mametseng. E se ke ea ba thuto ea tsuo kapa ea khalemo ka mehla. Thuto ea tsuo le khalemo ea kamehla e balehisa batho kerekeng.
- 3) **Ponahatso ea Moea O Halalelang le lineo tsa hae:** Boteng ba Moea O Halalelang le lineo tsa hae bo tlameha ho bonahatsoa khafetsa ka kerekeng, `me le batho ba pake matla a Ntate Molimo maphelong a bona.
- 4) **Batho ba koetlisoe:** Balumeli ba tlameha ho feta koetlisong ea ho sebelletsa hore e be barutuo ba `nete. Batho ba koetlileng ba tsitsa haholo kerekeng. Taba ea koetliso e tlameha ho nkeloa holimo haholo likerekeng hore balumeli bohle ba utloe hore ba ea e hloka. Haeba e mong le e mong ea sebelletsang a sa koetla, boemo (standard) ba kereke bo tla theoha, `me e tla ba kereke e fokolang (weak church).
- 5) **Batho ba nke karolo, ba khone ho beha lineo tsa bona ts'ebetsong:** Batho ba fuoe monyetla oa ho nka karolo tsoelopeleng ea kereke le linthong tsa eona tse fapaneng, `me mesebetsi eo ba e entseng e khabane e ananeloe. Mohlala: `minong oa kereke, ushering, bohlabolli, borapelli (intercession), bohloekisi le mekhahlelong e fapaneng e fumanehang ka kerekeng. Le ha ho tlo rekoa ho hong, kapa ho tlo etsoa ho hong, batho ba fuoe monyetla oa ho kenya letsoho tabeng eno. Batho ha ba sa nke karolo ba ka nyahama kapa base ke ba hola ho ea ka ts'oanelo.
- 6) **Batho ba kenngoe lihlopheng tse nyane:** Batho ba ka tlosoa kerekeng ke lintho tse ngata, empa se ba notlellang ka har'a kereke ke lihlopha tse 'nyane. Ho kenya motho ka hara sehlopha se se 'nyane ho etsa hore a bonahale `me a ikutloe a ena le boikarabello. Ha kereke e le sehlopha se le seng se seholo feela, batho ba bangata ba ka khona ho ipata

ka hara sehlopha seno, `me ebe ha ba nke karolo, `me le ha ba etsoa ha hona motho ea tla elelloa ha bonolo. Lihlopha tse 'nyane e kaba ka tsela ea li home cell/home fellowship, lihlopha tsa tsotello (care group), kapa tsela e fe kapa e fe feela eo moetapele oa kereke a tla e sebelisa)

- 7) **Kereke e se ke ea phahamisa matemona le ts'ebetso ea ona.** Likereke tse phahamisang matemona le lits'ebetso tsa ona li ea ferekana. Li hloka khotso le bo`ngoe, `me batho ba teng ha ba lule ho tsona hape ha ba hole hantle moeeng. Kereke e tlameha ho bona le ho phahamisa Morena Jesu, `me matemona a lelekoe bathong, empa a se ke a phahamisoa ka ho lula ho buuo a ka ona kapa a lumelloa ho iponahatsa joalo joalo.
- 8) **Batho ba se ke ba khetholloa ka hore nab a na le eng kapa ha ba na eng ka kerekeng.** Moetapele a se ke a khetholla batho ba ruileng ho ba hlohang, empa a ba ts'oare ka lerato kaofela.

LINTHO TSE BOHLOKOA BOTSITSONG BA KEREKE (1) Thapelo e matla: Kereke e tlameha ho ba le bophelo bo matla bo sa khaotseng ba thapelo: Thapelo ke eona mokokotlo oa molumeli le oa kereke ka kakaretso. Ka makhethlo kereke e kopane, e rapele ka tiio, ka linako tse ling e kopane ka thapelo le boitimo. **(2) Thuto e matla e fanang ka bophelo le tlhabollo. (3) Mofutho le bonolo ba molisa oa kereke eno bo tla etsa hore batho ba tsitse kapele kerekeng.** A khone ho atameloa ke batho le ho buiseha. **(4) Ponahatso ea Moea O Halalelang le lineo tsa hae le mapaki a batho. (5) Koetliso e ts'oanang eo litho tsohle tsa kereke eno li tlamehang ho feta ho eona.** Litho tse koetlisitsoeng li tsitsa kapele moreneng le kerekeng. Ho molemo hoba le koetliso eo e leng standard sa kereke kaofela. **(6) Mofutho le setsoalle se seholo kerekeng. (7) `Mino:** `Mino o bohlokoa haholo kerekeng. Ntho e `ngoe le e `ngoe e fuoa sefutho ke `mino ho sa tsotellehe hore na ke ho kae. Batho ba entsoe ka tsela ea hore ba natefeloe ke `mino. `Mino o matla kerekeng o etsa kereke e sefutho, e nang le cheseho. Kereke e tlameha ho bona hore e phahamisa boemo ba eona ba `mino haholo. E se ke ea ts'aba kapa ea kikitlala ho reka liletsa tse bohlokoa le ha li ka tsa ba turu, hobane `mino o matla o phahamisa boemo ba kereke haholo. `Mino o binoang kerekeng o tsamaee le thuto eo kereke e e lumelang. Ba se ke ba bina lipina tse tlang mehopolo ea lefu le ho hlora, empa ba bine lipina tse phelang, tsa thabo le khotso le katamelano le Ntate Molimo hobane ke sona seo Morena Jesu a re tselitseng sona. **(8) Mokhabiso le botle ka kerekeng:** Batho ba khahloa ke mokhabiso le botle le makhetho ka tlholeho. Ka hona, kereke e tlameha ho shebahala hantle ka ntle le ka hare. Botle ka kerekeng bo fana ka maikutlo a phomolo le ho photholoha bathong ba teng kerekeng. Khathe bobbe le bohlasoa ka kerekeng bo fana ka maikutlo a ho se phuthulohe le letsoalo joalo joalo. **(9) Thepa e phahameng hape e shebehang ka maemo (quality):** kereke e tlameha ho ba le thepa e khotsofatsang bakereki haholo ha ba fane hore thepa e rekoe. Thepa e tlase ka maemo kerekeng kapa e bohlasoa e fana ka maikutlo a hore kereke eno e tlase ka maemo. Ha ke bolele hore kereke e ikimetse ka lintho tse turu, empa ke re e reke lintho tse shebahalang. **(10) Moteno o hlomphehang:** Moteno o ka kerekeng o hlomphehe ka hohle hohle. **(11) Le lintho tse ling tseo Moea O Halalelang a ka li senolang. Ha kea ngola lintho tsohle mona. Empa tsena tseo ke li ngotseng li tla khona ho phahamisa boemo ba kereke.** **KHOLISO EA KEREKE:** Balumeli ba tlameha ho rutoa ho tlisa batho kerekeng beke le beke. Ho tloha mono, kereke e ts'oare litsoselletso tse tla hapa batho, kapa e hape batho ka litsela tse fapaneng joalo ka bo khaso, le litsela tse ling tseo re buileng ka tsona qalong. Kekere e holang hantle e tlameha ho etsa tsena tse latelang: **(1) E tlameha ho hapa ba lahlehileng. (2) E koetlise ba hapuoeng (3) E lokolle ba koetlileng hore ba phethe karolo ea bona ea bosebelletsi. Haeba ba bang ba bitselitsoe ho lisa liphutheho, ba lokolloe ho etsa joalo, haeba ba bang ba bitseliso e ho hlabolla, ba fuoe Sebaka sa ho sebelletsa, ba ts'ehetsang ka lichelete le lintho tsa nama le bona ba etse joalo, e mong le e mong a phethe karolo ea hae ka botlalo. Lineo tse hlano tsa Morena Jesu li tlameha ho sebetsa ka kerekeng. Baevangeli ba lokolloe ho etsa mosebetsi oa bona le ba bang ba bitselitsoeng lineo tse hlano tsa Morena Jesu ba sebelletse ka lineo tsa bona ka ho fapana.**

TSELA EA HO HLOMPHA MOTHO EO NTATE MOLIMO A MO ROMILENG HO UENA (How to honor your man of God)

Boholo ba lintho tseo Ntate Molimo a li etsang bophelong ba motho e mong kapa batho ba bang, o lula a sebelisa motho e mong. Ntate Molimo o roma motho e mong mothong kapa bathong ba itseng ho ba tsebisa Eena, kapa ho ba thusa hore ba tsamaee boemong boo a batlang hore batho bano ba tsamaee ho bona le Eena. Ntate Molimo ha a itlhahisi har'a batho ka Bo Eena, e be o etsa mosebetsi a batlang ho o etsa bathong bano, empa o roma motho, ebe o iponahatsa ka motho eno. Ka mantsoe a mang, o tlotha motho eno. Tlolo ke ponahatso ea boteng ba Ntate Molimo ka motho. Joale, haeba Ntate Molimo a romme motho ho rona, re tlameha re mo hlomphe, `me re elelloe hore motho eno o ronngoe ke Ntate Molimo ho rona. Ha Ntate Molimo a batla ho u phahamisa kapa ho u etsetsa mohlolo o mong o molemo bophelong ba hau, o roma motho eo a Mo tlositseng ho uena. **Boholo ba nako, o tla fumana hore motho ea romiloeng ho uena ke moruti/molisa oa hau ea o hlokomelang moeeng. Empa Ntate Molimo a ka tlisa motho ho uena leha e se molisa oa phutheho eo u e kenang. Motho feela eo Ntate Molimo a tla mo sebelisa ho tlisa se molemo ho uena, le ho u tlosa boemong boo u leng ho bona ba moea a u isa boemong bo phahametseng boo u neng u le ho bona. `Me phahamiso ea moea e tla tlisa ea nama.**

Joale re tlo sheba ka mangolo hore na re tlameha ho ts'oara ba ronngoeng ho rona joang. (1) U tlameha ho leboha Ntate Molimo ka eena, u mo hlomphe, u mo rate, u ananele seo Ntate Molimo a se entseng ka ho tliša motho eno. **(2)** U tlameha ho ikokobelletsa eena, 'me u mamele seo a se buoang ha a senola morero oa Ntate Molimo ka uena, hape u se lumele (2Liketsahalo 20:20). (Moea O Halalelang o tla o tiisetša se buuoang ke motho eno haeba se tsoa ho Eena), (Mona hare buoa ka ho ikokobelletsa eena hare buoe ka ho ikokobetsa ka lebaka la letsoalo kapa hobane o le tlas'a khatello kapa ele boikokobetso bo sa lokang ba ho etsa motho molingoana oa hau. Empa re buoa ka boikokobetso bo tlišoang ke lerato ho motho ea batlang hore bophelo ba hau bo ee pele (Baheberu 13:17) U se ke oa mo seba kapa oa mo buoa hampe leha u ka bona liphoso tse itseng ho eena, u hopole hore na o u fihlilitse ho kae bophelong. Le eena a kaba le mefokolo joalo ka uena hobane le eena e ntse e le motho. Ntate Molimo o oa halefa ha re buoa ba re thusitseng hampe (Pesalema 105:15). **(3)** U tlameha ho mo hlokomela ka lintho tsa nama, e leng lintho tse sebelisoang bophelong ba nama le lisebelisoa tse ling tse bohlokoa tsa nama tseo o ka khonang ho fana ka tsona (Bakhalata 6:6) (1Bakorinte 9:7-12). U tsebe hore ha u fa ea romiloeng ho uena, u fa Ntate Molimo ea mo romileng ka sebele (Matheu 10:40-42). U se ke oa fa motho eno lintho tse nyatsehang kapa tseo u ka li lahlang. Empa u mo fe lintho tse bohlokoa, joalo ka ha le eena a tlišitse tse bohlokoa ho uena. Lintho tsa moea li bohlokoa bo ke keng ba methoa ka chelete kapa lintho tsa nama (materials). **(4)** Etsa bonnete ba hore o phela ha monate ka boiketlo, 'me ha a hloke letho, hore le eena a tle a khone ho shebana le uena ho sena letho le mo sitisang. U mo ts'oare joalo ka ea romiloeng ke Ntate Molimo ho uena.

MELEMO EA HO HLOMPHA EA ROMILOENG HO UENA KE E FE? (1) U tla atleha bophelong ba hau ba moea le ba nama (2Liketsahalo 20:20). **(2)** U tla tsamaea tlas'a tlhohonolofatso ea Ntate Molimo linthong tsohle. Mohlala ke oa 'me enoa ea neng a lula a fa moporofeta boroko ha a feta ka tsela eno, 'me ka ho etsa joalo, o ile a qetella a fumana ngoana leha a ne a sitoa ho ba le eena (2 Marena 4:8-18). **(3)** U tla lula u buleloa mamati a mohlolo bophelong ba hau, hape ho etsahala lintho tse mohlolo tse tlišang tlhohonolofatso ea Ntate Molimo ho uena ka litsela tse tla u makatsa. Mohlala ke oa mohlolohali eo Elia a ileng a rongoa ho eena. 'Me ka ho fa ea ronngoeng ho eena ka boitelo, o ile a lokolla matla a Ntate Molimo a ileng a tliša mohlolo oa hore phoofo ea hae le oli li se ke tsa fela ho fihlela komello e felile Iseraele (1Marena 17:7-17). O mong ke oa 'me ea ileng a fumana ngoana ha a ne a sa khone ho ba le eena ka ho etsetša mohlanka oa Molimo molemo oa ho mo etsetša kamore ea hae hore a nne a phomole ho eona ha a tsamaea ka tsela eno e fetang pela ha 'me eno (2Marena 4:8-18). **(4)** Ha u fa motho ea romiloeng ho uena ke Ntate Molimo. U fa Ntate Molimo ka sebele ea mo romileng, 'me ha u fa Ntate Molimo, Ntate Molimo o tla u atisetša haholo ho feta ka moo u faneng ka teng (Bafilipi 4:18le 19). **(5)** Ka kakaretso, u tla tsamaea tlas'a tlhohonolofatso ea Ntate Molimo ka tsela e phahameng. **(6)** Haeba motho a tlišitse melemo e meholo bophelong ba hau ba moea, Ntate Molimo o lebelletse hore le uena o tlise melemo e meholo bophelong ba hae ka bokhoni ba hau. U fane ka lintho tse bohlokoa ho eena kapa ts'ebelletsong ea hae. U elelloe hore seo a se tlišitseng bophelong ba hau se ke ke sa methoa ka chelete kapa lintho tsa lefats'e lena, ka hona o se ke oa nna oa lekanya hore na u se u fane ha kae ho eena (1Bakorinte 9:11). **U ithute ho leboha ka ho fana ka ho hong ho bohlokoa ha u fumana se molemo ho tsoa ho eena khafetsa. Hona ke tsela e tiileng ea ho tsamaea ka tlhohonolofatso 'musong oa Ntate Molimo.**

LERABA LA SATANE: Satane o batla hore u se ke oa jala tsa nama ho ea romiloeng ho uena hobane o oa tseba hore ho jala bophelong ba ea romiloeng ho uena ho tliša tlhohonolofatso e fetisisang bophelong ba molumeli, ke ka hona a ratang ho susumetsa batho hore ba lumele mashano a hore baruti ba rata chelete joalo joalo. Ke bibe e reng re hlokomele baruti ba rona le ba re thusang ka tsa moea. Ha se maikutlo a motho, empa ke a Ntate Molimo ka sebele.

HO BULA KOPANO EA LE HAE (HOME CELL)

Joalo ka ha oso o qetile buka ena, o koetlile haholo moeeng. Joale re o khothalletsa ho bula kopano ea lehae moo ho tlo rutoa ka Ntate Molimo haholo tsona lithuto tse ka bukeng ena, hape ho rapeloe joalo joalo. Sena se tla o thusa ho beha seo o ithutileng sona tsèbetsong le lineo tsa hau le lineo tsa ba tla phutheha le lona.

Melemo ea home cell ke ena e latelang. (1) Home celleng batho baa pholoso. Joale litho tsa home cell li khothalletsoe ho mema ba bang. **(2)** Home celleng batho baa koetlisoa, joale home cell e thusa ka ho etsa barutuo. Hape ba beha lineo tsa bona ts'hebetsong. **(3)** Home celleng batho baa khothatsana le ho tsèlisana ha ba hlahetsoe ke mathata hape baa thusana habobebe hobane ha ba bangata joalo ka kerekeng. **(4)** Home celleng batho baa rapellana **(5)** Home celleng batho baa hlokomelana hore ba seke ba khutlela morao, 'me ba oeleng ba saloa morao.

O QALA HOME CELL JOANG: (1) Rapela o kope tataiso ea Moea O Halalelang le thuso ea hae. Ebe o rapela ka lipuo hape o oa porofeta o bitsa batho sebaka seno, 'me o phatlallatse hore ba tliše home celleng ka lebitso la Morena Jesu hape o lebohe Ntate Molimo ka sebaka sa ho kenyetša home cell. Thapelo ena e be leqhophe ho fihlella o utloa hore o fihletse phunyelletso semoeeng **(2)** Nka khato ea tumelo o lo mema batho ba motseng. O ka kena ntlo le ntlo oa botsa na ba kulang ba teng 'me oa ba rapella ka moo o koetlisitsoeng ka teng bukeng ena. Kapa oa ba porofeta haholo o sebelisa neo ea tsebo. Lineo li tla etsa hore batho ba thahaselle hotla. O ba joetse hore o tlo tsòara thapelo ea motseng, ka nako ena o qobe ho bua ka kereke. O ka sebelisa tsela e fe

kapa e fe eo Moea O Halalelang a ka o fang eona. Mohlomong oa fana ka lijo motseng kapa ka thuso e ngoe feela. **(3)** Beha letsatsi la ho kopana hape kopano ea lona e seke ea nka nako e telele haholo. Mohlomong hora kapa hora le halofo kapa hora tse peli. Hape e seke ea kena hangata bekeng. Mohlomong e ka kena ha ng'oe kapa ha beli bekeng. Home cell ha e tlose kereke. Ka hona e qobe ho kena letsatsi le pela Sontaha haholo joalo ka bo Moqebelo esere batho ba utloa se ba sa hloke hotla kerekeng Sontaha. O leke ho e kenya hara beke empa haeba Moqebelo ele ona oo batho ba khonang hotla home celleng le teng ho lokile ha feela ba ea kerekeng Sontaha.

HOME CELL E TSAMAI SOA JOANG (1) Le ka qala ka thapelo e khutsòane ea ho bula mosebetsi le ho amohela baeti ha monate. **(2)** Eaba e ba nako ea thoriso le khumamelo. Ho kaba bohlokoa ho reka liletsa kapa ho sebelisa liletsa. **(3)** Ho be le nako ea thuto. Empa mona moetapele ha a rere joalo ka kerekeng moo a buang a le mong. O tlameha ho ruta empa hobe le nako ea lipotso hape hobe le lipuisano (discussion) le litlatsetso. Boholo ho rutoa lithuto tse ka bukeng ena kapa tseo moruti oa hau a li rutileng ka sontaha **(4)** Ho be le nako ea thapelo lea tsèbetso ea lineo tsa Moea O Halalelang empa ese ka moetapele feela. Home celleng ke moo batho ba koetlisang lineo tsa bona. Le ba bang ba behe lineo tsèbetsong. **(5)** Ho be le nako ea ho fa ba sokang ba amohela Morena Jesu monyetla oa ho mo amohela. **(6)** Memela batho ba homecell ea hau kerekeng ka Sontaha hape o ba khothalletse ho latela leqephe la kereke la social media le ho mamela sealemoea sa kereke haeba ena le sealemoea. Litho tsa home cell li thusane ho ea kerekeng ka bo ho palamisana joalo joalo. **(7)** Etsa lintho tse ling tseo o ka li senoleloang molemong oa ho matlafatsa home cell empa li seke tsa thulana la pono ea kereke eo o e kenang. **(8)** Fana ka tlaleho ea palo ea batho ba neng ba tlile le thuto e entsoeng le liketso tsa Moea O Halalelang tseo o ka ratang ho li tlaleha. Ho tlameha ho ba le nomoro eo ho fanoang ka tlaleho ho eona boetapeleng ba kereke. **(9)** Home cell e be le pono ea o hola le ho ata, `me ha eba kholo haholo e ikatise ka ho ikarolo `me ebe home cell tse peli.

KE HANTLE HA U QETILE BUKA ENA, JOALE FUMANA BUKA EA INTERNATIONAL TRAINING CENTRE LE LI DVD TSA EONA. BUKA ENA E U FA MOTHEO O NEPAHETSENG, SONSHIP LIFE INTERNATIONAL TRAINING CENTRE E U KOETLISE TSA BOETAPELE. O E BALE O MAMETSE LE LI THUTO TSA AUDIO TSA EONA.